



Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով
ձևափոխել կամ օգտագործել առկա նյութը ստեղծելու համար նորը

You are free to:

Share — copy and redistribute the material in any medium or format

Adapt — remix, transform, and build upon the material

19617

19618

19619

91.99-82

9-36

891.99

26

Գարուն

ԳՐԱԿԱՆ-ԳԵՂԱՐԻԵՍՏԱԿԱՆ

ԱԼՄԱՆԱԽ

Գ Ի Ր Ք Ե Ր Կ Ր Ո Ր Դ



11932

Էլեքտրաշարժ տպարան Ե. Ալետիքեանի, Մոսկւա.

1911

2090




1768
40

Типографія Е. Аветикова
Москва, Б. Лубянка, Варсонофьевскій пер., домъ Бауэръ.

Բ Ո Վ Ա Ն Գ Ա Կ Ո Ւ Թ Ի Ի Ն

	ԵՐԵՍ.
ՇԻՐՎԱՆՋԱԴԷ. Արմենուհի	9
Ա. ԻՍԱՀԱԿԵԱՆ. Անգիր և անյայտ	103
" Հեծկլտող քամին	104
" Գիշերը պատեց	105
" Անյաղթ խալիֆան	106
ՓԱՅԼԱԿ. Թովանք	109
ԱՐՍԷՆ - ԵՐԿԱԹ. Չեմ կրնար	111
Յ. ՔԻԻՖԷՃԵԱՆ. Իջնիկի լիժը	112
Ս. ԲԱՐԻԵԱՆ. Կրակն այս գիշեր	124
Ո. ԱՆՈՓԵԱՆ. Berceuse	125
ԶԻՖԹԷ ՍԱՐԱՑ. Սպեղանին	127
Յ. ՅԱԿՈՐԵԱՆ. Աշխատանքի երգը	136
Դ. ԴԵՄԻՐՉԵԱՆ. Գիշեր է	138
Մ. ՄԱՆՈՒԷԼԵԱՆ. Հէքիաթ	139
Հ. ՆԱԶԱՐԵԱՆ. Սև երգեր	149
" Սև երգեր	150
Ռ. ՍԵՒԱԿ. Ինչպէս երբեմն	152
Մ. ՊԱՐՍԱՄԵԱՆ. Ոսկիին ծարաւը	153

Ա. ՏԻԳՐԱՆԵԱՆ.	Նորից մի կարօտ	161
"	Հոգիս վայելեց	162
Հ. ՄԱԶՄԱՆԵԱՆ.	Տրտմութեան խոհերից	163
Մ. ՄԱՆՈՒԷԼԵԱՆ.	Աշնան ծաղիկը	164
Ա. ԾԱՏՈՒՐԵԱՆ.	Գեղեցկութեան երգերից	175
"	Սիրավէպ	177
"	Անցիր, այ աղջիկ	178
"	Երազն է կանչում	179
Կ. ՄԻՔԱՅԷԼԵԱՆ.	Վարդանանց պատերազմը	181
Վ. ՏԷՐԵԱՆ.	Հատուած	190
"	Ոսկէ հէքիաթ՝ գրքից	194
Կ. ՄԻՔԱՅԷԼԵԱՆ.	Առաջին վիշտ	197
ՅԱՅՏԱՐԱՐՈՒԹԻՒՆՆԵՐ	205



ՃԻՐՎԱՆԶԱԴԷ

ԱՐՄԵՆՈՒՀԻ

ԳՐԱՄԱ 4 ԳՈՐԾՈՂՈՒԹԵԱՄԱ.

ԱՐՄԵՆՈՒՀԻ

Դրամա 4 արարւածով.

ԳՈՐԾՈՂ ԱՆՉԻՆՔ.

- ՍԱՄՍՈՆ ԱԼԱԴԵԱՆ, գործի մարդ, 37 տարեկան.
ԱՐՄԵՆՈՒՀԻ, նրա ամուսինը, 27 տարեկան.
ՀՄԱՅԵԱԿ ՎԱՌԼԱՄԵԱՆ, ճարտարապետ, 38 տարեկան.
ՍԻՐԱՆՈՅՇ, Հմայեակի ամուսինը, 29 տարեկան.
ՍՏԵՓԱՆ ԳՈՒՐԳԷՆԵԱՆ, բժիշկ, Սաճսոնի բարեկամ-ըն-
կերը և փեսան, 38 տարեկան.
ՎԻՐԳԻՆԷ, Ստեփանի ամուսինը, 28 տարեկան.
ԵՂԻՍԱԲԷԹ, Սաճսոնի և Վիրգինէի մայրը, 57 տարեկան.
ԿՈՆՍՏԱՆԴԻՆ ԲԱՐԱԹԵԱՆ, Արմենուհու հայրը, պաշտօ-
նաթող գնդապետ, 55 տարեկան.
ՍՈՂՈՄ ՍՈՂՈՄԵԱՆ, Եղիսաբէթի եղբայրը, նախկին
ուսուցիչ, 48 տարեկան.

ՄԵԼԱՆԻԱ, Ալադեանների աղախներ.

ԳԱՐԵԳԻՆ, Ալադեանների ծառան.

ԴԱՅԵԱԿ, անխօս կին.

ԵՐԿՈՒ ԹԱՓԱՌԱԿԱՆ ԵՐԱԺԻՇՏՆԵՐ:

Գործողութիւնը կատարուած է Ալադեանների ամարանոցում
190... թ.

ԱՐԱՐԻԱԾ ԱՌԱՋԻՆ.

Տեսարանը ներկայացնում է Ալադեանների ամարանոցը: Մի գեղեցիկ պարտէզ: Աջ*) կողմը ամարանոցի լայն և երկայն պատշգամբն է երեք-չորս աստիճան սանդուղքով դէպի պարտէզ: Խորքը երկամեայ ցանկապատ է, որի մէջտեղում, բեմի կենտրոնի ուղղութեամբ մի դռնակ: Չախ կողմը ներկայացնում է վարդի թփերի և ուրիշ ծաղիկների շարք, որ նշանակում է, թէ պարտէզը շարունակում է: Թփերի մէջտեղում մի փոքրիկ շատրւան: Բեմի խորքում, աջ անկիւնում մի համակ է կապած, որի վրայ դրած է մի մեծ գոյնզգոյն ասւեայ վերմակ, որպիսին գործ են ածում կառքի համար, մի անկազմ գիրք և մի քանի լրագրներ: Խորքի ցանկապատի յետևը փողոց է, յետոյ կանաչազարդ դաշտ, այնուհետև անտառ, անտառազարդ լեռներ, ժայռեր, ձորեր, հեռու ձիւնապատ դազաթներ:

Բեմի կենտրոնում, մի քիչ դէպի ձախ, դրած է ծաշի սեղան, ծածկւած, ձիւնափայլ սփռոցով: Սեղանի մի անկիւնում դրած են միմեանց վրայ ափսէներ:

ՏԵՍԻՒ, I.

Մելանիա և Գարեգին.

ԳԱՐԵԳԻՆ (վարագոյրը բարձրանալիս պատշգամբից իջնում է ձեռքին ափսէներ, դանակ պատառաքաղներ և այլն: Սկսում է դանդաղօրէն

*) «Աջ ու ձախ», ինչպէս «առաջին-երկրորդ» ընդունել հանդիսականների կողմից: Հեղ.

դարսել սեղանի վրայ: Շատ մաքուր հագնւած երիտասարդ է, սափ-
րած երեսով և բաւականին կիրթ ձևերով): **Մելանիա, ես սեղանը
կամաց-կամաց պատրաստում եմ:**

ՄԵԼԱՆԻԱ. (կանգնած է բեմի ծախ անկիւնում և նայում է հեռու, դէպի
ծախ: Թեթև ամառային մաքուր հագուստով երիտասարդ կին է, գլու-
խը բաց: Առանց Գարեգնի կողմը նայելու): **Լաւ ես անում:**

Մի փոքր ժամանակ լռութիւն:

ԳԱՐԵԳԻՆ (իր գործով զբաղւած): **Այդ ո՞ւր ես նայում:**

ՄԵԼԱՆԻԱ. Ժայռերին:

ԳԱՐԵԳԻՆ (առանց իր գործն ընդհատելու): **Գրագ կգամ, որ սա-
րի այժն էլի այնտեղ է:**

ՄԵԼԱՆԻԱ (երեսը դարձնելով Գարեգնին): **Մի համարձակելիք ան-
քաղաքավարի խօսել երիտասարդ տիկնոջ մասին: Ես նրան
շատ եմ սիրում: (Երեսը դարձնալ դէպի ծախ է դարձնում):**

ԳԱՐԵԳԻՆ. Բան ասաց. «շատ եմ սիրում»): **Կարծես, այնպիսի
տիկնոջ կարելի է չսիրել: Բայց էլի կասեմ, որ սարի
այժ է, ամեն օր բարձրանում է քերձերի գլուխը: (Սկսում
է հանդարտ երգել): «Եար ուղեցի, չգտայ,
«Սէրը կերաւ իմ սիրտ...»**

ՄԵԼԱՆԻԱ. Ահա նա, սպիտակ շալը գլխին, երկայն փայտը
ձեռքում, բարձրանում է...

ԳԱՐԵԳԻՆ. «Գիշերները բուն չունիմ,
«Բայդուշի պէս բուն չունիմ:
«Ե՛կ, նազելի, նազելի...»

ՄԵԼԱՆԻԱ. Նա մի քար վերցրեց, գլորեց ցած, նայում է դէ-
պի ծորը:

ԳԱՐԵԳԻՆ. «Ճամբին ծլած ծաղկի պէս,
«Թառամում ես մեն-մենակ...»

ՄԵԼԱՆԻԱ. Գնաց, հեռացաւ, չի երևում: (Մօտենում է սեղանին
և սկսում է Գարեգնին օգնել):

ԳԱՐԵԳԻՆ. «Դու ձայն սուր ճամբորդին,
«Նա չլսեց, հեռացաւ...»

ՄԵԼԱՆԻԱ. Զարմանալի կնիկ է, ինչ ասեմ. սիրում է թա-
փառել անտառներում ու ձորերում: Չի էլ վախենում:

ԳԱՐԵԳԻՆ. Եւ միշտ մենակ, տխուր, մտքերի մէջ թաղւած:

ՄԵԼԱՆԻԱ. Ա՛հ, երանի գիտենայի ինչ ցաւ ունի: Մի՞թէ հա-
րուստներն էլ անբաղդ են:

ԳԱՐԵԳԻՆ. «Ի՞նչ եմ անում ոսկէ սաշտր, որի մէջ արիւն
պիտի թքեմ»: Մելանիա, մեր տիկինը բաղդաւոր չէ, ես
գիտեմ: Է՛հ, հիմա պառաւ ագռաւը կգայ: Ես գլուխս
փախցրի: (Քայլերն ուղղում է դէպի աջ, որ սանդուղքով բարձրանայ:
Եղիսաբէթին տեսնելով, կանգ է առնում):

ՏԵՍԻՆԷ II.

Ն ո յ ն ք և Ե ղ ի ս ա բ է թ .

ԵՂԻՍԱԲԷԹ (զալիս է պատշգամբից ձեռքում մի համարակալ, մատիտ
և մի թերթ թուղթ. նիհար, ջոր-ջոր, խորշոմած, գռեհիկ դէմքով կին է:
Հագած է սև շրջագգեստ, գլխին կապած է սև մետաքսեայ թաշկինակ,
որի տակից դուրս են ընկած ալմխառը գիսակները: Քայլածքն ու
ձևերը գոռոզ են): Ի՞նչ էք շտապում սեղանը պատրաստել:
Ուրիշ գործ չունի՞ք: (Գարեգնին): Այն ո՞վ է պարոնիդ մօս:

ԳԱՐԵԳԻՆ. Չեմ ճանաչում, նոր մարդ է:

ԵՂԻՍԱԲԷԹ. Մի աման էլ աւելացրու, կարելի է Սամսոնը
նրան ճաշի պահի:

ԳԱՐԵԳԻՆ. Աչքի՛ս վրայ: (Գնում է պատշգամքով, իսկոյն յետ է զա-
լիս մի մարդու համար սերւիզ ձեռքում, դնում է սեղանի վրայ և
հեռանում է պատշգամքով):

ԵՂԻՍԱԲԷԹ (նստում է ծառի սեղանի քով և սկսում է համարակալի վրայ հաշիւ անել, նայելով Թերթին): **Տիկինդ տանն է:**

ՄԵԼԱՆԻԱ. Ո՛չ: (Մտնելով և համակին, վերմակը վերցնում է և սկսում է ծալել):

ԵՂԻՍԱԲԷԹ. Այգուձն էլ չի երևում:

ՄԵԼԱՆԻԱ. Այնտեղ էր, դուրս եկաւ, անցաւ գետակի միւս ափը:

ԵՂԻՍԱԲԷԹ. Մենակ:

ՄԵԼԱՆԻԱ. Այո:

ԵՂԻՍԱԲԷԹ. Ինչո՞ւ հետը չգնացիր:

ՄԵԼԱՆԻԱ. Տիկինը բարկանում է, երբ ես հետևում եմ իրան: Ասում է, ես երեխայ չեմ, որ դայեակ ունենամ:

ԵՂԻՍԱԲԷԹ (գրգուելով): **Բարկանում է—բարկանում: Շատ քաջն է: Իսկ եթէ մի բան պատահի, պատասխանատուն ես եմ նրա մարդու մօտ: Գնա, տուն կանչիր. ասա՛ ճաշի ժամանակ է:**

ՄԵԼԱՆԻԱ. Իսկոյն: (Վերմակը, գիրքը և լրագրները տանում է պատշգամբով և անմիջապէս վերադառնում է, գլխին մի շալ: Դուրս է գալիս ձախ կողմի Թփերի միջով):

ԵՂԻՍԱԲԷԹ (ինքն իրան): **Ես էլ կարող եմ ուրիշ սկեսուրների պէս պարծենալ, որ հարս ունիմ: Աչքս լոյս: (Բարկացած, համարակալի հատիկները խառնում է և հաշիւը նորից սկսում):**
ԹԻ՛ւ:

ՏԵՍԻԼ III.

Եղիսաբէթ և Վիրգինէ.

ՎԻՐԳԻՆԷ (երևում է պատշգամբի վրայ այն միջոցին, երբ Եղիսաբէթը պատւիրում է Մելանիային Արմենուհուն կանչելու, այնպէս որ լսում

է նրա վերջին խօսքերը: Շքեղ, բայց ոչ ախորժելի ծաշակով հագնւած կին է, դէմքով նման իր մօրը: Խօսելու միջոցին դէմքը միշտ արտայայտում է նախանձ ու ջարուծիւն): **Չեմ հասկանում—ինչու ես ուղարկում նրա յետեւից:** (Իջնում է սանդուղքով): **Կարծեմ, ինքը պէտք է, առանց ասելու, իմանայ իր պարտականութիւնը:** (Նստում է մօր մօտ):

ԵՂԻՍԱԲԷԹ. Դէ որ չի իմանում, ինչ անեմ: (Միշտ զբաղւած է հաշիւներով: Մերթ ընդ մերթ մատիտով ինչ որ նշանակում է Թերթի վրայ):

ՎԻՐԳԻՆԷ. Իհարկէ, այնքան ազատութիւն էք տւել, որ երես է առել:

ԵՂԻՍԱԲԷԹ. Էէ, Վիրգինիա, կինն իր ծնողների տանը պիտի կրթւած լինի՝ թէ չէ պսակելուց յետոյ դժւար է նրան փոխել: Արմենուհու հայրն ասում է. «Ես իմ աղջկան ազատ եմ մեծացրել»: Լաւ, տեսնենք վերջն ուր պիտի տանի նրան իր ազատութիւնը:

ՎԻՐԳԻՆԷ. Նա գիմնագիայումն էլ այդպէս էր, դասընկերս է եղել, միշտ ինքնագլուխ, գոռոզ, ինքնահաւան: Ես աչքով աչք չունէի նրան տեսնելու: Ինքն էլ գիտէր և ատում էր ինձ: Քանի քանի անգամ երեսիս ինձ անւանել է շար, նախանձոտ, ինտրիգան: Այժմ էլ նա ինձ արհամարհում է: Օ՛, կտեսնէք, նա ձեր գլխին մի փորձանք կը բերի:

ԵՂԻՍԱԲԷԹ (հաշիւը շփոթելով): Էհ, հաշիւներս խառնեցիր:

ՎԻՐԳԻՆԷ (յափշտակւած, չի լսում իր մօր խօսքերը): Տասն օր է ամուսնուս հետ այստեղ հիւր եմ, մի անգամ էլ հետս կարգին չի նստել ու զրոյց արել: Գիտեմ, նա իր մտքումն ինձ արժանի չի համարում: Անկիրթ ենք, իհարկէ, նրա նման դաշնամուր նւագել չգիտենք և ոչ էլ պօլկօվնիկի աղջիկ ենք: Ա՛հ, քիչ է մնում նախանձից սիրտս տրաքի, երբ

մտածում եմ, թէ ով է ուտում հօրս թողած ու եղբորս
վաստակած փողերը: Մայրի՛կ, լաւ պահիր նրա կապը, լաւ
պահիր, թէ չէ մի օր կփոշմանես: (Վեր է կենում):

ԵՂԻՍԱԲԷԹ. Լաւ, քիչ գրգռիր ինձ նրա դէմ, առանց այդ
էլ չեմ սիրում: (Վեր է կենում, համարակալի հատիկները խառնե-
լով): Ա՛հ, չթողեցիր խոհարարի հաշիւները ստուգել: (Տա-
լիս է համարակալն ու թուղթը Վերգինէին): Տա՛ր իմ սենեակը,
ճաշից յետոյ կվերջացնեմ: Կարծեմ, այս ամիս շատ չի
գողացել:

ՎԻՐԳԻՆԷ. Ես իմն ասացի, մնացեալը դու գիտես: (Համարա-
կալն ու թուղթն առնելով գնում է պատշգամբով):

ՏԵՍԻՆ IV.

Եղիսաբէթ, Կոնստանդին և Ստեփան.

ԿՈՆՍՏԱՆԴԻՆ (զալիս է խորքի ցանկապատի դռնակով: Ամրակազմ,
առողջ դէմքով տղամարդ է: Երեսը սափրած է: Հագած է մուգ գոյնի
վեստօն—պանթալօն, սպիտակ ժիլէ և ոռւս պաշտօնաթող գնդապետի
գդակ): Այ՛ո, բարեկամս, Արմենուհին կատարելապէս իր
մայրն է: Հանդուցեալն էլ փտանգ ասած բանը չգիտէր:
Բարև, խնամի: (Բարևում է զինուորական ձևով, առանց գդակը
բարձրացնելու):

ՍՏԵՓԱՆ (զալիս է Կոնստանդինի հետ ցանկապատի դռնակով: Կարծ
խուզած միրուքով, խոհուն, համակրելի դէմքով, շատ պարզ ձևերով և
պարզ հագնւած տղամարդ է): Մայրի՛կ, բարև:

ԵՂԻՍԱԲԷԹ (ուրաքանչիւրին): Բարև, բարև:

ԿՈՆՍՏԱՆԴԻՆ (շարունակելով իր խօսքերը): Մեր գիվիդիայում
օչ մի սպայի կին չէր կարողանում նրա հետ մըցել մի
հեծնելում: Նա միշտ ընտրում էր ամենակատաղի ձին և

վարուժ էր նրան ինչպէս առաջնակարգ կաւալերիտա: Ա՛խ,
ընտիր կին էր նա:

ՍՏԵՓԱՆ. Մայրիկ, մենք քաղցած ենք: (Նայում է իր ժամա-
ցոյցին):

ԵՂԻՍԱԲԷԹ. Քանի՞ ժամն է:

ՍՏԵՓԱՆ. Երեքին կէս է մնում:

ԵՂԻՍԱԲԷԹ. Ուրեմն, կէս ժամ էլ պիտի սպասել:

ԿՈՆՍՏԱՆԴԻՆ (Ստեփանին): Զգիտէ՞ք որ աշխարհը տակն ու-

վրայ լինի, երեքից առաջ մեզ ճաշ չեն տայ այս տանը:

ԵՂԻՍԱԲԷԹ. Այդ որդուս կարգադրութիւնն է:

ՍՏԵՓԱՆ. Սամսոնը ուղում է գերմանացի ծեւանալ—եշտա-
պահ:

ԳԱՐԵԳԻՆ (երևում է պատշգամբի վրայ): Պարոն Վառլամեանը
ուղում է տեսնել պարոն բժշկին:

ՍՏԵՓԱՆ. Աա, չմայեա՛կր: չրաւիրիր նրան իմ սենեակը:

ԳԱՐԵԳԻՆ. Նա պարոնի սենեակումն է:

ՍՏԵՓԱՆ. Իսկոյն:

ԿՈՆՍՏԱՆԴԻՆ. չմայեակն ո՛վ է:

ՍՏԵՓԱՆ. Իմ մօտիկ բարեկամներից մէկը: Ես նրան ծանօ-
թացրի Սամսոնի հետ: Եկել է այցելութեան: Օ՛ճ, նա հի-
անալի մարդ է և տաղանդաւոր հարտարապետ: Ապրում
է միշտ մայրաքաղաքում, բայց երկու ամսով եկել է այս-
տեղ հանդատանալու և իր հայրենիքի բնութեամբ սքան-
չանալու: (Բարձրանում է սանդուղքով և հեռանում):

1768
891
10

ՏԵՍԻՍ, V.

Կոնստանդին և Եղիսաբէթ.

ԵՂԻՍԱԲԷԹ. Խնամի՛, մի քիչ առաջ դուք իմ փեսայի մօտ ա-



ասցիք, թէ ձեր աղջիկն իր մօրն է նման: Միթէ հան-
գուցեալն էլ իմ հարսի պէս է եղել:

ԿՈՆՍՏԱՆԴԻՆ (ծխախոտ է վառում): Այո, ի՞նչ էք կամենում ա-
սել դրանով: (Նստում է սեղանից հեռու դանւող աթոռներից մէկի
վրայ և ոտը ոտի վրայ ձգում):

ԵՂԻՍԱԲԷԹ. Այն եմ ուզում ասել, պատուելի խնամի, որ,
վերջապէս, ժամանակ է ձեր աղջկան բան հասկացնելու:

ԿՈՆՍՏԱՆԴԻՆ (անփոյթ, ծխախոտի ծուխը գլխից վեր բաց թողնելով):
Իմ աղջիկը անհասկացող մէկը չէ, որ նրան բան հասկա-
ցնենք դուք և ես:

ԵՂԻՍԱԲԷԹ. Ո՛վ է ասում, բայց նրա արածն էլ խելօքութիւն
չէ: Նա դեռ չգիտէ, որ բամբասանքն օձ է, չի իմանում
անմեղին է կծում թէ մեղաւորին:

ԿՈՆՍՏԱՆԴԻՆ. Յետո՞յ:

ԵՂԻՍԱԲԷԹ. Ինչո՞ւ է նա ամեն օր մեն-մենակ թափառում
անտառներում, դաշտերում կամ ժայռերի վրայ:

ԿՈՆՍՏԱՆԴԻՆ. Ինչո՞ւ է թափառում: Որովհետև ամարիանո-
ցումն է, նա չորս պատերի մէջ նստելու համար չի եկել
այս գեղեցիկ վայրերը:

ԵՂԻՍԱԲԷԹ. Դուք չէ՞ք վախենում:

ԿՈՆՍՏԱՆԴԻՆ. Ինչի՞ց:

ԵՂԻՍԱԲԷԹ. Ո՛վ գիտէ, հազար ու մի տեսակ մարդ կայ:

ԿՈՆՍՏԱՆԴԻՆ (հանգիստ): Իմ աղջկան ոչ ոք չի համարձակ-
ւիլ մի խօսք անգամ ասել:

ԵՂԻՍԱԲԷԹ (հեզնաբար): Այո, կվախենան. կասեն հայրը
գնդապետ է, մայրը իշխանական ցեղից:

ԿՈՆՍՏԱՆԴԻՆ (հեզնութեամբ): Տիկի՛ն, դուք շատ էք սիրում Ար-
մենուհու ծնողների տիտղոսները չիշել, այդ ի՞նչ է նշա-
նակում: Զլինի թէ մեզ արժանի չէք համարում Ձերդ բուր-
ժուական գերազանցութեանը:

- ԵՂԻՍԱԲԷԹ. Ահա այգպէս էք խօսում ծիշտ, որ ձեր աղջիկը
կարծում է, թէ ոչ մի պակասութիւն չունի:
- ԿՈՆՍՏԱՆԴԻՆ. Կկամենայի իմանալ, թէ ինչ պակասութիւն էք
տեսել Արմենուհու մէջ:
- ԵՂԻՍԱԲԷԹ. Նա չգիտէ իրանից մեծերին յարգել:
- ԿՈՆՍՏԱՆԴԻՆ. Մեծերին յարգելն իմ աղջիկն օրօրացից է սո-
վորել, եթէ, իհարկէ, մեծերն էլ գիտեն նրան յարգել:
Յետոյ:
- ԵՂԻՍԱԲԷԹ. Գոռոզ է:
- ԿՈՆՍՏԱՆԴԻՆ. Ո՛չ, խնամի. հպարտ է գոռոզների վերաբեր-
մամբ: Շարունակեցէք:
- ԵՂԻՍԱԲԷԹ. Ինքնահաւան է:
- ԿՈՆՍՏԱՆԴԻՆ. Դեռ երէկ ձեր փեսան, Ստեփանը պախարա-
կում էր նրա անսահման համեստութիւնը:
- ԵՂԻՍԱԲԷԹ. Տնտեսութեամբ չի հետաքրքրւում:
- ԿՈՆՍՏԱՆԴԻՆ. Ալազեանի կինը կարիք չունի խոհանոց մտնելու:
Ուրի՞շ:
- ԵՂԻՍԱԲԷԹ. Նա ինձ չի հնազանդւում: Իմ աղգականներին
չի սիրում:
- ԿՈՆՍՏԱՆԴԻՆ. Ս կեսուրների իշխանութեան դարն անցել է: Գալով
ձեր աղգականներին, մեր մէջ ասած, սիրելու պտուղներ
չեն: (Վեր է կենում): Էհ, տիկին, դուք չգիտէք վարւել
ձեր հարսի հետ: Ես տասն անգամ ասել եմ, որ Արմե-
նուհին այն կանանցից չէ, որոնց ընկճում են խստութեան
և սպառնալիքների միջոցով: Նա ունի քնքոյշ սիրտ, բայց
ամուր կամք, ինչպէս իր հանգուցեալ մայրն էր: Նրան
միայն սիրով և փաղաքշանքով կարելի է գրաւել: Այս լաւ
իմացէք: (Մի երկու քայլ է անում դէպի բեմի խորքը):
- ԵՂԻՍԱԲԷԹ (արհամարհանքով): Իհարկէ, ոսկու և արծաթի
մէջ է մեծացել:

ԿՈՆՍՏԱՆԴԻՆ (կանգ առնելով): Տիկին, քիչ գողոզացէք ձեր ոսկի
ու արծաթով: Եթէ իմ աղջիկը համաժայնւեց այս տունը
մտնել, չկարծէք, թէ ձեր հարստութեամբ յափշ-
տակւեց: Արմենուհին ձեր ասած կանանցից չէ: Ո՛չ, ոչ
ոչ:

ՏԵՍԻՆՆԻ, VI.

Նոյնք և Մելանիա.

ՄԵԼԱՆԻԱ (գալիս է ձախ կողմից): Տիկին, ես նրան ոչ մի տեղ
չգտայ:

ԵՂԻՍԱԲԷԹ (կատաղելով): Ա՛յ, տեսնում էք. տանը հիւրեր,
իսկ տանտիկնոջը փնտրում են սարերում, ձորերում ու
չեն գտնում: Մի օր նա իր գլուխը կշարդի, կտեսնէք:
(Գնում է պատշգամբով):

ՏԵՍԻՆՆԻ, VII.

Կոնստանդին և Մելանիա.

ՄԵԼԱՆԻԱ (նայելով Եղիսաբէթի յետևից երկիւղով: Ցածր ձայնով): Ես
տեսայ երիտասարդ տիկնոջը: Գետակի ափում նստած,
բարեր էր գցում ջրի մէջ:

ԿՈՆՍՏԱՆԴԻՆ. Հապա ինչո՞ւ ասացիք այդ պառաւին, թէ չը-
գտար:

ՄԵԼԱՆԻԱ. Երիտասարդ տիկինն այնպէս պատւիրեց: Նա
բարկացաւ, երբ ասացի, թէ սկեսուրն է ինձ ուղարկել
իրան տուն կանչելու: Ահա գալիս է ինքը:

ՆՈՂԵՐ և ԱՐՄԵՆՈՒՅԻ.

ԱՐՄԵՆՈՒՅԻ (զալիս է ծախ կողմից: Սիրուն, համակրելի, համարձակ դէմքով, գեղեցիկ կազմաձևով կին է, բաց-շագանակագոյն թանձր մազերով, հազած է թեթև ամարային շրջազգեստ, դեղնագոյն կօշիկներ: Գլխին զգած է մի սպիտակ շալ, ձեռքում բռնած է մի մեծ փունջ վայրի ծաղիկներից և մի բարակ, սև, երկայն ծիւղաւոր ձեռնափայտ—Ալպենս-շուօկ): **Հայրիկ, բարև, այսօր ես քեզ չեմ տեսել:** (Համբուրում է Կոնստանդինի հետ):

ԿՈՆՍՏԱՆԴԻՆ. Այդ ի՞նչ լաւ փունջ ես կազմել:

ԱՐՄԵՆՈՒՅԻ. Հիանալի է, այնպէս չէ՞: Բարձր տեղերում եմ ժողովել այս ծաղիկները: Շատ նուրբ հոտ ունին: **Հապա, տես:** (Փունջը մօտեցնում է Կոնստանդինի դէմքին): **Զգո՛ւմ ես: Մելանիա, խնդրեմ բերէք մի ծաղկաման:**

ՄԵԼԱՆԻԱ. Իսկոյն: (Շտապով գնում է աջ կողմով և անմիջապէս վերադառնում է առանց շալի, ձեռքում մի ծաղկաման):

ԱՐՄԵՆՈՒՅԻ (փունջը պահելով, ձեռնափայտը լինում է աթոռներից մէկին և զալիս է առաջ): **Հայրիկ, կարծես դու տխուր ես և մի քիչ էլ յուզւած: Ի՞նչ է պատահել:**

ԿՈՆՍՏԱՆԴԻՆ. Սկեսուրդ արիւնս պղտորեց:

ԱՐՄԵՆՈՒՅԻ. Դարձեա՛լ: Ա՛հ, այդ անտանելի է, վերջապէս: (Մելանիային): **Դրէ՛ք ծաղկամանը սեղանի վրայ:** (Փունջը տեղաւորում է ծաղկամանի մէջ): **Այսպէս, տես, հայրիկ, ինչպէս գեղեցկացնում է սեղանը:** (Շալը գլխից վերցնելով, տալիս է Մելանիային): **Երեխան տա՛նն է:**

ՄԵԼԱՆԻԱ. Ոչ: Դայեակը նրան դուրս տարաւ: (Շալն առնելով, գնում է պատշգամբով):

Արմենուհի և Կոնստանդին.

ԱՐՄԵՆՈՒՅԻ. Ի՞նչ էր ասում սկեսուրս, հայրիկ:

ԿՈՆՍՏԱՆԴԻՆ. Էհ, չարժէ ուշադրութիւն դարձնել: Մէկ ա-
կանջով լսեցի, միւսով բաց թողի:ԱՐՄԵՆՈՒՅԻ. Այո՛, չարժէ, իհարկէ. բայց, դժբաղդաբար,
այդ կինն իմ կեանքում մեծ դեր է խաղում: Անշուշտ,
նա գանգատում էր իմ դէմ: Անհնազանդ եմ, մեծերիս
չեմ յարգում, ամբողջ օրը կամ նւագում եմ ու կարգում
կամ դբօսնում: Օհ, միշտ միւսնոյն երդը՝ անփոփոխ, ձան-
ձրալի: (Նստում է):

ԿՈՆՍՏԱՆԴԻՆ. Չար է այդ կինը, Արմենուհի, չար է:

ԱՐՄԵՆՈՒՅԻ. Ոչ, հայրիկ չար չէ, այլ բռնակալ: Նա կար-
ծում է, որ, լինելով իմ ամուսնու մայրը, իմ գլխի տէրն
է: Նա մի տեսակ սուրբ պարտականութիւն է համարում
ինձ կրթել: Եւ ի՞նչպէս: Փափագում է, որ ես, առաւօտը
զարթնելով, ձեռներս կրծքիս դրած, սպասեմ նրա հրա-
մաններին, ինչպէս ինքն է արել մի ժամանակ իր սկեսրի
առաջ: Այս չէ միայն: Նա խառնում է իմ և Սամսոնի
յարաբերութիւնների մէջ, ծգտում է իշխել իմ մտքի, զղա-
ցումների և ճաշակի վրայ: Ահա այս մէկն էս տանել չեմ
կարողանում, և նա կատաղում է: Նայրիկ, սկզբից և եթ
մենք միմեանց չենք սիրել: (Վեր է կենում):

ԿՈՆՍՏԱՆԴԻՆ. Պատճառը:

ԱՐՄԵՆՈՒՅԻ. Պատճառը պարզ է: Այդ կինը վճռած է եղել
իր որդուն ամուսնացնել մի ուրիշի հետ: Ո՛վ է—հետա-
բրբրական չէ, բայց իր ճաշակի մէկն է: Սամսոնը գերա-
դասել է ինձ: Եւ ես այս տունն եմ մտել արդէն իմ դէմ

ունենալով որոշ թշնամութիւն: Աւելացրու և այն, որ
Վիրգինէն, Սամսոնի քոյրը, ինձ ատուժ է դեռ գիմնա-
գիայից սկսած:

ԿՈՆՍՏԱՆԴԻՆ. Նրան ինչ ես արել, որ ատուժ է:

ԱՐՄԵՆՈՒՅԻ. Ոչինչ, հայրիկ, հաւատա: Միայն հետը վարւել
չեմ կարողանում:

ԿՈՆՍՏԱՆԴԻՆ. Պէտք է կարողանաս վարւել մի կերպ, ի՞նչ
արած:

ԱՐՄԵՆՈՒՅԻ. Ախ, հայրիկ, հեշտ է այդ ասել, բայց ի՞նչպէս:
Դու գիտես, որ ես զգում եմ բամբասանքից: Իսկ Վիր-
գինէն միայն նրանով է շնչում և ապրում: Դեռ գիմնա-
գիայում նա սիրում էր ամենքին չարախօսել, նոյնիսկ մեր
ընկերուհիներին: Ոչ, հայրիկ, ես չգիտեմ ինչ-
պէս նրա հետ ժամանակ անցկացնեմ, ինչի մասին խօսեմ:
Ինչ որ ինձ է զբաղեցնում, նրան ծանօթացնում է և հա-
կառակը: Նա սիրում է միշտ սրան պարսաւել, նրան զըր-
պարաւել: Երէկ, օրինակ, նա անբարոյական անւանեց իմ
մօտ մի կնոջ, որին ես սիրում եմ և յարգում: Նա լրտե-
սում է ամենքին և ամենից աւելի ինձ: Եւ շարունակ
իր մօրը լարում է իմ դէմ: (Քայլում է):

ԿՈՆՍՏԱՆԴԻՆ. Բայց ամուսինդ ինչ է ատում: Չէ՛ որ նա
շատ էլ տգէտ մարդ չէ: Ինչո՞ւ է թոյլ տալիս իր մօրն
ու քրոջը քեզ վրայ իրաւունք բանացնելու:

ԱՐՄԵՆՈՒՅԻ (ծեռով մի տխուր շարժումն անելով): Ա՛հ, ամուսինս:
Նա ժամանակ չունի ինձնով հետաքրքրւելու, նա զբա-
ղւած է իր գործերով: (Երեսը դարձնում է հօրից իր այլայլ-
մունքը թաղցնելու համար):

ԿՈՆՍՏԱՆԴԻՆ (զգացել է Արմենուհու այլայլւելը: Լոուծիւն: Մօտենում է):

Արմենուհի, ինչո՞ւ երեսդ դարձրիր ինձնից: Ի՞նչ ունիս,
ասա, մի քաշւիր:

ԱՐՄԵՆՈՒՅԻ (ուղղելով իրան): Թողնե՛նք, հայրիկ, թողնե՛նք: Այս
բոլորը հետաքրքրական չէ քեզ համար:

ԿՈՆՍՏԱՆԴԻՆ. Ես քո ձայնի մէջ զգացի ինչ որ դառնութիւն:
(Բռնում է Արմենուհու ձեռը): Աչքերիս նայիր...

ԱՐՄԵՆՈՒՅԻ (ձեռն ազատելով Կոնստանդինի ձեռից): Ոչինչ, հայ-
րիկ, իմ ամուսինը վատ մարդ չէ... Ես գոհ եմ: Ահա գա-
լիս են նրանք: Լուե՛նք:

ԿՈՆՍՏԱՆԴԻՆ. Դու ինձ խաբել չես կարող, դու մի բան ու-
նիս սրտու՞մդ...

ՏԵՍԻՒ, X.

Նոյնք, Սամսոն, Հմայեակ, Ստեփան և Սողոմ Սողոմեան.

ՍԱՄՍՈՆ (զալիս է պատշգամբից: Միջահասակ, ամրակազմ մարդ է, տա-
փակ ձակատով, թուխ դէմքով: Սև միրուքը խուզած է կարծ, բարակ
ընչացքը հազիւ ծածկում է ամուր սեղմած բարակ շուրթը: Յօնքերը
միշտ կնձռած են: Անտարբեր, Եսամոլ, շահասէր մարդու տիպար: Սո-
վորութիւն ունի մի ձեռը պահել պանթալօնի գրպանում, միւսով խա-
ղալ ժամացույցի շղթայի հետ):

ՀՄԱՅԵԱԿ (զալիս է պատշգամբից Սամսոնի հետ: Պարզ, համակրելի
դէմքով, բաց գունի մազերով տղամարդ է: Հազնւած է ձաշակով: Զե-
ւերը մեղմ են և շատ կիրթ: Զեռում բռնած է կակուղ գլխարկ):

ՍՈՂՈՄ ՍՈՂՈՄԵԱՆ (զալիս է պատշգամբից Սամսոնի յետևից Ստե-
փանի հետ: Ալեխառը, կարծ խուզած միրուքով, փոքրիկ, խորամանկ
աչքերով, դէմքի շողոքորթ արտայայտութեամբ տղամարդ է: Հագած է
տծե սիւրտուկ, սպիտակ ժիլէ, որ բաւական մաշւած է, ծալած օձիքով
շապիկ, սև, տափակ փողկապ, լայն պանթալօն: Զւերը ստրկական են):

ՍԱՄՍՈՆ (իջնելով պարտէզ): Ես հաւանեցի ձեր առաջարկած
ոճը իմ նոր տան համար: Կազմեցէք պլանն այդ ոճով,

Եթէ ժամանակ ունիք: Խնդրե՛մ, ծանօթանաք. կինս, աներս:
ՀՄԱՅԵԱԿ. Վառլամեան: (Նախ ձեռ է տալիս Արմենուհուն, ապա Կոնստանդինին):

ՍՈՂՈՄ ՍՈՂՈՄԵԱՆ. Այո, իմ կարծիքով էլ պարոն ճարտարապետի առաջարկած ոճը լաւն է, թէև ուրիշ լաւ ոճեր էլ կան: (Իբրև տնացի, չի բարևում Արմենուհուն և Կոնստանդինին):

ՍՏԵՓԱՆ (ծաղրելով): Այո, պատուելի քեռի, ինչպէս, օրինակ, դուք լաւ վարժապետ էք եղել, թէև կան և ուրիշ լաւ վարժապետներ էլ. կամ ես բժիշկ եմ, թէև ուրիշ բժիշկներ էլ կան:

ՍՈՂՈՄ ՍՈՂՈՄԵԱՆ. Ինձ թւում է, սիրելի փեսայ, որ դուք ճի թիչ ծաղրեցիք ինձ, թէև այդ չի կարելի ծաղր համարել:

ՏԵՍԻՆԱԿ XI.

Նոյնք և Եղիսաբէթ ու Վիրգինէ.

ԵՂԻՍԱԲԷԹ (երևում է պատշգամբի վրայ):

ՎԻՐԳԻՆԷ (երևում է պատշգամբի վրայ Եղիսաբէթի հետ):

ՍԱՄՍՈՆ. Ահա՛ և իմ ծայրն ու քոյրը:

ՀՄԱՅԵԱԿ (որ առանձին խօսում էր Արմենուհու հետ, հեռուից գլուխ տալով Եղիսաբէթին ու Վիրգինէին, մօտենում է և ձեռ է տալիս):

ՎԻՐԳԻՆԷ (երևում է թէ չէ: աչքերով փնտրում է Արմենուհուն և, տեսնելով նրան Հմայեակի հետ խօսելիս, դժկամութեան շարժումն է անում: Բարևում է Հմայեակին սառը):

ԵՂԻՍԱԲԷԹ. Կարող էք ճաշի նստել: (Նստում է սեղանի մի ծայրում):

ԱՄԵՆՔԸ (նստում են):

ԱՐՄԵՆՈՒՅԻ (նստում է սեղանի հակառակ ծայրում, հրաւիրելով Հմայեակին իր մօտ նստել):

ՎԻՐԳԻՆԷ (այնպէս է նստում, որ կարողանայ դիտել Արմենուհուն և Հմայեակին):

- ԳԱՐԵԳԻՆ (կերակուր է բաժանում):
- ՄԵԼԱՆԻԱ (օգնում է Գարեգինն):
- ՍՍՄՍՈՆ (անձեռոցիկը կրծքին կապելով): Այդ ի՞նչ փուռնչ է:
- ԿՈՆՍՏԱՆԴԻՆ. Արմենուհին է կաղմել: (Սկսում է ուտել):
- ՍՍՄՍՈՆ (Արմենուհուն): Ասա, դու էլի անտառճամն ես եղել:
(Սկսում է ուտել):
- ԱՐՄԵՆՈՒՅԻ (կերակուր առաջարկելով Հմայեակին): Ո՛չ, լեռն էի
բարձրացել:
- ՍՍՄՍՈՆ. Երեխայութի՛ւն: Չե՞ս մտածում, որ կարող է փոր-
ձանք պատահել:
- ԵՂԻՍԱԲԷԹ. Կարծես, մեր պարտիզում ծաղիկներ չկան, որ
լեռներն է վազում:
- ԱՐՄԵՆՈՒՅԻ. Ես գերադասում եմ վայրենի ծաղիկները:
- ՎԻՐԳԻՆԷ. Որոնք բոլորովին հոտ չունին:
- ՀՄԱՅԵԱԿ. Տիկին, մի՞թե չէք զգում նրանց բուրմունքը: (Ուտում
է քիչ դանդաղ):
- ՎԻՐԳԻՆԷ (կոշտ): Իհարկէ, չեմ զգում:
- ՍՈՂՈՄ ՍՈՂՈՄԵԱՆ. Ծաղկի հոտը կարելի է զգալ և չըզ-
գալ, կախած է տրամադրութիւնից (ուտում է ախորժա-
կով), թէև տրամադրութիւն ասած բանն էլ վիճելի է:
- ՍՏԵՓԱՆ. Երևելի՛ փիլիսոփայութիւն:
- ԱՐՄԵՆՈՒՅԻ. Պարոններ, այսօր եղանակը բացառապէս գե-
ղեցիկ է, չէի՞ք կամենալ արդեօք ճաշից յետոյ խմբովին
մի թեթև զբօսանք կատարել:
- ԵՂԻՍԱԲԷԹ. Էլի զբօսանք:
- ՎԻՐԳԻՆԷ (մեկուսի): Ցնդւել է:
- ԱՐՄԵՆՈՒՅԻ. Ոչ-հեռու, մերձակայ դաշտը: Ես ձայներ եմ ժո-
ղովում. ո՞վ է ցանկանում:
- ՀՄԱՅԵԱԿ. Ես մեծ ուրախութեամբ:
- ԵՂԻՍԱԲԷԹ. Ինձ միշտ դուրս բերէք, պառաւ կին եմ:

ԱՐՄԵՆՈՒՅԻ. Վիրգինէ, դո՛ւ:
 ՎԻՐԳԻՆԷ (կոշտ): Չեմ ուզում:
 ՍԱՄՍՈՆ. Իսկ ես չեմ կարող:
 ՍՏԵՓԱՆ. Ես կարող եմ:
 ԿՈՆՍՏԱՆԴԻՆ. Ես էլ:
 ԱՐՄԵՆՈՒՅԻ. Երեք ծայն երեքի դէմ:
 ՍՏԵՓԱՆ. Հարցր վճռում է քեռին:
 ՍՈՂՈՄ ՍՈՂՈՄԵԱՆ (նեղն ընկած): Ճաշից յետոյ գրօսանքը
 շատ լաւ բան է, բայց հանգստանալն էլ շատ լաւ բան է,
 թէև կարելի է և չհանգստանալ:
 ԱՐՄԵՆՈՒՅԻ. Ուրեմն, չէ՞ք կամենում:
 ՍՈՂՈՄ ՍՈՂՈՄԵԱՆ. Ես ինչպէ՞ս կարող եմ ձեր առաջարկու-
 թիւնը չընդունել, բայց միւս կողմից... պէտք է ասած, որ...
 ՍՏԵՓԱՆ. Այո՞, վերջապէս, թէ ոչ:
 ՍՈՂՈՄ ՍՈՂՈՄԵԱՆ. Նայելով հանգամանքներին...
 ՍՏԵՓԱՆ. Ուրեմն, այո և ոչ: Մի խօսքով, կատարելապէս Սո-
 ղոմոն քեռի:
 ՍՈՂՈՄ ՍՈՂՈՄԵԱՆ. Բժիշկ, եթէ կամենամ, այդ խօսքերից
 կարող եմ վիրաւորել, թէև վիրաւորական բան չկայ:
 ԱՐՄԵՆՈՒՅԻ (նկատել է երկու Թափառական երաժիշտներ, որոնք անց-
 նում են հեռու փողոցով): Օ՛ո, Թափառական երաժիշտներ:
 Դարեգին, կանչեցէք նրանց:
 ԳԱՐԵԳԻՆ (շտապով մօտենում է խորքի ցանկապատին և նշան է անում
 մօտենալու):

ՏԵՍԻՆ, XII.

Նոյնը և Թափառական երաժիշտներ.

ԵՐԿՈՒ ԹԱՓԱՌԱԿԱՆ ԵՐԱԺԻՇՏՆԵՐ (մօտենում են ցանկապա-
 տին և պատրաստւում են նւագելու):

ՍԱՄՍՈՆ (ծանձրոյթով): Արմենուհի, թող անցնեն, գնան:
ԱՐՄԵՆՈՒՀԻ. Օօ ոչ, այս մէկն ինձ ներիր: Ես շատ եմ սիրում թափառական երաժիշտներին: (Դէպի երաժիշտները):
Մի հին եղանակ նւագեցէ՛ք:
ԵՐԿՈՒ ԹԱՓԱՌԱԿԱՆ ԵՐԱԺԻՇՏՆԵՐ (նւագում են, մէկը քեամանջա, միւսը թառ):

ՍԱՄՍՈՆ. Գոնէ չերգէին:

ԱՐՄԵՆՈՒՀԻ. Դրանք չեն երգում:

ՍԱՄՍՈՆ (Հմայեակին): Երեւակայեցէ՛ք, պարոն Վառլամեան, իմ կնոջ ճաշակը: Երեք անգամ ինձ հետ ճանապարհորդել է Եւրոպան: Տեսել է բոլոր մեծ թատրոնները, լսել է ամենարնտիր երաժիշտներին, Բայրէօթում հիացել է Վաղների օպերաներով, Պարիզում Կոլօնի և Լամուրէօի օրկեստրներով, հռովմում Կարուզօի ծայնով և դարձեալ ախորժում է այդ վայրենի երաժշտութիւնից:

ՀՄԱՅԵԱԿ. Ներեցէ՛ք, պարոն Սամսոն, ես ճարտարապետ եմ, հիանում եմ Եւրոպական հին ու նոր ոճերով, բայց այս ինձ չէ խանգարում սիրել և իմ մայրենի երկրի հին վանքերի ճարտարապետութիւնը: Այն ունի իր առանձին հմայքը:

ՍՈՂՈՄ ՍՈՂՈՄԵԱՆ. Բայց եթէ դուք լսէիք Արմենուհու դաշնամուր նւագելը, ամեն բան կմոռանայիք:

ՍՏԵՓԱՆ. Աա, վերջապէս քեռին մի բան գտաւ, որի մասին կարողանում է ասել («այո») և ոչ թէ («և այո և ոչ»):

ՀՄԱՅԵԱԿ (Արմենուհուն): Տիկին, ես յուսով եմ, որ անձամբ կը վայելեմ ձեր նւագման հաճոյքը:

ԱՐՄԵՆՈՒՀԻ. Պայմանով, որ շատ էլ չհաւատաք քեռու գովասանքին: Ինձ համար աւելի բարձր են այդ տարրական հնչիւնները: Լսեցէ՛ք՝ որքան թախիժ, դառը վիշտ, ողբ մի տառապող սրտի:

ՎԻՐԳԻՆԷ. Ես ոչինչ չեմ զգում:

ՍԱՄՍՈՆ. Մուրեի հարւածներ են տալիս ձարդու ներւերին:

ՀՄԱՅԵԱԿ. Դժւարանում եմ հաւատալ, որ այդպէս լինի: Ձէ՞ որ մանկութիւնից այդ հնչիւններով է կրթւել մեր լսելիքը:

ՍՏԵՓԱՆ. Իհարկէ, բայց սովորութիւն է դարձել մեզնում պարսաւել բոլորը, ինչ որ մայրենի է: Դա համարւում է եւրոպականութիւն: Սնօբի՞ղմ...

ՍՈՂՈՄ ՍՈՂՈՄԵԱՆ. Երաժշտութիւնն այնպիսի բան է, որ կարելի է զգալ և չզգալ, նայելով տրամադրութեանը:

ՍՏԵՓԱՆ. Կեցցէ՛ք, քեռի, դարձեալ մի խորը փիլիսոփայական գաղափար արտայայտեցիք: Ձեր կենացը... (Բաժակը զարկում է Սողոմ Սողոմեանի քաժակին և խմում):

ԱՐՄԵՆՈՒՀԻ. Մելանիա, վերցրէ՛ք պարոնից երեք ռուբլի և տւէ՛ք երաժիշտներին:

ԵՂԻՍԱԲԷԹ (զայրանալով). Երեք ռուբլի՞: Դժւել ես, ի՞նչ է: Դա էլ թատրոն չէ՛, որ ամեն անգամ ութ ռուբլի ծախսէք: (Սամսոնին). Տասը կոպէկն էլ շատ է:

ԱՐՄԵՆՈՒՀԻ (վշտացած). Հայրիկ, տուր նրանց երեք ռուբլի:

ԿՈՆՍՏԱՆԴԻՆ. Աչքիս վրայ: (Ձեռք տանելով գրպանը): Մեծ բան չէ:

ՎԻՐԳԻՆԷ (մեկուսի). Շատ ես մեծ-մեծ կոտրտում, տեսնե՛ք վերջդ ի՞նչ պիտի լինի:

ՍԱՄՍՈՆ (Կոնստանդինին). Ներեցէ՛ք, իմ հիւրերն իմ տանն իրաւունք չունին փող ծախսելու: (Տալով Մելանիային մի ռուբլի):

Տուր այս մի ռուբլին նրանց, թող կորչեն:

ԱՐՄԵՆՈՒՀԻ. Մելանիա, շնորհակալութիւն յայտնեցէ՛ք նրանց:

Այդ ցնցոտիների տակ՝ ձարդկային սիրտ է բաբախում:

ՄԵԼԱՆԻԱ (զրամը տալիս է երաժիշտներին):

ԵՐԱԺԻՇՏՆԵՐ (զաղարում են նւագել, գլուխ են տալիս խոնարհ և հեռանում են):

ՍՏԵՓԱՆ. Մայրիկ, կարելի՞ է վեր կենալ: (Արմենուհուն): Տիկի՞ն:

ԵՂԻՍԱԲԷԹ. Ճաշը վերջացել է: (Վեր է կենում):

ԱՐՄԵՆՈՒՅԻ (զլխով համաձայնութեան նշան է անում Ստեփանին և վեր կենում):

ԱՄԵՆՔԸ (վեր են կենում):

ԳԱՐԵԳԻՆ } (սկսում են սեղանը ժողովել):
ՄԵԼԱՆԻԱ }

ՍՏԵՓԱՆ (Կոնստանդինին): **Կամենաք, մի քիչ նառդի խաղանք պատշգամբի վրայ:**

ԿՈՆՍՏԱՆԴԻՆ (ծխախոտ վառելով): **Իսկ զբօսանքը:**

ԱՐՄԵՆՈՒՅԻ. **Չկայացաւ, հայրիկ:** (Սկսում է Հմայեակի հետ զրոյց անել):

ԿՈՆՍՏԱՆԴԻՆ (Ստեփանին): **Գնանք:** (Բարձրանում է պատշգամբ):

ՍՏԵՓԱՆ (Կոնստանդինին հետևելով): **Գարեգին, նառդին բերէք:**

ԳԱՐԵԳԻՆ (գնում է աջ, սենեակից շտապով մի նառդի է դուրս բերում և դնում պատշգամբի երկրորդ ծայրում):

ԿՈՆՍՏԱՆԴԻՆ } (սկսում են խաղալ):
ՍՏԵՓԱՆ }

ՍՈՂՈՄ ՍՈՂՈՄԵԱՆ (Եղիսաբէթին): **Քոյր, կարճո՞ղ ես մի բաժակ սուրճ տայ, թէև սուրճը վնասակար է ինձ համար:**

ԵՂԻՍԱԲԷԹ. **Գնանք:** (Քայլերն ուղղում է դէպի պատշգամբ):

ՎԻՐԳԻՆԷ (աչքերով միշտ հետևել է Արմենուհուն և Հմայեակին: Եղիսաբէթին առանձին): **Տես է՞, քչփչում են:**

ԵՂԻՍԱԲԷԹ (մի արագ թշնամական հայեացք ձգելով Արմենուհու կողմը):

Ա՛հ, քանի գնում, այնքան աւելի եմ ատում: Երեք ուղբի մուրացկաններին, Տէ՛ր Աստուած: (Գնում է):

ՍՈՂՈՄ ՍՈՂՈՄԵԱՆ (հետևում է Եղիսաբէթին):

ՎԻՐԳԻՆԷ (մի չար հայեացք ևս ձգելով Արմենուհու և Հմայեակի վրայ, հետևում է Եղիսաբէթին):

ՍԱՄՍՈՆ (Հմայեակին): **Ես կկամենայի ձեզ հետ աւելի մանրամասն խօսել իմ նոր տան պլանի մասին: Պէտք է ասած, որ ձեր առաջարկած ոճը քանի գնում ինձ աւելի է գրաւում:**

- ՀՄԱՅԵԱԿ.** Խնդրե՛մ: Ես ձեր տրամադրութեան տակ եմ:
ՍԱՄՍՈՆ. Գնանք իմ սենեակը: (Դիմում է դէպի պատշգամբ):
ՀՄԱՅԵԱԿ (բարձրանում է պատշգամբ և, մինչ Սամսոնն ու Արմենուհին խօսում են, կանգնում է Կոնստանդինի ու Ստեփանի քով և նայում նրանց խաղին):
ԱՐՄԵՆՈՒՀԻ. Սամսոն, մի բռայէ:
ՍԱՄՍՈՆ (յետ է դառնում):

ՏԵՍԻԼ XIII.

Արմենուհի և Սամսոն.

- ԱՐՄԵՆՈՒՀԻ.** Ասա խնդրեմ, ինչո՞ւ դու միշտ խափանում ես ամեն մի զլարեութիւն: Կարծեմ, քեզ համար դժլար չէր լինիլ մի երկու ժամ նւիրել ինձ:
ՍԱՄՍՈՆ. Դրա համար պահեցիր ինձ: Է՛հ: (Ուզում է գնալ):
ԱՐՄԵՆՈՒՀԻ. Կաց:
ՍԱՄՍՈՆ (կանգ առնելով): Ասա՛, լսում եմ:
ԱՐՄԵՆՈՒՀԻ. Բանը զբօսանքը չէ, Սամսոն, հասկացի՛ր, վերջապէս:
ՍԱՄՍՈՆ. Ի՞նչ է պատահել, ասա, որ հասկանամ:
ԱՐՄԵՆՈՒՀԻ. Վերջերս մի չար նախազգացում սկսել է ինձ հալածել: Թւում է, որ շուտով ինձ մի դժբաղդութիւն է պատահելու: Պաշտպանի՛ր ինձ:
ՍԱՄՍՈՆ. Դատարկ բաներ են, ի՞նչ նախազգացում, ի՞նչ դժբաղդութիւն: Մեր հասարակութեան մէջ երեք կին չըկայ քեզ նման բաղդաւոր:
ԱՐՄԵՆՈՒՀԻ. Հաւատամ արդեօք:
ՍԱՄՍՈՆ. Իրաւունք չունիս չհաւատալու: Նայի՛ր շուրջդ, ամենքը նախանձում են քեզ: Ո՞ւմ ամուսինն ես: Սամսոն Ալադեանի. ասել է՝ ոչինչ չի պակասում քեզ բացի պակասութիւնից:

ԱՐՄԵՆՈՒՅԻ. Ա՛հ, եթէ իմանայիր ինչ է կատարւում ահա
այստեղ, (սրտին դարկելով), այդ չէիր ասիլ: Կայ մի պակա-
սութիւն, որ ոչ քո հարստութիւնը կարող է լրացնել,
ոչ մարդկանց յարգանքն և նախանձը:

ՍԱՄՍՈՆ. Ա՛յն է:

ԱՐՄԵՆՈՒՅԻ. Քո անտարբերութիւնը դէպի իմ հոգեկան վի-
ճակը: Սամսոն, պարզ ասա, աներկիւղ, ճիշտ է, որ քո
գործերն են միայն քեզ խլում ինձնից:

ՍԱՄՍՈՆ (Թեթև ցնցւում է, բայց և իսկոյն ուղղում է իրան): Զարմա-
նալի հարց: Ուրիշ ես ինչո՞վ կարող եմ յափշտակել, բացի
իմ գործերից:

ԱՐՄԵՆՈՒՅԻ. Իհարկէ, ես էլ այդպէս եմ կարծում, սակայն
մի տխմար կասկած, մի ինչ որ թերահաւատութիւն մտել
է սիրտս և ինձ տանջում է...

ՍԱՄՍՈՆ (ձեռնում է վիրաւորւած): Արմենուհի՛, կարծեմ, ես քեզ ոչ
մի կասկածի առիթ չեմ տւել:

ԱՐՄԵՆՈՒՅԻ. Լաւ, մի բարկանար: Երևի, ես չիմար եմ...

ՍԱՄՍՈՆ. Յիմար չեա, Արմենուհի, այլ մի փոքր ներւային, և
այդ առաջանում է անգործութիւնից: Զբաղւիր մի բա-
նով և կանցնի:

ԱՐՄԵՆՈՒՅԻ. Աա, ոչ մի զբաղմունք, ոչ մի գործ ինձ չի հե-
տաքրքրում: Ասա՛ ինձ, Սամսոն, սիրո՞ւմ ես քո Արմենու-
հուն:

ՍԱՄՍՈՆ. Տինգ տարի է ամուսնացած ենք և դեռ հարցնում
ես այդ: Մի՞թէ չգիտես, որ ինձ նման մի մարդու համար
բացի իր օրինական ամուսնուց ոչ մի կին գոյութիւն
ունենալ չի կարող: Այդ կողմից ես նահապետական մարդ եմ:

ԱՐՄԵՆՈՒՅԻ (ուրախացած, ինքնամոռացումիան մէջ յարձակում է Սամ-
սոնին գրկելու): Ա՛հ, ես այդ էի փափագում քեզնից լսելու:

ՍԱՄՍՈՆ (մի քայլ յետ է կանգնում, նայելով դէպի պատշգամբ): Ի՞նչ
ես անում, անմիտ, հիւրերի ներկայութեամբ:

ԱՐՄԵՆՈՒՅԻ (կանգ է առնում: Դառը ծիծաղով): Աա, վախեցա՞ր,
բանականութիւնդ իսկոյն բողոքեց: Լաւ, մի ամաչիր, կա-
տակ էի անում: (Հնոանում է Սամսոնից): Գիտե՞մ, չես ու-
զում, որ քեզ թեթեամիտ մարդ համարեն: Ո՛չ, բարեկամս,
այդպէս չեն սիրում: Սիրող մարդն այդքան զգոյշ չի լի-
նում: Տիւրէր: Ո՛ւր են նրանք: Պատշգամբի ծայրում:
Այնքան հեռու, որքան քո սիրտն ինձնից: Գնա՛, ես քեզ
համար կեանքի ընկերուհի չեմ, այլ ուրիշ բան...

ՍԱՄՍՈՆ. Ձե՞մ հասկանում, բոլորովին չե՞մ հասկանում:

ԱՐՄԵՆՈՒՅԻ. Ա՛հ, իմ վիշտն էլ այն է, որ չես հասկանում և,
երևի, երբէք չես հասկանալ ինձ: Տիւնդ տարի է քո կինն
եմ, և մի անգամ դու չես կարողացել բարախել տալ իմ
սիրտը: Ես քո հոգու և արեան բաժինը չեմ, այն, ինչ որ
երևակայում էի, թէ պիտի լինի մի կին իր ամուսնու
համար: Քո գլուխը լի է հաշիւներով, քո սիրտը կաշկանդ-
ւած է քո գործերի ցանցով:

ՍԱՄՍՈՆ. Ճիշտ է, ճիշտ է, յետո՛յ:

ԱՐՄԵՆՈՒՅԻ. Դրամի սէրը դարձել է քեզ համար բռնակալ
կիրք և չափշտակել է քեզ իսկական կեանքից: Բայց ի՞նչ
եմ անում քո հարստութիւնը, որ այնքան երեսովս են
տալիս քո քոյրն ու մայրը: Ինձ սիրտ է հարկաւոր, վառ-
վառն, թրթռուն սիրտ, հարուստ հոգի, կեանք, հասկա-
նում ես, կեանք: Գնա՛ քո գործերի յետևից: Ես այն չեմ,
ինչ որ հարկաւոր էր քեզ նման մի խելօք մարդու: Մենք
տարբեր աշխարհների մարդիկ ենք: Մայրդ ու քոյրդ ու-
նին իրաւունք ինձ ատելու: Ո՛ւմ եմ դիմում ես իմ ան-
միտ փափաղներով, իմ չիմար երազներով: Մտի՛ր առանձ-
նասենեակդ, խորասուզի՛ր քո հաշիւների մէջ և յետո՛յ..

նվ գիտէ: Իսկ ես... թող, որ իմ տխմար երեւակայութեամբ
երջանկութեան օգային դղեակներ կառուցանեմ: (Շտապով
բարձրանում է պատշգամբ և անհետանում):

ՍԱՄՍՈՆ. Կնոջ, սպասիր: (Մի երկու քայլ է անում Արմենուհու յե-
տևից և, կանգ առնելով, մտածում է): **Զարմանալի է, տարօրի-
նակ:**

Վ Ա Ր Ա Գ Ո Յ Ր.

ԱՐԱՐԻԱԾ ԵՐԿՐՈՐԳ.

Տեսարանը ներկայացնում է ամարանոցի ներսը:

Մի մեծ սենեակ, թեթև կահաւորւած: Խորքում երկու լուսամուտներ, մէջտեղ դռներ դէպի այն պատշգամբը, որ Վ արարւածում կազմում էր բեմի աջ կողմը: Հետու երևում են պարտիզի ծառերի գազաթները: Աւելի հեռու՝ ժայռեր: Աջ պատի մէջ երկու դռներ, որոնցից առաջինը տանում է Սամսոնի սենեակը, երկրորդը—Արմենուհու բուդուարը: Չախ պատի մէջ ևս երկու դռներ, որոնցից առաջինը տանում է մի ընդհանուր մուտք, իսկ երկրորդը—Եղիսաբէթի սենեակը:

Բեմի խորքում, աջ լուսամտի առջև դաշնամուր, ձախ լուսամտի առջև մի կլոր սեղան, վրէն վայրի ծաղիկների մի փունջ: Չախ պատի առջև, երկու դռների միջև զահաւորակ և մի քանի թեթև կիսաբազկաթոռներ: Լուսամուտների վրայ սպիտակ վարագոյրներ:

Խորքի դռներն ու լուսամուտները բաց են:

ՏԵՍԻԼ Լ.

Կոնստանդին և Ստեփան.

ԿՈՆՍՏԱՆԴԻՆ (վերադառնում է առաւօտեան գբօսանքից խորքի դռներով: Հագնւած է այնպէս, ինչպէս առաջին արարւածում): Շատ ուրախ եմ, որ դուք վեճել էք մի քանի շաբաթ մնալ: Սամսոնի ազգականների մէջ դուք այս տան միակ անկեղծ բարեկամն էք: Իսկ այժմ ձեր ներկայութիւնն այստեղ մինչև անգամ անհրաժեշտ է:

ՍՏԵՓԱՆ. Ինչո՞ւ է անհրաժեշտ: (Գալիս է Կոնստանդինի հետ. նույն հարցառով է):

ԿՈՆՍՏԱՆԴԻՆ (յուզւելով): Կասեմ, բժիշկ, կասեմ:

ՍՏԵՓԱՆ. Ես նկատում եմ, որ վերջին անգամ քաղաք գնալուց յետոյ դուք առհասարակ տխուր էք: Կարելի՞ է իմանալ ինչ է պատահել:

ԿՈՆՍՏԱՆԴԻՆ. Պատահել է այն, ինչ որ ես վաղուց կասկածում էի: Բայց մի անգամ էլ պէտք է ստուգել: Բժիշկ, տե՛ք ինձ ազնիւ խօսք, որ իմ մի հարցին կպատասխանէք ամենայն անկեղծութեամբ:

ՍՏԵՓԱՆ. Ի՞նչ բանի է վերաբերւում ձեր հարցը:

ԿՈՆՍՏԱՆԴԻՆ. Իմ աղջկայ ճակատագրին:

ՍՏԵՓԱՆ (զարմացած): Ճակատագրի՞ն անգամ: Այդ ի՞նչ կարող է լինել:

ԿՈՆՍՏԱՆԴԻՆ. Տալի՞ս էք խօսք, որ կպատասխանէք իմ հարցին:

ՍՏԵՓԱՆ. Դուք այնպիսի բան էք պահանջում, որ ես չեմ կարող մերժել: Արմենուհու ճակատագիրն ինձ համար այնքան թանգ է, որքան ձեզ համար: Հարցրէ՛ք ինչ կամենում էք:

ԿՈՆՍՏԱՆԴԻՆ (զողոզուն ձայնով): Ի՞նչ էք կարծում, բժիշկ, իմ փեսան, Սամսոն Ալադեանը ազնի՞ւ մարդ է:

ՍՏԵՓԱՆ (զարմացած): Ի՞նչ: Ձեր հարցը տարօրինակ է: Ձեմ հասկանում:

ԿՈՆՍՏԱՆԴԻՆ. Կհասկացնեմ, բարեկամս, կհասկացնեմ: Ո՛վ է այն անառակ... Բայց սպասեցէ՛ք, կարծեմ գալիս են: Գնանք իմ սենեակը: Այնտեղ կբացատրեմ: Գնանք: (Գնում է ձախ կողմի առաջին դռներով):

ՍՏԵՓԱՆ (հետևում է Կոնստանդինին):

Եղիսաբէթ, Սիրանոյշ և Վիրգինէ.

ԵՂԻՍԱԲԷԹ (գալիս է ձախ կողմի երկրորդ դռներով: Հազնւած է այն-
պէս, ինչպէս առաջին արարւածում): **Ապրի՛ք, որդի, ապրի՛ք:**
Հարսը ձեզ պէս պիտի լինի: Մի կին, որ փողի հաշիւ
չգիտէ, պրծաւ, քանդւեց նրա մարդու տունը: Նստենք
այստեղ: (Նստում է):

ՎԻՐԳԻՆԷ (ներս է մտնում ձախ կողմի երկրորդ դռներով Եղիսաբէթից
և Սիրանոյշից յետոյ: Հազած է ուրիշ շրջազգեստ, այս անգամ հա-
մեմատարար համեստ): **Իհարկէ: (Նստում է):**

ՍԻՐԱՆՈՅՇ (գալիս է ձախ կողմի երկրորդ դռներով Եղիսաբէթից յե-
տոյ, Վիրգինէից առաջ: Բաւական գեղեցիկ, բայց ոչ-մեղմ դէմքով կին
է: Հազնւած է շքեղ, գլխին շատ մեծ գլխարկ ահագին փետուրով:
Ձեռում մի Թանկագին քսակ և շքեղ հովանոց): **Հայրս օժիտս**
տւել է ինձ, ես շահեցնում եմ: (Նստում է): Ամուսինս իմ
հաշիւներին չի խառնւում և [Թոյլ էլ չեմ տալ, որ խառ-
նւի: Նա անհաշիւ մարդ է:

ԵՂԻՍԱԲԷԹ. **Չմոռանամ մի բան հարցնել. Մոսկովումն էլ**
խոհարարները գողանում են, ինչպէս մեզնում:

ՍԻՐԱՆՈՅՇ. **Այո՛, տիկին, այս վերջին տարին իննը խոհարար**
եմ փոխել:

ՎԻՐԳԻՆԷ. **Ես էլ ամիսը մէկը փոխում եմ:**

ԵՂԻՍԱԲԷԹ. **Ձեր լւացարարներն ինչպէս են:**

ՍԻՐԱՆՈՅՇ. **Հաշւով տալիս եմ լւացքը, հաշւով ընդունում**
եմ: Մի բան պակասելիս վարձը կտրում եմ:

ՎԻՐԳԻՆԷ. **Ես էլ:**

ԵՂԻՍԱԲԷԹ. **Երևակայում եմ, որքան է սիրում ձեզ ձեր սկե-**
սուրը:

ՍԻՐԱՆՈՅՇ. Ես սկեսուր չունիմ: (Մեկուսի): Բարեբաղդարար:
ԵՂԻՍԱԲԷԹ. Ափսոս: Սկեսուրը ընտանիքի խմորն է: Վիրգինէն
էլ չունի:

ՎԻՐԳԻՆԷ (մեկուսի): Բարեբաղդարար: (Սիրանոյշին): Սիրո՞ւմ էք
ձեր ամուսնուն:

ՍԻՐԱՆՈՅՇ (ժպտալով): Չգիտեմ:

ԵՂԻՍԱԲԷԹ. Իսկ նա, իհարկէ, սիրում է ձեզ:

ՍԻՐԱՆՈՅՇ. Այդ մասին չեմ էլ մտածում: Ամուսինս է, իհար-
կէ, օրէնքով պարտաւոր է սիրել: Միայն մեր գաղա-
փարները միմեանց հակառակ են, երբեմն վիճում ենք:
(Ինքնագոհ): Բայց միշտ ես եմ յաղթում:

ՎԻՐԳԻՆԷ. Իսկ և իսկ ինձ նման: Բարի մարդ է, երևի:

ՍԻՐԱՆՈՅՇ. Շատ բարի, բայց դիւրագրգիռ է:

ԵՂԻՍԱԲԷԹ. Լաւ պահեցէք, բարի մարդիկ թոյլ են լինում:
(Խորհրդաւոր ժպտում է):

ՍԻՐԱՆՈՅՇ. Ես դրանից իսկի չեմ վախենում: Ոչ ոք չի կա-
րող իմ ամուսնուն ձեռքիցս խլել:

ՎԻՐԳԻՆԷ (խորհրդաւոր ժպտալով): Ո՞վ գիտէ...

ԵՂԻՍԱԲԷԹ (տեսնելով Արմենուհուն): Ահա, հարսս եկաւ:

ՏԵՍԻՆ, III.

Նոյնք, Արմենուհի եւ Մելանիա.

ԱՐՄԵՆՈՒՅԻ (գալիս է աջ կողմի երկրորդ դռներով. հագած է ընդու-
նելութեան բաւական շքեղ հագուստ, շատ ծաշակով յարդարած: Թան-
ձր մազերը պահպանուում են գեղեցիկ կրեայ սանրով: Կոկորդի վրայ
մի հնաշէն քորոց): **Բարև ձեզ, տիկի՛ն:** (Ձեռ է տալիս Սիրա-
նոյշին սիրալիբ եւ նստում է):

ՍԻՐԱՆՈՅՇ (մի նախանձոտ հայեացքով չափել է Արմենուհուն ոտքից

մինչեւ գլուխ): Հմայեալք բերեց իր կազմած պլանը ձեր ամուսնունց ցոյց տալու, ես էլ կամեցայ ձեզ հետ մի քիչ զրոյց անել:

ԱՐՄԵՆՈՒՅԻ. Շատ ուրախ եմ: (Մինչ Եղիսաբէթն ու Մելանիան խօսում են, ձեւերով զրոյց է անում Սիրանոյշի հետ):

ՄԵԼԱՆԻԱ. (գալիս է ձախ կողմի առաջին դռներով: Եղիսաբէթին): Տիկին, գիւղացիները իւրը բերել են:

ԵՂԻՍԱԲԷԹ. (արագ ոտքի կանգնելով): Օյ, տեսէք, որ առանց ինձ չկշռեն: Այդ գիւղացիները խաբեբաներ են: Գնա՛, սուրճ բեր տիկինների համար: (Գնում է ձախ կողմի առաջին դռներով):

ՏԵՍԻՆ ԻՎ.

Արմենուհի, Սիրանոյշ եւ Վիրգինէ, մերձ ընդ մերձ Մելանիա.

ՍԻՐԱՆՈՅՇ. Կարդացի ձեր տւած վէպը:

ԱՐՄԵՆՈՒՅԻ. Հաւանեցի՞ք:

ՍԻՐԱՆՈՅՇ. Ես հաւանեցի միայն այն առաքինի կնոջը, որին մի խելագար ուղում էր զրկել օրինական ամուսնուց:

ԱՐՄԵՆՈՒՅԻ. Իսկ այդ օրիորդին, որ խելագար անւանեցիք, չէ՞ք կարեկցում:

ՍԻՐԱՆՈՅՇ. Ամենևին:

ՎԻՐԳԻՆԷ. (ձանձրոյթի նշաններ է անում):

ԱՐՄԵՆՈՒՅԻ. Չէ՞ որ նա անյոյս սիրուց իրան ժայռից գցում է իր սիրեցեալի ոտների տակ և կտոր-կտոր լինում:

ՍԻՐԱՆՈՅՇ. Ի՞նչ իրաւունք ունէր մի օրիորդ սիրահարւելու ամուսնացած մարդու վրայ:

ԱՐՄԵՆՈՒՅԻ. Ասում են սէրն իրաւունքներ չի ճանաչում, տիկին:

ՎԻՐԳԻՆԷ. Անառակ սէրը, իհարկէ, չի ճանաչիլ:

- ԱՐՄԵՆՈՒՅԻ** (Սիրանոյշին): Հաւանում էք այստեղի բնութիւնը:
ՍԻՐԱՆՈՅՇ. Շատ էլ չէ, զառիվայրեր շատ կան, կառքով
 զբօսնելը վտանգաւոր է:
- ՄԵԼԱՆԻԱ** (երեք գաւաթ սուրճ և շաքարահաց է բերում, դնում է սեղա-
 նի վրայ և դնում է միւսնոյն, այսինքն՝ ծախ կողմի առաջին դռներով):
- ԱՐՄԵՆՈՒՅԻ.** Իսկ ձեր ամուսինը հիացած է:
- ՎԻՐԳԻՆԷ** (մի բաժակ սուրճ վերցնելով): Ա՛խ, դու արդէն խօսե՞լ
 ես նրա հետ բնութեան մասին մինչև անգամ:
- ԱՐՄԵՆՈՒՅԻ** (առանց նայելու Վիրգինէին): Այո՛, ես պարոն Հմա-
 յեակի հետ խօսել եմ ամեն բանի մասին:
- ՍԻՐԱՆՈՅՇ.** Եւ նա հիացած է ձեզնով: Ասում է, առաջին
 անգամն եմ հանդիպում մի հայ կնոջ, որ գեղեցկի մասին
 դադափար ունի:
- ՎԻՐԳԻՆԷ** (մեկուսի): Օհօ՛:
- ՍԻՐԱՆՈՅՇ.** Իսկ երէկ նա այստեղից վերադարձաւ խելադարւած
 ձեր դաշնամուր նւագելուց: (Դիտում է Արմենուհու հագուստը):
- ԱՐՄԵՆՈՒՅԻ.** Ես թանգ եմ գնահատում արտիստի կարծիքը:
- ՎԻՐԳԻՆԷ** (Սիրանոյշին): Է՛հ, սիրելիս, այժմ ո՞վ չի դաշնամուր
 նւագում: Անցէք մեր փողոցներով, իւրաքանչիւր լուսա-
 մուտից կլսէք «դի՛նգ-դրնգ, դի՛նգ-դրնգ»... (Սուրճ է խմում):
- ՍԻՐԱՆՈՅՇ.** Ես էլ օրիորդ ժամանակս շատ էի նւագում, բայց
 հիմա դաշնամուրս փոշի է պատել: (Արմենուհուն): Ասացէ՛ք,
 խնդրեմ, ո՞րտեղ էք կարել տւել այդ հագուստը:
- ԱՐՄԵՆՈՒՅԻ** (անփոյժ): Թիֆլիսում: (Սուրճ է խմում):
- ՍԻՐԱՆՈՅՇ.** Հիանալի՛ է: Երեւակայեցէ՛ք, զարնանը ես Պարի-
 զում երկու հագուստ պատւիրեցի, փչացրին: (Շօշափելով
 Արմենուհու շրջագոգեստը): Եւ ի՛նչ ամուր կտոր է, երկար կը-
 դիմանայ:
- ՎԻՐԳԻՆԷ** (Սիրանոյշին): Ես ձեր հագուստն աւելի եմ հաւա-
 նում: Դուք ճաշակ ունիք:

ԱՐՄԵՆՈՒՅԻ (ուշադրութիւն չդարձնելով Վերգինէի խօսքերի վրայ, Սիրանոյշին): Դուք ասացիք, թէ գարնանը Պարիզումն էք եղել. անկասկած, տեսել էք այն պիէսը, որ ներկայացնում է Բեթհօվէնի ողբերգական կեանքը: Ասում են, շատ սրտաշարժ է այն տեսարանը, երբ իննը սիմֆօնեաները զայիս են իրանց երկնային ձայնով մխիթարելու հանճարեղ ստեղծագործողին:

ՍԻՐԱՆՈՅԾ (ձանձրոյթով): Չգիտեմ, չեմ յիշում, թատրոններ շատ եմ տեսել: Երկու ամսւայ ընթացքում Պարիզում ծախսեցինք չորս հազար հարիւր քսան ու եօթը ըուբլի:

ՎԻՐԳԻՆԷ (Սիրանոյշին): Դուք ճանաչում էք Մոսկւայում տիկին Մարմառեանին:

ՍԻՐԱՆՈՅԾ. Այո:

ՎԻՐԳԻՆԷ. Նա իմ դասընկերն է եղել. ասում են, իր մարդուն դաւանանում է, ճիշտ է:

ՍԻՐԱՆՈՅԾ. Չեմ լսել:

ՎԻՐԳԻՆԷ. Իսկ ես լսել եմ:

ԱՐՄԵՆՈՒՅԻ (կամենալով խօսակցութեան նիւթը փոխել, Սիրանոյշին):

Տիկին, Պարիզում տեսա՞ք Ռօզէնի գործերը:

ՍԻՐԱՆՈՅԾ (մտածելով): Ռօզէն... Ռօզէն... միտս չէ... այդ ի՞նչ մարդ է:

ՎԻՐԳԻՆԷ. Կար ու ձեի վարպետ կլինի, մօղիստ:

ԱՐՄԵՆՈՒՅԻ. Ո՛չ, Վերգինէ, Ռօզէնը մեր ժամանակի ամենահանճարեղ արձանագործն է, որին համեմատում են Փիղիասի հետ:

ՍԻՐԱՆՈՅԾ. Արձանների մասին ամուսնուս հետ խօսեցէք: Ախ, այդ ի՞նչ հրաշալի քորոց է: Կարելի՞ է մօտիկից տեսնել:

ԱՐՄԵՆՈՒՅԻ (քորոցն իր օձիքից պոկելով, տալիս է Սիրանոյշին):
Համեցէ՛ք:

ՍԻՐԱՆՈՅԾ (հիացած դիտելով քորոցը): Ի՞նչ հաղւազիւտ քար է, ի՞նչ պայծառ դոյն ունի և ի՞նչ աննման գործ է: Թա՛նգ արժէ: (Քորոցը տալիս է Արմենուհուն):

- ԱՐՄԵՆՈՒՅԻ (քորոցը իր տեղը կպցնելով): Չգիտեմ, հանգուցեալ
 մօրս չիշատակն է: Կամենա՞ք, տիկին, վաղն ինձ հետ բարձ-
 րանալ կարմիր լեռան գագաթը արեգակի էլքը տեսնելու:
- ՍԻՐԱՆՈՅՇ (զարմացած): Արեգակի ծագումը: Ի՞նչ էք ասում,
 մի՞թէ մարդ կարող է այդպէս վաղ զարթնել:
- ՎԻՐԳԻՆԷ (չարուծեամբ): Ինչո՞ւ չէ, կաթնավաճառներն ու հաց-
 թուխները զարթնում են:
- ԱՐՄԵՆՈՒՅԻ. Կկամենա՞ք:
- ՍԻՐԱՆՈՅՇ. Ո՛չ, սիրելիս, անկարող եմ:
- ԱՐՄԵՆՈՒՅԻ. Այն ժամանակ այս երեկոյ բարձրանանք արե-
 գակի մայր մտնելը տեսնելու:
- ՍԻՐԱՆՈՅՇ. Մի՞թէ հետաքրքրական է:
- ԱՐՄԵՆՈՒՅԻ (ոգևորւելով): Օ՞, տիկին, այդ մի սքանչելի տե-
 սարան է: Մի երազ և այնպիսի երազ, որ միայն մա-
 նուկ հասակում կարելի է տեսնել:
- ՎԻՐԳԻՆԷ (մեկուսի): Օհ օ, սկսեց: (Բարձր): Սինեմատօգրա-
 ֆումն էլ կարելի է տեսնել:
- ԱՐՄԵՆՈՒՅԻ (ուշադրութիւն չդարձնելով Վիրգինէի վրայ): Ձեր առջև
 տարածւում է Կովկասեան լեռնաշղթան աջ ու ձախ: Ձիւ-
 նապատ գագաթները ոսկեզօծւած, լայնատարած սառցա-
 րանները մանիշակագոյն, ինչպէս երկինքը ամարային երե-
 կոյ: Վերը սպիտակ ամպերի վիթխարի քուլաները, վարը
 մթին անդունդներ: Լոյս և խաւար, կեանք և մահ, աստուա-
 ծային գեղեցկութիւն և դիւային զօրութիւն: Եռանդների
 աննկարագրելի խառնուրդ: Եւ դուք, նայելով հսկաների
 վարդագոյն գագաթներին ու նրանց հուժկու կրծքերին,
 սլանում էք դէպի հեռաւոր, անծանօթ աշխարհներ, ուր
 չկան մանր կրքեր, չնչին յոյզեր, նիւթամոլութիւն, նախանձ,
 զրպարտութիւն, բանսարկութիւն, ատելութիւն: Ա՛հ, այդ
 սքանչելի է, ինչպէս տիեզերքի գոհար... (Վեր է կենում):

ՍԻՐԱՆՈՅՇ (կիսահեզնական): **Կեցցէ՛ք, կեցցէ՛ք, դուք կատարեալ բանաստեղծ էք:** (Վեր է կենում):

ՎԻՐԳԻՆԷ (բռնի ծիծաղելով): **Պակասում է միայն սազը:** (Վեր է կենում): **Է՛հ, այնքան վէպեր է կարդացել, որ կարող էր մի բան անգիր անել:**

ԱՐՄԵՆՈՒՀԻ (նայում է Վիրգինէին հանգիստ արհամարհական հայեացքով):

ՍԻՐԱՆՈՅՇ (նայելով իր ժամացոյցին): **Ա՛հ, արդէն տասներկու ժամն է, չմայեակն ուշացաւ, ես չեմ կարող նրան սպասել: Դէ՛հ, ցտեսութիւն, սիրելիս. ես լեռներ բարձրանալ չեմ կարող: Տափակ տեղ էլ կարելի է դարձանալ:**

ԱՐՄԵՆՈՒՀԻ (ուղեկցում է Սիրանոյշին մինչև խորքի դռները և յետ է գալիս: Հառաչում է իբրև մի մեծ ծանձրոյթից ազատւած):

ՎԻՐԳԻՆԷ. **Արմենուհի, դու իսկի հիւր զբաղեցնելու շնորհք չունիս:**

ԱՐՄԵՆՈՒՀԻ (անփոյթ): **Ճշմարիտն ես ասում: (Ուզում է գնալ աջ կողմի երկրորդ դռներով, Սամսոնին տեսնելով, կանգ է առնում):**

ՏԵՍԻՆ Կ.

Արմենուհի, Սամսոն և Վիրգինէ.

ՍԱՄՍՈՆ (գալիս է աջ կողմի առաջին դռներով: Հագած է ուրիշ հագուստ—մոխրագոյն կօծալէ): **Վիրգինէ՛, աղախնին հրամայիր երկու զաւաթ սուրճ տանել իմ սենեակը:**

ՎԻՐԳԻՆԷ. **Իսկոյն:** (Շտապով գնում է ձախ կողմի առաջին դռներով):

ՏԵՍԻՆ ԿԱ.

Սամսոն և Արմենուհի.

ՍԱՄՍՈՆ (սպասել է, որ Վիրգինէն հեռանայ: Գրգուած է): **Լսի՛ր: չայրդ իրան խելօք չի պահում. ես պատասխանատու չեմ իմ մասին:**

ԱՐՄԵՆՈՒՀԻ. **Ի՞նչ է պատահել:**

ՍԱՄՍՈՆ. **Այս բոպէին նա ինձ վիրաւորեց օտարի ներկայութեամբ:**

ԱՐՄԵՆՈՒՅԻ. Վիրաւորե՞ց, քե՞զ, հա՞յրս. այդ անկարելի բան է:
ՍԱՄՍՈՆ. Ահանջ դիր. նա անցնում էր իմ լուսամտի առջևով:
Ես խնդրեցի նրան մտնել իմ սենեակը մի ըոպէ. կամենում էի
ցոյց տալ նրան Վառլամեանի շինած պլանը մեր նոր տան
համար: Պատիւ էի ուզում անել: Երեւակայի՛ր, նա ինչ պա-
տասխան տւեց. «Թո՛ղ ինձ հանդիստ, ես չեմ ուզում տես-
նել քո նոր տունը, որ շինում ես հինը քանդելով»): Ի՞նչ էր
ուզում ասել այդ խօսքերով—չհասկացայ. միայն նրա ասելու
ձևը, դէմքը, ձայնը այնքան կոպիտ էին, որ մնացի ամօթա-
հար Վառլամեանի առջև: Պէտք է ասել, որ առհասարակ
վերջերսնա իմ դէմ ինչ որ թշնամական դիրք է բռնել: Ապրելով
իմ տանը, նա կրում է իմ դէմ մի անհասկանալի ոխ: Այդ
ես համբերել չեմ կարող, լսո՛ւմ ես չեմ կարող: (Ուզում է զնալ):

ԱՐՄԵՆՈՒՅԻ. Սպասի՛ր: Քո խօսքերն ինձ ապշեցնում են: Իմ
հայրը ոչ չար մարդ է, ոչ անտակտ: Եթէ արդարև նա քեզ
վիրաւորել է, կնշանակի մի պատճառ ունի և, անկասկած,
լուրջ պատճառ:

ՍԱՄՍՈՆ. Ես չգիտեմ և չեմ էլ հետաքրքրւում նրա պատճառ-
ներով. գիտեմ միայն, որ եթէ այդպէս շարունակելի, ստիպ-
ւած կլինեմ... (Զսպում է իրան):

ԱՐՄԵՆՈՒՅԻ (զուշակելով): Դուրս անել նրան քո տնից, այնպէս
չէ: Շատ լաւ. տունը քոնն է, ունիս իրաւունք: Բայց
լսիր, առանց քո սպառնալիքի էլ իմ հայրը կհեռանայ քո
տնից: Արդէն նա ինքը վաղուց էր ուզում հեռանալ. ես
չէի թողնում: Վաղը նա այլևս քեզ չի անհանգստացնիլ.
բաւական ես:

ՍԱՄՍՈՆ. Ես չեմ ուզում, որ մարդիկ ասեն, թէ Ալադեանն
իր աներոջ վերաբերմամբ եղել է անբաղաքավարի: Միայն
ինձ թւում է, որ մեր փոխադարձ յարաբերութիւնների
մէջ երրորդ անձի մասնակցութիւնը աւելորդ է:

ԱՐՄԵՆՈՒՅԻ. Աս, այդպէս է, կեցցե՛ս, կեցցե՛ս: Ես վաղուց էի փափագում լսել այդ քեզնից: Շատ բարի, իմ հայրը կհեռանայ քո տնից և դու երբէք չես տեսնիլ նրա երեսը: Բայց կան և ուրիշ անձնաւորութիւններ, որ աւելի են խառնուում մեր փոխադարձ յարաբերութիւնների մէջ, քան իմ հայրը: Այդ քո մայրն է և քո քոյրը: Դու էլ նրանց հեռացրու: Համաձայն ես:

ՍԱՄՍՈՆ (զարմացած): Ի՞նչ, ես բաժանուեմ իմ ծնողից:

ԱՐՄԵՆՈՒՅԻ. Ինչո՞ւ չէ. չէ՞ որ ես բաժանուում եմ իմ ծնողից:

ՍԱՄՍՈՆ. Դու կին ես, ես այր. դու ես եկել իմ մօր տունը և ոչ նա՛ քո տունը:

ԱՐՄԵՆՈՒՅԻ. Ահա թէ ինչ: Եւ դու քեզ համարում ես լուսաւորւած մարդ: Սամսոն, մեր երջանկութիւնը անկախ հիմքի վրայ պիտի դրւի, եթէ ուզում ենք վայելել փոխադարձ երջանկութիւն: Ես կյարգեմ քո մօրը բիւր անգամ աւելի, ես սուրբի պէս կպաշտեմ նրան, եթէ նա հեռու լինի մեզնից. գոնէ այնքան հեռու, որ չխառնւի քո և իմ զգացումների մէջ: Ես աւագ քրոջս պէս կպատուեմ քո քրոջը, եթէ նա ինձ հանգիստ թողնի: Մի փոքր առաջ, նա տիկին Սիրանոյշի ներկայութեամբ, հինգ անգամ ինձ վիրաւորեց կոպիտ ակնարկներով: Ես հազիւ կարողացայ ինձ զսպել:

ՄԵԼԱՆԻԱ (զալիս է աջ կողմի առաջին դռներով, երկու գաւաթ սուրճ ձեռքին և բեմով անցնում է աջ կողմի առաջին դռներով):

ՍԱՄՍՈՆ (մտածել է Արմենուհու խօսքերի միջոցին): Գուցէ դու էլ ունիս իրաւունք:

ԱՐՄԵՆՈՒՅԻ (ողելորւած): Ա՛խ, այդ իրաւունքը տալիս է ինձ իմ սրտի պահանջը, իմ զգացումների անկախութիւնը, վերջապէս, իմ սէրը դէպի քեզ: Բաժանուե՛նք մեր մերձաւորներից նրանց աւելի յարգելու և աւելի սիրելու համար:

- ՍԱՄՍՈՆ** (վճռական): Շատ բարի, ես համաձայն եմ, թող քո-
 ասածը լինի:
- ԱՐՄԵՆՈՒՅԻ** (ուրախացած): Ա՛հ, վերջապէս: Եթէ չեմ սխալոււմ,
 այդ առաջին զիջումն է, որ անում ես ինձ: Շնորհակալ եմ:
- ՍԱՄՍՈՆ**. Բայց ո՛չ, իհարկէ, այժմ: Սպասենք ամառը վերջա-
 նայ: Քաղաք վերադառնալով, մայրս կերթայ Վիրգինէի
 տանն ապրելու, իսկ մենք կապրենք առանձին: Գո՛հ ես
 ինձանից այժմ: (Գրկում է Արմենուհուն):
- ԱՐՄԵՆՈՒՅԻ** (խանդավառութեամբ գրկելով Սամսոնին): Գո՛հ եմ, ան-
 չափ գո՛հ, որովհետեւ այդ դոհաբերութիւնը ցոյց է տա-
 լիս, որ դու ինձ քիչ թէ շատ սիրում ես:
- ՍԱՄՍՈՆ**. «Քիչ թէ շատ». թեթեամիտ, մի՞թէ կասկածում
 ես իմ սիրոյ մասին: (Փաղաքշում է):
- ԱՐՄԵՆՈՒՅԻ**. Օհ, չեմ ուզում կասկածել, երբէ՛ք: (Նորից գրկե-
 լով Սամսոնին): Ա՛հ, այժմ կարող եմ ասել, որ ես սկսում
 եմ ապրել, վերջապէս...
- ՍԱՄՍՈՆ** (մեղմիկ հեռացնելով Արմենուհուն): Բայց լսիր, ես էլ ու-
 նիմ մի պայման:
- ԱՐՄԵՆՈՒՅԻ**. Ասա՛, կանխաւ ընդունում եմ քո բոլոր պայ-
 մանները:
- ՍԱՄՍՈՆ**. Քո հայրն աղնիւ մարդ է, խօսք չունիմ: Բայց շատ
 դիւրահաւանն է և յափշտակող: Ինձ թւում է, որ թրշ-
 նամիներս ինձ զրպարտել են նրա մօտ: Ո՞վ գիտէ ինչեր
 են ասել: Համոզիր նրան, որ փողոցային լուրերի վրայ
 ուշադրութիւն չդարձնի և դու էլ մի՛ հաւատար նրա
 լսածներին իմ մասին: Համաձայն ես:
- ԱՐՄԵՆՈՒՅԻ** (մի փոքր հիասթափւած): Այդ ի՞նչ է նշանակում.
 քո խօսքերը մութն են ինձ համար:
- ՍԱՄՍՈՆ**. Լա՛ւ, լա՛ւ, յետոյ կբացատրեմ: Այնտեղ Վառլամեա-
 նը ինձ սպասում է, յետոյ կառավարիչը կգայ: Բայց կէս

ժամ անցած էս ազատ եմ և կարող եմ գրկել քեզ: (Գնում է աջ կողմի առաջին դռներով):
ԱՐՄԵՆՈՒՀԻ (խանդագին համբուրելով Սամսոնին): Գնա՛, էս քեզ կսպասեմ ինչպէս սիրահար:

ՏԵՍԻՆՆԵՐ ԵՒ ՄԵԼԱՆԻԱ.

Արմենուհի եւ Մելանիա.

ՄԵԼԱՆԻԱ (զալիս է աջ կողմի առաջին դռներով դատարկ սկուտեղը ձեռքին և ուզում է սեղանի վրայ գտնուող դատարկ գաւաթները ժողովել):

ԱՐՄԵՆՈՒՀԻ. ՄԵԼԱՆԻԱ, տես Արմենակը զարթնել է: (Մօտենում է դաշնամուրին եւ մի քանի ուրախ ափօրհներ վերցնում):

ՄԵԼԱՆԻԱ (սկուտեղը դնելով սեղանի վրայ, շտապով անցնում է աջ կողմի երկրորդ դռները եւ իսկոյն յետ զալիս): **Զարթնել է:** (Դատարկ գաւաթները ժողովում է):

ԱՐՄԵՆՈՒՀԻ. Դայեակն այնտե՞ղ է:

ՄԵԼԱՆԻԱ. Այո՛: (Սկուտեղը գաւաթների հետ տանում է ձախ կողմի առաջին դռներով):

ԱՐՄԵՆՈՒՀԻ (զնում է աջ կողմի առաջին դռներով):

ՏԵՍԻՆՆԵՐ ԵՒ ՄՈՒՏԻՓԱՆ.

Կոնստանդին և Մուտփան.

ՍՏԵՓԱՆ (զալիս է ձախ կողմի առաջին դռներով): **Զարմանալի հայր էք. կարծես, դուք ձեր ճիակ դաւակի թշնամին էք:**

ԿՈՆՍՏԱՆԴԻՆ (զալիս է Մուտփանի հետ նոյն դռներով: Միշտ յուզւած): **Դուք դատում էք ինչպէս բժիշկ, որ վախենում է հիւանդին յայտնել նրա վտանգաւոր կացութիւնը: Բայց էս բժիշկ չեմ, այլ զինւորական. էս սովոր եմ վտանգների դէմ կանգնել ճակատ ճակատի:**

ՍՏԵՓԱՆ. Ընտանեկան կեանքը պատերազմի դաշտ չէ, բարեկամ:

ԿՈՆՍՏԱՆԴԻՆ. Գիտեմ, բայց ես էլ Միդաս թագաւորի սա-
փրիչը չեմ, որը ճշմարտութեան լծից ազատւելու համար
մի փոս էր փորել և ամեն օր, դլուխը նրա մէջ մտցնե-
լով, ասում էր. «Տէրս իշի աղանջներ ունի»։ Ոչ, ոչ, իմ
աղջիկը պէտք է լսի ճշմարտութիւնը։

ՍՏԵՓԱՆ. Եւ դուք կարծում էք դրանով կբարւոքւի՞ նրա
վիճակը։

ԿՈՆՍՏԱՆԴԻՆ. Չգիտեմ, բայց նախ և առաջ ճշմարտութիւ-
նը։ Արմենուհին արդէն կասկածում է և մի քանի անգամ
փորձել է ինձնից խօսք քաշել։ Այժմ, երբ արդէն համոզ-
ւած եմ, չեմ թոյլ տալ այլ ևս, որ իմ աղջիկը ամենու-
րեք ծաղրի առարկայ դառնայ։ Ա՛հ, մի քանի րոպէ առաջ
քիչ էր մնում լրբին ապտակ տալի լուսամտից՝ Վառլա-
մեանի ներկայութեամբ։ (Մխախտտ է վառում)։

ՍՏԵՓԱՆ. Փորձանքի էք ենթարկում ձեր աղջկան, զնդապետ,
մի՛ արէք։

ԿՈՆՍՏԱՆԴԻՆ. Ա՛ա, մանկութիւնից է նա սովորել փորձանք-
ներին նայել համարձակ։ Հինգ տարեկան էր նա, երբ մի
օր կառքով հանգուցեալի հետ Ղուսար էինք գնում։ Աւա-
զակները յարձակւեցին մեզ վրայ, կառքը պահեցին։ Ես
հրացանս առայ, հանգուցեալը ոււսուերս, իսկ Արմենու-
հին ոտքի կանգնեց կառքի մէջ համարձակ։ Օհ, պէտք է
տեսնէիք նրան այդ վայրկեանին։ Նրա սիրուն ձագերը
ցցւել էին ասեղների պէս, նրա վառվռուն աչքերից ար-
ցունքի փոխարէն կայծեր էին թափւում։ Աւազակապետը
հիանալով նրա հրեշտակային կատաղութիւնից, գոռաց իր
խմբին. «Թողէք անցնեն, այդ երեխան ինձ չաղթեց»։ Եւ
Արմենուհին մեզ ազատեց։

ՍՏԵՓԱՆ. Լա՛ւ, դուք գիտէք։ Տեսէք միայն, որ յետոյ չզրդ-
չար։

ԿՈՆՍՏԱՆԴԻՆ. Ճշմարտութեան կաթովն է նա սնւել, բժիշկ:
Նա չի կարող ապրել ստի և կեղծիքի մէջ: (Յուզում է):
Ա՛հ, բարեկամս, դառն է, շատ դառն՝ ունենալ մի հատիկ
զաւակ և տեսնել նրան դժբաղդ: (Աչքերը սրբում է Թաշկի-
նակով):

ՍՏԵՓԱՆ. Լա՛ւ, հանգստացէք: Գնանք սլարտէղ:

ԿՈՆՍՏԱՆԴԻՆ. Գնանք, այժմ ես այս տանը խեղդւում եմ:
(Գնում է խորքի դռներով):

ՍՏԵՓԱՆ (հետևում է Կոնստանդինին):

ՏԵՍԻԼ ԻՃ.

Արմենուհի և դայտակ, երեխային գրկած.

ԴԱՅԵԱԿ (զալիս է աջ կողմի երկրորդ դռներով, շքեղ հագցրած մի տա-
րեկան երեխայ գրկած):

ԱՐՄԵՆՈՒՅԻ (զալիս է դայտակի հետ նոյն դռներով): Տարէ՛ք ան-
տառ, թող մի փոքր անուշ օդ շնչի եղևնիների տակ:
(Համբուրում է երեխային և ուղեկցում մինչև խորքի դռները):

ՏԵՍԻԼ Կ.

Արմենուհի, յետոյ Հմայտակ.

ԱՐՄԵՆՈՒՅԻ (մի քանի վայրկեան լուսամտով նայում է երեխայի յետևից,
ապա դանդաղօրէն մօտենում է դաշնամուրին, նստում: Սկսում է նւա-
գել նախ մի փոթորկալի եղանակ, ապա մի Թախծալի ումանս):

ՀՄԱՅԵԱԿ (նւագումը սկսելուց բաւական անցած զալիս է աջ կողմի առա-
ջին դռներով գլխարկը ձեռքին և աննկատելի նստում է մի անկիւ-
նում: Հազնւած է այնպէս, ինչպէս առաջին արարւածում: Իծմանսի
տպաւորութեամբ տխրում է):

ԱՐՄԵՆՈՒՅԻ (բաւական ժամանակ չի նկատել Հմայեակին: Երեսը պատահաբար դարձնելով, տեսնում է նրան): Ա՛հ, դուք այստե՞ղ էք: (Գլուխն երկու անգամ շարժում է ի նշան բարեի առանց նւագումը ընդհատելու):

ՀՄԱՅԵԱԿ. Ես վերջացրի իմ գործը: Այժմ ձեր ամուսինը զբաղւած է իր կառավարչի հետ: Շարունակեցէ՛ք, տիկին, շարունակեցէ՛ք, խնդրեմ: Անցեալ օրն ես պատիւ ունեցայ ծանօթանալ և այցելել ձեր նախկին ուսուցչին: Այդ վառվառն ծերունին առանց հիացման չի կարողանում խօսել ձեր մասին:

ԱՐՄԵՆՈՒՅԻ. Իմ սեղանի առաջին զարդը նրա համակրելի լուսանկարն է:

ՀՄԱՅԵԱԿ. Իսկ ձեր լուսանկարը ես տեսայ նրա դաշնամուրի վրայ: Նա ասում էր յուզւած ծայնով. «Պարոն, նա Աստուածային տուրք ունի, զգացում, ճաշակ: Նա տաղանդ է և մեծ տաղանդ: Ափսո՛ս, որ այդ տաղանդը թառամում է իր շրջանից դուրս»): Այո՛, տիկին, այլ է ձեր շրջանը. այն արւեստի փշոտ ասպարէզն է, ընտիր հոգիների դրախտավայրը: Նւազեցէ՛ք, նւազեցէ՛ք. այդ թախծալի հնչիւնները մարդու սրտից հառաչանքներ են կորզում: (Հռում է):

ԱՐՄԵՆՈՒՅԻ (մի փոքր ևս լուռ նւագելով, դադարում է եւ ոտքի կանգնում): Դուք տխրեցի՞ք: Բարև: (Ձեռ է տալիս):

ՀՄԱՅԵԱԿ (ոտքի կանգնելով): Տիկի՛ն, ես ունիմ մի ընկեր, որի կեանքը անձայն, անարիւն ողբերգութիւն է: Երբ դուք նւագում էիք, իմ առջև կենդանի պատկերացաւ այդ կեանքը: Երևակայեցէ՛ք, որ նրա դժբաղդութիւնն ունեցել է երջանիկ նախերգանք և այդ նախերգանքը երգւել է այն ուսմանսով, որ իսկոյն նւագեցիք: Կկամենայի՞ք լսել այդ պատմութիւնը: Նա երկար չէ, և ես այս ըոպէին զգում եմ անյաղթելի պահանջ ձեզ պատմելու:

ԱՐՄԵՆՈՒՅԻ. Նստեցէք, խնդրեմ: (Նստում է, ցոյց տալով իրանից ոչ հեռու մի աթոռ Հմայեակին): Ես ձեզ լսում եմ:

ՀՄԱՅԵԱԿ (նստելով): Երեսուն և հինգ տարեկան է իմ ընկերը այժմ, ամուսնացած, զաւակների հայր, ընտանեկան կեանք կոչւած հրէշի ստրուկ:

ԱՐՄԵՆՈՒՅԻ. Տարօրինակ լեզու:

ՀՄԱՅԵԱԿ. Դա մի հոգի է, ստեղծւած սիրելու փափագով և սիրւելու կրակոտ երազով, բայց ստրուկ: Չար ոգիները նրան ձերբակալել են և շղթայել: Ուղիղ տասներկու տարի սրանից առաջ նա ազատ էր, ինչպէս լեռնային զեփիւռը, և կարծում էր այդպէս պիտի մնայ մինչև մահ: Բայց նա հանդիպեց դեին, որ ընդունել էր հրէշտակի կերպարանք, և յափշտակեց: Դա մի զւարթ, կայտառ էակ էր, ընդունակ ոչ միայն մտածելու, այլ և զգալու: Երգում էր, պարում էր, թռչկոտում: Եւ նւագում էր: Լաւ էր նւագում թէ վատ—ընկերս չգիտէր, բայց զգացում էր, որովհետև նրա հոգին ունէր միշտ զգացւելու պահանջ, ինչպէս մանուկն ունի լալու պահանջ: Օրիորդը հետաքրքրւում է բոլորով, ինչ որ գեղեցիկ է, ինչ որ բանաստեղծական է, ինչ որ զատում է մարդուն անասնից, ինչ որ մաքրում, բիւրեղացնում է նրա հոգին: (Հառաչում է): Ընկերս սիրահարւեց: Սիրոյ բոցավառ խոստովանութիւնն եղաւ օրւայ ճիշտ այս պահին և ճիշտ այն միջոցին, երբ օրիորդը նւագում էր ձեր նւագած ոսմանսր: Դուք ձանձրանում էք:

ԱՐՄԵՆՈՒՅԻ. Շարունակեցէք, ձեր պատմելու ձեր նոյնքան հետաքրքրական է, որքան և նիւթը:

ՀՄԱՅԵԱԿ. Օրիորդը չձերժեց, որովհետև իր առջև կանգնած էր մի ոչ տգեղ երիտասարդ, առողջ, կայտառ, որ խոստանում էր փայլուն ապագայ... Նրանք ամուսնացան: Եւ

այս եղաւ իմ թշուառ ընկերոջ դժբաղդութեան սկիզբը: Հազիւ մի տարի անցած՝ դէր դէն ձգեց իր քօղն և երևան եկաւ իր իսկական պատկերով: Ընկերս նայեց և սարսափեց: Նրա աչքերն այլ ևս վարագուրւած չէին առաջին սիրոյ վարդագոյն մշուշով: Այդ ուրախ, վառվռուն, գեղեցիկով և գաղափարականով ողևորւող էակը հէնց որ կին դարձաւ, հէնց որ հօրից ստացաւ օժիտը, հէնց որ ճաշակեց ոսկու թունաւոր ժանգը, աղատեց իր հոգին կապանքներից: Նա դարձաւ այն, ինչ որ էր էսպէս:

ԱՐՄԵՆՈՒՅԻ. Եւ ամուսինների մէջ սկսեցին ընդհարումներ...

ՀՄԱՅԵԱԿ. Ա՛, ով չի կրել—չի կարող զգալ այն տւայտանքը, որ կոչւում է ընտանեկան կեանք, երբ ամուսիններն օտար են միմեանց: Օտար իրանց մտքերով, ճաշակով, օտար հոգու պահանջներով, սրտի զգացումներով: Եւ խորտակեցին թշուառ ընկերոջս երազները: Նա, որ երևակայում էր պօէզիայով զարդարել առօրեայ կեանքի տափակութիւնը, դատապարտւեց անտանելի պրօզայի: Այդ կնոջ համար գրքերը փոխարինւեցին հօրից ստացած տոկոսաբեր թղթերով, գաղափարները հաշի տետրակներով, և նրա ճաշակը, թեթև թուիչքից յետոյ, գնաց, թառ եղաւ թանկագին գլխարկների վրայ: Նա սկսեց արհամարհել բոլորը, բոլորը, ինչ որ կապ չունէր սնտոի պչրանքի, կուշտ որովայնի և հանգիստ քնի հետ: Բայց ամենից դառը, ամենից ողբալին իմ ընկերոջ համար եղաւ այն, որ նրա կնոջ դաշնամուրը փոշի պատեց...

ԱՐՄԵՆՈՒՅԻ. Դաշնամուրը փոշի պատեց... (Նայում է խորը Հմայեակին):

ՀՄԱՅԵԱԿ. Այո, և այն մարդը, որ պաշտում էր երաժշտութիւնը իբրև երկրորդ աստուած ճարտարապետութիւնից յետոյ, այլ ևս բաղդ չունեցաւ սքանչելի վայլսը լսելու:

ԱՐՄԵՆՈՒՅԻ (մեկուսի): Ճարտարապետութիւնից յետոյ: (Բարձր):

Սպասեցէ՛ք, ես, կարծես, ճանաչեցի ձեր ընկերոջը: (Կանգ է առնում ոտքի):

ՀՄԱՅԵԱԿ (վեր կենալով): Լսեցէ՛ք, տիկին, ես դեռ չեմ վերջացրել: Նա գերի է, նա ստրուկ է, նրա ձեռներն ու ոտները շղթայւած են այն անողոր շղթայով, որ մարդիկ անլանում են օրինական ամուսնութիւն: Նրա սրտից արիւն է կաթում, երբ ամեն անգամ նայում է փակ դռնամուրին: Նա ասում է. «Լաւ, ես համաձայն եմ կրելու այս տաժանակիր պատիժը, միայն թէ լսեմ այդ հնչիւնները»: Սակայն դէն արտաքսել է նրանց: (Հառաչում է, կարծատե լռում): Անցնում են տարիներ, անգոյն, անկրակ գոյութեան տարիներ, որ տափակ գլուխներն անլանում են խաղաղ ընտանեկան կեանք և որ զգայուն մարդու համար գերեզման է: (Դարձեալ հառաչում է, լռում, ծակատը տրորում): Մի օր յանկարծ, ո՛վ գիտէ, գուցէ Նախախնամութեան կամքով իմ ընկերը մի հեռաւոր երկրում, մի անձանօթ շրջանում հանդիպում է մի ընտիր էակի: Դա է լինում իսկական հրեշտակը, դա է լինում նրա երազների կատարեալ մարմնացումը, վասնզի այդ էակը նիւթական կեանքում պահպանած է լինում իր հոգեկանը: Եւ ընկերոջս շղթան, որ մինչև այդ ժամանակ պողպատից էր, փոխւում է փշերի:

ԱՐՄԵՆՈՒՅԻ (շփոթւել է, յուզւած): Կանգ առէք. մնացեալը գիտեմ արդէն:

ՀՄԱՅԵԱԿ. Ո՛չ, տիկին, դեռ չգիտէք էականը: Լսեցէ՛ք ինչ է ասում այսօր այդ թշւառը: Նա ասում է, որ հոգիները մենակ չեն գալիս այս աշխարհ, այլապէս նրանց գոյութիւնը կլինէր յաւիտենական մենակեաց բանտարկութիւն: Նա պնդում է, որ իւրաքանչիւր էակ ունի իր ընկերը,

զուգակիցը: Փոյթ չէ, թող նրանք բաժանւած լինեն իրարից տարածութեամբ, ժամանակով, օրէնքների դաժանութեամբ և աւանդութիւնների բռնութեամբ, նրանք անհանգիստ փնտրում են միմեանց: Եւ երբ մի օր հանդիպում են իրար, այլ ևս ոչ ոք և ոչինչ չի կարող նրանց բաժանել... Նոյն իսկ սուրբ համարւած պարտականութիւնները...

ԱՐՄԵՆՈՒՅԻ (յուզմունքից գունատւել է): Այդպէս է արդեօք:

ՀՄԱՅԵԱԿ (աւիւնով, յափշտակւած): Այսպէս է, տիկի՛ն, այսպէս պէտք է լինի: Այս համոզմունքը հիւսւած է իմ ընկերոջ... այժմեան տառապանքներից...

ԱՐՄԵՆՈՒՅԻ. Իսկ եթէ հոգիներից մէկը չունենայ ոյժ ոսնատակ անելու օրէնքներն ու պարտականութիւնները, այն ժամանակ:

ՀՄԱՅԵԱԿ. Այն ժամանակ միւսը... միւսը պէտք է կործանւի... Բայց ի՞նչ պատահեց ձեզ:

ԱՐՄԵՆՈՒՅԻ (գունատւել, նկատելով Վիրգինէին դռների մէջ, յենւել է աթոռներից մէկի կռնակին): Ոչինչ, գլուխս պտտւեց:

ՏԵՍԻՆ, XI.

Նոյնք և Վիրգինէ.

ՎԻՐԳԻՆԷ (հանդարտ բաց է արել ծախ կողմի երկրորդ դռները և ներս մտել մի չարախի՛նդ ժպիտ երեսին): Ա՛հ, ներեցէք, ես կարծում էի ոչ ոք չկայ այստեղ: Ես կերթամ: (Ձևանում է թէ յետ է գնում):

ԱՐՄԵՆՈՒՅԻ (արագութեամբ ժողովել է ուշքը և հպարտ նայում է Վիրգինէին):

ՀՄԱՅԵԱԿ (ցնցւել է, բայց եւ իսկոյն իշխել իրան): Տտեսութիւն,

տիկին: (Ձեռն է տալիս Արմենուհուն: Վիրգինէին): Յարգանքներս:
(Վիրգինէին գլուխ տալով, գնում է խորքի դռներով):

ՏԵՍԻՆԱ XII.

Արմենուհի և Վիրգինէ.

ՎԻՐԳԻՆԷ (նայել է Հմայեակի յետևից ջարախինդ և նոյն ժպիտը երեսին
մօտենում է դաշնամուրին ու ձեռք քսում նրա կափարջին: Բարձրա-
ձայն ծիծաղում է): Հա՛, հա՛, հա՛...

ԱՐՄԵՆՈՒՀԻ (վրդովւելով): Ինչո՞ւ համար ես ծիծաղում:

ՎԻՐԳԻՆԷ. Ոչինչ, կարծում էի դաշնամուրդ փոշի է պատել:

ԱՐՄԵՆՈՒՀԻ (համբերութիւնը կորցնելով): Լրտե՛ս, լրտե՛ս:

ՎԻՐԳԻՆԷ. Լաւ, մի՛ կատաղիր, ների՛ր, ես գնում եմ: (Բարձր
ծիծաղելով, գնում է ձախ կողմի առաջին դռներով):

ՏԵՍԻՆԱ XIII.

Արմենուհի եւ Կոնստանդին.

ԿՈՆՍՏԱՆԴԻՆ (գալիս է խորքի դռներով): Դու մենակ ես:

ԱՐՄԵՆՈՒՀԻ. Ո՛չ, հայրիկ, ես միշտ շրջապատւած եմ խնա-
մակալներով: Հայրիկ, ինչո՞ւ համար ես Սամսոնին վիրա-
ւորել:

ԿՈՆՍՏԱՆԴԻՆ. Նրա համար, Արմենուհի, որ քո ամուսինը
լիբբ է, լիբբ...

ԱՐՄԵՆՈՒՀԻ (վշտացած, դառը յանդիմանութեամբ): Հայրի՛կ: (Նայում
է հօրը սուր հայեացքով, վախեցած):

(Թե՛ թ և լռութիւն):

ԿՈՆՍՏԱՆԴԻՆ. Այ՛ո, որդի, քո կասկածները ճիշտ են:

ԱՐՄԵՆՈՒՅԻ. Ա՛հ: (Ընկձած ընկնում է բազկաթոռի վրայ): Ո՛չ այդ,
ոչ այդ: (Լռութիւն):

ԿՈՆՍՏԱՆԴԻՆ. Մարդիկ մեր ժամանակում այդ համարում են
սովորական բան, սիրելի: Էհ, մենք էլ համարենք, ինչո՞վ
ենք պակաս ուրիշներից:

ԱՐՄԵՆՈՒՅԻ (առանց հորը նայելու): Ո՞ւմ հետ, ո՞վ է նա:

ԿՈՆՍՏԱՆԴԻՆ. Սատանան գիտէ, քի՞չ կան:

ԱՐՄԵՆՈՒՅԻ. Ես ճանաչում եմ նրան:

ԿՈՆՍՏԱՆԴԻՆ. Աստուած մի՛ արասցէ, որ դու ծանօթ լինես
այդպիսիների հետ: Վարչաւայից է թէ Պետերբուրգից—
չգիտեմ, չինովնիկի կնիկ է:

ԱՐՄԵՆՈՒՅԻ (մաքառել է իր դէմ: Ոտքի է կանգնում): Այդ անկա-
րելի է, այ՛ո, անհնարին է: Մի քիչ առաջ նա գրեթէ իր
սէրը բացատրեց ինձ: Սամսո՞նը, այն ժուժկալ մամրդը: Ո՛չ,
հայրիկ, նա նախանձողներ շատ ունի, սուտ լուրեր են
տարածում նրա մասին: Հայրի՛կ, չլինի՞ թէ զրպարտում
ես նրան:

ԿՈՆՍՏԱՆԴԻՆ. Հարիւր անգամ ուրախ կլինէի զրպարտչի
անունը կրել, քան այս լուրը քեզ հաղորդել: Ես էլ սկըզ-
բում չէի հաւատում. ո՞ւմ չեն բամբասում: Բայց չեղաւ:
Փաստեր շատ ունիմ. հարցրո՛ւ Ստեփանից, նա կհամոզի
քեզ:

ԱՐՄԵՆՈՒՅԻ. Ահա՛ թէ ինչ են նշանակում նրա խօսքերը.
«Քո հայրը դիւրահաւան է, համոզիր նրան, որ փողոցա-
յին լուրերի վրայ ուշադրութիւն չդարձնի»): Այժմ հաս-
կանալի է: Հայրիկ, դու տեսե՛լ ես նրան:

ԿՈՆՍՏԱՆԴԻՆ. Մի անգամ ցոյց են տւել արտիստական կլու-
բում:

ԱՐՄԵՆՈՒՅԻ. Երիտասա՞րդ է:

ԿՈՆՍՏԱՆԴԻՆ. Մի՞թէ կարելի է այժմեան կնոջ հասակը որոշել:

ԱՐՄԵՆՈՒՅԻ. Դեղեցի՞կ է:

ԿՈՆՍՏԱՆԴԻՆ. Մի՞թէ կարելի է այժմեան կնոջ գեղեցկութիւնը որոշել:

ԱՐՄԵՆՈՒՅԻ (բոլորովին տիրել է իրան): Շնորհակալ եմ, հայրի՛կ: Աւելի լաւ էր դառը ճշմարտութիւնն իմանալ, քան կեղծ դրութեան մէջ մնալ: Շատ լաւ, այժմ ես գիտեմ ինչպէս պէտք է վարւեմ նրա հետ:

ԿՈՆՍՏԱՆԴԻՆ. Չմոռանաս, Արմենուհի՛, որ բացի քեզնից ոչ ոք չունիմ այս աշխարհում:

ԱՐՄԵՆՈՒՅԻ. Ո՛չ, հայրիկ, ես ոչ թողլ եմ, ոչ չիմար: Հեռացիր այստեղից: Նա իսկոյն գալու է: Ես չեմ ուզում քո ներկայութեամբ հանդիպել նրան: Օ՛հ, այժմ նա ինձ կճանաչի: Ես իր երևակայած կանանցից չեմ:

ԿՈՆՍՏԱՆԴԻՆ (մի վայրկեան խորհում է, ապա վճռական մի շարժումն անելով հանդարտ քայլերով գնում է ձախ կողմի առաջին դռներով):

ՏԵՍԻՆ, XIV.

Արմենուհի, մենակ.

ԱՐՄԵՆՈՒՅԻ (մնալով մենակ, մի քանի վայրկեան մտածման մէջ է: Յետոյ նստում է և սկսում է լաց լինել: Լացը փոխում է հեկեկանքի: Այդ տևում է բաւական ժամանակ: Ոտքի է կանգնում, աչքերը արագ-արագ սրբում է, ուշքը ժողովում այն պահին, երբ Սամսոնը ներս է մտնում):

ՏԵՍԻՆԻ, XV.

Արմենուհի եւ Սամսոն.

ՍԱՄՍՈՆ (գալիս է աջ կողմի երկրորդ դռներով): **Վերջապէս, աղատ-
ւեցի գործերից: Այժմ կարող եմ քեզ համբուրել: (Մօտե-
նում է Արմենուհուն):**

ԱՐՄԵՆՈՒՀԻ (բարձր ձայնով): **Մի՛ համարձակելի մօտենալ ինձ:
(Քալերն ուղղում է դէպի աջ կողմի երկրորդ դռները):**

ՍԱՄՍՈՆ (ապշոււմ է): **Այդ ի՞նչ է նշանակում:**

ԱՐՄԵՆՈՒՀԻ (դռների մօտից): **Մի քանի րոպէ սրանից առաջ
այստեղ մէկն իր կեանքը կտար ինձ, եթէ ես պահանջէի:
Դուք չարժէք նրա գարշապարին անգամ: Բայց ես փա-
փագում էի ձեզ միայն սիրել, ձեզ միայն բարձր տեսնել:
Այժմ կանգ առէք, իմ սենեակի դռները փակ են ձեզ հա-
մար: (Գնում է աջ կողմի երկրորդ դռներով):**

ՎԻՐԳԻՆԷ (ներս է մտել ձախ կողմի առաջին դռներով և կանգնել է
դռների առջև Արմենուհու խօսքերի միջոցին):

ՍԱՄՍՈՆ (մի քայլ անելով Արմենուհու յետևից, կանգ է առնում): **Բայց
բացատրի՛ր...**

ՎԻՐԳԻՆԷ. Ես կբացատրեմ:

Վ Ա Ր Ա Գ Ո Յ Ր.

ԱՐԱՐԻԱԾ ԵՐՐԱՐԳ.

Երկրորդ արարածի տեսարանն անփոփոխ, միայն չկայ ծաղիկների փունջը: Իրիկնադէմ է: Արեգակի ծառագայթները ոսկեզօծել են բեմի լետին մասը:

ՏԵՍԻԼ 1.

Մելանիա եւ Գարեգին.

ՄԵԼԱՆԻԱ (Գարեգնի օգնութեամբ դաշնամուրին շապիկ է հագցնում):

Մի քիչ էլ քո կողմը քաշիր: Այդպէս, բաւական է:

ԳԱՐԵԳԻՆ. Ձհասկացայ ինչո՞ւ համար ենք այսպէս վաղ ծածկում դաշնամուրը: Դեռ քաղաք գնալուն մի ամիս է մնում:

ՄԵԼԱՆԻԱ. Մեր գործը չէ, պառաւը հրամայել է ծածկել, ծածկում ենք:

ԳԱՐԵԳԻՆ (սկսում է հանդարտ երգել, Մելանիային օգնելով հանդերձ):
«Ես որս էի, դու որսորդ, նետդ դիպաւ ջիզարիս»... ահ, գալիս են:

ՄԵԼԱՆԻԱ (նայելով լուսամտից դէպի դուրս): Ճարտարապետն է իր կնոջ հետ:

ԳԱՐԵԳԻՆ. Օհ, ես ասում եմ այդ կնոջը... Ժլատ է... անց-

եայները կէս գիշերին վազեցի, կառք գտայ, ճանապարհ
դրեցի, մի բան չբաշխեց: Բայց մարդը շատ լաւ մարդ
է: Էհ, վերջացաւ: (Գնում է ձախ կողմի առաջին դռներով): «Ես
որս էի, դու որսորդ»...

ՏԵՍԻԼ ԻԻ.

Հմայեակ, Սիրանոյշ և Մելանիա.

ՍԻՐԱՆՈՅՇ (զալիս է խորքի դռներով Հմայեակից առաջ: Հազած է
առաջւայ համեմատ համեստ հագուստ: Յուզւած է): **Բարև, Մելա-**
նիա, տանն ո՞վ կայ:

ՄԵԼԱՆԻԱ. **Մեծ տիկինը:**

ՀՄԱՅԵԱԿ (զալիս է խորքի դռներով Սիրանոյշից յետոյ: Հազած է ու-
րիշ հագուստ — ժակետ, շատ բաց մանիշակագոյն ժիլէ: Չեղբում
բռնած է մի թղթէ կապոց): **Իսկ պարոնդ:**

ՄԵԼԱՆԻԱ. **Անտառ գնաց, երևի շուտով կգայ:**

ՀՄԱՅԵԱԿ (նստում է բազկաթոռի վրայ, գլխարկն ու թուղթը դնելով մի
կողմը): **Ես կսպասեմ նրան:**

ՍԻՐԱՆՈՅՇ. **Ասացէք մեծ տիկնոջը, որ ես այստեղ եմ:**

ՄԵԼԱՆԻԱ. **Լա՛ւ: (Գնում է ձախ կողմի առաջին դռներով):**

ՏԵՍԻԼ ԻԻԻ.

Սիրանոյշ և Հմայեակ.

ՍԻՐԱՆՈՅՇ (հեզնաբար, սրտմտութեամբ): **Կարծեմ դու կարող էիր
պարոն Սամսոնին սպասել իր սենեակում:**

ՀՄԱՅԵԱԿ (ծխախոտ է վառում): **Ինչո՞ւ ոչ այստեղ:**

- ՍԻՐԱՆՈՅՇ** (նոյն եղանակով): Որովհետև գործով ես եկել: (Գործովս բառը շեշտում է առանձին հեղնութեամբ):
- ՀՄԱՅԵԱԿ** (խորը յանդիմանական եղանակով): Սիրանոյշ:
- ՍԻՐԱՆՈՅՇ** (աւելի գրգռած): Աստուած իմ, Աստուած իմ, ո՞վ կարող էր երեւակայել:
- ՀՄԱՅԵԱԿ** (վրդովւելով): Եթէ սկսում ես, ես կհեռանամ: (Վեր է կենում):
- ՍԻՐԱՆՈՅՇ.** Աւելի լաւ կանես, որ իսկի ոտ չդնես այս տունը:
- ՀՄԱՅԵԱԿ.** Չափը մի՛ անցնիր, խնդրում եմ: Մենք օտար տան մէջ ենք:
- ՍԻՐԱՆՈՅՇ.** Հիմա քեզ համար օտար չէ այս տունը: Տէ՛ր Աստուած, ես էլ ասում եմ, ինչո՞ւ համար է ամեն օր վաղում այստեղ: Դուրս է գալիս, որ այդ արկածախնդիր կիներ դրան խելքից հանել է:
- ՀՄԱՅԵԱԿ.** Գիտե՞ս, դու կարող ես ինձ վիրաւորել որքան կամենաս, բայց նրան հանգիստ թող:
- ՍԻՐԱՆՈՅՇ.** Ա՛, դու դեռ համարձակւում ես պաշտպանել նրան: Չե՞ս ամաչում:
- ՀՄԱՅԵԱԿ.** Մինչև այսօր ես դեռ իմ զգացումների և մտքերի համար չեմ ամաչել, յոյս ունիմ այսուհետև էլ չամաչել:
- ՍԻՐԱՆՈՅՇ** (ծաղրով): Իհարկէ, ձեզ նմանների զգացումներն ու մտքերն անարատ են: Բաւական է. ճանաչում եմ իդէալ փնտրողներին: Դուք միշտ սկսում էք երկնքում և վերջացնում երկրում: Մի քանի վայրկեան ճանճի պէս թռչում էք օդում, յետոյ նստում... աղբի վրայ: (Վեր է կենում և սկսում է անցուդարձ անել):
- ՀՄԱՅԵԱԿ** (կանգ է առել և նայել Սիրանոյշին: Ցնցւում է նրա վերջին խօսքերից): Ահ, ի՜նչ լեզու, ի՜նչ համեմատութիւն: Ես անկարող եմ վիճել այդ եղանակով:

ՍԻՐԱՆՈՅՇ (շարունակում է, ուշադրութիւն չդարձնելով Հմայեակի խօսքերի վրայ): Եւ ինչպէս է յափշտակւած, ինչպէս, Աստուած իմ: Գիշերներն էլ երազում նրա հետ է խօսում: Երբէք, երբէք ինձնով այդպէս յափշտակւած չի եղել:

ՀՄԱՅԵԱԿ. Զրպարտում ես քեզ, Սիրանոյշ, զրպարտում ես: Կար ժամանակ, որ քեզ, միմիայն քեզ էի երազում: Ես որոնում էի քո սէրը, ինչպէս մի ծարաւ ճամբորդ ջուր է որոնում ամայի անապատում: Քանի-քանի անգամ աշխատանքից յոգնած, տուն վերադառնալիս, երևակայել եմ հանդիպել մի ուրախ թռչուն, որ անհոգ բազմէր ուսերիս վրայ, շոյէր իր թևերով իմ յոգնած ճակատը և մուսցնել տար կեանքի սպանիչ ծանծրոյթը:

ՍԻՐԱՆՈՅՇ (հեղնաբար): Մի՞թէ:

ՀՄԱՅԵԱԿ. Եւ ի՞նչ եմ տեսել փոխարէնը: Ունքերը կիտած, շրթունքները սեղմած մի դէմք, խորասուզւած իր մանրմունք հաշիւների մէջ: Ինձ տեսնելով, առանց տեղիցդ շարժւելու, յայտնել ես քո ուրախութիւնը, որ այս ինչ աքցիաներում վաստակել ես այսքան, այն ինչ տոկոսաբեր թղթի արժէքը բարձրացել է: Դու եղել ես քո հօր կատարելատիպը, հրճւել ես քո վաստակով, ուրիշների կորստով: Դու եղել ես ամեն ինչ, բացի այն, ինչ որ իմ հոգին է փափագել: Քո արդ ու զարդը աւելի է հետաքրքրել քեզ, քան իմ ներքին աշխարհը: Մի շքեղ գլխարկով աւելի ես զրաււել, քան իմ զգացումների ամբողջ թափով: Եւ դու համարւել ես խելօք կին, օրինակելի ամուսին և ամենքը նախանձել են ինձ: Մինչդեռ ես չեմ իմացել գլուխս ուր թազցնեմ զայրոյթից, ծանծրոյթից և... ամօթից: (Անցնում է քսմի խորքը):

ՍԻՐԱՆՈՅՇ. Լռի՛ր, լռի՛ր, դու ցնորւել ես, դու ինքդ չգիտես ինչ ես ասում. բայց սպասի՛ր, ես քեզ հետ տանք

կնստեմ հաշւի: Այստեղ ամօթ է, դու խայտառակում ես
ինձ և քեզ...

ՏԵՍԻՒԼ IV.

Նոյնք եւ Եղիսաբէթ.

ԵՂԻՍԱԲԷԹ (գալիս է ձախ կողմի առաջին դռներով: Հագնւած է դար-
ձեալ նոյն տեսակ): **Ծառաների համար ամսական թէյ ու**
շաքար էի կշռում. ի՜նչ անեմ, ամբողջ տունն ինձ վրայ
է: (Սիրանոյշին բարևում է սիրալիր, Հմայեակին տեսնելով, աչք-
ունքը թծւեցնում է: Հազիւ գլխի թեթև շարժումով պատասխանում է
նրա բարևին): **Որդիս գնաց իր սենեակը:**

ՀՄԱՅԵԱԿ. **Շնորհակալ եմ:** (Վերցնելով գլխարկն ու թղթերը, գնում
է աջ կողմի առաջին դռներով):

ՏԵՍԻՒԼ V.

Եղիսաբէթ և Սիրանոյշ.

ԵՂԻՍԱԲԷԹ (նայել է Հմայեակի յետևից չար հայեացքով): **Տէնց առա-**
ջին օրից աչքիս դուր չեկաւ այս ձարդը, ի՜նչ թազցնեմ:

ՍԻՐԱՆՈՅՇ. **Ա՛հ, չգիտեմ ինչ պիտի լինի վերջը, բայց նա**
օրէցօր խելքը կորցնում է:

ԵՂԻՍԱԲԷԹ. **Ես իմ տան հոգսն արդէն տեսել եմ:** (Ցոյց տալով
դաշնամուրը): **Այնտեղ մտիկ արէք:**

ՍԻՐԱՆՈՅՇ (նայելով դաշնամուրին): **Աա, հասկանում եմ:**

ԵՂԻՍԱԲԷԹ (ինքնագոհ): **Այո, չար օձը հէնց նրա մէջ է նստած.**
ես հրամայեցի կապել նրա բերանը: Օ՛ճ, Վիրգինէն աչքա-
բաց կին է. հէնց առաջին օրը նա նախադգաց, ասաց՝

- «Մայրիկ, լաւ հետեիր նրանց»։ Լաւ է, որ ժամանակին հասկացանք։ Բան ունի՞ք ասելու ինձ։
- ՍԻՐԱՆՈՅՇ. Հէնց դրա համար եմ եկել. պէտք է փորձանքի առաջն առնել։
- ԵՂԻՍԱԲԷԹ. Հեռացրէք ձեր մարդուն այստեղից, պրծաւ — գնաց։
- ՍԻՐԱՆՈՅՇ. Բայց նա չի ուզում հեռանալ։ Նա ասում է, «Ես փախչելու պատճառ չունիմ»։
- ԵՂԻՍԱԲԷԹ. Ունի թէ չունի, բայց նրա ոտքը այս օրւանից պիտի կտրւի իմ տնից։
- ՍԻՐԱՆՈՅՇ. Դրսերում կհանդիպեն միմեանց։
- ԵՂԻՍԱԲԷԹ. Աշխատեցէք, որ չհանդիպեն։
- ՍԻՐԱՆՈՅՇ. Դուք պիտի աշխատէք, մայրիկ, որովհետեւ ձերը կին է, իմը տղամարդ։
- ԵՂԻՍԱԲԷԹ. Ձեր ամուսինն է ձեր ձեռքից գնում և ոչ իմը։
- ՍԻՐԱՆՈՅՇ. Իմ ամուսնուն ճանապարհից շեղողը ձեր հարսն է։
- ԵՂԻՍԱԲԷԹ. Մինչև ձեր մարդու գալը իմ հարսը հանգիստ էր իր համար։
- ՍԻՐԱՆՈՅՇ. Իմ մարդն էլ հանգիստ էր մինչև ձեր հարսին տեսնելը։
- ԵՂԻՍԱԲԷԹ. Մի տղամարդ, որ իրան կարող է պահել, ոչ մի կին չի կարող նրան խելքից հանել։
- ՍԻՐԱՆՈՅՇ. Մի կնիկ, որ իր պատիւը ճանաչի, ոչ մի տղամարդ չի կարող նրան մոլորեցնել։
- ԵՂԻՍԱԲԷԹ (անհամբեր)։ Ուրեմն ի՞նչ էք ուզում ինձնից։ Ես ինչ որ կարող եմ, անում եմ։
- ՍԻՐԱՆՈՅՇ. Լռե՛նք. ես լսեցի նրա հօր ծայնը։
- ԵՂԻՍԱԲԷԹ (նայելով լուսամտով դուրս)։ Այո՛, նա է, գալիս է փեսայիս հետ։ Միշտ միասին են, խօսում են, քչփչում,

չգիտեմ նրանց մէջ ինչ կայ: Գնանո՞ իմ սենեակը: Պատի-
ւը մերն է, պէտք է պաշտպանենք միմեանց: (Վեր է կենում
և դիմում է դէպի ծախ կողմի երկրորդ դռները):

ՍԻՐԱՆՈՅՇ. Այո՞, պէտք է պաշտպանէք ինձ, մայրիկ: (Հետե-
ւում է Եղիսաբէթին):

ՏԵՍԻՆ, VI.

Կոնստանդին և Ստեփան.

ԿՈՆՍՏԱՆԴԻՆ (գալիս է խորքի դռներով: Նկատելի ընկձւած է): Հա-
պա այս բոլորից յետոյ ինչպէ՞ս չասել, «Ամօթ քեզ, հա-
սարակութիւն, որ այդպիսիներին յարգում ես, պատուում,
ազնիւ մարդ հռչակում:

ՍՏԵՓԱՆ (գալիս է խորքի դռներով Կոնստանդինի հետ): Ես կկամե-
նայի իմանալ՝ ի՞նչ շահեցիք արդեօք, խորտակելով ձեր
աղջկայ իլլիւզիան իր մարդու առաքինութեան մասին:

ԿՈՆՍՏԱՆԴԻՆ. Ես թունաւոր ժահրը դուրս քաշեցի իմ աղ-
ջկայ կեանքից. բժշկւելն իր կամքից է կախւած այժմ:
Օ՞, հանգիստ կացէք, նա ինձնից շնորհակալ է:

ՏԵՍԻՆ, VII.

Նոյնք, Սամսոն և Հմայեակ.

ՍԱՄՍՈՆ (գալիս է աջ կողմի ածաջին դռներով): Այսօր, դժբաղդա-
բար, չեմ կարող ձեր նախահաշուով զբաղւել:

ՀՄԱՅԵԱԿ (գալիս է աջ կողմի առաջին դռներով Սամսոնի հետ, Թղթ
փաթեթը ձեռքին): Փոյթ չէ, վաղը կպարապենք: (Ձեռք է տա-
լիս Կոնստանդինին և Ստեփանին):

ՍԱՄՍՈՆ (բաւական սառը): **Զգիտեմ, կարող եմ արդեօք վաղը կամ միւս օրն էլ պարապել:**

ՀՄԱՅԵԱԿ (նայում է Սամսոնին զարմացած: Զգալով նրա տրամադրութիւնը, շրթունքները սեղմում է իր վրդովմունքը զսպելու համար):

Լաւ, ինչպէս կամենաք: Մնացէք բարև: (Առանց ձեռ տալու, զլուխ է տալիս և զնում խորքի դռներով):

ՏԵՍԻԼ VIII.

Նոյնք, առանց Հմայեակի.

ՍԱՄՍՈՆ (մի նշանակալից հայեացք է ձգում Կոնստանդինի վրայ): **Ստեփան, ես քեզ հետ առանձին խօսելիք ունիմ:**

ԿՈՆՍՏԱՆԴԻՆ (հեռւից դիտել է տեսարանը. հանդարտ հեռանում է ձախ կողմի առաջին դռներով):

ՏԵՍԻԼ IX.

Սամսոն և Ստեփան.

ՍԱՄՍՈՆ. Ա՛հ, փառք Աստծոյ, ազատւեցի: (Նստում է, հառաչելով): **Գլուխս տրաքում է:**

ՍՏԵՓԱՆ (հեռւից դիտել է նախընթաց տեսարանը): **Այդ ի՞նչ արիր. մի՞թէ կարելի էր այդպէս վարւել Հմայեակի հետ: Դու գրեթէ վռնդեցիր նրան քո տնից:**

ՍԱՄՍՈՆ. Ո՞վ է այդ քո Հմայեակը:

ՍՏԵՓԱՆ. Ով էլ լինի, յամենայն դէպս, այն մարդկանցից է, որոնց դու սովոր ես քո աղայական բարձրութիւնից նայել:

ՍԱՄՍՈՆ. Զլինի թէ ուզում ես, որ ես քեզ դեռ շնորհակա-

լուծիւն էլ յայտնեմ նրան իմ տուներ մտցնելու համար:
(Վեր է կենում):

ՍՏԵՓԱՆ. Ես քո տուներ մտցրել եմ մի մարդ, որ հարիւր անգամ աւելի ազնիւ ու մաքուր է, քան թէ դու և ես միասին վերցրած:

ՍԱՄՍՈՆ. Համոզմունքով ես ասում այդ:

ՍՏԵՓԱՆ (յանդիմանօրէն): Սամսոն, միլլիօնների դործեր ես վարում, հարիւրաւոր մարդկանց հետ յարաբերութիւն ունիս առանց մէկի հետ խորհրդակցելու, իսկ քո ընտանեկան կեանքում խաղալիք ես երկու կանանց ձեռքում: Ամօթ է, ամօթ է: (Անցուդարձ է անում):

ՍԱՄՍՈՆ. Մէկն այդ կանանցից իմ մայրն է, միւսն իմ քոյրը: Երկուսն էլ իմ պատւին նախանձախնդիր են:

ՍՏԵՓԱՆ. Մէկը նրանցից հին նախապաշարումներով վարակւած մի պառաւ է, միւսը կասկածամիտ, մանրակրկիտ և նախանձոտ: Այսօր ես խոշոր ընդհարում ունեցայ Վիրգինէի հետ: Չեմ հերքում, Արմենուհին և Հմայեակը համակրում են միմեանց, բայց ահա բոլորը ինչ որ կայ: Խելքի եկ, Սամսոն, քո կիներ այն կանանցից չէ, որոնք մէկի հացն ուտում են, միւսին շոյում: Խօսք չունիմ, Արմենուհին մի օր կարող է սիրել մի ուրիշին, բայց այդ դէպքում նա ճշմարտութիւնը չի թաղցնիլ քեզնից:

ՍԱՄՍՈՆ (խորհել է): Այո, ունիս իրաւունք: Արմենուհին կեղծել և խաբել չգիտէ: Բայց ի՞նչ անեմ, այստեղ (զարկելով սրտին) այժմ մի հնոց է վառւել: Ամօթ է ասել, Ստեփան, ես տանջւում եմ: (Նորից նստում է և ծակատը սեղմում է ձեռքով):

ՍՏԵՓԱՆ (կանգ է առնում հեզնական ծիծաղով): Մի՞թէ, այդպէս շուտ. զարմանալի է, հա՛, հա՛, հա՛:

ՍԱՄՍՈՆ. Դու ծիծաղում ես, դու սիրտ չունիս:

ՍՏԵՓԱՆ. Այո: Այդ ո՞ր ժամանակից է, որ սկսել ես սիրտը

զնահատել մարդկանց մէջ, ո՞վ դու ուղեղի գերի և հա-
շիւների ստրուկ: Բաւական է, ես չեմ ծիծաղում, այլ
ներքուստ արտասուում եմ քո մասին: Թշւառ, տեղը եկել
է, կասեմ ճշմարտութիւնը: Դու երբէք արժանի չես եղել
Արմենուհուն, իսկ այժմ—նամանաւանդ:

ՍԱՄՍՈՆ (Թոյլ): Ինչո՞ւ:

ՍՏԵՓԱՆ. Որովհետև դու և նա երկու հակառակ խառնածը-
ներ էք: Որովհետև նա, իբրև երազող հոգի, կեանքից
կեանք է պահանջում: Իսկ դու ամեն ինչ դարձրել ես
չոր ու ցամաք պռօզա: Փող, փող, փող, ահա՛ քո ալ'ֆան
և օմեզան: Խեղճ մարդ, դու կանգնած էիր մի սքանչելի
արժանի պատւանդանի մօտ և, որովհետև շատ էիր մօտ,
չէիր տեսնում նրա աննման գեղեցկութիւնը: Եւ այժմ,
երբ նա քեզնից հեռացել է, ով գիտէ, գուցէ առ միշտ, այժմ
հիանում ես նրանով, կարօտում և տանջւում: Իսկ նա
քեզ ատում է: Եւ ունի իրաւունք, դու ոչ միայն չզնա-
հատեցիր նրան, այլ և (ծայնը ցածրացնելով) ցեխ շարտեցիր
նրա վրայ: (Քալլում է):

ՍԱՄՍՈՆ. Ես միշտ նրան սիրել իմ սրտի խորքում:

ՍՏԵՓԱՆ. Լաւ ապացուցեցիր քո սէրը, մի իսկական աղամտնդ
փոխարինելով վաճառքի դուրս բերւած կեղծ քարով:

ՍԱՄՍՈՆ. Մոլորւում են ամենքը, մոլորւեցի և ես:

ՍՏԵՓԱՆ. Կրի՛ր ուրեմն քո արժանի պատիժը: Ո՞ւմ դէմ ես
բողոքում: Դու կարծում էիր Արմենուհին մէկն է այն
ողորմելիներից, որոնք մի փոքր հացի համար տանում են
իրանց մարդկանց բոլոր վիրաւորանքները, բոլոր ստորու-
թիւնները: Դու մեծ յոյս ունէիր քո հարստութեան և
նրա երախտագիտութեան վրայ: Բայց չեղաւ, սխալւեցիր:
Ա՛հ, որքան ուրախ եմ, որ, վերջապէս, գտնւեց մէկը, որ

ընդունակ է կուլելու: Կայց, դու դեռ կտեսնես նա ինչ-
պէս կպատժի քեզ:

ՍԱՄՍՈՆ (ոտքի է կանգնում արագութեամբ): Բաւական է, լռի՛ր. առանց
քո յանդիմանութեան էլ զգում եմ ամեն ինչ: Աստուած
իմ, որքան անտարբեր է նա դէպի ինձ և որքան փոխ-
ւել է: Ես նրան չեմ ճանաչում:

ՍՏԵՓԱՆ. Նա միայն քո աչքումն է փոխւել, նա միևնոյն Ար-
մենուհին է:

ՍԱՄՍՈՆ. Լսի՛ր. երկու ժամ սրանից առաջ, լուսամտիցս նրան
տեսնելով պարտիզում մենակ, տխուր, չկարողացայ համ-
բերել: Ինքնասիրութիւնս զսպելով, դուրս եկայ: Ուզում
էի մի անգամ էլ փորձել հետը խօսելու: Բայց ինձ տես-
նելով, նա հանդարտ քայլերով դուրս եկաւ պարտիզից,
իջաւ ձորը: Ես ևս իջայ, առաջին անգամ: Նա անցաւ
զետակով: Ես ևս անցայ: Եւ սկսեց բարձրանալ քարքա-
րոտ ուղիով, թփերը ճեղքելով, դէպի ժայռը. ես մի փո-
քրը հետևեցի նրան և կանգ առայ:

ՍՏԵՓԱՆ. Իհարկէ, չկարողացար սուելի հետևել նրան:

ՍԱՄՍՈՆ. Ա՛հ, նա դարձանալի ոտիկներ ունի, մինչև այսօր
ուշադրութիւն չէի դարձրել: Սուր քարերի վրայով քայ-
լում էր, ինչպէս վայրենի այծ: Բարձրանում էր, շարու-
նակ բարձրանում: Երբ հասաւ ծայրը, նստեց և իր հպարտ
հայեացքը ձգեց դէպի հեռաւոր լեռները:

ՍՏԵՓԱՆ. Եւ այդ պահին նա նման էր մի հպարտ արծւի,
իսկ դու մի ապիկար որսորդի:

ՍԱՄՍՈՆ. Ես մնացի ներքևում: Ինձ տիրեց մի ամօթալի եր-
կիւղ, ոտներս չհնազանդւեցին ինձ, երբ կամեցայ բար-
ձրանալ:

ՍՏԵՓԱՆ. Եւ բաւականացար ժայռի ստորոտից դիտելով նրան
անմերձենալի բարձունքի վրայ: Ահա քո և նրա մէջ եղած

տարբերութիւնը. դու երբէք, երբէք չես կարողացել բարձրանալ մինչև նա:

ՍԱՄՍՈՆ (յանկարծ լուսամտից նկատել է Արմենուհուն): Ահա, նա գալիս է: Մնացի՛ր այստեղ, Ստեփան, եթէ ինձ մենակ տեսնի, ներս չի մտնիլ: Օգնի՛ր ինձ նրա հետ հաշտուելու:

ՏԵՍԻՆԱԿ X.

Նոյնք, Արմենուհի, յետոյ Կոնստանդին.

ԱՐՄԵՆՈՒՅԻ (գալիս է խորքի դռներով: Հազնւած է այնպէս, ինչպէս առաջին արարւածում: Ձեռնափայտը թողնում է պատշգամբի վրայ: Ներս է մտնում յոգնած. ուսերի շալը ձգում է աթոռի վրայ): Ա՛հ, յոգնեցի: (Նստում է: Սամսոնին չի նկատել):

ՍՏԵՓԱՆ. Առաջին անգամն եմ լսում ձեզնից յոգնեցի բառը:

ԱՐՄԵՆՈՒՅԻ (ժպտալով): Երևի պառաւել եմ: (Սամսոնին տեսնելով, արագ ոտքի է կանգնում և դիմում է դէպի աջ կողմի երկրորդ դռները: Նկատում է դաշնամուրը ծածկւած և թեթև ձջում): Ա՛հ: (Կանգ է առնում):

ՍՏԵՓԱՆ (վախեցած, մօտենալով): Ի՞նչ պատահեց:

ԱՐՄԵՆՈՒՅԻ. Տեսէ՛ք, ի՛նչ են արել, բժիշկ:

ԿՈՆՍՏԱՆԴԻՆ (երևում է ձախ կողմի առաջին դռների միջև):

ԱՐՄԵՆՈՒՅԻ. Հայրիկ, նայիր, նրանք ուզում են ինձնից խլել իմ մխիթարութիւնը: Ո՞ւմն է այդ դաշնամուրը:

ԿՈՆՍՏԱՆԴԻՆ. Քոնք: Հանգուցեալ մօրդ նւէրն է:

ՍԱՄՍՈՆ (կանգնած է դէպի ձախ և ակնածութեամբ դիտում է տեսարանը): Ճիշտ է:

ԱՐՄԵՆՈՒՅԻ (ուշադրութիւն չդարձնելով Սամսոնի կողմը): Ուրեմն ի՞նչ իրաւունքով են ինձ զրկում նրանից: Հայրիկ, դու գիտես՝ ես առանց նւագելու մի օր անգամ չեմ կարող ապրել,

իսկ նրանք ծածկել են դաշնամուրը, որպէսզի ես չնւագեմ:
Բայց այդ ես թող չեմ տալ: Ո՛չ: (Արագ քայլերով մօտենում
է ձախ կողմի առաջին դռներին): Մելանիա: (Աւելի բարձր): Մե-
լանիա:

ՏԵՍԻՆ, XI.

Նոյնք, Մելանիա, յետոյ Եղիսաբէթ և Վիրգինէ.

ՄԵԼԱՆԻԱ. (շտապով գալիս է ձախ կողմի առաջին դռներով): Այստեղ
եմ, տիկին:

ԱՐՄԵՆՈՒՅԻ. Ո՞վ է ծածկել դաշնամուրը:

ՄԵԼԱՆԻԱ. Ես ու Գարեգինը:

ԱՐՄԵՆՈՒՅԻ. Ո՞ւմ հրամանով:

ՄԵԼԱՆԻԱ. Մեծ տիկնոջ:

ԵՂԻՍԱԲԷԹ. (երևում է ձախ կողմի երկրորդ դռների միջև):

ՎԻՐԳԻՆԷ. (երևում է մօր կողքին, դուրս գալով ձախ կողմի առաջին
դռներով):

ԱՐՄԵՆՈՒՅԻ. Ո՞ւր են իմ նօտաները:

ՄԵԼԱՆԻԱ. Մեծ տիկնոջ սենեակում:

ԱՐՄԵՆՈՒՅԻ. Գնացէ՛ք, բերէք, դաշնամուրը բաց արէք:

ՄԵԼԱՆԻԱ. (քայլերն ուղղում է դէպի ձախ կողմի երկրորդ դռները, բայց
Եղիսաբէթին տեսնելով, կանգ է առնում):

ԵՂԻՍԱԲԷԹ. Խայտառակւեցիներ օտարների մօտ: (Վիրգինէին):

Այն կինն իմ սենեակումն է: Գնա՛, նրան ճանապարհ դիր
միւս դռներով, որ դրա ծայնը չլսի:

ՎԻՐԳԻՆԷ. (շտապով գնում է ձախ կողմի երկրորդ դռներով և քիչ ան-
ցած յետ է գալիս):

ԱՐՄԵՆՈՒՅԻ. (Մելանիային): Բաց արէք, ասում եմ, դաշնա-
մուրը:

ԵՂԻՍԱԲԷԹ. Թող ձարդդ հրամայի, բաց կանենք: (Մելանիային):

Կորի՛ր այստեղից:

ՄԵԼԱՆԻԱ (շտապով գնում է ծախ կողմի առաջին դռներով):

ԱՐՄԵՆՈՒՀԻ. Շատ լաւ, թող այգպէս լինի: Ես ձեզնից դեռ
աւելին եմ սպասում:

ԿՈՆՍՏԱՆԴԻՆ. Հանգստացի՛ր զաւակս, դաշնամուրն ի՞նչ է,
որ նրա համար արիւնդ պղտորում ես:

ԱՐՄԵՆՈՒՀԻ. Ա՛հ, դաշնամուրը չէ դլխաւորը, հայրիկ, այլ
դրանց նպատակը: (Եղիսաբէթին): Բարբարոսներ, ես տարել
եմ ձեր բոլոր հալածանքները, բայց այդ մէկը տանել չեմ
կարող: Վախից չէ, որ լուել եմ մինչև այսօր, այլ ամօթից:
Դուք թունաւորել էք իմ կեանքի իւրաքանչիւր վայր-
կեանք ձեր անտեղի կասկածներով. դուք հետեւել էք իմ
ամեն մի քայլին: Եւ ի՞նչ է եղել ձեր նպատակը: Կոտ-
րել իմ կամքը, դարձնել ինձ ստրուկ տնտեսական չնչին
պարտականութիւններին և ձեր հնամաշ աւանդութիւն-
ներին:

ԵՂԻՍԱԲԷԹ. Ինչե՛ր է ասում, Աստուած իմ, ինչե՛ր է ասում:

ՍԱՄՍՈՆ. Թող ասի, ձայրի՛կ, թող ասի:

ՎԻՐԳԻՆԷ. Հարբած է կամ խելագարւել է:

ՍՏԵՓԱՆ (վրդոված, Վիրգինէին): Դու մի՛ խառնւիր, ի սէր Աս-
տծոյ:

ԱՐՄԵՆՈՒՀԻ. Խելագարւել: Ո՞վ չէր խելագարւիլ ձեր երկու-
սի ձեռքում: Մայր և աղջիկ՝ դուք աշխատել էք ամեն
իրաւունք բանեցնել իմ վրայ: Մանկութիւնից սովոր ազատ
մտածելու, ազատ զգալու, այս տունը մտնելու օրից զգա-
ցել եմ ստրկութեան գարշելի լուծը: Եւ որքան ծանր է
եղել այդ լուծը, այնքան աւելի եմ ատել ձեզ: (Վիրգինէին):
Ինչ վերաբերում է ձեզ, զզւելով զզւում եմ ձեզնից...
Օձ...

ՎԻՐԳԻՆԷ. Մայրիկ, լսեցի՞ր: Լսեցի՞ր, եղբայր: Ինչո՞ւ ես լը-
ռու՞մ, ինչո՞ւ չես խօսու՞մ: Քո ձօր ու քրոջ պատիւը գին
չունի՞ քեզ համար: Ա՛հ, ես կտրաքեմ:

ՍԱՄՍՈՆ. Ստեփան, հեռացրու նրան այստեղից:

ՍՏԵՓԱՆ (բռնելով Վիրգինէի թևից): Գնանք, գնանք, ասու՞մ եմ.
դու կրակի վրայ իւղ ես ածու՞մ: (Գրեթէ ուժով տանում է
Վիրգինէին ձախ կողմի առաջին դռներով և յետ է գալիս):

ՏԵՍԻՒ, XII.

Նոյնք, առանց Վիրգինէի.

ԱՐՄԵՆՈՒՅԻ. Չգիտեմ, ո՞ր բարոյական օրէնքով է մէկն իշ-
խու՞մ միւսի վրայ: Ա՛հ, գիշեր,—ցերեկ իմ ականջներին
հնչել է մի չոր, անախորժ ձայն. «Դու կին ես, ուրեմն
ստրուկ ես, որովհետեւ ես էլ ժամանակին ստրուկ եմ եղել:
Ինչպէս ինձ հետ են վարւել, նոյնպէս և ես պիտի վար-
ւեմ քեզ հետ: Խեղդիր քո մէջ քո կամքը և լսիր ինձ,
քո ամուսնուն, նրա ազգականներին: Վարիր բուսական
կեանք, կեր, խմիր, պճնւիր, ծախսիր—այս բոլորը թոյլ
ենք տալիս, բայց ազատ մի՛ զգար քեզ, այդ արգելւած է:
Դու քո ամուսնու ընկերը չես, հաւասարը, այլ նրա հիւ-
րին, նրա ազատ ընկերի զւարճալիքը: Վերջապէս,
դու պէտք է փառաբանես քո ճակատագիրը, որ քեզ գցել
է մի հարուստ տուն»...»

ԵՂԻՍԱԲԷԹ (Սամսոնին): Ինչո՞ւ չես ասու՞մ, որ քաղցածութիւ-
նից ենք ազատել նրան, պատուտւած կօշիկներից ենք դուրս
բերել:

ԿՈՆՍՏԱՆԴԻՆ (բարկուժիւնից դողալով): Սո՞ւտ է, սո՞ւտ է. մենք

երբէք քաղցած չենք եղել: Օ'հ, ինչո՞ւ դու տղամարդ չես,
պառաւ, թ'հ...

ՍՏԵՓԱՆ (բռնելով Կոնստանդինի թևը): **Զսպեցէ՛ք ձեզ:**

ԱՐՄԵՆՈՒՅԻ. Ի՞նչ պիտի անէի: Ես կուլելու համար չէի եկել
այս տունը, այլ ապրելու: Պատերը կապստամբւէին, եթէ
ես թշնամութիւն գցէի որդու և մօր մէջ: Ճարահատեալ
սկսեցի յարմարւել իմ վիճակին, ինչպէս որսւած թռչուն,
որ ընտելանում է իր վանդակին: Բայց թռչունն իր վան-
դակում իսկ պահպանում է երգելու, թռչկոտելու իրա-
ւունքը, մինչդեռ ինձնից այն էլ են խլում: (Հալիս է հան-
դարտ):

ԵՂԻՍԱԲԷԹ. Ասացի՞ր բոլորը, վերջացրի՞ր: (Կոնստանդինին)

Դէ'հ, տարէք նրան այստեղից: Երբ ուշքի կգայ, ես կխօ-
սեմ նրա հետ: Ամօթ, ամօթ ձեզ նման հօրը:

ՍԱՄՍՈՆ (սրտմտութեամբ): Մայրի՛կ... Ես խնդրում եմ, գնա՛
քո սենեակը:

ԵՂԻՍԱԲԷԹ. Կգնամ, ես չեմ կարող այս անպատուութիւնը
տեսնել... Անղգամ: (Գնում է դէպի ծախ կողմի երկրորդ դռները.
լսելով Վիրգիլի ձայնը, կանգ է առնում):

ՏԵՍԻՆԱ, XIII.

Նոյնք և Վիրգիլն է.

ՎԻՐԳԻՆԷ (զալիս է ծախ կողմի առաջին դռներով: Վերարկու և գլխարկ
հագած, ձեռքին հովանոց և մի քսակ): **Մայրի՛կ, մնաս բարով:**

ՍՏԵՓԱՆ. Ուր ես գնում:

ՎԻՐԳԻՆԷ (արագ-արագ ձեռնոցները հագնելով): **Քաղաք, իմ տունը:**
Խայտառակեցի, հերիք է: (Սամսոնին): Եղբայր, ներողու-
թիւն, ինչպէս երևում է, այդ բոլորի պատճառն ես եմ:

Ես չպիտի պաշտպանէի իմ հօր տան պատիւը: Մնաս
բարով:

ՍԱՄՍՈՆ (զրգուած): Վիրգինէ, խելօք կաց:

ՎԻՐԳԻՆԷ. Լաւ, մի՛ կատաղիր. գիտեմ, որ քոյրը եղբօր հա-
մար մի մեծ բան չէ: Գնում եմ:

ՍՏԵՓԱՆ. Վիրգինէ, մինչև անգամ իմ համբերութիւնն էլ չափ
ունի: Վերցրու գլխարկդ, հանի՛ր վերարկուդ: Մենք քա-
ղաք կերթանք միասին:

ԵՂԻՍԱԲԷԹ (բռնելով Վիրգինէի թևը): Արի, աղջիկս, գնանք իմ
սենեակը: Քիչ էլ համբերենք, տեսնենք ինչ է լինում: (Տա-
նում է Վիրգինէին իր սենեակը ձախ կողմի երկրորդ դռներով):

ՍՏԵՓԱՆ (Կոնստանդինին): Մենք էլ հեռանանք այստեղից: Մենք
աւելորդ ենք ամուսինների մէջ:

ԱՐՄԵՆՈՒՅԻ (աչքերը սրբել է, ուշքը ժողովել. անտարբեր դէպի կա-
տարւող տեսարանը, աչքերը յառել է յատակի մի կէտին): Գնա՛,
հայրիկ:

ԿՈՆՍՏԱՆԴԻՆ (մի ծուռ հայեացք ձգելով Սամսոնի վրայ, թոյլ է տալիս,
որ Ստեփանն իրան տանի ձախ կողմի առաջին դռներով):

ՏԵՍԻՆԱ XIV.

Ա Ր Մ Ե Ն Ո Ւ Յ Ի և Ս Ա Մ Ս Ո Ն .

(Մի քանի վայրկեան լռութիւն).

ԱՐՄԵՆՈՒՅԻ (չի զգում Սամսոնի ներկայութիւնը):

ՍԱՄՍՈՆ. Ես լռեցի մինչև վերջը: (Մօտենում է դաշնամուրին և
բաց է անում): Ահա՛ քո քոյրը ասածների պատասխանը:
Սրանով ես վիրաւորում եմ իմ մօրն ու քրոջը: Ես թոյլ

եմ տալիս մինչև անգամ, որ այդ մարդը շարունակի այցելել իմ տունը: Բաւական է:

ԱՐՄԵՆՈՒՅԻ (վեր է կենում և քայլերն ուղղում է դէպի աջ կողմի երկրորդ դռները):

ՍԱՄՍՈՆ. Սպասիր, դու ոչինչ չե՞ս ասում: Դաշնամուրը բաց է:

ԱՐՄԵՆՈՒՅԻ. Այլ ևս ինձ համար միևնոյնն է:

ՍԱՄՍՈՆ. Լսիր. ես խօսքի մարդ չեմ, կարճ կասեմ: Երբ դու բորբոքած ձգում էիր իմ մօր երեսին քո նախատինքները, ես մտածում էի: Խոստովանում եմ, դու մասամբ իրաւացի ես:

ԱՐՄԵՆՈՒՅԻ (առանց երեսը Սամսոնին դարձնելու, դառը հեզնուծեամբ):
Մի՞թէ:

ՍԱՄՍՈՆ (մօտենում է Արմենուհուն, ձեռը մեկնում է նրան): Տո՛ւր ինձ ձեռդ: Ես քեզնից ներումն եմ խնդրում:

ԱՐՄԵՆՈՒՅԻ (նոյն եղանակով): Այդպէս շո՛ւտ:

ՍԱՄՍՈՆ. Ի՞նչ արած. այն օրից դէս դու ինձ թոյլ չես տալիս քեզ բացատրութիւն տալու: Դու փախչում ես ինձնից, ինչպէս անբուժելի ախտաւորից, այն ինչ՝ ես անբուժելի չեմ: Ո՞վ չի սխալում: Տուր ինձ ձեռդ հաշտե՛նք:

ԱՐՄԵՆՈՒՅԻ (նորից քայլերն ուղղում է դէպի աջ կողմի երկրորդ դռները):

ՍԱՄՍՈՆ. Ուրեմն չե՞ս ներում: Պատժո՞ւմ ես:

ԱՐՄԵՆՈՒՅԻ (կանգ առնելով): Ես չունիմ իրաւունք ոչ ներելու, ոչ պատժելու:

ՍԱՄՍՈՆ. Բայց դու արդէն պատժել ես ինձ խիստ: Աստծուն է յայտնի, թէ ինչ տանջանքներ եմ կրում: Ես քուն չունիմ, հանգիստ չունիմ, գործերս մնացել են անտէր. ոչ պարապել եմ կարողանում և ոչ մտածել նրանց մասին: Ես կկործանւեմ, եթէ այդպէս շարունակւի: Արմենուհի, մի՛ լինիր սխալալ:

ԱՐՄԵՆՈՒՅԻ. Ես ձեր դէմ ոխ չունիմ:

ՍԱՄՍՈՆ. Ունիս և շատ մեծ ոխ: Այսօր մեր զաւակի ծերնդեան առաջին տարեդարձն է, և դու այսօր էլ ինձ հետ ճաշին մի սեղանի չնստեցիր:

ԱՐՄԵՆՈՒՅԻ (ծանր հառաչելով): Լաւ տօնեցինք: Ա՛հ, թողէք ինձ, մոռացէք իմ գոյութիւնը:

ՍԱՄՍՈՆ. Քո գոյութիւնն երբէք այնքան թանգ չի եղել ինձ համար, որքան այժմ:

ԱՐՄԵՆՈՒՅԻ (երկարատև դառը հեզնական ծիծաղ): Հա՛, հա՛, հա՛...

ՍԱՄՍՈՆ. Մի ծիծաղիր. ես խօսքերը սապնի պղպնակներէ պէս օդը շարտողներէյ չեմ: Ասա՛, վերջապէս, ներձում ես թէ ոչ:

ԱՐՄԵՆՈՒՅԻ. Ո՛չ:

ՍԱՄՍՈՆ. Ուրեմն ո՞չ մի հաշտութիւն, ո՞չ մի պայման:

ԱՐՄԵՆՈՒՅԻ. Մենք կմնանք միևնոյն յարկի տակ մեր զաւակի համար, բայց կապրենք ինչպէս օտարներ:

ՍԱՄՍՈՆ. Ա՛յդ է քո վերջին խօսքը:

ԱՐՄԵՆՈՒՅԻ. Այս է:

ՍԱՄՍՈՆ (քիչ մտածելով): Շատ բարի, թող այդպէս լինի, այժմ խօսենք ինչպէս օտարներ: (Դէմքն ընդունում է խիստ արտայայտութիւն): Արդեօք ձեր այդ յամառութեան հիմքը իմ անհաւատարմութիւնն է, թէ՞ մի ուրիշ, աւելի խոշոր պատճառ:

ԱՐՄԵՆՈՒՅԻ (զլուխը համարձակ բարձրացնելով): Ի՞նչ էք կամենում ասել դրանով:

ՍԱՄՍՈՆ. Այն, որ իմ մայրն ու քոյրը չեն սխալուում: Դուք ոչ թէ համակրում էք այդ հմայեակին, այլ սիրում էք նրան և սիրում էք... յանցաւոր սիրով:

ԱՐՄԵՆՈՒՅԻ (սառը): Ձե՞զ ինչ, մենք օտարներ ենք:

ՍԱՄՍՈՆ. Եւ դուք համարձակե՞լմ էք, դ՞ուք, իմ օրինական
կի՞նը, իմ զաւակների մայրը:

ԱՐՄԵՆՈՒՅԻ. Իսկ դուք իմ օրինական ամուսինը, իմ զաւակի
հայրը չէ՞ք, երբ դաւաճանում էիք ինձ:

ՍԱՄՍՈՆ. Ես տղամարդ եմ:

ԱՐՄԵՆՈՒՅԻ. Արհամարհում եմ այդ զապրելի արտօնութիւնը
տղամարդու համար, ինչպէս մի ստոր աւանդութիւն:

ՍԱՄՍՈՆ (դառը ծիծաղով): Ահա՛ թէ ինչ, ուրեմն դուք ուզում
էք տակն ու վրայ անել մեր վարք ու բարքերը:

ԱՐՄԵՆՈՒՅԻ. Եթէ ձեռքիս լինէր, ես նրանց կխորտակէի
հիմնովին:

ՍԱՄՍՈՆ (հետզհետէ կատաղելով): Ձեզ կստիպեն յարգել և խո-
նարհւել նրանց առջև:

ԱՐՄԵՆՈՒՅԻ (արհամարհանքով): Ո՛վ արդեօք:

ՍԱՄՍՈՆ. Ես:

ԱՐՄԵՆՈՒՅԻ. Փորձեցէ՛ք:

ՍԱՄՍՈՆ. Ուրեմն չէ՞ք հերքում ձեր սէրը դէպի այդ մարդը:

ԱՐՄԵՆՈՒՅԻ. Առաջ ես կպատասխանէի ձեր հարցին ամենայն
համարձակութեամբ, այժմ պարտաւոր չեմ: (Շուռ է գալիս
զնալու):

ՍԱՄՍՈՆ (բարձր ձայնով): Անառակ, ես քո գլուխը կջախջախեմ:
(Աթոռը բարձրացնում է Արմենուհու վրայ):

ԱՐՄԵՆՈՒՅԻ (երեսը համարձակ Սամսոնին դարձնելով և գլուխը աներ-
կիւղ բարձրացնելով): Ջախջախեցէ՛ք:

ՏԵՍԻՆ ԽՎ.

Նոյնք, Ստեփան, Եղիսաբէթ և Վիրգինէ.

ՍՏԵՓԱՆ (Սամսոնի գոռոցին շտապով վազել է ծախ կողմի առաջին

դոներից): Ի՞նչ էս անուամ, խելագար: (Ընկնում է Սամսոնի և Արմենուհու մէջ):

ԵՂԻՍԱԲԷԹ (զալիս է ծախ կողմի երկրորդ դոներով Ստեփանից յետոյ):

ՎԻՐԳԻՆԷ (զալիս է ծախ կողմի երկրորդ դոներով Եղիսաբէթից յետոյ):

ՍԱՄՍՈՆ (նայել է Արմենուհու համարձակ դէմքին: Աթոռը ցած է իջեցնում):

ԱՐՄԵՆՈՒՀԻ. Քաջութիւն չունեցաք մի հարւածով վերջ տալու խնդրին:

ՍԱՄՍՈՆ. Ձեզ նմաններին չեն սպանում, այլ խեղդում են շան պէս: (Աթոռը շարտում է մի կողմը):

ԱՐՄԵՆՈՒՀԻ. Այդ չէ, ձեր խիղճը բողբոջեց: Դուք զգացիք, որ զրպարտում էք ինձ կարծելով, թէ էս նոյնն եմ, ինչ որ դուք: Ոչ, եթէ էս կամենամ անել ձեր արածը, գոնէ էս մի վայրկեան անգամ չեմ մնալ ձեր տանը:

ՍՏԵՓԱՆ. Այդ այնքան ճիշտ է, որքան ինքը ճշմարտութիւնը, կարող եմ երդւել:

ԱՐՄԵՆՈՒՀԻ. Ինչո՞ւ գազանացաք: Ո՞ւր էիք այն ժամանակ, երբ էս պատրաստ էի կեանքս զոհել մի օր սիրելու և սիրւելու համար: Մի՞թէ իմ սիրտը ժամացույցի մեքենայ էր պողպատից շինւած: Մի՞թէ այն չէ՞ր եռում բուռն զգացումներից ձեզ համար, երբ դուք գործերով էիք զբաղւած: Մի՞թէ էս չէ՞ի փափագում իմ երազների մարմնացումը տեսնել ձեր մէջ և միմիայն ձեր մէջ: Մի՞թէ ձեր լետեից վազելով ամեն վայրկեան չէ՞ի փաթաթւում ձեր պարանոցին: Ո՞ւր էիք այն ժամանակ: Ինչո՞ւ էիք ինձ հրում: Զբաղւած էիք, հա՛ հա՛ հա՛: (Դառը ծիծաղ): Ահ, արժէ՞ր մի՞թէ ուշադրութիւն դարձնել ինձ վրայ, ինձ, որ ձեր ապարանքի զարդերից մէկն էի:

ՍՏԵՓԱՆ (Սամսոնին): Լսիր, լսիր:

ԱՐՄԵՆՈՒՀԻ (աւելի ոգևորւած): Ա՛հ, դուք մտածում էիք. «Ի՞նչ

կայ, նա իմ սեփականութիւնն է, իմ հարստութեան հրապոյրով գնւած: Ոչ ոք չի կարող նրան խլել ինձնից: Պահապաններ կան նրա վրայ—մայրս, քոյրս, ազգականներս, հասարակական կարծիքը: Ինչո՞ւ իմ թանկագին զգացումները միայն նրա վրայ շուայլեմ: Ես հարուստ եմ, կարող եմ ամենազեղեցիկ կանանց սէրը գնել շուկայում, ինչպէս գնում եմ իմ ձեռնոցները, իմ կօշիկները: Իսկ նա թող տանը մնայ, այնպէս, ի միշի այլոց»: Եւ գնեցիք, և վայելեցիք: Ի՞նչ էք ուզում այժմ ինձնից: Ես ոչ նախանձում եմ, ոչ բողոքում, ես... զգւում եմ ձեզնից: (Արագ քայլերով գնում է աջ կողմի երկրորդ դռներով):

ՏԵՍԻՒԼ XVԼ.

Նոյնք, առանց Արմենուհու.

ՍԱՄՍՈՆ (կատաղած, շնչասպառ): Մայրի՛կ, այժմ ամեն ինչ վերջացաւ: Հրամայիր ծառաներին, որ այդ մարդը գալիս վռնդեն իմ տնից: Թող Գարեգինը դուրս գայ տնից և ասի. «Կորէք, պարոն, դուք պատուի գող էք»:

ՎԻՐԳԻՆԷ. Ես քո հրամանը իսկոյն կյայտնեմ Գարեգնին: (Ուզում է գնալ):

ՍՏԵՓԱՆ (բռնելով Վիրգինէի թւր): Կաց, քո գործը չէ:

ՎԻՐԳԻՆԷ (ստիպւած կանգ է առնում, կատաղումիւնից ատամները կրծտելով):

ՍԱՄՍՈՆ (Ստեփանին): Այ՛ո՛, ազատամիտ բարեկամ, նայիր ինձ զարմացած: Համարի՛ր ինձ ասիացի, վայրենի, այնուամենայնիւ ես պիտի գործադրեմ իմ իրաւունքները: Յիմար չէին մեր հայրերն ու պապերը, որ մտրակով էին խրատում իրանց կանանց:

ՎԻՐԳԻՆԷ. Իհարկէ, կապը կտրած կանանց:

ՍՏԵՓԱՆ. Լռելո՛ւ ես, վերջապէս, թէ չէ:

ՍԱՄՍՈՆ. Օրէնքով իմ կինն է, էապէս էլ ինձ պիտի պատկա-
նի: Ես անձեռոցիկ չեմ, որ կեղտոտուելուց չետոյ դէն
շարտի և մի ուրիշը վերցնի: Գիտեմ ինչ ասել է փոխա-
դարձ համակրանք, գաղափարական ձգտում և այլն: Այսօր
հոգով եմ միացած, վաղը մարմնով կմիանան:

ԵՂԻՍԱԲԷԹ. Ա՛յ, ես էլ հէնց այդ եմ ասում:

ՎԻՐԳԻՆԷ. Վերջապէս:

ՍՏԵՓԱՆ (անհամբեր): Քիչ գրգռեցէք այդ մարդուն, քիչ գրգռե-
ցէք:

ՍԱՄՍՈՆ (սպառնալով դէպի աջ կողմի երկրորդ դռները): Սպասի՛ր,
գոռոզ արարած, այժմ ես քեզ ցոյց կտամ իմ ատամները:
(Գնում է աջ կողմի առաջին դռներով):

ՍՏԵՓԱՆ (Սամսոնի լետեից): Գլորւիր, գլորւիր մինչև անդնդի
լատակը: (Դառնալով Եղիսաբէթին և Վիրգինէին): Դուք կզղջաք
ձեր վարմունքի համար, բայց ուշ կլինի: (Գնում է ձախ
կողմի առաջին դռներով):

ՎԻՐԳԻՆԷ. Դու ոչինչ չես հասկանում: (Գնում է Ստեփանի լե-
տեից):

ԵՂԻՍԱԲԷԹ. Մենք ձեր պարտքն ենք կատարում: (Գնում է
ձախ կողմի երկրորդ դռներով):

Վ Ա Ր Ա Գ Ո Յ Ր .

ԱՐԱՐԻԱԾ ՉՈՐՐՈՐԳ.

Առաջին արարւածի տեսարանը, միայն ծաշի սեղանի փոխարէն դրւած են մի թեթև եղէգնեայ գահաւորակ, մի փոքրիկ սեղան և պարտիզի ակնոներ: Համակի վրայ գցած է Արմենուհու շալը և երկայն ձեռափայտը:

ՏԵՍԻԼ 1.

Ստեփան և Վիրգինէ.

- ՍՏԵՓԱՆ** (նստած է փոքրիկ սեղանի մօտ. ծխում է): Գնանք Վիրգինէ, հաւատա, այդ լաւ կլինի: Բաւական է, ինչքան հիւր եղանք այստեղ:
- ՎԻՐԳԻՆԷ.** Ես չեմ ուզում եղբօրս այդ դրութեան մէջ թողնել ու հեռանալ: (Կանգնած էր, նստում է):
- ՍՏԵՓԱՆ.** Այն ժամանակ ինձ ներիր, ես կերթամ մենակ:
- ՎԻՐԳԻՆԷ.** Չեմ հասկանում, ինչո՞ւ ես այդպէս շտապում:
- ՍՏԵՓԱՆ.** Շտապում եմ, որովհետև անտանելի է այս ընտանիքի կեանքը: Մայր, որդի ու աղջիկ խօսք մի էք արել մի ազնիւ էակ հալածելու: Ես չեմ կարող տեսնել անմեղութիւնը այդ հալածանքի տակ և լռել: (Վեր է կենում):
- ՎԻՐԳԻՆԷ.** Գետինը մտնի քո անմեղը հա՛, գետինը մտնի:
- ՍՏԵՓԱՆ** (գրգռւած): Կէկէլ ես դու, Վիրգինէ, կատարեալ կէ-

- կէլ: Մաղծս է շարժուում, երբ դու խօսում ես այդ եղա-
նակով: (Քալում է):
- ՎԻՐԳԻՆԷ. Կէկէլ եմ թէ փէփէլ, բայց քեզ հաւատարիմ եմ,
նրա նման չեմ:
- ՍՏԵՓԱՆ. Իսկ նա հաւատարիմ չէ:
- ՎԻՐԳԻՆԷ. Լսեցի՞ր ինչ ասաց երէկ եղբայրս. «Այսօր հոգով
են միացած, վաղը մարմնով կմիանան»: Խեղճ եղբայր,
ինչպէս է տանջուում: Եւ ո՞ւմ համար, Աստուած իմ, ո՞ւմ
համար:
- ՍՏԵՓԱՆ (կանգ առնելով): Ա՛խ, կարճամիտ, կարճամիտ: Եթէ
դու մի քիչ խելք ունենայիր, հալածելու փոխարէն, կը-
պաշտպանէիր նրան:
- ՎԻՐԳԻՆԷ (հեղնութեամբ): Ահա թէ ի՜նչ: Հետաքրքրական է
իմանալ, ինչո՞ւ պիտի պաշտպանէի:
- ՍՏԵՓԱՆ. Որովհետեւ նա մի կենդանի բողոք է կնոջ վիրաւո-
րական և ստորացուցիչ կացութեան դէմ: Նա չի ուզում
ոչխարի հեղութեամբ տանել իր վիճակը: Բայց ես ինչպէս
քեզ բան հասկացնեմ: Է՛հ, արէք ինչ որ ուզում էք, ես
ձեռներս լանում եմ: (Դիմում է դէպի պատշգամբ):
- ՎԻՐԳԻՆԷ. Դու այսօր ես ուզում զնալ: (Հետևում է Ստեփանին):
- ՍՏԵՓԱՆ. Հէնց այս ըոպէին: (Հեռանում է):

ՏԵՍԻՆ 11.

Կոնստանդին և Սողոմ Սողոմեան.

- ԿՈՆՍՏԱՆԴԻՆ (զալիս է խորքի դռնակով Սողոմ Սողոմեանի հետ): Ես
չեմ հասկանում ձեր լեզուն՝ «թէև այնպէս է, բայց և
այնպէս», «հանդամանքների նրբութեան պատճառով» և
այլն և այլն: Խնդրեմ պարզ խօսէք:

ՍՈՂՈՄ ՍՈՂՈՄԵԱՆ (զալիս է խորքի դնակով, միշտ հետևելով Կոնստանդինին, մի քալլ յետ): Պարոն զնդապետ, իսկապէս խնդիրը շատ պարզ է, թէև բացատրելու և լուսաբանելու կողմեր շատ ունի: Բանն այն է, որ...

ԿՈՆՍՏԱՆԴԻՆ (անհամբեր): Բանն ի՞նչ է, ևս հէնց այդ եմ ուղում իմանալ:

ՍՈՂՈՄ ՍՈՂՈՄԵԱՆ. Բարեկամական և ազգակցական կապերն ինձ հարկադրում են ասել, որ դուք կոչւած էք մի ընտանեկան թիւրիմացութիւն հեռացնելու: Իսկապէս ասած թիւրիմացութիւն էլ չկայ, բայց և այնպէս թիւրիմացութիւն պիտի համարել, քանի որ երկու կողմերն էլ համահաւասար իրաւացի են:

ԿՈՆՍՏԱՆԴԻՆ (մեկուսի): Տէր ողորմած Ասուած: (Սողոմ Սողոմեանին): Ասացէք, ի սէր երկնաւորի, դուք ի՞նչ յանձնարարութիւն ունիք իմ վերաբերմամբ:

ՍՈՂՈՄ ՍՈՂՈՄԵԱՆ. Կարելի է յանձնարարութիւն համարել, կարելի է և պարտականութիւն, նայելով թէ խնդրին որ կողմից կբարեհաճէք մօտենալ:

ԿՈՆՍՏԱՆԴԻՆ (հասնելով բեմի կենտրոնը կանգ է առել): Լսեցէ՛ք, պարոն: Ես մի պարզ զինւորական եմ, դուք՝ նախկին ուսուցիչ: Մենք դիպլոմատներ չենք, որ տաւարը ասեղով մորթենք: Պատասխանեցէք, առանց պատէպատ ընկնելու: Ի՞նչ է հրամայել ձեզ իմ փեսան ինձ ասելու: Գիտէ՛ք, ևս զրգուում եմ, ևս զգացմունքի մարդ եմ:

ՍՈՂՈՄ ՍՈՂՈՄԵԱՆ. Զգացմունքի մարդ լինելը ազնիւ բան է, թէև վնասակար: Մի փիլիսոփայ ասել է. — կեանքը ողբերգութիւն է նրանց համար, որոնք զգում են, և կօմեդիա նրանց համար, որոնք մտածում են: Արդ, դուք զգացող, ևս մտածող՝ միանանք և այնպէս մօտենանք խնդրին:

ԿՈՆՍՏԱՆԴԻՆ (ամուր բռնում է Սողոմ Սողոմեանի թևը, թափահարում

- է): Ասելով էք, վերջապէս, թէ չէ... Ի՞նչ է պահանջում
ինձնից ձեր քրոջ որդին, իմ աղջկայ ամուսինը:
- ՍՈՂՈՄ ՍՈՂՈՄԵԱՆ** (ցաւ զգալով): Պահանջում է, որ...
- ԿՈՆՍՏԱՆԴԻՆ** (լրացնելով): ... Որ ես հեռանամ այս տնից, այն-
պէս չէ: Գնամ, կորչեմ... ամա:
- ՍՈՂՈՄ ՍՈՂՈՄԵԱՆ**. Թէև կատարելապէս այդպէս չէ, բայց
և այնպէս: Սակայն թեև բաց թողէք... ցաւեցնում էք:
Մի իմաստասէր ասել է. — ով ուրիշին... ցաւում է...
- ԿՈՆՍՏԱՆԴԻՆ** (բաց թողնելով նրա թևը): Ի՛է, հեռացէք. այժմ հաս-
կացայ ձեզ, պարոն դիպլոմատ:
- ՍՈՂՈՄ ՍՈՂՈՄԵԱՆ**. Ինձ թւում է, որ աւելորդ չէր լինիլ
մի քանի դէտայլներ բացատրել:
- ԿՈՆՍՏԱՆԴԻՆ** (բարձր ձայնով): Հեռացէ՛ք: (Նստում է վրդովւած և
մտածում է):
- ՍՈՂՈՄ ՍՈՂՈՄԵԱՆ**. Չնայելով, որ շատ բարի մարդ էք, բայց և
այնպէս բարի չէք... Սակայն թէև... Իսկապէս ասած... (Հեռա-
նում է պատշգամբով, մի քանի անգամ երկիւղով լետ ու լետ նայելով):

ՏԵՍԻՍ III.

Կոնստանդին և Արմենուհի.

- ԱՐՄԵՆՈՒՀԻ** (զալիս է պատշգամբից: Հազած է ուրիշ ամարալին հա-
զուստ: Համեմատաբար զլարթ է արտաքուստ): Ի՞նչ էր ասում, մեր
պատւելին, հայրիկ:
- ԿՈՆՍՏԱՆԴԻՆ** (զրզիռը զսպել է): Ասում էր, թէև այսօր չորեք-
շաբթի է, բայց կարող էր և հինգշաբթի լինել: Դու, երևի,
ուղում ես տնից դուրս գալ:
- ԱՐՄԵՆՈՒՀԻ** (մօտեցել է համակին և շալը վերցրել): Այո՛, հայրիկ,
գնում եմ իմ ոովորական դբօսանքը կատարելու:

ԿՈՆՍՏԱՆԴԻՆ. Սպասիր մի քանի բոպէ: Խօսք ունիմ քեզ
ասելու: (Նստում է):

ԱՐՄԵՆՈՒՅԻ (շալը լետ դնելով, դալիս է քեմի կենտրոնը): Հրամայի՛ր,
հայրիկ:

ԿՈՆՍՏԱՆԴԻՆ. Այս երեկոյ ես հեռանում եմ այստեղից և եր-
բէք ոտ չեմ դնելու այս տունը:

ԱՐՄԵՆՈՒՅԻ (հառաչելով): Հասկանում եմ, հայրիկ: (Նստում է):

ԿՈՆՍՏԱՆԴԻՆ. Ես կարծում էի իմ ներկայութիւնը կարող է
քեզ օգնել, բայց դուրս է դալիս հակառակը: Ի՞նչ և է,
խնդիրը ես չեմ: Ասա՛, Արմենուհի, մտադի՛ր ես Սամսոնի
հետ հաշուելու:

ԱՐՄԵՆՈՒՅԻ (դրական): Ո՛չ:

ԿՈՆՍՏԱՆԴԻՆ. Այժմ չեմ ասում, այլ յետոյ, մի քիչ անցած:

ԱՐՄԵՆՈՒՅԻ (աւելի դրական): Ո՛չ այժմ, ո՛չ յետոյ, ո՛չ երբէք:

ԿՈՆՍՏԱՆԴԻՆ. Ուրեմն այդ վեռւած է:

ԱՐՄԵՆՈՒՅԻ. Վճուռած է:

ԿՈՆՍՏԱՆԴԻՆ. Հըր՛: (Մտածում է մի փոքր, զսպում է իր դժկամակու-
թիւնը): Լաւ, շատ լաւ, վարւիր ինչպէս սիրտդ է ուզում:
Ես չեմ կարող լինել մէկն այն հայրերից, որոնք հասարա-
կական կարծիքի անունով ճնշում են զործ դնում իրանց
զաւակների վրայ: Իհարկէ, ես էլ ունիմ որոշ հայեացքներ,
բայց ամեն քանից առաջ քո բաղդաւորութիւնն է ինձ
համար: Մի հարց ևս:

ԱՐՄԵՆՈՒՅԻ (անհանգիստ): Լսում եմ, հայրիկ:

ԿՈՆՍՏԱՆԴԻՆ. Ասա ինձ, սիրո՞ւմ ես այդ ճարտարապետին:

ԱՐՄԵՆՈՒՅԻ (շփոթւելով): Հայրիկ:

ԿՈՆՍՏԱՆԴԻՆ (հանգիստ): Մի՛ շփոթւիր. ասա՛, աղջիկս:

ԱՐՄԵՆՈՒՅԻ (տատանւում է, մտածում է քիչ, յետոյ վճռական): Այո՛, սի-
րում եմ, հայրիկ:

ԿՈՆՍՏԱՆԴԻՆ (ցնցում է: յետոյ իսկոյն զսպում իրան): Լաւ, շատ
լաւ: Ամուսինդ գիտէ:

ԱՐՄԵՆՈՒՅԻ. Ամուսինս կապ չունի իմ զգացումների հետ:

ԿՈՆՍՏԱՆԴԻՆ. Աղջիկս, դու գեռ նրա տանն ես, նրա անունն
եւ կրում:

ԱՐՄԵՆՈՒՅԻ. Ուրի՞շ, հայրիկ:

ԿՈՆՍՏԱՆԴԻՆ. Կկամենայի իմանալ ի՞նչ ես մտածում անելու:

ԱՐՄԵՆՈՒՅԻ. Ոչինչ:

ԿՈՆՍՏԱՆԴԻՆ. Կարելի է մտադիր ես բաժանուէլ Ալադեա-
նից:

ԱՐՄԵՆՈՒՅԻ. Ոչ, չեմ ուզում բաժանուէլ:

ԿՈՆՍՏԱՆԴԻՆ. Հապա ինչպէ՞ս. ապրելով մէկի տանը, սիրելի...
(Յանկարծ կատաղում է, ձեռն ուժղին դարկում է սեղանին, բարձրա-
ձայն): Արմենուհի: (Վեր է կենում):

ԱՐՄԵՆՈՒՅԻ (անփոյթ, նայում է հօրը խոր լանդիմանութեամբ): Հայ-
րիկ: (Լռութիւն):

ԿՈՆՍՏԱՆԴԻՆ (նայել է Արմենուհու համարձակ աչքերին: Զսպում է
իրան. հանգստանում է): Լաւ, լաւ, ներիր, մի վայրկեան չի-
մարացայ: Գիտեմ, որ դու այն կանանցից չես: Հասկանում
եմ, դու չես ուզում թողնել քո զաւակին:

ԱՐՄԵՆՈՒՅԻ. Այդ չէ դիտաւոր պատճառը:

ԿՈՆՍՏԱՆԴԻՆ (զարմանալով): Այդ չէ. ուրեմն ի՞նչ է:

ԱՐՄԵՆՈՒՅԻ. Ես չեմ ուզում հետևել շատերի օրինակին: Ինձ
համար կարևորը սէրն է, որին այնքան կարօտում էիս
Այժմ ես սիրում եմ և սիրւած եմ—այսքանը բաւական
է ինձ:

ԿՈՆՍՏԱՆԴԻՆ. Սիրում ես, սիրւած ես և պիտի տանջուես
լաւիտեան: Ինչո՞ւ:

ԱՐՄԵՆՈՒՅԻ. Յանուն սիրոյ, հայրիկ. լանուն այն բարձր զգաց-
ման, որ կեանք է ներշնչում կնոջ անգոյն գոյութեանը:

- ԿՈՆՍՏԱՆԴԻՆ.** Չեմ հասկանում, ինձ համար պարզ չէ այդ:
Ասա, խնդրեմ, նա քանի՞ զաւակ ունի:
- ԱՐՄԵՆՈՒՅԻ.** Երկուսը:
- ԿՈՆՍՏԱՆԴԻՆ.** Դու տեսնու՞մ ես նրա հետ:
- ԱՐՄԵՆՈՒՅԻ.** Երբեմն:
- ԿՈՆՍՏԱՆԴԻՆ.** Կարելի է այժմ էլ տեսակցութեան ես զնում:
- ԱՐՄԵՆՈՒՅԻ** (տանջւելով): Հայրի՛կ: (Վեր է կենում):
- ԿՈՆՍՏԱՆԴԻՆ** (զղջւելով): Լաւ, լաւ. այլևս ոչ մի հարց: Իէ՛հ,
ես զնում եմ հանապարհի պատրաստութիւն տեսնելու:
(Վեր է կենում):
- ԱՐՄԵՆՈՒՅԻ.** Հայրիկ, դու մտքումդ ինձ անիծո՞ւմ ես:
- ԿՈՆՍՏԱՆԴԻՆ.** Քո՞ւ լիցի: Ընդհակառակը, օրհնում եմ քո անկեղծութիւնը: Շնորհակալ եմ, զաւակս, շատ շնորհակալ եմ, որ բոլորն ասացիր: (Ուզում է գնալ դէպի պատշգամբ, Ստեփանին տեսնելով, կանգ է առնում):

ՏԵՍԻՆԻ, IV.

Ն ո յ ն ք և Ս տ ե փ ա ն .

- ՍՏԵՓԱՆ** (զալիս է պատշգամբից վերարկուով, ուսին պայուսակ, ձեռքին մի ձամբարկղ): Մնացէք բարև, բարեկամներս:
- ԿՈՆՍՏԱՆԴԻՆ.** Դուք արդէն զնո՞ւմ էք:
- ՍՏԵՓԱՆ.** Ինչպէս տեսնում էք: (Ձեռ է տալիս Կոնստանդինին: ձամբարկղը զնելով գետնի վրայ, զլիսարկը բարձրացնում է): Արմենուհի՛, թոյլ աւէք իմ շնորհակալութիւնը յայտնել ոչ ձեր հիւրասիրութեան, այլ պարզ և անկեղծ վարմունքի համար: Ինչ որ էլ պատահի, իմացէք, որ ես ձեր կողմն եմ:
- ԱՐՄԵՆՈՒՅԻ** (ջերմագին սեղմելով Ստեփանի ձեռը): Օ՛՞, շատ շնոր-

ՏԵՍԻՆ, VI.

Արմենուհի, Եղիսաբէթ, յետոյ Մելանիա.

ԱՐՄԵՆՈՒՅԻ (նայել է հօր յետեից: Մօտենում է համակին, շալը գցում է գլխին, ձեռնափայտը վերցնում է և դիմում է դէպի խորքի դռնակը):

ԵՂԻՍԱԲԷԹ (երևում է խորքի դռնակի յետևում: Հագած է դրսի հագուստ. մետաքսեայ սև շրջազգեստ, գլխին թասակրաւ, ձեռքին հովանոց): **ՈՒՐ ԷՍ ԳՆՈՒՄ:**

ԱՐՄԵՆՈՒՅԻ (ձեռը հանգիստ բարձրացնելով, ցոյց է տալիս կանաչազարդ լեռները): **Այնտեղ:**

ԵՂԻՍԱԲԷԹ (մօտենում է արագ քալելով սանդուղքին): **Մելանիա:** (Արմենուհուն): **Սպասի՛ր:**

ՄԵԼԱՆԻԱ (երևում է պատշգամբի վրայ): **Այստեղ էմ, տիկին:**

ԵՂԻՍԱԲԷԹ. **Տիրուհուդ հետ գնա, ուր որ նա գնում է:** (Խորհրդաւոր): **Իմացան:**

ՄԵԼԱՆԻԱ. (Թոյլ): **Լաւ:** (Իջնում է պարտիզակ):

ԱՐՄԵՆՈՒՅԻ (Յուզւած): **Ամօթ է, ամօթ է, տիկին:**

ԵՂԻՍԱԲԷԹ. **Ես էլ գիտեմ ամօթ է, բայց թէ ո՞ւմ համար:**

ԱՐՄԵՆՈՒՅԻ (Մելանիային): **Հեռացի՛ր:** (Սրտմտութիւնից դողում է, բայց իրան զսպելով, շալը նորից վերցնում է և ձեռնափայտի հետ ձգում համակի վրայ):

ՄԵԼԱՆԻԱ. (հեռանում է պատշգամբով):

ԵՂԻՍԱԲԷԹ (ինքնագոհ): **Այդպէս:**

ՏԵՍԻՆ, VII.

Արմենուհի, Եղիսաբէթ և Սամսոն.

ՍԱՄՍՈՆ (երևում է պատշգամբի վրայ. տխուր է, նեարդային):

ԵՂԻՍԱԲԷԹ. Ուզում էր մենակ դուրս գալ, հրամանդ կատարեցի: (Զար ուրախութեամբ): Հնազանդւեց:

ՍԱՄՍՈՆ (Թոյլ): Լաւ: (Նշան է անում Եղիսաբէթին հեռանալու: Իջնում է պարտիզակ):

ԵՂԻՍԱԲԷԹ (հեռանում է պատշգամբով, լետ ու լետ նայելով):

ԱՐՄԵՆՈՒՅԻ (նստել է ձախ կողմի ակոռներից մէկի վրայ: Աշխատում է հանգիստ ձեռնալ):

ՏԵՍԻԼ VIII.

Սամսոն եւ Արմենուհի.

ՍԱՄՍՈՆ (զալիս է բնի կենտրոնը: Նոյնպէս աշխատում է հանգիստ ձեռնալ): Զգում եմ, դժւար է ազատութիւնից զրկւելը:

ԱՐՄԵՆՈՒՅԻ (չի նայում Սամսոնին և ոչ էլ որեէ շարժումն է անում):

ՍԱՄՍՈՆ. Ի՛նչ արած, դուք ինքներդ այդպէս կամեցաք: Դուք ի չարը գործ դրեցիք իմ բարութիւնը, այժմ ես ստիպւած եմ խիստ վարւել:

ԱՐՄԵՆՈՒՅԻ (նոյն դիրքում): Վարւեցէք, ինչպէս կամենաք:

ՍԱՄՍՈՆ. Թողտուութիւն չէք խնդրում: Ես կարող եմ դարձեալ ազատութիւն տալ ձեզ:

ԱՐՄԵՆՈՒՅԻ (վեր է կենում և դիմում է դէպի պատշգամբ):

ՍԱՄՍՈՆ. Ո՞ւր էք գնում:

ԱՐՄԵՆՈՒՅԻ. Իմ երեխային համբուրելու:

ՍԱՄՍՈՆ. Իսկ եթէ այդ էլ թոյլ չտամ:

ԱՐՄԵՆՈՒՅԻ. Իմ շրթունքները դեռ արատաւորւած չեն: (Ուզում է գնալ):

ՍԱՄՍՈՆ (Արմենուհուն ձանապարհը կտրելով): Կանգ առէք:

ԱՐՄԵՆՈՒՅԻ (կանգ է առնում):

ՍԱՄՍՈՆ. Ասու՛մ են, ձեր սիրահարութեան լուրն արդէն տա-
րածւել է բոլոր ամարանոցներում:

ԱՐՄԵՆՈՒՅԻ (սառը): Կարելի է:

ՍԱՄՍՈՆ. Ասու՛մ են, նրա կինը այնքան է կատաղած, որ մտա-
դիր է ձեզ հրապարակական վիրաւորանք հասցնել, եթէ
համարձակւիք երևալ հասարակութեան մէջ: Ի՞նչ կասէք
դրա դէմ:

ԱՐՄԵՆՈՒՅԻ. Ոչինչ:

ՍԱՄՍՈՆ. Լուրն այսօր-վաղը կանցնի քաղաք, և ես կդառնամ
ամբողջ հասարակութեան ծաղրի և արհամարհանքի առար-
կան:

ԱՐՄԵՆՈՒՅԻ. Կարող է պատահել:

ՍԱՄՍՈՆ (աւելի ու աւելի վրդովւելով): Ես, Սամսոն Ալադեանս,
որ ամենքի յարգանքն է վայելում և որ իր շրջանի ամե-
նախելօք մարդն է համարւում:

ԱՐՄԵՆՈՒՅԻ (թոյլ հեզնանքով): Այո, համարւում է:

ՍԱՄՍՈՆ. Եւ դուք կարողանում էք այս բոլորը լսել սառնու-
թեամբ:

ԱՐՄԵՆՈՒՅԻ. Ամենայն սառնութեամբ:

ՍԱՄՍՈՆ. Գոնէ ձեր պատուի մասին մտածեցէք:

ԱՐՄԵՆՈՒՅԻ. Իմ պատիւը ձեզ հետ կապ չունի:

ՍԱՄՍՈՆ. Բայց չէ՞ որ դուք իմ անունն էք կրում:

ԱՐՄԵՆՈՒՅԻ. Վերադարձնում եմ ձեզ այդ անունը ամենայն
պատրաստակամութեամբ:

ՍԱՄՍՈՆ (ծայնը բարձրացնելով): Իսկ իմ տունը, իմ հանգր:

ԱՐՄԵՆՈՒՅԻ. Վունդեցէք ինձ էլ ձեր տնից, ինչպէս վունդեցիք
իմ հօրը:

ՍԱՄՍՈՆ. Դուք կորցրել էք ամեն մի մարդկային զգացում:

ԱՐՄԵՆՈՒՅԻ (առաջին անգամ երեսը դարձնելով Սամսոնին): Խօսե-
ցէք ինչի մասին կամենաք, բացի զգացումից:

- ՍԱՄՍՈՆ (յուսահատ): Դուք բարոյապէս մեռել էք:
- ԱՐՄԵՆՈՒՅԻ. Ինչո՞ւ չէք մեռցնում և մարմնապէս:
- ՍԱՄՍՈՆ (խեղդուկ ծայնով): Բաւական է. ես կարող եմ ցնոր-
լել:
- ԱՐՄԵՆՈՒՅԻ (նորից ուզում է պատշգամբով բարձրանալ):
- ՍԱՄՍՈՆ. Սպասեցէ՛ք. ես վերջին անգամն եմ ձեզ հետ խօ-
սում:
- ԱՐՄԵՆՈՒՅԻ (կանգ է առնում):
- ՍԱՄՍՈՆ. Ես փորձեցի ձեզ բացատրութիւն տալու — չընդու-
նեցիք, մեղքս յանձն առայ— չմեղմացար, ներումն խընդ-
րեցի— չներեցիք, աղերսեցի, ստորացայ— չազդեց: Վճռեցի
խստութեան դիմել. կարծում էի դրանով կկտրեմ ձեր
կամակորութիւնը: Այժմ տեսնում եմ, որ այդ էլ չի օգ-
նում: Ես սառն եմ վերաբերւել ձեզ— ճիշտ է: Չեմ հա-
նաչել և գնահատել ձեր հողին— գուցէ: Ես դաւաճանել
եմ ձեզ— չեմ հերքում: Բայց այս բոլորն անցել է: Ես
քաւել եմ մեղքերս անքուն գիշերներով, անհուն տանջանք-
ներով: Ես այլ ևս այն չեմ, ինչ որ էի: Մնում է ձեր
արածը: Այդ է նշանաւորը, այդ է սարսափելին: Ես թոյլ
եմ տալիս ինձ հաւատալու, որ ձեր շրթունքները դեռ
արատաւորւած չեն, թոյլ եմ տալիս հաւատալու, որ նա, այդ
պարոնը շատ մաքուր, շատ ազնիւ մարդ է: Բայց ո՞վ
հաշլի կառնի այդ:
- ԱՐՄԵՆՈՒՅԻ. Մի ապականւած հասարակութեան մէջ ոչ ոք:
- ՍԱՄՍՈՆ. Ա՛յ, զգո՞ւմ էք այդ: Այո՛, բոլորը կբամբասեն, բոլո-
րը կժաղրեն: Եւ մէջ տեղ դէս ու դէն կշարտուի իմ պա-
տիւր, ինչպէս մի թքւած, արհամարհւած պատառ: Ճի՞շտ
եմ ասում, թէ չէ:
- ԱՐՄԵՆՈՒՅԻ. Ճիշտ էք ասում:
- ՍԱՄՍՈՆ. Ուրեմն, լսեցէ՛ք: Ես յետ եմ վերցնում եմ խստու-

Թիւնը: Նորից տալիս եմ ձեզ ազատութիւն: Բայց մի պայմանով: Հեռացրէք ձեզնից այդ մարդուն: Չեմ ասում վիրաւորեցէք, այլ ցոյց աւէք սառնութիւն, արհամարհանք: Ես կճոռանամ ձեր վարմունքը, բայց դուք ևս պիտի մոռանաք իմը: Մենք կհաշտուենք և վաղն և եթ կուղևորուենք արտասահման մի քանի ամսով կամ ամբողջ տարով: Այս անհրաժեշտ է: Մեր բացակայութեամբ հասարակութիւնը կճոռանայ մեզ, և մեր անունը կազատուի բամբասանքից: Ընդունում էք իմ առաջարկութիւնը:

ԱՐՄԵՆՈՒՅԻ (լսել է ուշադիր, մտածել է): Չգիտեմ:

ՍԱՄՍՈՆ. Յանուն մեր դաւակի:

ԱՐՄԵՆՈՒՅԻ. Չգիտեմ, չեմ կարող ասել:

ՍԱՄՍՈՆ. Լա՛ւ: Ես ձեզ ժամանակ կտամ մտածելու, միայն մինչև երեկոյ, ոչ աւելի: Կրկնում եմ, այս իմ վերջին խօսքըն է: Կրնդունէք—լաւ, չէք ընդունիլ—խնդիրը կվնուի ահա այս: (Ցոյց է տալիս ատրճանակը և իսկոյն յետ դնում գրպանը): Երէկանից դէս իմ ամբողջ էութիւնը տակն ու վրայ է եղել: Այս երեկոյ ես կսպասեմ ձեր վերջնական պատասխանին: (Գնում է պատշգամբով):

ՏԵՍԻՍ ԻՃ.

Արմենուհի, մենակ.

ԱՐՄԵՆՈՒՅԻ (մնալով մենակ, մի բոպէի չափ մտածում է, թե՞ թե շարժումն է անում, բարձրանում է սանդուղքը մի երկու աստիճան: Յանկարծ կանգ է առնում, վճռական շարժումն է անում, իջնում է և նստում առաջին աստիճանի վրայ: Գլուխը բռնում է ձեռներին մէջ և մտածում):

Արմենուհի և Հմայեակ.

ՀՄԱՅԵԱԿ (երևում է խորքի դռնակի մէջ: Յուզւած է, գունատ, նիհար, բայց ընկձւած չէ, այլ վճռական, համարձակ): Տիկի՛ն:

ԱՐՄԵՆՈՒՀԻ (զլուխը բարձրացնում է, նայում, ցնցւում, ոտքի կանգնում): Ա՛հ, դ՞ուք, այստե՞ղ: Նա իսկոյն հեռացաւ. կարող է վերադառնալ:

ՀՄԱՅԵԱԿ. Չտեսնելով ձեզ սովորական ժամին ժայռի վրայ, ինձ թւաց, որ մի դժբաղդու-թիւն է պատահել, և վճռեցի ամեն վտանգ յանձն առնել: Պէտք է վերջ տալ այս անտանելի կացութեանը:

ԱՐՄԵՆՈՒՀԻ. Հեռացէք, Աստուած սիրէք, հեռացէք:

ՀՄԱՅԵԱԿ. Առանց ձեզ մի քայլ անգամ չեմ անիլ այստեղից: Կամ այսօր, կամ երբէք: Ես այլևս տառապելու ոչ չունիմ: Պէտք է հանգուցը լուծել:

ԱՐՄԵՆՈՒՀԻ (յուսահատ): Դիւրին է ասել, բայց ինչպէ՞ս լուծել:

ՀՄԱՅԵԱԿ. Այնպէս, ինչպէս պահանջում է ամենազօր, ամենայազթ սէրը, որի համար չպիտի լինի խոչընդոտ: Ստել և խաբել ոչ դուք կարող էք և ոչ ես: Մինչդեռ ձեզ արդէն համարում են սովորական խաբեբաներ: Արմենուհի՛, ապացուցանենք, որ մենք ընդունակ չենք ամօթալի դաշինք կապելու հասարակական հնամաշ աւանդութիւնների հետ: Մեր սէրը չի կարող և չպիտի կերակրուի ամբոխի սեղանի փշրանքներով: Ես վճռեցի զոհել ամեն բան:

ԱՐՄԵՆՈՒՀԻ. Ամեն բան, հարկաւ, բացի զաւակներից:

ՀՄԱՅԵԱԿ. Նոյն իսկ զաւակներիս:

- ԱՐՄԵՆՈՒՅԻ (բաւական անտարբեր): Նոյն իսկ զաւակներիդ: Շատ
 չէ, արդեօք, այդ ինձ համար:
- ՀՄԱՅԵԱԿ. Արմենուհի, չի կարող լինել իսկական սէր առանց
 խոշոր զոհաբերութեան:
- ԱՐՄԵՆՈՒՅԻ. Բայց մի այդպիսի զոհ կարող է թունաւորել
 ամեն մի սէր, որքան ևս այն զօրաւոր լինի:
- ՀՄԱՅԵԱԿ. Ամենազեղեցիկ ծաղիկն ամենասոսկալի թոյն է պա-
 րունակում իր մէջ: Անունն է այդ ծաղկի բելադոն: Ես
 բարւոք եմ համարում նրա բուրմունքով մահ ընդունել,
 քան անվերջ սողալ բուսական կեանքի ծանծրոյթում:
- ԱՐՄԵՆՈՒՅԻ. Դուք չունիք իրաւունք զրկելու այդ անմեղ-
 ներին իրանց հօրից, այդ կլինի ոճիր, եթէ անէք:
- ՀՄԱՅԵԱԿ. Բայց միթէ աւելի մեծ ոճիր չէ մարդկային ամե-
 նավեհ զգացման հետ առւտրական դաշինք կապելը: Ես
 դերադասում եմ իմ զաւակներին զրկել իրանց հօրից, քան
 թողնել նրանց առանց ծնողների:
- ԱՐՄԵՆՈՒՅԻ. Ձեմ հասկանում այդ:
- ՀՄԱՅԵԱԿ. Ահ, տիկին, իմ զաւակներն արդէն ծնողներ չու-
 նին: Այն օրից, երբ ես հանդիպել եմ ձեզ, նրանց մայրն
 և ես նրանց թշնամիներ ենք:
- ԱՐՄԵՆՈՒՅԻ (մեկուսի, տանջանքով): Ասուած իմ:
- ՀՄԱՅԵԱԿ. Ի՞նչ է այդ ողորմելիների տեսածն ու լսածը մեզ-
 նից: Փոխադարձ ասելութիւն, հալածանք, զզւանք: Ար-
 դէն նրանց մանուկ աչքերը չողնել են մեր ամենօրեայ
 ընդհարումները տեսնելուց, արդէն նրանց քնքոյշ լսելիքը
 աղաւաղւել է իրանց ձօր անդուսպ անէծքներից և չիշոց-
 ներից: Երէկ առաւօտ կրտսերը հարցնում է ինձ. «Նայ-
 րիկ, բո՞ անունը լի՞րբ է»: Ահա ամենաթույլ ածականը, որ
 տալիս է ինձ նրանց մայրը:
- ԱՐՄԵՆՈՒՅԻ (տառապանքով): Եւ մեղաւորն ես եմ, ան:

ՀՄԱՅԵԱԿ. Կարող է լինել աւելի մեծ ոճիր, քան ամեն օր, ամեն ժամ կաթիլ-կաթիլ թոյն ածել մանկական սրտերի մէջ, որոնք սպունգի նման ծծում են: Ասացէք, ո՞րն է աւելի մեծ յանցանք՝ ղրկել նրանց հօրից թէ՞ պատրաստել նրանց համար մի դժբաղդ ասպազայ և հասարակութեան համար բարոյական անդամալուծներ:

ԱՐՄԵՆՈՒՅԻ (ընկձած): Չգիտեմ. այդքանը հասկանալու ոյժ չունիմ:

ՀՄԱՅԵԱԿ. Թող այժմենից իսկ ընկնի ստի և փարիսեցիութեան քօղը, որով օրօրոցից արդէն կապում են մեր աչքերը: Երբ նրանք կհասունան, կեանքը կեանաչեն, կհասկանան, որ իմ արածը դաժանութիւն չէր իրանց վերաբերմամբ, այլ մի անխուսափելի տուրք յաւիտենական ճշմարտութեանը:

ԱՐՄԵՆՈՒՅԻ. Կհասկանան արդեօք: Մայրը նրանց փափուկ սրտերի մէջ կանուցանի խորին ատելութիւն դէպի ձեզ, դուք կդառնաք նրանց աչքում մի անսիրտ հրէշ, և նրանք երբէք, երբէք չեն ներիլ ձեզ ձեր արարքը:

ՀՄԱՅԵԱԿ. Օ՛հ, ո՛չ. մայրական կրթութիւնն այնքան զօրաւոր չէ, որքան ընդունւած է կարծել: Վաղ թէ ուշ նրանց ուղեղը կազատուի կապանքներից և կսկսի գործել ինքնուրոյն, ազատ: Ահա այն ժամանակ նրանք կհասկանան ինձ և կներեն: Չէ՞ որ կեանքը նրանց համար ևս դպրոց է դառնալու: Արմենուհի, եթէ ամուր է մեր սիրոյ կապը, եթէ առողջ է նրա սաղմը, պէտք է բաժանւենք մեր ամուսիններից, պէտք է խորտակենք կեղծ կապը և միանանք բնութեան օրհնւած կապով: Այս է պահանջում մեզնից ոչ միայն մեր փոխադարձ երջանկութիւնը, այլ և բոլոր նախապաշարուծներից, բոլոր աւանդութիւններից ազատ ազնւութիւնը:

ԱՐՄԵՆՈՒՅԻ. Իսկ ես կարծում եմ, որքան հեռու լինենք մի-
մեանցից, այնքան չարգած կլինենք սիրոյ զգացումը և
այնքան խորը կզգանք նրա մեծութիւնը: Տարիներով երա-
զած մի աշխարհ եմ ձեռք բերել: Նա լի է անուշ բուր-
մունքով և հեռաւորութեան փշերը չեն, որ պիտի արգե-
լեն ինձ վայելել այն:

ՀՄԱՅԵԱԿ. Դուք դեռ շարունակում էք երազել, տիկին, դուք
դեռ չէք հասել այդ աշխարհը, այլապէս կշտապէք վայե-
լել այն:

ԱՐՄԵՆՈՒՅԻ. Ծառը ուրախ, զւարթ ու գեղեցիկ է իր ծա-
ղիկներով ու կոկոններով, իսկ երբ նա բեռնաւորում է
պտուղներով, թեքում է դէպի երկիր և տառապում:
Նեռու լինենք երկրից, ճմայեակ, և բարձր պահենք մեր
զգացումները:

ՀՄԱՅԵԱԿ. Այդ է ուրեմն ձեր վերջին խօսքը:

ԱՐՄԵՆՈՒՅԻ. Առ այժմ, այո, ապագայի մասին պատասխա-
նատու չեմ:

ՀՄԱՅԵԱԿ. Եւ պիտի բաժանւենք չմիացամ:

ԱՐՄԵՆՈՒՅԻ. Պիտի բաժանւենք, հոգով աւելի ամուր կապ-
ւելու համար:

ՀՄԱՅԵԱԿ (տառապանքով): Ա՛հ, որքան միամիտ էի ես, որ երե-
ակայում էի մի նոր կեանք, որքան խաբւած, որ մի
կտրւած ծաղիկ չի կարելի մի ուրիշ բունի վրայ հաստա-
տել:

ԱՐՄԵՆՈՒՅԻ (փաղաքշանքով): Մի վշտանաք. այդ կրկնապատ-
կում է իմ տառապանքը: Մի պահանջէք անկարելին, մենք
միայն մեր սեփական կեանքերի վրայ ունինք իրաւունք
և ոչ ուրիշների բաղդաւորութեան և պատւի: Նեռացէ՛ք,
նա ամեն վայրկեան կարող է գալ. ես չեմ ուզում ձեզ
վտանգի ենթարկել: Նա ատրճանակ ունի իր զրպանում:

ՀՄԱՅԵԱԿ. Աղաւաղում էք ձեր սքանչելի բնութիւնը, որ այն-
քան համարձակ է և անկեղծ: Փոքրիկից սարսափելով,
դուք ուզում էք գործել մի մեծ յանցանք: Ձեր զաւակը
կուենեայ հայր, իմ զաւակները կուենեան մայր, իսկ մեր
սէրը կմնայ կատարեալ որր, լքւած, անիծւած:

ԱՐՄԵՆՈՒՅԻ. Ո՛չ, նա միայն կմնայ անապական և սուրբ:

ՀՄԱՅԵԱԿ. Սէրը սիրահարների միութեամբ երբէք չի կարող
ապականել: Այն միայն կկործանի ձեզ և ինձ, եթէ չմի-
անանք: Մի՛ լինիք երկչոտ, եղէք բարձր ամբօխի բարոյա-
կան ցածր մակերևութից: Արծիւը չի կարող և չպիտի
ապրէ հաւարնում:

ԱՐՄԵՆՈՒՅԻ. Ա՛խ, դուք ճշումն էք գործ դնում ինձ վրայ,
այդ լաւ չէ, լաւ չէ:

ՀՄԱՅԵԱԿ. Ես ունիմ իրաւունք մինչև անգամ բռնանալու,
եթէ միայն ձեր սէրը սէր է:

ԱՐՄԵՆՈՒՅԻ. Ապագան ցոյց կտայ, թէ որքան ամուր է այն:

ՀՄԱՅԵԱԿ. Ինձ համար չկայ ապագայ առանց ձեզ և ոչ մի
օր, ոչ մի ժամ:

ԱՐՄԵՆՈՒՅԻ. Երեխայ մի՛ լինիք. մտածեցէք:

ՀՄԱՅԵԱԿ. Ես այրել եմ այն կամուրջը, որով անցել եմ ձեզ
հասնելու համար, ինձ համար դարձ չկայ: Ահա՛, տեսէք:
(Հանում է մատից պսակի մատանին): Այս իմ ստրկական շղթա-
յի վերջին օղակն է:

ԱՐՄԵՆՈՒՅԻ. Ի՞նչ էք ուզում անել:

ՀՄԱՅԵԱԿ. Շարտել դէն: (Ձգում է մատանին ձախ կողմը, հեռու):

Ահա այդպէս, դնաց, ընկաւ ձորը:

ԱՐՄԵՆՈՒՅԻ. Խելագամ:

ՀՄԱՅԵԱԿ. Ես դէն ձգեցի այն բռնակալական կապը, որ կոչ-
ւում է ամուսնութիւն: Բաւական է, որքան կրեցի այն՝
իբրև խորին վիրաւորանք անհատի ազատութեան: (Մ'օտև-

նում է Արմենուհուն): Գնանք, հեռանանք, հեռանանք այս մի-
ջավայրից, ուր հինը խառնւել է նորին և կազմել ստով
տոգորւած մի մթնոլորդ: Այնտեղ, հեռու երկրներում,
ուր մեզ չեն ճանաչում, մեզ սպասում է նոր կեանք,
անկախ, ազատ, հիմնւած բոլորովին այլ սկզբունքների
վրայ: Մի մոռանաք ձեր կոչումը, Արմենուհի, այդ յան-
ցանք է: Դուք զիտէք նւագել սքանչելի, դուք ստեղծւած
էք ազատ գեղարւեստի, ազատ սիրոյ համար: (Բռնում է
Արմենուհու ձեռը): Լս՞ում էք, ձեզ կանչում է ճշմարտութեան
ձայնը:

ԱՐՄԵՆՈՒՅԻ (կուելով ինքն իր հետ): Ա՛խ, այդ ձայնը... Այն վա-
ղուց է ինձ կանչում:

ՀՄԱՅԵԱԿ. Հետևեցէ՛ք նրան, ուրեմն, այդ է ձեր կոչումը,
այդ է ձեր սուրբ պարտականութիւնն անգամ:

ԱՐՄԵՆՈՒՅԻ. Բայց ո՞ւր կտանի ինձ այն:

ՀՄԱՅԵԱԿ. Լաւագոյնը աշխարհներից — գեղարւեստների դը-
րախար:

ԱՐՄԵՆՈՒՅԻ. Արժանի՞ եմ ես, արդեօք, այնտեղ ընդունւելու:

ՀՄԱՅԵԱԿ. Աւելի քան արժանի էք, որովհետև դուք ունիք
աստւածային տուրք և մեծ տուրք:

ԱՐՄԵՆՈՒՅԻ. Ա՛խ, այդ ամենքն ասում են, ամենքը, և ես
զգում եմ, որ ունիմ, զգում եմ մանկութիւնից — ահա՛ իմ
թշւառութեան աղբիւրը:

ՀՄԱՅԵԱԿ. Դէն ձգեցէք սնտաի երկիւղի և կեղծ ամօթի կա-
պանքները: Միայն մի քայլ, և դուք փրկւած էք:

ԱՐՄԵՆՈՒՅԻ (ողևորւելով): Ասացէք, թո՞յլ կտան ինձ այնտեղ
նւագելու:

ՀՄԱՅԵԱԿ. Երբ կամենաք, որքան կամենաք և ինչ կամենաք:

ԱՐՄԵՆՈՒՅԻ (հետզհետէ ինքնամոռացութեան մէջ ընկնելով): Եւ ոչ
ո՞ք չի խանգարիլ ինձ, ո՞չ մի ձայն, ո՞չ մի տրտունջ:

ՀՄԱՅԵԱԿ. Ոչ ոք, ոչինչ:

ԱՐՄԵՆՈՒՀԻ. Եւ ես կլինեմ այնտեղ արտիստների շրջանում:

Մհ, այդ իմ լաւագոյն երազն է: Ինձ չեն արհամարհիլ: Նրանք ինձ պատիւ կանեն արւեստների մասին հետո խօսելու: Եւ ես այլեւ չեմ լսիլ առւեստուրի, շահ և վնասի, մուրհակների ու մատեանների մասին: Իմ յոզնած լսելիքն այլեւ չի ընդունիլ համարակալի չխկչխկոցը: Ահ, տարէք ինձ, փախցրէք այստեղից, ես փափագում եմ այդ աշխարհում շնչել և ապրել:

ՀՄԱՅԵԱԿ. Ահ, վերջապէս, դուք խօսեցիք ձեր բնական ծայ-

նով: (Գրկում է Արմենուհուն): Այժմ ես այլեւ երկիւղ չունիմ:

Մենք տարանք յաղթանակը, մեր թշնամիները չեն կարող

հրելու: Գնանք, շտապեցէք: Ես արդէն ամեն ինչ պատ-

րաստել եմ փախչելու համար: (Մղում է Արմենուհուն բեմի

խորքը): Յիսուն քայլ հեռու, անտառի մօտ մեզ սպասում

է մի կառք:

ԱՐՄԵՆՈՒՀԻ (ազատւելով Հմայեակի գրկից): Բայց ոչ, սպասեցէք,

հեռ՛ու, ես խելագարւում եմ, հայրս, զաւանկս: Ո՛չ, ոչ ոչ:

ՏԵՍԻՍ, XI.

Նոյնք, Սամսոն, Վիրգինէ, Եղիսաբէթ, Կոնստանդին և ծառաներ.

ՀՄԱՅԵԱԿ. Մի՛ թուլանաք, եկէք: (Նորից գրկում է Արմենուհուն):

Դուրս գանք այս երկաթէ ցանկապատից, և յաղթանակը

մերն է:

ՎԻՐԳԻՆԷ (երևում է պատշգամբի մի ծայրում և արագ անցնում է միւս

ծայրը):

ԱՐՄԵՆՈՒՀԻ (նկատում է Վիրգինէին, ազատւում է նորից Հմայեակի

գրկից և ձգում): Ահ:

- ՀՄԱՅԵԱԿ** (վախեցած): **Ի՞նչ պատահեց:**
- ԱՐՄԵՆՈՒՀԻ.** **Զարհուրելի ուրևականը:** **Փախի՛ր, եթէ չես ու-**
զուժ կործանուել:
- ՍԱՄՍՈՆ** (բեմի յետևից բարձրաձայն): **Ա՛ն...**
- ՀՄԱՅԵԱԿ.** **Մի քայլ անդամ չե՞մ անիլ առանց քեզ, թո՛ղ զայ:**
- ՍԱՄՍՈՆ** (երևում է պատշգամբի վրայ, ձեռքին ատրձանակ: Խելակո-
 ռոյս): **Սրիկա՛յ:** (Արագ-արագ իջնում է պարտիզակ): **Ստացի՛ր քո**
պատիժը: (Ատրձանակը բարձրացնում է):
 (Վիրգինէ, Կոնստանդին, Մելանիա, Գարեգին, Եղիսաբէթ միմեանց
 յետևից երևում են պատշգամբի վրայ):
- ՀՄԱՅԵԱԿ** (կանգ է առել աներկիւղ և նայում է Սամսոնին):
- ԱՐՄԵՆՈՒՀԻ** (ընկնելով Հմայեակի առաջ, ծածկում է նրան իր մարմնով)
Առաջ ինձ, յետոյ նրան:
- ՍԱՄՍՈՆ.** **Ե՛ւ քեզ, և՛ նրան:** (Ուզում է ատրձանակը արձակել, չի
 կարողանում, թուլանում է): **Ա՛հ, չե՞մ կարող, չե՞մ կարող:** (Ատր-
 ձանակը զցում է գետին: Տանջում է: Քիչ լռութիւն: Խեղդած ձայնով):
Գնա՛ նրա հետ, ազատ ես: (Հեկեկում է):
- ԱՐՄԵՆՈՒՀԻ** (զրկում է Հմայեակին):

Վ Ա Ր Ա Գ Ո Յ Ր.

* * *

Անգիր և անյայտ և անլիշատակ
Ամայի դաշտում կայ մի գերեզման,
— Ո՞վ է հող դառնում այս լուռ քարի տակ,
— Ո՞վ է լաց եղել այս քարի վրան:

Համր քալերով դարերն են անցնում,
Արտուտն է հնչում իր գովքը գարնան,
Շուրջըր դաշտերն են ոսկեվառ ծրփում...
— Ո՞վ է երազել և սիրել նրան...

Ա. Ի. ԻՍԱՀԱԿԵԱՆ.

* * *

Հեծկրլսող քամին, հեծկրլսող քամին,
Թևը վիրաւոր,
Եկաւ ու փարւեց, եկաւ ու փարւեց
Սրտիս վիրաւոր...

Ես բախտի բոյրին, ես բախտի բոյրին
Կարօտ մնացի.
Սիրոյ համբոյրին, սիրոյ համբոյրին
Ծարաւ մնացի:

Օրըս լալազար, օրըս լալազար
Մանկուց սևացաւ.
Ախ, երազներիս, ախ, երազներիս
Գարունը անցաւ...

Ա. Ի. ԻՍԱՀԱԿԵԱՆ.

* * *

Գիշերը պատեց իմ դուռն ու երթիկ,
Եւ օրեր կանցնին ու չի լուսանայ.
— Իմ քնքուշ մանկիկ, իմ սիրուն մանկիկ,
Մի՛ դիպչիր սրտիս,— փշրւած է նա:

Իմ գլխին պայթեց բախտի գոռ մրրիկ
Ու տունս դարձուց տխուր, վերանայ.
— Իմ անուշ մանկիկ, իմ սիրուն մանկիկ
Մի՛ դիպչիր սրտիս,— փշրւած է նա:

Կուգան ու կերթան ճանաչ ու ծաղիկ,
Ախ, միւսնոյն է ինձ համար հիմա.
— Իմ քնքուշ մանկիկ, իմ երազ-մանկիկ,
Մի՛ դիպչիր սրտիս,— փշրւած է նա...

Ա. Ի. ԻՍԱՀԱԿԵԱՆ.

ԱՆՅԱՂԹ ԽԱԼԻՓԱՆ

Յաւերժական Բաղդադում, խալիֆաների ալմաստէ զահի վրայ նստել էր մի երիտասարդ խալիֆայ:

Երեք անգամ օրհնւած լինի նրա մոռացւած անունը:

Հարուն Ալ-Ռաշիդի յաղթական սուրը, որի շողքից դուրս էին ժողովուրդները Տաւրոսեան լեռներից մինչև Մսրայ դարբասները—նա ձեռք չառաւ:

Ազատ թողեց իշխանութեան սանձերը և յայտարարեց բոլոր հպատակներին.

— Թող ապրի ամեն մարդ, ինչպէս ուզում է, միայն թէ թողնէ, որ ուրիշն էլ ապրի:

Եւ հաւաքեց իր ոսկեղէն Գէօշքում պետութեան մէջ ապրող ընտիր երգիչներին և նւագածուներին. — Թող երգեն և նւագեն, և զմրուխտէ հէքիաթներ հիւսեն...

Եւ խալիֆան գիշեր-ցերեկ լսում էր երգիչներին և նրա հողին երազական թւերով սաւառնում էր շքեղ հէքիաթների մէջ:

Իսկ ժողովուրդը ապրում էր զոհ և բաղդաւոր. աշխատում էր և օրհնում թագաւորի կեանքը:

Եւ բուրաւէտ տարիները արշալոյսների պէս ոսկեվառւելով սահում էին Բաղդադի վրայից...

Եւ մի օր, երբ նա լսում էր նւագածուններին՝ ներս ընկաւ սահմանապահ իշխանի մօտից մի սուրհանդակ և գուժեց.

— Մե՛ծ արքայ, թշնամին ներս խուժեց հարաւից և տիրեց Ձեր պետութեան մի ամբողջ նահանգին:

Լռութիւն տիրեց:

— Նրանք չեն կարող տիրել իմ պետութեան մի բուն հողն անգամ, հանգիստ պատասխանեց խալիֆան, իսկ դուք շարունակեցէք նւագել:

Մի քանի օրից յետոյ եկաւ նորից մի գուժաբեր սուրհանդակ.

— Մե՛ծ խալիֆայ, թշնամին արշաւեց հիւսիսից և տիրեց մի ամբողջ նահանգին:

— Սուտ ես ասում, որոտաց խալիֆան, ոչ ոք չի կարող ոտք կոխել իմ պետութեան սահմանները, իսկ դուք նւագեցէք աւելի եռանդագին, դիմեց նա երաժիշտներին:

Եւ նւագում էին երաժիշտները և հիւսում էին զմրուխտէ հէքիաթներ, և խալիֆայի հողին երազական թւերով սաւառնում էր այդ շքեղ հէքիաթների մէջ:

Մի քանի օրից յետոյ եկաւ նորից մի գուժկան.

— Տէ՛ր արքայ, արևելքից մի իշխան եկաւ ահագին բանակով և գրաւեց մի քանի նահանգ. պատերազմ է յայտարարել նա քո պետութեան դէմ և յաղթանակով արշաւում է դէպի Բաղդադ...

Իջաւ խորին լռութիւն. նախարարները խոժոռ կանգնած՝ սպասում էին մարտական հրամանի. դուրսը, Քէօշքի պարիսպների տակ աղմկում էր ամբոխը և պատերազմ էր պահանջում:

Եւ անյողդողդ հանդստութեամբ ասաց խալիֆան.

— Նւագեցէք, մի դադարէք, երբ դուք կդադարէք նւագելուց, այն ժամանակ կնւաճի իմ պետութիւնը... Ի՞նչ նւագեցէք ձեր մարդարտահիւս երգերը, երբ ես լսում եմ մի շքեղ երգ՝ իմ պետութեան սահմանները լայնանում են, մեծանում

են և փուռում—տիրում անեզր հեռուները մինչև աշխարհի
ծայրերը. թող ներս խուժեն իմ անմիտ թշնամիները. նրանք
հողն են տենչում միայն. թող հողով լցւեն նրանց ունայն հո-
գիները. իսկ իմ պետութիւնը—երգն է. և ոչ ոք չի կարող
մտնել իմ հզօր պետութեան անառիկ, անծայր սահմանները.
Նւազեցէ՛ք, յաւերժ նւազեցէ՛ք...

Իսկ յաջորդ օրը ապստամբ Բաղդադը զահրնկէց արաւ
խալիֆային և փոխարէն զահր նստեցրեց նրա եղբօրը, որը
արիւնով և յաղթանակներով ծածկեց պետութեան սահման-
ները:

Սակայն յաւերժապէս օրհնւած լինի անյաղթ խալիֆայի
մոռացւած անունը...

Ա. Ի. ԻՍԱՀԱԿԵԱՆ.

ԹՈՎԱՆՔ

(Անծանօթ Թրքուհիի մը)

Ուրկէ եկար դուն յանկարծ ճամբուս վրայ, չեմ գիտեր.
Կառախուճբին ճիշտ քովի խցիկին մէջ տեսայ քեզ:
Իրիկուն էր. դաշտին մէջ, հորիզոնին վրայ, դեռ
Արևը կը տատամսէր—յոզնած ճամբորդ ինձի պէս.
Ուրկէ եկար դուն յանկարծ ճամբուս վրայ, չեմ գիտեր:

Հմայքներու գոց սրուակ, ինչո՞ւ անցար դուն քովէս,
Խորհրդաւոր մարմինիդ Գիտերը ճոխ ու ճկուն
Եւ սլացիկ հասակիդ ըմբոսաացող գիծը վէս
Սև մետաքսի ծալէծալ խաւերուն մէջը թաքուն.
Հմայքներու գոց սրուակ, ինչո՞ւ անցար դուն քովէս:

Ես ի՞նչ տեսայ հուրիի քու կախարդող դիւթանքէդ.
Ո՛չ թաւիշը մորթիդ, ոչ քօղին տակէն հազիւ թէ
Ընդհնշմարուող գէմբըդ, ոչ ալ աչքերուդ փայլը գէթ.
Ամբողջ գեղըդ սևի մէջ թաղուած, պահուած չէր միթէ.
Ես ի՞նչ տեսայ հուրիի քու կախարդող դիւթանքէդ:

Բայց տարիները անցան, բու թովանքըդ կ'ապրի դեռ.
Աղուորութեանըդ աննիւթ սարսուռն էր ան, որ բոլոր
Շղարշներուն, քօղերուն մէջէն ինծի հասած էր
Եւ հողիս խռովքներ կը վերարկէ մեղծօրօր:
Տարիները անցած են, բու թովանքըդ կ'ապրի դեռ.
Ո՞ւրկէ եկար դուն լանկարծ ճամբուս վրայ, չեմ գիտեր...

ՓԱՅԼԱԿ.

ՉԵՄ ԿՐՆԱՐ

Հեռո՞ւն, դալար մարդերի
Եւ ջրերի անուշիկ
Համբոյր տալով կը փախչի
Վերջալոյսը գեղեցիկ:

Կ'ուզեմ թռչիլ, սլանալ
Ծոցը մարող արեւին,
Բայց ափսոս որ չեմ կրնար
Նորա շողերն կը մարին:

Հեռո՞ւն, դալար մարդերի
Եւ լեռների աննման
Համբոյր տալով կը մարի
Վերջալոյսը իրիկւան:

ԱՐՍԷՆ - ԵՐԿԱԹ.

ԻՉՆԻԿԻ ԼԻՃԸ

(Ն Է Ք Ի Ա Թ)

Ա.

Իչնիկի լիճին արևմուտքի եզրը շրջանակի մը պէս կլոր
ու արծաթէ թելի մը պէս նրբին գիծով մը աչքի կուգայ:
Հիւսիսի ու հարաւի ափերուն վրայ դեղնող կնիւնները կը
դադրեն ջուրին վրայ պղտորելէ, կամ դարնան թարմութիւն-
ներուն՝ կապոյտին վրայ կանանչ կապելէ:

Այդ ափին վրայ ազնուական աւազ մը կը քնանայ, տեղ
տեղ ալիւրի պէս բարակ ու փափուկ, տեղ տեղ քար կտրած,
երկանի կարծրութեամբ գետինը կաղապարելով: Եզերքէն քիչ
մը վար եղեգներու ոսկեբաշ անտառն է որ կը տոժկայ, մռայլ
սպառնալից փափսուքներով կանգնած կանանչ ջուրերուն վրայ:
Հովը վախնալով կը գլլի անոնց մագերուն մէջէն: Մութ թաւի-
շէ, երկար օղակներով զրահուած շամբերուն ահարկու բանակը
կը ծփայ յամբարար, գորտերու երգին հետ համաչափելով կար-
ծես իր շարժումը:

Եղգիւրի այս բարբարոս ու մռայլ տիրապետութիւնը

կ'երկնայ բաւական հեռուներ մինչև հերկուած բլուրներուն
ոտքը, ուրկէ վեր տարտամ միջոցէն մեծնալով ու անուշնալով
գոյն գոյն հատուածները կը տեսնուին այդիներուն, պարտէզնե-
րուն ու ցորեններուն:

Ու կը քալես: Քիչ քիչ ճահիճը ափունքէն կը հեռանայ.
կարճ, փշոտ թուփեր ճամբուն մէջ հոս հոն կը կենան փոշիով
քօղուած կամ հեռուներէն փախչող երգերուն դեղին թաւիշո-
վը զարդարուն: Աջիդ ծովն է որ իր ջուրերը կ'օղակէ, տարօ-
րինակ օձերու կունակներ ուռեցնելով ափերն ի վեր. ու վարը՝
աչքիդ առածին չափ ջուրն է որ կը ճերմկի, կը դեղնի, կը կա-
պուտնայ, փոխնիփոխ հազար գոյն հագնելով, ցերեկուան դալուկ
արևներուկ տակ հրաշալի վերջալոյսներ ծաղկեցնելով իր երե-
սին վրայ:

Ու կը քալես: Ճահիճները կը հալին, կը հատնին, գորտե-
րուն երգը կը մեռնի. գաճաճ թուփերը կը կլորնան, կը լայ-
նան, պղտիկ որք մանուկի տխրութեամբ ծառիկներ կը դառ-
նան, որոնց վրայ յաճախ ճայերու և մարթիներու ծիւնի պէս
մաքուր մարմինը կուգայ քիչ մը ճերմակ դնելու. շատ անգամ
այ ազոաւներով սգաւոր կը դառնան:

Ու յանկարծ այս բոլորովին տափակ գետնին վրայ կը
բուսնին երեք բլուրներ, քով քովի դրուած. թևերնին իրարու
դպած, իրարու ետևէ շարունակուելով:

Ճամբէն դէպ արևմուտք կորսուող շամբուտներէն վար
դաշտը կը քաշուի երկա՛ր երկա՛ր. բլուրներէն անդին գետինը
նորէն թուղթի պէս հարթ կը տարածուի երազկոտ. բայց չես
հասկնար թէ լեռներէն այսքան հեռու, ծովուն այսքան մօտիկ,
ետևէն ընդարձակ ու անտառատիպ ճահիճներով շրջանակուած
այս բլուրները ուրտեղէն ինկած են հոս:

Ճամբուն մէջ ցրուած թուփիկները բլուրներուն վրայ կը

Թօփիկնան, ծառի մը պարույրը կը գծեն միջոցին մէջ, դետնէն
բարձրանալով քիչ քիչ, միշտ վախկոտ ելքով մը:

Ու հատիկ հատիկ՝ կլոր ծառերուն տակուանքը մանիշա-
կի գոյնով, բայց մշտապէս ապրող ծաղիկի ծղօտներ կը դող-
դղան նիհար խոտերուն վրայ: Փռնալները իրենց կուզկուռ
ոստերուն գռուզ դալարէն կը կախեն, աւաղներով մարգարտըած
մարմանդը երբէք չի դեղներ հոն:

Ու բլուրները իրենց կողերէն անցք կուտան ջուրի յստակ
թելի մը, որ չես տեսներ ինչպէս կը քակուի լիճէն, բայց որ
ճահիճներուն արիւնը կը սեպուի:

Մէջտեղի բլուրին ոտքը, հողէն ներս մտած հսկայ քարայր
մը կը մխայ շարունակ, կը մխայ, հովէն հալածող քուլաներ
իրար կ'անցնեն, իրարու կը պլլուին գրկուողներու տաքու-
թեամբ: Դէմդ, մեծ զանգուածով լեռը մուխի մէջ փաթթուած
կը քաշուի դէպ վեր:

Ջուր-Ելածէն անդին ալ ծառները կը հալին բարակ
մշուշի մը մէջ. բլուրներուն ալեկոծումը և շուքերուն տրտմու-
թիւնը աչքերուդ ուժը կը կտրեն, կ'առնեն մինչև աւելի վերը,
լեռան ճիշտ փորը, ուր հսկայ վերքի մը պէս պատառուածք
մը, Սայանը, կը դեղնի կանանչին վրայ:

Ու բլուրներուն վրայ կեցած կը հարցնեմ. ո՞վ բերած է
ասոնք հոս:

Բ.

Ու քարայրի ձկնորսը պատմեց ինձի:

... Մենէ դարեր առաջ աս լիճը չի կար հոս: Ջուրերուն
բռնած տեղը կար քաղաք մը մեծ այնքան՝ որուն նմանը ալ արևը
տեսնալիք չունի երկրի վրայ:

Լեռներուն փէշերէն, երկու եզերքի վրայ ծայր կ'առնէին

տուները, մեծ, ճերմակ, խաս մարմարէ: Ամեն տուն իր պարտէզն ունէր հորովն ու արիշովը:

Ու քաղաքին մէջտեղէն կ'անցնէր զետր, հարուստ ու չրստակ: Անոր ջուրերը անուշ էին զարուհի անձրեւին նման ու բարի: Զուրի աղջիկներ ալիքներուն իվար կռնակի վրայ կը քնանային:

Հարաւի լեռան, Սօղուճախի մէկ բազուկը կը մտնէր քաղաքէն ներս, ու այդ բազուկին տակ ու անոր մէջ չենք գիտեր, ի՞նչպէս, շինւած էր Արև—Աղջիկին պալատը:

Պալատը կռնակէն փակած էր ապառաժին. ոտքերը, դարձել քարէ՝ կը նստէին շատ խորունկները, ջուրերու ակերուն վրայ որոնք երբէք լոյս չի տեսան ու պիտի չի տեսնին ալ:

Պալատը մեծ էր, շատ մեծ. ամեն մէկ պատուհանէ լուծք մը գոմէշ կրնար առանց նեղուելու ներս մտնել: Դռները թերթուած, տաշուած լեռան երեսէ էին, նիգերուն տեղը թռչուններ բոյն կը լարէին, այնքան քիչ կը բացուէին: Ու կաթի ճերմակ մը կը լողար լման շէնքին վրայ. իրկուններուն ու ատուններուն արիւնի բարակ հոսանքներ ծիրանի մը դնէին անոր վրայ, շուտ անցնող ծիածանում մը կը թրթուար քարերն իվար ու քարերն իվեր, պատուհաններուն ընդմէջէն մոխիր դառնալով:

Ներսը մարդ մտած չունէր: Մենակ աղջիկը կը տեսնէին իր պատշգամին վրայ ճառագայթող երեսներով: Անոր աչքերէն կայծակներ կը փախէին, պռունքներէն նուռ կը կաթէր, մազերէն լոյս, ծովի պէս լոյս կը վազէր: Մէկը չէր գիտեր, ամպերը ձգած էին թէ լեռը ծնած էր անի:

Անոր համբաւն ու անունը լեռներն ու ծովերը չափած անցած էին: Շատ հսկաներ, էժտահարի պէս իկիտներ ճամբայ էին ընկած անի տեսնալու համար:

Աղջիկը սիրտ ունէ՞ր թէ ոչ, յայտնի չէ: Մինակ շատ կը սիրէր պալատին առջև փլած հսկաներուն տաքուկ, արիւնոտ սիրտը որ հուժ հուժ կ'ուտէր, դիակնին թողելով դռան նիզերուն փորուածքին մէջ ծագ նստող ազուաւներուն:

Ու սարսափը կը քալէր անոր համբաւին ետեւէն:

Հսկաները, որոնք շատ վարերէ կը փրթէին, պալատին մօտենալու համար ստիպուած էին գետէն անցնել: Հոն կը կռուէին ջուրի աղջիկներուն հետ որոնք իրենց հոլանի միսերուն տարօրինակ համովը կը զինովցնէին ամեհի քաջերը, կը քնացնէին ու կը քաշէին վար անդունդներու մէջ...

Աւելի կորովիները կը փետտէին ծիւն բազուկներու այդ ցանցը, ծիծի ալիքներուն շղթայող թուլութիւնը, ու երբ ոտքերնին փակցնէին դէմի ափին, հողը կը փախէր անոնց առջևէն, հողը խմոր կը դառնար ու հսկաներուն հաստ մարմինը բեւեռուած կը մնար լոյծ տիղմին մէջ, որ հեռուէն կանանչ կախարդանք մը ցոյց կուտար դիտողներուն:

Էժտահարի չափ ուժով մարդը ճանճի նման կը թապլկէր այդ նենգող ափերուն վրայ: Իր մռնչիւնէն պատուհան կուգար աղջիկը, խարդախ, մարդուն ծուծը ոսկորին մէջ եփելու ուժ ունեցող ժպիտով մը:

Ու երբ մարդը գամուած մնար իր դերեղմանին մէջ, թւերն ալ ծիւթ հողին տակ անքակօրէն կապուած ու գերի, կըսեն թէ աղջիկը կ'իջնէր վար: Մեր դուռները ճարճատիւնով կը դառնային ծխնիններուն վրայ, ազուաւները թափ կուտային թւերնուն, բարախուն սև ամպ մը կ'թրթուար աղջիկին ետեւէն որ անծայն նոյն կապող խնդայն երեսին՝ կուգար ոսկի դանկով մը ողջ հսկային կուրծքը կը ճեղքէր, կ'առնէր սիրտը ուր արիւնը դեռ կը խժար, կը տանէր ռունգերուն, ետքը բերնին ու մազերուն ոսկի պատմութեանովը գոցելով իր աչքերուն վայրագ ուրախութիւնը՝ կը ծծէր պուտ պուտ կեանքի հեղուկը, կը

ծծէր այնչափ որ լակած կոկով մը դառնար սիրտը, ետքը կուլ
կուտար...

Ազուաւները իրենց ձագերով կ'անցնէին միսերը մաքրելու
քանի մը ժամէն հսկայէն կը մնար կարմիրով օծուն ոսկոր-
ներու ահարկու և այլանդակ զանգուած մը, կմախք մը կատա-
րել, որ քանի մը օրէն կը ճերմակնար ու կանանչ բակին մէջ
կը մնար տարիներ, մինչև որ օր մը ալիւր դարձած՝ հալէր
ու գետին լցուէր:

Եկող հսկաներուն կը պատմուէին բոլոր այս բաները: Իի-
մացի ափին վրայ տարտամօրէն նշմարւող կանանչին մէջ ճեր-
մակ ստուերներու, վարուած կմախքներու մեռած հսկումը
մտածել կուտար իկիտներուն: Բայց պատշգամի Աղջիկին
լոյսերն այնքան անուշ, աղւորութիւնը այնքան ողողող էր որ
վարանքը կը փախէր քաջերուն մտքէն, ջուրը կը նետուէին
խենդեցած ու գինով:

Օր մըն ալ խոշոր հսկայ մը յայտնուեցաւ:

Վարի աշխարհքէն էր ելեր կարծես, այնչափ բարձր ու սև
էր ան: Իր պատմածին նայելով վեց եղբայրներն ալ եկած էին
այդ աղջիկին համար ու ալ ետ չ'դարձած: Պալատին դէմ,
գետի ափին կեցաւ ան:

Իր հասակը այնքան բարձր էր որ կրցաւ տեսնել կանանչ
մարմանդին վրայ խարսխուած կմախքներուն ճերմակ գերեզմա-
նը: Ոսկորները թնդացին իր միսին մէջ երբ ճանչցաւ հոգիով
իր եղբայրներուն կմախքները որոնք իրար ետևէ շարուած կը
սպասէին: Իրմէն անմիջապէս առաջ եկողը դուռն հասնելու
քիչ էր թողած:

Տխուր էր շատ տեսարանը: Իրենց սերունդը հող այդպէս
արձանացած՝ զոհ էր եղած այդ խարդախ աղջիկին: Ոսկորնե-
րուն վրայ մլիկ մլիկ լոյսեր կը դողային, երբեմն երբեմն մէկէն
միւսը անցնելով: Նեռաւորութեան մէջ լոյսերու այդ երթևեկը

տեսակ մը կեանք կը ստեղծէր կմախքներուն շուրջը և հսկային ծուծին մէջ անտես երակներ այրելէն ուղեղը կը գտնէին: Գոյն գոյն ցոլքեր, արիւնոտ ու կանանչ մանաւանդ՝ գետին վրայ մինչև կ'երկննային:

Եղբայրութեան կապերը շուտով խելքը թռցուցին հսկային: Ճիշտ նոյն պահուն պաշտօնամին վրայ ծագեց աղջիկը ու անոր նայուածքը կրակէ ջուրի պէս ինկաւ հսկային սիրտը: Հմայքն էր թէ վրէժն էր իր մէջը արթնցողը, ստոյգ չի գիտցուիր: Հսկան ջուրը նետուեցաւ:

Շուտով ոտքերը կտրեցան գետնէն և պղտոր, գալարուն ալիքներուն վրայ ծաղկեցան սպիտակ միսերու, կնկան միսերու հրաշալի կլորութիւններ: Անոնք կուգային իրենց ծիծերը կախել հսկային լողացող բաղուկներուն վրայ, կամ իրենց պորտին թրթռուն հեշտութիւնովը զինովցնել անոր աչքերը: Շատ էին այդ աղւորները ու գետը անոնց մազերուն տակ ոսկի ալիքներ կը գլլէր: Բայց հսկան ուժով էր և միտքը մեծ:

Անդունդներուն վրայ պահ մը դարձաւ, քանի մը հեզ աղւորներուն փետուրէ ծանրութիւնը իրեն յաղթելու պէս եղաւ, բայց կախարդանքը թէ վրէժը չի գիտցուիր, սիրտ տուաւ անոր, քակեց ելաւ ջուրէն:

Հողը կը փախէր ոտքերուն տակ, կը փախէր կամաց կամաց շոյելով իր ներքանը:

Այն ու ծախ չոր, խարդած գանկերէն կոյր աչքի փոսեր սոսկում կը պարպէին կանանչին վրայ: Կուրծքի լայն վանդակներուն լարուածքը դեռ իր պարոյրը կը պահէր: Նորեր, հիներ, մեծեր, պղտիկներ, բոլոր կմախքները ցցուած էին միօրինակ սևեռումի մը մէջ: Կմախքներուն մօտիկ կանանչը քիչ մը նուաղուն էր և նուազ, ատոր տեղ կարմիր ծաղիկներ ազդրերն իվեր բարակուկ բարակուկ կը կենային:

Ագռաւները իրենց սև կառաչը թող տուին: Միւս կող-

մէն, պատուհաններուն ներսերէն ճառագայթումը շատցաւ. լոյսը լեցուց ու ալեկոծեց առաստաղներուն մարմարէ մաքրութիւնը ու պատշգամն ի վար Աղջիկը ծռեցաւ, լոյս ու բոց թոթուելով իր ծիծերէն ու պորտէն...

Այս տեսիլքէն ետքը հողը կը դաւէր: Հսկան իր հասակին բարձրութեանը վստահած քալեց որչափ կրցաւ, թւերը վեր բռնած: Բայց տիղմը կը քաշէր անի, կը քաշէր այնքան ծանր ու բռնի որ հսկան կը կարծէր թէ իր ուսերուն վրայ լեռներ են նստեր:

Հողը կուլ տուաւ անոր լման իրանը: Դուռը ալ մօտ էր, շատ մօտ: Ու ապառաժէ դռան առջև երբ վերջին թափով մը նետեց թւերը քարը բռնելու համար, ինչպէս եղաւ, քարը փախաւ թէ հողը կապեց, թւերն ընկան կանանչին ու մնացին...

Աղջիկն եկաւ: Ոսկի դանակը ափին պահ մը նայեցաւ այդ ողջ աչքերուն խորունկը ու յետոյ մի ոտքը դուռին մէջ միւսը կանանչին վրայ որ կարծես կը պազնէր անի, բացաւ սիրտը:

Խոշոր էր ան ու արիւնը սև. կտրած արիւն մըն էր, տարակարգ համով մը: Ծծեց, ծծեց, ծծեց... իր հաճոյքը այնքան սաստիկ եղաւ որ փոխանակ սիրտը կուլ տալու, վեր տարաւ, պատշգամը և կանանչ կրակներու վրայ դրաւ եփելու համար:

Բայց այդ սիրտը հալեցաւ, կարմիր շոգիի փոխուած թռաւ օդին մէջ ու աներևոյթ եղաւ:

Քաղաքը այն օրը օդին մէջ ճամբորդող արիւնի մուխեր տեսաւ և վախցաւ:

Անանկ հսկայ տակաւին քաղաքը չէր ճանչցած: Հազար տարի ապրողներուն սերունդն անգամ հիացաւ նոր եկողին արտակարգ հասակին վրայ: Էն մեծ սօսերուն քով շուք կուտար:

Ու քաղաքը իրար անցաւ.— Եօթը կտրիճներուն պապն էր եկողը: Արիւնոտ մուխերը գացած անոր ըսած էին զարհուրելի ոճիրը ու պապը իր աղիքներուն մէջ կտրուած՝ ճամբայ էր ինկեր վրէժի անդառնալի երդումով:

Իր օրերը անցած էին: Փիր մօրուքով այդ հսկան մոռցած ըլլալու էր կնկան մը երեսէն ցաթող բաներուն փափկութիւնը: Կարմիր մուխերը անոր արիւնին մէջ այնքան բոց դրած էին որ կարելի չէր ենթադրել թէ կնիկ է մը բղխող համն ու սարսուռները պիտի ցնցէին իր սիրտը:

Պապը լացաւ երբ գետի ափին հեռուէն տեսաւ իր եօթ զաւկրներուն ճերմակ կմախքները, լացաւ ու իր աչքերէն առուներ ինկան գետին: Իր սաստիկ ցաւին մէջ սակայն փորձութիւնը չունեցաւ գետէն անցնելու: Աւելորդ յոգնութիւն մըն էր աղի:

Ու վայրկենական կատաղութեան մը մէջ երկնցաւ լեռան ծոցը խնդացող բլուրին, բռնեց տակի ժայռէն ու ցաւի սպաննող տազնապի մը մէջ փետտեց բլուրը և նետեց գետին մէջ:

Գետը կեցաւ: Զուրերը ետ ետ գացին: Ափէն բարձրանալով կոխեցին կանանչ պարտէզը և պալատին դուռը թրջեցին: Աղջիկը պատշգամին վրայէն իր կապող ժպիտովը կ'ուզէր կախարդել այս խենդ վրիժառուն:

Բլուրը բաւական խոշոր էր, բայց գետն ալ հարուստ էր. պահ մը ետքը կեցող ջուրերը սկսան բլուրին կողերն ի վար իրենց աւազանը սողալ: Գետը քանի մը ժամէն կուտէր այդ բլուրը:

Հսկան աճապարեց. ուրիշ լեռ մըն ալ շալկելով բերաւ դրաւ առաջինին քով. յետոյ երրորդ մըն ալ: Ամբողջ գետը կապուած էր: Զուրերը առջևէն շղթայուած տարածուեցան դէպ ետ. քաղաքը օրուան մը մէջ թաղուեցաւ. ջուրը պալատին պատուհաններէն ալ ներս մտաւ:

Դեռ պատշգամին վրայ ահաբեկ աղջիկը իր դիւթանքը կը թափէր այդ ծերունի հօր վրայ, որ անտարբեր կը սպասէր պալատին կլլուելուն:

Բայց Սողունախը բարձր է. ու պալատն ալ դեռ կէս տեղէն վեր դերժ էր ջուրէն:

Գետը բլուրներուն փէշերէն քամուել էր առեր: Հսկան հասկցաւ թէ եթէ այդպէս թողուր, իր շինած ծովը կը փլէր ու աղջիկը կ'ազատէր: Շուտով մը աւլեց լեռներուն վրայի կաղնիներն ու սօսիները, թութի ճիւղերու պէս կոտրտեց անոնց բուները, խոտերն ու տերեւները իրար հիւսեց ու կոխեց բլուրներուն կողերուն վրայ: Փխրուն լեռ մըն ալ թափթփելէն բերաւ կործեց անոնց վրայ:

Զուրը դանկի պէս կտրեցաւ: Ու ջուրը լայնցաւ, լայնցաւ դէպ առաջ, յետոյ պօչին տուաւ. չափուեցաւ Սողունախին հետ: Հեռուն Պաշ-Քերազի ծիւնազարդ գագաթը կար: Ու ջուրը ելաւ, ելաւ, պալատին պատշգամն ալ գտաւ, աղջիկը վերջին վայրկեան մըն ալ դողդողաց իր լոյսերուն մէջ, ետքէն ջուրերը գրկեցին անոր բոցէ միսը. մազերը լարուեցան փրփրած ալիքներուն վրայ, ու կամաց կամաց իջաւ վար դէպ կմախքներու պարտէզը:

Քաղաքը կորած էր: Բայց պալատն ալ աներևոյթ եղած:
Ու երկու լեռներուն մէջտեղի բարի հովիտը դարձաւ հիմակ-
ուան աղւոր ծովը:

Նսկան, ինքն ալ մտաւ ջուրերուն տակ հանգիստ սիրտով
պառկեցաւ:

Դ.

Աւլուած բլուրներուն վրայ կեցած կը նայիմ քիչ մը հե-
ռուն քէնոտած Սողուճախին ու ետիս ճահիճներուն դեղին
անտառին: Ինձի այնպէս կուգայ թէ լեռան տակէն մինչև
բլուրները պապ հսկային շալկած լեռներէն թափուած հողն է
որ կը պարսպէ ծովն ու ճահիճը:

Դիմացիս Սայանի վէրքն ալ հէքիաթը կը լրացնէ իր ահա-
զին փոսովը: Այդ փորուածքէն քանի բլուրներ կրնան առ-
նուիլ:

Ու ձկնորսը կ'աւելցրնէ.

— «Աղջիկը շատ անգամ կը տեսնեն մերերը. նաւակին
ծփանքին ետեւէն կաթի պէս իր մարմինը կը փախչի ու կը
խաթէ. վա՛յր անոր որ պարտէզին մօտերը չի գիտնալով լողալ
կ'երթայ: Ամեն տարի իր սիրածը կը փոխէ ան, գեղացի տղոց
էն լեցունկները քաշելով ջուրին տակ:

«Բայց հսկային ծայնը 30-40 տարին անգամ մը միայն
մէջտեղ կ'ելլէ»:

— «Երբ սա ջուրի թելիկը կտորիկ մը հաստընայ (ցու-
ցնելով բլուրներուն կողերէն քամուող ջուրիկը), հսկան վախուն
դուրս կ'ելլէ, կը քննէ բլուրներուն դիմացկունութիւնը, ճա-
հիճներուն պարարտութեան վրայ աչք մը նետելով տրտում,

տխուր կը քաշուի վար իր խորունկ հառաչանքը երեք անգամ
կրկնելով):

Ու իրաւ ալ, երբ ջուրերը հարուստնան լիճին մէջ ու
եզերքի շամբուտները թաղուին մինչև իրենց օղակները, իր-
կունները անորոշ ատեն, որոտումի պէս ծայն մը կ'ելլայ ջու-
րերուն խորունկէն սաստիկ՝ այնքան որ ծառերը կը դողան ու
եղեգները կ'ալեկոծեն, կը կրկնուի երեք անգամ ու լետոյ կը
դադրի:

ՅԱԿՈՒ ՔԻԻՑԷՃԵԱՆ.

ԿՐԱԿՆ ԱՅՍ ԳԻՇԵՐ...

Կրրակն այս գիշեր վառ պահենք, ընկեր.
Սև արհաւիրքի և խորունկ ահի
Շնչով է հեռւմ հողմը ամեհի
Ու ոռնում թաղման սգալի երգեր:

Մեր դուռը, գուցէ, այսօր էլ խրվին,
Նւաղած ծայնով աղերսեն հանգիստ:
Խաւարը դրսում շատ է խորանիստ.
Շատերն այս գիշեր պիտի խարխափեն...

Կաց. հեռւից ոտքի ծայներ են գալիս...
Լսո՞ւմ ես՝ հնչեց զսպլած հեկեկանք,
Սրտի խորքերից թռաւ հառաչանք.
Եւ հողմը մէկտեղ ոռնում է, լալիս...

Խաւարի առաջ դուռն ենք բաց անում
Ու կանչում շէմքից.—Նե՛րս մտիր, եղբայր.
Արի՛՜ ամոքենք քո վիշտը անծայր.
Թող պնդւի ոգիդ մեր օթեանում...

ՍԻՄ. ԲԱՔԻԵԱՆ.

BERCEUSE

Գիշերն անյոյս հառաչեց...
Քրնի՛ր, զաւանկ քաղցրանուշ,
Դուրսը քամին շառաչեց,
Դուրսը բազմեց պանդ մըշուշ:

Ի՞նչ ես սոսկում դու այնքան,
Հոգիդ ահով մըշուշած.
Օրճր, զաւակ սիրական,
Այն ուռենին խըշխըշաց:

Թո՛ղ մահերգակ ցուրտ քամին
Տրտում նըլադ ոլորէ.
Քեզ խուլ աշնան այս ժամին
Գարնան երազ կօրօրէ:

Քեզ կըժպտայ լոյս եթեր
Հոգուդ պէս ջինջ ու պայծառ.
Բոյր կըշնչեն քեզ վարդեր,
Քեզ հով կանեն թուփ ու ծառ:

Ու եթերից քո վրրայ
Կիչնե՛ն, կիչնե՛ն սուրբ լուշեր.
Իսկ ցուրտ քամին կըսուրայ
Դէպի թախիծ ու գիշեր:

Քանի քո մէջ չէ կաթած
Վշտի սև թոյն, իմ անո՛ւշ,
Քրնիր... Քամին հեծկտաց.
Օրօր... Բազմեց պա՛ղ մըշուշ...

ՈՆՈՓՐԻՈՍ ԱՆՈՓԵԱՆ.

Ս Պ Ե Ղ Ա Ն Ի Ն

« Ինչ մեծ բաժին որ ունի սէրը՝ գրականութեան մէջ, եթէ փոխադարձաբար գրականութիւնն ալ նոյնչափ կարևորութիւն ունենար սիրոյ մէջ, գրագէտները աշխարհի երջանկագոյն արարածները կ'ըլլային »:

Տիրան Վիրապեան, երեսուն տարեկանին, արդէն համբաւաւոր գրագէտ մըն էր: Տակաւին պատանեկան շրջանին մէջ, արտադրեց բանաստեղծութիւններու իր առաջին հատորը, որ ուշադրութիւն գրաւեց: Յետոյ սկսաւ արձակ գրութիւններ հրատարակել օրուան գրական հանդէսներուն մէջ, որոնք կատարեալ քերթուածներ էին նորէն, բնութեան ու գեղեցիկին նուիրուած: Տարիներու հետ իր արձակն ալ հասունցաւ, կատարելագործուեցաւ ու աւելի իրական կեանքի ուսումնասիրութիւններու շուրջը դառնալ սկսաւ. նորավէպեր գրեց, սիրային արկածներու մասնագէտ նկարիչը եղաւ, իրապաշտ էջեր արտադրեց. բայց իր ոճը պահեց միշտ իր առաջին օրերու խանդոտ, զգայուն, բանաստեղծական երանգը, որով աւելի նուրբ ու աւելի գրաւիչ հանդիսացաւ: Նիմա, ալ կը մտածէր երկարաշունչ վէպի մը՝ ուր իր բոլոր նախասիրութիւնները ու

կարողութիւնները պիտի երևան գային: Իր հիացողները, անգաղտնապահութեան մը շնորհիւ իմացած էին այդ մտադրութիւնը և անհամբեր կը սպասէին անոր իրականացումին: Շքեղ բան մը պիտի ըլլար ան ապահովաբար, երիտասարդ բանաստեղծ-վիպագիրին դիւթիչ գրիչին տակ: Բայց ան բժախնդիր էր շատ ու կը վարանէր սկսնակի մը պէս, վախնալով մանր յուսախաբութենէ մը որ կրնար զինքը զգետնել ու ոչինչ արտադրելու անկարող դարձնել անկէ վերջը: Կ'ուզէր որ անթերի բան մը ըլլար ան, նիւթի, ոճի, ուսումնասիրութեան ու զգացումի տեսակէտներով: Իր առաջին այդ ընդարձակ գործը կ'ուզէր որ արդէն ըլլար գլուխ գործոց մը: Բնական էր ուրեմն որ, պիտի վարանէր, որչափ ալ վստահ ըլլար ինքզինքին վրայ, իր գրական կարողութիւններուն, իր տաղանդին վրայ:

Վիրապեան՝ Բերա կը բնակէր, աղջիկ մնացած իր ծերունի մօրաքրոջը հետ, առանձին յարկաբաժինի մը մէջ: Մայրը շատ կանուխէն մեռած էր, անանկ որ, ինք շատ քիչ բան կը չիշէր մայրական գուրգուրանքէն ու քաղցրութենէն, թէև այդ քիչին կարօտը իսկ բաւական եղած էր, իր գրիչին տալու, ամենից անուշ ու մելամաղձօտ շեշտերն ու թրթռումները: Չափահաս եղած էր արդէն, երբ հայրն ալ ինքնասպան եղաւ, կնոջական չես գիտեր ինչ մութ խնդիրի մը մէջ, տղուն ծագելով հանգիստ ապրելու չափ եկամուտ մը: Ու տասը տարիէ իվեր, իր բարի մօրաքրոջը հետ առանձնացած կ'ապրէր Շիշլիի այդ հեռաւոր ու բարձրահայեաց մենարանին մէջ, խոկալով, երազելով, կարգալով, գրելով, իր ամենէն սիրած բաներով միայն զբաղելով: Հազիւ մէկ քանի նախկին ընկերներ ու հիացող բարեկամներ կ'ընդունէր տունը և ինք ալ երբեմն կ'երթար ման գալ, իրիկունները, քաղաքէն դուրս, ամայի անկիւններ, անոնցմէ դիտելու ու զմայլելու համար կապոյտ Վոսիորին ու

մեծվայելուչ բնութեան զմայլելի տեսարաններուն վրայ:

Ինքը, հակառակ սիրային պատմուածքներու նախասիրող հեղինակ մը ըլլալուն, զգուշացող մըն էր կիներէն ու անոնց հրապոյրներէն: Ժառանգական դիւրութիւն մը ունէր խելայեղօրէն խանդավառուելու ամեն գեղեցիկ բաներէն, հետեաբար և կիներու հրապոյրներէն. բայց իր հօրը դժբախտ վախճանը անշնչելի տպաւորութիւն մը ըրած էր իր պատանի երեակայութեանը վրայ, անանկ որ, այդ դժբախտութեան իսկ արդիւնքը եղող իր կանխահաս զգուշաւորութիւնը, եթէ թումբ կանգնած չըլլար իր երիտասարդական խօլ թռիչներուն ու բաղձանքներուն, ինք ալ շատոնց կորսուած կ'ըլլար, ինչպէս իր ընտանիքին մէջ եղած էին ուրիշներ ալ, հօրմէն զատ, աւելի կամ պակաս նմանօրինակ պարագաներու մէջ փնացած: Անշուշտ սկիզբները ունեցած էր մէկ քանի աննշան ամուրէթներ, սիրաբանութիւններ, որոնք արդէն, իրենց աննշանութեանը իսկ պատճառով, իրենց մէջ չէին պարունակեր Վիրապեանը դիւթելու, կապելու, խելայեղելու կարող տուիքները: Խորունկ սէր մը, տրուած ըլլալով իր բուռն զգայնականութիւնը, նախանձոտ անձնասիրութիւնը ու եղերական խառնուածքը, կրնար աղէտալի ըլլալ, երազներով ապրող այդ բանաստեղծին համար, եթէ իր դէմը չելլար հազուագիւտ այն էակներէն մին, որ իրենց ամեն նախասիրութիւնները գիտակցաբար կը զոհեն դիմացինին երջանկութիւնը ապահովելու համար:

Բազմաթիւ թախանձանքներու վրայ, Տիրան՝ օր մը, իր ամենէն աւելի հիացողներէն մէկուն տունը գնաց, ուր աչքէ պիտի անցընէր այդ պարոնին գրութիւնները և իր կարծիքը պիտի յայտնէր անոնց մասին: Հոն հասած վայրկեանին իսկ զղջաց գալուն, ինչու որ, երբ ընկերօջը հետ մտաւ, այս վերջինին աշխատութեան սենեակը, ամերիկեան գեղակերտ զրասեղանին առջև, դեռատի ու հիանալի գեղեցկութեամբ խար-

տիշուհի մը նստած նամակ կը գրէր. պարոնին քոյրն էր, հա-
զիւ քսան տարու, երեք տարի առաջ ամուսնացած և տարի
մը առաջ այրիացած. մարմինին փակած սև շրջազգեստը, պա-
րանոցին ու թևերուն շուրջը ճերմակ նեղ ժանեակէ մանեակ-
ներով, զմայլելիօրէն վայլած էր պերճ հասակին և կը ցայտե-
ցնէր մորթին ճերմակ-վարդագոյն փայլը: Իրենց մէկէնիմէկ
ներս մտնալուն վրայ, քիչ մը աւելի շիկնած ու շփոթած, ոտ-
քի ելաւ ան ու գլխու թեթև շարժումով մը պատասխանեց
նորեկին բարեւին: Բայց Վիրապեան, շփոթած ըլլալէ աւելի,
սրտնեղած երևոյթ մը առած էր, կարծես ծուղակի մը մէջ
ինկած ու ետ դառնալու փափաքներով տոչորող մէկու մը դրժ-
գոհ երևոյթը: Տարակոյս չիկայ սակայն որ, տիկին Շաքարեա-
նի հոն ներկայութիւնը բոլորովին դիպուածական բան մըն էր,
քանի որ, իր հոն երթալիքը ինքն իսկ չէր գիտեր դեռ առ-
տուն, և իր լաւ տրամադրուած մէկ վայրկեանին, փողոցը հան-
դիպելով իր բարեկամին, անակնկալ կերպով վերջապէս ուղած
էր գոհացում տալ անոր: Ստով հանդերձ, ներկայացուեցան
իրարու: Տիկինը շուտով գտաւ ինքզինքը և եկաւ սրտագին
թօթուել բանաստեղծին ձեռքը, իր հիացումները յայտնելով:
Վիրապեան, որ քաղաքավար ու կնամեծար էր հակառակ ամեն
բանի, շնորհակալ եղաւ և ցաւ յայտնեց զինքը անհանգիստ
ընելուն համար: Տիկին Շաքարեան՝ ոչ միայն անհանգիստ չըլ-
լալը պնդեց, այլ նոյնիսկ հասկցուց որ, ուրախ պիտի ըլլար
եթէ ինք ալ ներկայ գտնուէր, եղբօրը հետ ըլլալիք գրական
խորհրդակցութեան: Վարելի չէր մերժել: Եւ երկարօրէն մնա-
ցին հոն, մինչև արեւմուտ, մինչև մութ, սկսնակը՝ կարդալով
իր գրութիւնները, բանաստեղծը մտիկ ընելով ու երբեմն դի-
տողութիւններ ներկայացնելով, ու տիկին Շաքարեան՝ իր խո-
շոր կապոյտ աչքերը յառած՝ Վիրապեանի դէմքին ու անոր
արտայայտութիւններուն: Փոխադարձաբար, բանաստեղծին մե-

լամադձոտ աչքերն ալ, կարծես հմայուած, երբեմն ահամայ կը դառնային իրենց յառած լոյսի ու քաղցրութեան այդ աղբիւրներուն ու կ'ըմպէին անոնց բովանդակ մոգութիւնը ու պըշրանքը:

Ալ չի պիտի պատմեմ թէ ինչպէս, կրկնուեցան ու բազմապատկուեցան տեսութեան նմանօրինակ առիթները, թէ ինչպէս, միասին բանաստեղծութիւններ կարդալէ վերջը, Վիրապեան ու տիկին Շաքարեան, օր մըն ալ ինքնաբերաբար սկսան սիրային զաղտնի թղթակցութեան մը՝ որ ամբողջ յորդում մըն էր երկուստեք բանաստեղծութեան ու յուզմունքի, և թէ ինչպէս, յանգեցան վերջապէս, տունէն դուրս, յաճախ Պօլսէն ալ դուրս, հեռաւոր արուարձաններու ու գիւղերու մէջ ժամադրութիւններու, ժամանցներու, պտոյտներու, գիշերային իսկ հսկումներու ու սիրարբուքներու: Անհասանելի, ապշեցուցիչ ու խելայեղ բան մըն էր այդ սէրը, միտքով ու խանդով հոյակապ այդ տղուն ու մարմնով ու հրապոյրով ոչ նուազ հոյակապ այդ կնոջ միջև: Վիրապեան աշխարհը մոռցած, անձնատուր եղած էր այդ կնոջ զոր հրեշտակ մը կը դաւանէր: Տիկին Շաքարեան՝ զինքը յուսախաբ ըրած ծերուկ ամուսինէն ձերբազատուած, իր մեղրալուսինն էր որ կ'ապրէր այդ հազուագիւտ արժանիքներով երիտասարդին մօտ: Եւ այդ՝ ամիսներ տևեց: Առաջին օրերուն, խեղճ մօրաքոյրը, ի՞նչ սրտադողեր, ի՞նչ մտահոգութիւններ ունեցաւ, իր քեռորդիին նորօրինակութիւններուն ու բացակայութիւններուն հանդէպ. ի՞նչ վախեր, ի՞նչ իրարանցումներ, երբ գիւղազնացութեան պատրուակին տակ այդ բացակայութիւնները, կ'երկարէին քիչ մը չափէն աւելի: Բայց հետզհետէ հանդարտեր, վարժուեր էր այդ վիճակին ալ, մանաւանդ ամեն անգամուն երբ տեսած էր Տիրանին վերադարձը, միշտ աւելի զոհ ու երջանիկ, միշտ աւելի կատակասէր ու զուարթ, թէև քիչ մը նիհարցած, աչքերը սև

շրջանակուած, աւելի փայլուն ու յոգնած, քնատի մը աչքերուն պէս:

Ամիսներ չետոյ սակայն, Վիրապեանի դէմքը հետզհետէ մռայլացաւ, թէև միշտ կը շարունակուէին իր բացակայութիւնները, իր աչքերուն փայլունութիւնը ու քնատի երևոյթը: Ան կորսնցուց իր զուարթ ու կատակասէր բնաւորութիւնը, և աւելի ջղային, աւելի խստաբարոյ դարձաւ, նոյնիսկ իր սիրական մօրաքրոջը հանդէպ: Այս վերջինը, հազիւ հանդարտած, հիմա նորէն այլայլեր էր, իտես այս նոր ու չարագուշակ կերպարանափոխութեան: Կասկածներ սպրտեր էին բանաստեղծին կոյս ու սիրատոչոր սիրտին մէջ, ուր նախանձը, ցեղային անդիմադրելի ու մոլեկան նախանձը, թունաւորող ու խելացեղիչ նախանձը բոյն էր դրեր: Այ հիմա, ժամադրութիւններ ու սիրային առժամապէս մոռցնող ու հանգչեցնող հանգրուաններ ունենալով հանդերձ, շուտով կը վերադառնար իր կասկածներուն ու հնհնուքներուն, որոնցմով նոյնիսկ իր սիրուհին, երես առ երես նեղելու չէր քաշուեր, չի հաշուելով, ցորեկ գիշեր, փողոցներուն անկիւնը, վաճառատուններուն մէջ, հանդէսներու ատեն իր ըրած հետապնդումները, որոնք այնքան բորբոքիչ ու սպառիչ էին իրեն համար, որքան կրնային ձանձրալի ըլլալ տիկին Շաքարեանի խառնուածքը ունեցող ազատ կնոջ մը համար:

Ամիսներ ալ անցան այդպէս, այդ դառն տառապանքներուն մէջ որ կրնան ըլլալ սիրողի մը համար, փոխնիփոխը, մէջ մը համողումներ գոյացնելով իր մէջ իր սիրուհիին անմեղութեանը մասին, մէջ մըն ալ, աւելի անհանդուրժելի ու դաժան կասկածներու մղուելով: Հիմա, տարիէն աւելի անցել էր այն օրէն իվեր, ուր առաջին անգամ ճանչցաւ տիկին Շաքարեանը և նոյնչափ ժամանակէ իվեր տող մը բան չէր արտադրած, ինչ որ մեծ զարմանք պատճառած էր գրական աշխարհին մէջ: Իր

հիացողները, իր վրայ հաւատք ունեցողները, միշտ կը կարծէին որ, ան սկսած ըլլալու էր իր խոստացած մեծ վէպին, հակառակ իր ուրացումներուն, որոնք ապահովաբար անակնկալ մը պատճառելու համար դարբնուած անմեղ սուտեր էին:

Օր մըն ալ, ստուգութիւնը ունեցաւ թէ, իր սիրուհին կը խաբէր զինքը ուրիշի մը հետ: Ամբողջ մարմնովը սկսաւ դողալ: Շիտակ տուն վազեց, բեւօլվէրը առնելու և վերադառնալու համար այն հիւրանոցը, ուր կը գտնուէին այս պահուսերկու մեղսակիցները: Բայց հոն հասնելուն, զգաց իր վիճակին ծիծաղելիութիւնը ու յանկարծ միտքը փոխեց. հօրը պէս անծնասպան պիտի ըլլար քան թէ ոճրագործ. վերջապէս ի՞նչ իրաւունք ունէր բռնանալու կնոջ մը վրայ որ անկեղծօրէն սիրէ զինքը, կամ սպաննելու մարդ մը՝ որ իրեն պէս յանցանքը գործած էր սիրելու նմանօրինակ թովիչ հրէշուհի մը: Փակուեցաւ իր սենեակին մէջը ու սկսաւ քալել, դառնալ գրասեղանին շուրջը մոլեգին առիւծի մը պէս, ինքնիրենը՝ անկապ խորհրդածութիւններ ու բացազանչութիւններ դուրս տալով բերնէն: Հէք մօրաքոյրը որ դողահար ու սրտաբեկ կը սպասէր դրանը ետին, բովանդակ քաջութիւնը ժողվելով հարցուց.

— Ի՞նչ ունիս, Տիրան, հիւանդ ես...

— Ոչ, բան մը չունիմ, մօրաքոյր, գնա պառկէ, հանգստացիր... արտաբերեց ու հեկեկալով գլուխը թաղեց բարձերուն մէջ, անկողնին վրայ տարածուած:

Բայց մօրաքոյրը մնաց հոն, դրանը ետին, մինչև առտու, ականջը բանալիին ծակին կը թնցուցած: Վիրապեան ոտքի ելաւ քիչ վերջը ու սկսաւ կրկին դառնալ. կըզգար որ մօրաքոյրը հոն էր ու անկարելի կ'ըլլար իրեն, ձեռք առնել հրազէնը, ինչու որ կը գուշակէր թէ, նոյն հարուածը պիտի մահացնէր նաև ազնիւ ու հէք աղջիկը: Երկարօրէն խոկաց. որոշեց տունէն դուրս ելթալ գործադրել իր մտադրութիւնը, մտածեց նոյնիսկ, չետին

տեսակցութեան մը մէջ, իր ներքին բովանդակ մաղծը պոռթկալ
անօրէն ու անզգամ կնոջ երեսին ու յետոյ մեռնել: Այդ զանա-
զան որոշումներուն, վարանումներուն և տառապանքի ու
յուսահատութեան նոպաներուն մէջ, արշալոյսը ծագեցաւ. յե-
տոյ առտու եղաւ: Մօրաքոյրը, նոր ելածի պէս, դուռը զար-
կաւ, հարցուց թէ ինչպէս է և ըսաւ թէ նախանշը պատ-
րաստ է: Վիրապեան երբ ճաշարան անցաւ, ակամայ իր և մօ-
րաքրոջը նայուածքները զիրար խաչածեցին և յուսահատ բա-
նաստեղծը ու ծերացած աղջիկը զիրար հասկցան: Այս վեր-
ջինը, մահու չափ տրտմած, անկիւն մը նստած՝ մատները կրգրա-
ղեցնէր անվերջանալի ձեռագործի մը թելերը հիւսելու գործով,
մինչ Տիրան, գլուխը սեղանին վրայ կախած, կը փորձէր պուտ
մը կաթ կուլ տալ: Դուրս ելլալու համար հագուած էր. հրա-
ղէնը դրպանն էր. բայց մօրաքրոջը տեսքը կը ջլատէր իր բո-
վանդակ կորովը: Յանկարծ դիւային կերպով սկսաւ ժպտել
ինքնիրենը, և գաւաթին մնացած պարունակութիւնը մէկ ում-
պով խմելով, վերագարծաւ սենեակը ու աշխատութեան շորե-
րը վերստին հագնելով անցաւ գրասեղանին գլուխը:

Մօրաքոյրը՝ որ սարսափահար ետեւէն էր վազեր, բանալի-
ին ծակէն դիտելով ու տեսնալով Տիրանին՝ հանդարտիկ մը
աշխատութեան սկսելը, ինքն ալ իր կարգին ինքնիրենը ժրպ-
տեցաւ, նրբանցքին կէս-մութին մէջ:

Բանաստեղծ-վիպագիր-սիրահարը, տարուան մը իր ալեկոծ
անցեալը խուղարկած ու ապագայ երազներու փլուզումը մտո-
վի աւաղած պահուն, ներքին ահարկու փոթորիկի ամենէն
բուռն վայրկեանին, փոխանակ ինքնասպանութեան, մարդա-
սպանութեան, խենդութեան կամ սիրադրուժին հետ յետին
բանակռիւի մը ու հարուածի մը, ինչպէս կը թելադրէր իրեն՝
իր արիւնը, յանկարծ, մութին մէջ շողշողացող արշալոյսի մը
պէս, վէպի հրաշալի նիւթի մը ծագումը ընդհնմարեր էր իր

Երևակայութեանը խորը, վէպ մը՝ զոր շատոնց խոստացած էր
և որ կ'ուզէր որ անպատճառ ճշմարիտ գլուխ-գործոց մը ըլ-
լար:

Եւ երեք ամիս վերջը, երբ իր ցաւը, իր անձը իսկ մոռ-
ցած, թաղուած էր յամառ ու տենդագին աշխատութեան մը
մէջ, տեսաւ որ սիրոյ իր խորունկ վէրքը մասամբ սպիացեր ու
իր անհնարին ցաւը մինչև մէկ աստիճան բուժուելու ճամբայ
էր բռներ: Նորածին վէպը, որ արդարև հոյակապ հրաշակերտի
մը բոլոր յատկանիշներովը երևան կուգար հետզհետէ, միևնոյն
ատեն սպեղանի էր եղեր միտքի մարդուն վիրաւոր սիրտին:

ԶԻՖԹԷ ՍԱՐԱՅ.

ԱՇԽԱՏԱՆՔԻ ԵՐԳԸ

Մի երգ գիտեմ ես աննման—
Հզօր մուրեի թափի նման,
Որոտի պէս հատու, խրոխտ—
Մի երգ գիտեմ ես աննման:

Ծնուել է նա մութ հանքերի
Մետաղակուռ երակներից,
Ու ծայն առել քլունդների
Ցասկոտ ու շեշտ հոլր-զարկերից:

Սնունդ առել, ջիղ ու արիւն՝
Բանուկ, ուժեղ բազուկներից,
Գործարանը խանդ ու աւիւն
Շնչել նրան իր ժխորից:

Հմայք ունի երգս այնպէ՛ս
Հոգսի ժամին թէ՛ որ երգես՝
Թախիծ ու վիշտ կէքանայ—
Լքւած հոգուն նեցուկ է նա:

Հէ՛յ իմ երգը միշտ աննման—
Հօօր մուրճի թափի նման,
Որոտի պէս հատու՛ւ, խրճիստ—
Մի երգ գիտեմ ես աննման:

ՅԱԿՈՐ ՅԱԿՈՐԱԵԱՆ.

* * *

Գիշեր է, չափ բու
Իմ գլխիս վերև:
Դանդաղ, ծանծրալի՜
Մաղում է անծրև:

Զարթել եմ, լսում...
Լսում... Բայց ինչո՞ւ.
Էլ ի՞նչ եմ սպասում,
Ի՞նչ մնաց գալու:

Էլ ոչի՛նչ ոչի՛նչ
Էլ ոչի՛նչ չի գայ
Այս տխուր, տաղտիչ
Աշխարհի վրայ:

Մաղում է անծրև.
Վերջ չունի երբեք.
Ցաւերս է հաշւում,
Ցաւերս մէկ մէկ...

Դ. ԴԵՄԻՐՃԵԱՆ.

Հ Է Ք Ի Ա Թ

Դրամատիքական էտիւդ 1 գործողութեամբ.

Ա Ն Չ Ի Ն Ք՝

ՆԱ, ԿԻՆԸ, ԴԱՅԵԱԿ, Ա. ԾԱՌԱՅ, Բ. ԾԱՌԱՅ:

Ծովափին: Սպիտակ մարմարեայ աշտարակի մի սենեակ, փարթամ արևելեան ծաշակով զարդարւած: Ներքեից լսելի է ջրերի ձայնը, որ զարկում է աշտարակի պատերին: Ճակատի կողմը երեք լուսամուտ, միջին պատուհանը դուրս ընկած դէպի ծովը, այնպէս որ սենեակում խորունկին է ստացւում: Թանկագին վարագոյրներով: Սենեակը զարդարւած է զորգերով, ծաղիկներով: Աջ պատի մօտ թախտ վազրի մորթով, մօտը մի կլոր սեղան սև սատափով զարդարւած: Մուտքը ձախից:

Վարագոյրը բացելուց պատի մօտ լուռ կանգնած են երկու ծառաները: Նրանք կարծես սպասում են մի բանի: Սենեակը աղօտ լուսաւորւած է լուսնի լուսով:

Ա. ԾԱՌԱՅ. Իսկ էթէ չգայ:

Բ. ԾԱՌԱՅ. Կգայ:

Ա. ԾԱՌԱՅ. Դու գիտե՞ս նշանը:

Բ. ԾԱՌԱՅ. Գիտեմ:

- Ա. ԾԱՌԱՅ. Ծովը հանգիստ չէ, դժւար թէ այսօր դայ: (Մի
փոքր լռութիւնից յետոյ): Դու գիտես ով է նա:
- Բ. ԾԱՌԱՅ. Ո՛չ:
- Ա. ԾԱՌԱՅ. Ասում են դա նրա նախկին սիրահարն է, մի
գեաւուր:
- Բ. ԾԱՌԱՅ. Եթէ ինձ տան այդ մարդուն, ես նրան կտոր-
կտոր կանեմ:
- Ա. ԾԱՌԱՅ. Դու տեսա՞ր ինչ մուսլ էր մեր տէրը... Նա շատ
է տանջւում:
- Բ. ԾԱՌԱՅ. Ես տեսայ ինչպէս նա լալիս էր: Քսան տարի է
եւ ծառայում եմ այս տանը և առաջին անգամ տեսայ
ինչպէս նա լալիս էր: Նա շատ դժբախտ է: Նա շատ զա-
ւակներ է ունեցել. բայց այժմ մէկն է մնում: Նա դողում
է նրա վրայ, նա այնպէս դժգոյն է: Նա թաղեց երկու
որդուն, թաղեց կնոջը՝ լաց չեղաւ, պողպատի սիրտ ու-
նի: Ես չէի կարծում: որ այդ հուժկու մարդը կարող է
լալ. բայց այսօր ես տեսայ ինչպէս նա լալիս էր:
- Ա. ԾԱՌԱՅ. Երևի շատ է սիրում:
- Բ. ԾԱՌԱՅ. Նրա ամբողջ կեանքը մի մութ դաժան գիշեր է
եղել: Նրան ոչ ոք չի սիրել... Բոլորը վախենում են նրա-
նից:
- Ա. ԾԱՌԱՅ. Նա այնպէս դաժան հայեացք ունի... Ես չեմ կա-
րողանում ուղիղ նայել նրան:
- Բ. ԾԱՌԱՅ. Նա շատ դժբախտ է: Ես նրան մի անգամ միայն
տեսայ ուրախ, երջանիկ: Նա երեխայի նման ուրախ էր...
Ես նրան երբէք այդպէս չէի տեսել:
- Ա. ԾԱՌԱՅ. Ե՞րբ էր:
- Բ. ԾԱՌԱՅ. Երբ առաջին օրը մեր նոր տիրուհին մտաւ այս
տունը: Այդ օրը նա ծառաների հետ էլ քաղցր էր... Լի-
քը բռով արծաթ թափեց նրանց առաջ: (Լռութիւն):

Ա. ԾԱՌԱՅ. Որտե՞ղ էր նա պատահել տիրուհուն:

Բ. ԾԱՌԱՅ. Չգիտեմ... Դա երկար պատմութիւն է... Ասում են նա սպանել է նրա սիրածը, որը կամեցել է փախցնել նրան ուրիշ երկիր... Նա վաղուց աչք է ունեցել նրա վրայ: Դա մի հարուստ հայի աղջիկ է:

Ա. ԾԱՌԱՅ. Հայի աղջի՞կ:

Բ. ԾԱՌԱՅ (յանկարծ): Մս... Լուռ... Լսեցի՞ր:

Ա. ԾԱՌԱՅ. Ոչինչ:

Բ. ԾԱՌԱՅ (լսողութիւնը լարած): Սսս...
(Ցածից մեղմ սուլոց):

Բ. ԾԱՌԱՅ. Նա՛ է:

Ա. ԾԱՌԱՅ. Իջեցնե՞մ:

Բ. ԾԱՌԱՅ. Սպասիր:

(Սուլոցը կրկնում է):

Բ. ԾԱՌԱՅ. Իջեցրո՞ւ... զգոյշ, չերևաս:

Ա. ԾԱՌԱՅ. Մոռթ է:

Բ. ԾԱՌԱՅ. Կամաց... ս... ս...

(Մի պահ լռութիւն: Իջեցնում է ջլանը, որի մի ծայրը ամրացրած է պատուհանի վանդակին):

Բ. ԾԱՌԱՅ. Դանակը ձեռքի՞դ է:

Ա. ԾԱՌԱՅ. Այո: (Լռութիւն): Բռնեց ջլանը... Բարձրանում է:

Բ. ԾԱՌԱՅ. Սս... Լուռ: (Լռութիւն. լսում է ջրերի ծայնը):

Ա. ԾԱՌԱՅ. Թողնեմ բարձրանա՞յ:

Բ. ԾԱՌԱՅ. Կասեմ—երբ:

Ա. ԾԱՌԱՅ. Մօտենում է:

Բ. ԾԱՌԱՅ. Շատ կայ:

Ա. ԾԱՌԱՅ. Քիչ մնաց:

Բ. ԾԱՌԱՅ. Կտրի՞ր... Դէ՛հ...

Ա. ԾԱՌԱՅ. Չեռներս զողում են:

Բ. ԾԱՌԱՅ. Շո՛ւտ:

Ա. ԾԱՌԱՅ. Ես չեմ կարող...

Բ. ԾԱՌԱՅ. Վախկոտ... տուր ինձ: (Վերցնում է դանակը և մի հարևանով կտրում):

Ա. ԾԱՌԱՅ. Արդէ՞ն:

Բ. ԾԱՌԱՅ (մօտենում է պատուհանին): Հա՛, հա՛, հա՛... Վերջաւ... Թող չանգրտի քարափը... Նա շարդէց տուր, սե ժայռերի վրայ... Վառիր ջահը:

Ա. ԾԱՌԱՅ (վառում է: Մուտքի դուռը ծեծում են):

Բ. ԾԱՌԱՅ. Ո՞վ է:

ԴԱՅԵԱԿ (դրսից): Ի՞նչ եղաւ:

Բ. ԾԱՌԱՅ. Վերջացաւ: (Բանում է դուռը):

(Ներս է մտնում մի պառաւ, մէջքը կորացած. խօսում է խոպոտ):

ԴԱՅԵԱԿ. Վերջացաւ... խի՛... խի՛... խի՛... Վերջացաւ... լա՛ւ:

Բ. ԾԱՌԱՅ. Մի բան իմացա՞ք:

ԴԱՅԵԱԿ. Ոչինչ... Լուռ է, կասես պողպատից է ծուլւած... Ոչ մի հառաչանք, ոչ մի կաթիլ արցունք... Այս չորացած մատներով ես նրա աչքերը կհանէի... Սանդի մէջ կշախշախէի նրա պիղծ մարմինը... ոչ մի տանջանք չբացեց նրա լեզուն...

Բ. ԾԱՌԱՅ. Չիմացա՞ք ով է:

ԴԱՅԵԱԿ. Ոչ:

Բ. ԾԱՌԱՅ. Ինչպէ՞ս է մեր տէրը:

ԴԱՅԵԱԿ. Նա դեռ սիրում է նրան, այդ շան աղջկանը. ի՞նչպէս ես կպոկոտէի նրա մսերը, ինչ մեծ հրճանքով կրկրծէի նրա կոկորդը, որ ցաւից աչքերը դուրս պրծնէին, որ աստամների տակ խածնէր իր լեզուն... (Ծամածուած դէմքով): Ես կխմեմ նրա արիւնը... Ասա՛... ասա՛... ասա՛... ի՞նչ միջոցով կարելի է նրան աւելի տանջել, աւելի չարչարել... (Կատաղութիւնից կրծոտում է մատները):

Բ. ԾԱՌԱՅ. Աւելի լաւ էր նա ոչինչ չիմանար... Ոչինչ... չը-

պէտք էր ոչինչ ասել... Ծովափից կգնդակահարէինք այդ
շանր...

ԴԱՅԵԱԿ (խոժոռ նայում է նրան, ուզում է մի քան ասել, այդ ըոպէին
դուռը բացում է, շէմքի վրայ երևում է ՆԱ: Նրա արիւնով լիք
աչքերը փայլում են: Աչքերի կրակը կարծես ծաղրում է գլխի ծեր-
մակը: Մօտ 60 տարեկան: Խստադէմ, մռայլ: Մի վայրկեան լուռ
կանգնած է դռներում, մի հայեացք է ձգում երկու ծառաների վրայ,
որոնք լուռ, ձեռները կրծքին կանգնած են: Մի քսակ փող է նետում
նրանց: Ա. Ծառան վերցնում է և երկուսն էլ լուռ դուրս են գնում):

ՆԱ. Ի՞նչ եղաւ:

ԴԱՅԵԱԿ. Արդէն:

(Ծառաները գնալուց յետոյ Նա մի քանի անգամ անցուղարձ է անում
սենեակում, մօտենում է պատուհանին, մի վայրկեան լուռ նայում է
հետուն: Ապա մօտենում է վազրի մորթով ծածկւած Թախտին՝ ընկնում
է նրա վրայ, ծանր հեռւմ է, որը մի քիչ անց փոխւում է լուռ հեծ-
կլտանքի: Դայեակը, որ կանգնած պատի մօտ լուռ հետևում էր նրան
աչքերով, մօտենում է և ծունկ չոքում նրա առաջ):

ՆԱ. Նա ինձ երբէք... երբէք չի սիրել... իմ ամբողջ անիծեալ
կեանքը մի մուխ գիշեր էր... իմ արևը ծագեց՝ երբ նա
ոտ դրեց այս տունը, և այդ արևը նորից մայր է մտնում...
Եւ այժմ անթափանցելի խաւար է շուրջս:

ԴԱՅԵԱԿ. Հրամայիր, և նրա արևը յաւիտեան կխաւարի:

ՆԱ. Կխաւարի նրա արևը, կխաւարի և իմը. առանց նրան ես
անկարող եմ ապրել:

ԴԱՅԵԱԿ. Մահւան է արժանի նա, ով գողանում է իր տիրոջ
պատիւը:

ՆԱ. Մահը փրկութիւն կլինի նրա համար: Նա պէտք է ապրի:
(Հերարձակ, դիակի պէս դժգոյն ներս է մտնում ԿԻՆԸ. նա մօտ 20
տարեկան է: Վազում է դէպի պատուհանը, սարսափած շուրջն է

նայում, նայում է պառաւի՛ն, որը նրա մտնելուց վեր է կացել և կանգ-
նած է պատի մօտ: Արագ մօտենում է ամուսնուն և ծնկաչոք ընկնում
է նրա առաջ, ուզում է մի բան ասել, շրթունքները շարժում են, բայց
ոչինչ չի կարողանում արտասանել: Նա հրում է կնոջը և ոտքի կանգ-
նում):

ԿԻՆԸ. Ասացէք, ի՞նչ արիք դուք նրան: Ո՞ւր է նա:

ՆԱ. Հա՛... հա՛... հա՛...

ԴԱՅԵԱԿ (արձագանքի պէս): Խի՛... խի՛... խի՛...

ԿԻՆԸ. Դուք այժմ գիտէք թէ ով է նա... էլ ինչո՞ւ էք կանգ-
նել, սպանեցէք ինձ... Սպանի՛ր... բայց թող մի անգամ էլ
նայեմ նրան, յետոյ սպանի՛ր:

ՆԱ. (ձեռքերը կրծքին լուռ կանգնած է):

ԿԻՆԸ. Տեսնո՞ւմ ես, որ ես քեզ դաւաճանել եմ: Տեսնո՞ւմ ես,
որ ես երբէք քեզ չեմ սիրել և չեմ էլ սիրելու: Սպանի՛ր...
վռնդի՛ր կամ ոչ իբրև բարի հայր տուր ինձ նրան ու թող
մեր երջանկութիւնը լինի և՛ քո երջանկութիւնը: Ես
քեզ կսիրեմ ինչպէս իմ հարազատին, կպաշտեմ ինչպէս
աստուածութիւն... Տո՛ւր ինձ նրան, տուր, ծնկաչոք ոտ-
ներդ ընկած աղաչում եմ... տո՛ւր ինձ նրան... (Հեկեկում է):

ՆԱ. Պոռնի՛կ... Դու աւերակ դարձրիր այն տաճարը, որի
աստուածն էիր դու... Դու չմոռացար այն շուն գեաւու-
րին, որից ես քեզ խլեցի: Ես պաշտում էի քեզ ինչպէս
աստուածութիւն...

ԿԻՆԸ. Նրա՛ն... Այո՛, դու խլեցիր ինձ նրանից: Ես էլ նրան էի
պաշտում... Ես նրան սիրում էի... սիրում եմ և այժմ...
իմ չիշողութեան մէջ դեռ վառ է նրա պատկերը: Ես
նրան այժմ էլ սիրում եմ. սիրում եմ ինչպէս աստղերին,
որոնց երբէք չեմ կարող հասնել. ես նրան սիրում էի ինչ-
պէս այն սարի դազաթի մշտական ծիւնը, ինչպէս այս
ծովի ջրերի ձայնը, որոնց լսում էի իմ մենակութեան

մէջ, իմ երջանկութեան ժամերին, հեռու քո ատելի հայ-
կացբից: Բո տանա՞րը—բանտ էր ինձ համար. իսկ դու մի-
թէ չխորտակեցիր իմ տանարը: Դու խլեցիր ինձ իմ
սիրածի զրկից, և երեք տարի զարշելով ես քոնն եմ ե-
ղել, դու թունաւորել ես իմ ամբողջ երիտասարդ կեան-
քը. ես բոլորը, բոլորը ներում եմ քեզ, միայն տուր ինձ
նրան:

ՆԱ. Նրան տամ քե՞զ... հա՛... հա՛... հա՛... Պառաւ, լսո՞ւմ ես...
Ո՞ւր է նա, թող դուրս գայ... Թող տանի իր սիրածը...
հա՛... հա՛...

ԴԱՅԵԱԿ (շարունակելով): Հա՛... հա՛... հա՛... (Առաջ գալով, կնոջը, շշու-
կով): Խի՛... խի՛... խի՛... նա, նա այնտեղ է... (Ցոյց է տալիս
ծովը): Լողում է:

ԿԻՆԸ (չհասկանալով): Այնտե՞ղ է... (Վազում է դէպի պատուհանը, ապա
յետ է դառնում, նայում է մերթ պառաւին, մերթ ամուսնուն, հասկա-
նալով, ընկձած ընկնում է):

ՆԱ. (վայրենի քրքիջով): Այնտեղ... նա լողում է կարմիր ծովի մէջ
իր արիւնով ներկւած: Երբ նրա պիղծ դիակը ծովը ամի
կշարտի, ես կհրամայեմ, որ կրկին ծովը նետեն. նա պէտք
է ձկների կերակուր դառնայ կամ այնքան ծեծի ամիերը
իր այլանդակւած, ուռած մարմնով՝ մինչև քայքայւի:

ԿԻՆԸ (կարծես չի հաւատում իր լսածներին. կարծես երազ է, նա կծո-
տում է ձեռները, շօշափում է մազերը, կարծես, համոզւելու համար,
որ երազ չէ: Աչքերը լայն բացած խելագարի պէս՝ ուզում է ոտի
կանգնել, բայց ընկնում է: Շշուկով): Դո՞ւք սպանեցիք նրան...
Դո՞ւք...

ՆԱ. Այժմ դու իմն ես... իմը... միակ իմը... իմը... հա՛... հա՛...
հա՛...

ԿԻՆԸ (յանկարծ ոտի է կանգնում, վազում է դէպի պատուհանը, բայց նա

ընում է նրան և ուժով պահում: Յուսահատ ձիգ է անում ազատել-
լու և չի կարողանում):

ՆԱ. Դու կապրես, և ես ամեն անգամ ուժով կխլեմ քո այտե-
րից համբույրները: Ես կծծեմ քո շրթունքների կարմիր հիւ-
թը, որ նեկտարից աւելի անուշ է, կծծեմ քո արիւնը՝ մին-
չև թառամես, թօշնես և ոտնահար եղած ծաղկի պէս
դէն կշարտեմ: Շղթայակապ շներիս հետ կպահեմ... իսկ
դիակդ... դիակդ անգղներին կեր կտամ:

ԿԻՆԸ (որ սարսափած լսում էր նրան, կամաց-կամաց կանգնել է: Նրա
վերջին խօսքերի վրայ ձգւած է ամբողջ հասակով, աչքերը կատաղու-
թեամբ վառւում են): Վազր... Բորենի... Դէհ լսիր... Այժմ
ես կլուծեմ իմ վրէժը... Երեք տարի դու տանջել ես ինձ,
այժմ դու երեք տարւայ տանջանքների փոխարէնը տոկո-
սով կհատուցանես... Դէհ, լսիր... Նա քո որդին էր...

ՆԱ. (կարծես չհասկացաւ):

ԿԻՆԸ. Նա քո որդին էր... քո միակ որդին:

ՆԱ. (յարծակւում է կնոջ վրայ): Ես կխեղդեմ քեզ... (Թուլացած ընկ-
նում է):

ԿԻՆԸ (մի քայլ լետ է գնում): Անարգ, ես լուծեցի իմ վրէժը և
նրա վրէժը, որ կրժում էր սիրտս...

ՆԱ. Պառա՛ւ... պառա՛ւ...

ԴԱՅԵԱԿ (մօտեցել է և չոքել նրա առաջ):

ԿԻՆԸ. Դու խլեցիր իմ սիրածը, ես էլ խլեցի որդուդ: Դու
թունաւորել ես իմ տարիները քո պիղծ շնչով, դու ստի-
պել ես ինձ շոյել քո ատելի դէմքը, որից ես գարշում
էի. քո նողկալի շրթունքները քանի՛ անգամ հպւել են
իմին. ես բոլորը տարել եմ լուռ, անծայն այս ըոպէի հա-
մար... Ես վրէժս առի... այժմ սպանի՛ր:

ՆԱ. (պառաւի օգնութեամբ ոտի է կանգնել. պառաւը նրան մօտեցրել է
Թախտին. մի վայրկեան լուռ, ընկձւած նստած է: Աղաչելով):

Ասա՛, ասա որ դու սուտ ասացիր, ասա՛ որ դու վրէժ էիր ուզում առնել:

ԿԻՆԸ. Նա քո որդին էր... թող բերեն դիակը...

ՆԱ. (արիւնը խփեց գլխին. կատաղած): Հրէ՛շ, չէ՛տ տուր, չէ՛տ տուր որդուս:

ԿԻՆԸ. Ո՛ւշ է... այլևս երբէք չես տեսնելու նրան, նա լողում է իր արիւնով ներկած ջրերում, ժայռերը սուր-սուր մեխւել են նրա կողերը, և դո՛ւ, դո՛ւ ես նրա դահիճը...

ՆԱ. Պառա՛ւ... Սղմի՛ր նրա կոկորդը, սղմիր... փակի՛ր նրա աչքերը...

ԿԻՆԸ. Նրա ուռած դիակը կծեծի քո մարմարեայ աշտարակի պատերին և քո լսողութեանը շարունակ կշշնջայ նրա անէծքը: Որդեսպան... քնած թէ արթուն նա կհալածէ քեզ և դու ոչ մի տեղ հանգիստ չես գտնիլ և շարունակ կլսես՝ «Որդեսպան... որդեսպան»... Սյդ մեղեդին գերեզմանում էլ քեզ հանգիստ չի տալ... Հրէ՛շ... Բորենի՛... Դէ՛հ, այժմ սպանի՛ր ինձ...

ՆԱ. (կատաղած վեր է ցատկում, խլում է կողքի կեռ սուրը և մի հարւածով պատռում է կնոջ կուրծքը): Հա՛... հա՛...

ԿԻՆԸ. Նզովա՛ծ լինիս... որդեսպան... ես վրէժս առի... Աստուա՛ն... Աստուա՛ն... (Մեռնում է):

ՆԱ. (վայրենի քրքիջով ընկնում է յատակի վրայ, հայեացքը սառած է մի կէտի):

Պ ա ու զ ա .

ԴԱՅԵՍ.Կ (ոտի է կանգնում: Կարծես բրօնզից է ձուլւած: Անթարթ նայում է ուղիղ տարածումեան մէջ: Խուլ ձայնով, կարծես գերեզմանից է լսւում): Լինում է—չի լինում մի իշխան. նրա ամբողջ

կեանքը մի մուժ, դաժան գիշեր էր: Նա միայն մի ան-
գամ էր ժպտացել: Նա շատ որդիք ունէր, բոլորն էլ մե-
ռան. միայն մէկն էր մնում, նրան էլ ծովը նետեց: Մի
կին միայն սիրեց, նրա էլ կուրծքը պատուեց իր կեռ-
սրով:

Կ ա մ ա ց - կ ա մ ա ց ի ջ ն ու մ է

ՎԱՐԱԳՈՅՐԸ.

ՄԻՔ. ՄԱՆՈՒԷԼԵԱՆ.

ՍԵՒ ԵՐԳԵՐ

Քու եղեմնաստուեր աչքերուդ վրայ
Քարացուր հողիս լաւիտենօրէն,
Սիրոյ երգերը շատ կարճ կը տւեն,
Իմ ճամբաս կարճ է, միամիտ Լէյլա:

Խղճի խայթ մըն է սէրդ՝ սրտիս մխուած,
Զայն միշտ կ'արիւնէ, անդուլ պեղելով
Վէրքը որ հոն է, կուրծքիս տակ բացուած
Լայն, գերեզմանայի՛ն ու բազմահովով:

Բայց, գուցէ, շատ ո՛ւշ է արդէն հիմա...
Թշուառութենէ կարծրացած, բարի,
Դի՛ր ցաւոտ սիրտդ ձեռքերուս վրայ
Քու լուծդ է թեթև, եղնիկի հողի:

Ու սրտիդ վերջին թելովը վտիտ,
Նիհար մատներուս տաղանդով կրկին՝
Թերևս փորձուիմ երգելու վերջին
Երգը երջանիկ քու ներող դարձիդ...

ՀՐԱՆՏ ՆԱԶԱՐԵԱՆ.

ՍԵՒ ԵՐԳԵՐ

Հնամենի՛ դղեակներու մէջ ծալլըւած
Ու կուպրացած գիշերներու պէս ամաչի,
Հոգիս՝ հաղա՛ր խաւարներով օծամանուած
Հոգին կառչամ, ի՛նքնիրվրայ կը գալարուի:
Մութին մէջէն կարօտի սև ձեռք մը անտես
Կը փլցընէ՛ հոգիս՝ անդուլ մուրճի մը պէս.
Կը կանչէ՛ զիս ձայն մը ողորմ ու սիրակէզ,
«Յկո՛ւր, եկո՛ւր» կը կանչէ՛ զիս «ես ալ քեզպէս
«Յուղարկն եմ հին Գարուններու մութ թափօրին.
«Քու վերջացող Աշունիդ երգն եմ ես վերջին.
«Կարա՛պի երգդ՝ չի հասկցուած, ծանր ու խորին:
«Բեռեկտուած, նիհար սրինգն եմ ես ծա՛լի,
«Շունչդ է թեթև, շրթունքներուդ լուծն է բարի,
«Թող շրթներուդ խունկն ու հալուէն մէջէս անցնի:
«Արցունքներուդ լիճերուն քով ես մենաճեմ՝
«Քու ուշացող երազներուդ Մոխրացանն եմ...
«Քու նահանջիդ աւեր կամուրջն եմ ես վերջին,
«Ուրկէ խաբուած քայլերդ շուտով պիտի փախչին:
«Սուգիդ ծովին մէջ կո՛յս կղզին իմ սո՛ւրբ, գա՛ղտնի

«Ուր պիտ' իջնես քու անրնտել սէդ թռչունի
«Անմահ ծանծրոյթդ արևուն տակ քնացնելու:
«Գողգոթայիդ քարէ սնարն եմ ես վերջին.
«Վերջին թևն եմ քու Տանջանքիդ կարծիր Խաչին»:

ՀՐԱՆՏ ՆԱԶԱՐԵԱՆ.

ԻՆՉՊԵՍ ԵՐԲԵՄՆ...

Քերթնող, պատմէ՛ մեզ հայրենի յուշքերէդ,
Երգէ՛ մեզ հի՛ն օրերու երգ մը անհետ,
Թափառայա՛ծ թրուպատուրի երգ մը զով,
Արփշի՛ռ ու զո՛վ մեր Գողթանի ողկոյզով...

Մեռելի շէ՛ն երգ մը հանէ թոքերէդ,
Հի՛ն, կռապա՛շտ այն երգերէն որոնց հետ
Մեր ասպազէն Քաշերն արույր թափօրնով
Սաղաւարդնին շողացնելով ջահերնով,

Արքայական հանդէսներուն, վայրա՛զ, վէս,
Կը պարէ՛ին, աստուածներո՛ւ պարին պէս...
Երգէ՛ մեզի հի՛ն օրերու հին յուշեր,

Մենք դարաւոր մեր Մահացումն այս զիշեր
Պիտի պարե՛նք, եղեռնօրէն շէ՛ն, խելա՛ր...
— Քերթողը, ծե՛ր, չը խօսեցաւ... Ան կուլար...

Ռ. ՍԵՒԱԿ.

ՈՍԿԻՒՆ ԾԱՐԱԻՐ

(Ա. Ա հ ա ղ ո ն Ե ա ն ի ն)

Երկարահասակ, ջղուտ, թուխ դէմքով, հպարտ քալուածքով, երեսուն երկու տարեկան երիտասարդ մըն էր արկղակալնիս:

Ութը տարիէ ի վեր նոյն հաստատութեան մէջ, առտուան եւրոպական ժամը տասնէն մինչև իրիկուան չորսը դրամով կ'զբաղէր: Կը կշռէր, պարկերու մէջ կը լեցնէր, կը գանձէր, կը վճարէր, versement-ները և retrait-ները կ'արձանագրէր իր journal de caisse-ին մէջ, կը համրէր, յետոյ նորէն վճարում, գանձում, արձանագրութիւն, վերջապէս մեքենական աշխատութիւն մը՝ որ կարծես չէր ծանօթացներ դայն երբէք:

Վարչութիւնը իրեն հինգ ոսկի ամսական յատկացուցած էր, գումար մը՝ որուն սիրանալու համար խեղճ արկղակալը ութը տարիներ աշխատած, չարաչար յողնած, տքնած, քրտնած էր շարունակ:

Այս պաշտօնին կոչուելուն երրորդ տարին իսկ ամուսնացաւ աղջկան մը հետ, որ իր սիրտին հետ քանի մը հարիւր ոսկի ալ բերաւ իրեն, և որմէ զաւակ մըն ալ ունեցաւ:

Սաթենիկի մէկ ծննդական աղետալի հիւանդութիւնը սակայն փնացուց արկղակալին ունեցած պզտիկ գումարը, զինքը դատապարտելով իր իսկ խեղճ ու կրակ ամսականովը ապրելու: Ուրիշ յոյս չկար. ասդին անդին ինկած էր աւելի շնորհքով գործի մը ձեռնարկելու համար: Բայց բաղդը ամեն կողմէ միշտ պատուար մը կը դցէր իր դէմ, տառապանքի, յաւիտենական մտատանջութեան, յուսավրիպումի մատնելով զինքը: Կէորդեան, մեր պաշտօնատուներն արկղակալը, որքան պատուախնդիր մարդ՝ այնքան վէս, խրոխտ նկարագրի տէր, կը խորհէր ամենէն աննշան բայց նիւթական տեսակէտով նպաստաւոր գործերու ձեռնարկել՝ իր սիրական ընտանիքը պատուաւորապէս ապրեցնելու համար:

Յանախ կը պատահէր որ գրպանը հինգ դահեկան չգտնուի, բայց, անգնթ հեզնութիւն, հարկադրուած էր ոսկիներու հետ խաղալ, առտուրնէ մինչև իրիկուն, շլացնող փայլով, վառող, գերող մագնիսականութիւնով ոսկիներ, տանկական, անգլիական ոսկեդրամներ, ամենքն ալ զատ զատ պարկերու մէջ, փայտէ խոշոր սկահներով լեցուն:

Պղինձէ պզտիկ թիով մը կշիռին մէջ կը լեցնէր, կը հաշուէր, կը գրէր, պարկերու մէջ կը զետեղէր, յանախորդներուն կուտար, անոնցմէ կ'առնէր, յետոյ նորէն դրամը կը հոսեցնէր, ու ասիկա ժամերով, օրերով:

Ոսկիին ծարաւը սկսած էր տոչորիլ զինքը:

Եւ այդ պապակը յագեցնելու ըղձանքով, ոսկին կը կշուէր միշտ, գլուխը աւելի կը մօտեցնէր նժարին, կը ծծէր կարծես դրամին հեշտանքը ու անոր ծայնը իր ականջներուն մէջ կ'երգէր աշխարհիս ամենէն հնչուն, ամենէն գեղեցիկ երաժշտութիւններէն մէկը:

Դրամին վրայ նայած պահուն՝ աւելի կը սաստկանար իր ծարաւը:

Օր մը այնքան խորասուզուած էր իր մտածումներուն մէջ, որ յանախորդի մը Ֆրանսական ոսկի տալու տեղ անգլիական տուաւ:

Տնօրէնին դիտողութիւնը վիրաւորեց սիրտը: Թէև հաշիւը կարելի եղաւ կարգադրել անմիջապէս, յանախորդը ծանօթ ըլլալով իրեն:

— Ի՞նչպէս կը վաստկին աս մարդիկը, կը խորհէր ինքնիրեն, տեսնելով որ շատեր դրամ կը բերեն կը ձգեն:

Կիսաշխարհիկ կին մը չորս օր իրարու վրայ ութսունական ոսկի ձգեր էր: Թափթփած վրայ գլուխով նպարավանառ մը ամեն օր գրեթէ կանոնաւորաբար տասնական ոսկի կը բերէր: Հայ քահանայ մը ամիսը անգամ մը քսան ոսկի, աղջիկ մը՝ յիսուն նաբօլէօն, մսավանառներ, դերձակներ, ստորին գօգօթներ, սպասուհիներ, պանդոկի ծառաներ, վերջապէս ահագին ժողովուրդ մը այլազան ախպարներու, անհատներու, իր շահին մէկ մասը կը հաւաքէր դրամատունին մէջ՝ հետզհետէ պարարտացնելով, ստուարացնելով անոր հարստութիւնը:

Գէորգեան՝ մտամոլոր, կը խորհէր թէ ի՞նչ իրաւունք է առանց գրպանը տասը փարա ունենալու, ուրիշին դրամը համբրելու, կշռելու, պահելու ստիպուած ըլլալ: Ընդվզումներ կ'ունենար: Անոնք ալ մարդ չէին իրեն պէս: Ինք անոնցմէ քիչ կ'աշխատէր: Ինք ալ պէտք չէր որ գոնէ նուազ տառապելով ապրէր:

Իր դէմքին արտայայտութենէն յայտնի էր թէ Գէորգեան սաստիկօրէն կը զգար իր վիճակին օրստօրէական վատթարացումը: Նիհարցեր, աչքերուն շուրջը սև ծիր մը գոյացեր էր. նակատին վրայ խորշոմներ կ'երևային ու աչքերուն խորը կը կարգացուէր կործանարար հիւանդութեան մը ախտանիշերը:

Երբեմն կը պատահէր որ Սաթենիկ պէտքի մը համար պաշտօնատեղինիս գար, արկղակալը, որ չափազանց կը սիրէր

իր կինը և կը տառապէր զանիկա պէտք եղածին պէս չկրնայ
ապրեցնելուն համար, այդ օրերը աւելի սրտնեղ, անքաղաքա-
վար, տարօրինակ կը դառնար. կարծես աւելի անյազօրէն կը
խաղար դրամին հետ, կը խնդար ակռաներուն մէջէն, և շարու-
նակական ջղածգութեան մը կ'ենթարկուէր իր անծր:

Հետը չէինք կրնար խօսիլ. ընդհակառակը ինք կը շաղա-
կրատէր ոսկիներուն հետ, հարցումներ կ'ուղղէր անոնց, մէկ
ծեռքէն միւսը կը փոխանցէր:

— Սա գօգօթը որ հազարներով ոսկի կը դիզէ, կը մտա-
ծէր, ի՞նչ կրնէ, ի՞նչ է ըրածը, յետոյ այնքան ուրիշներ ալ:

Օգուտ մը չէին ունեցած իր կրկնակ դիմումները ամսա-
կանին վրայ պզտիկ, սանկ աննշան յաւելում մը ընել տալու
մասին: Վարչութիւնը միշտ կ'առարկէր թէ շահ չկայ, թէ
չկրնար պաշտօնեաներուն ատկէ աւելի վճարել, թէ դժգոհ եղո-
ղը կրնար մեկնիլ:

Գէորգեան դժբաղդ ծնած էր. օրինաւոր միջոցներով քա-
լող և պարկեշտութիւնով յառաջադիմել տենչացող երիտասարդ
մը՝ ամեն վայրկեան փորձութիւններու դիմադրելով՝ կը կար-
ծէր թէ անժանօթ ուժէ մը իր առաքինութիւնը պիտի վար-
ձատրուէր և հետզհետէ պիտի մօտենար երանութեան ճամ-
բուն:

Շատեր խոստացած էին զինքը ուրիշ աղէկ գործի մը
դնել. խոստում՝ բայց բնաւ գործադրութիւն: Հինգ ոսկիով
ինչպէ՞ս կրնար ընտանիք մը ապրեցնել: Պարտք պարտքի վրայ
սկսած էր դիզուիլ, և իր ուժն ալ կամաց կամաց կը կորսնցնէր,
վհատութեան մշուշով քողարկուած ըլլալով իր երեւակայու-
թիւնը:

Ապօրինի միջոցներով դիւրին էր դրամ շահիլ, կ'ըսէին:

Միտքին առջև կը ներկայանար շքեղ կեանք մը, սքանչե-
լի տուն մը, գեղեցկօրէն կահաւորուած, սպասաւորներ, հեշտա-

ուստ ըմպելիներ, յետոյ իր սիրական կինը ու աղուոր աղջիկը
պերճանքի մէջ թաթխուած: Կը խորհէր թէ անոնք ոչ մէկ
տարբերութիւն ունէին հարուստներէն, կեանքերնին զրկանքի
մէջ այսպէս չթառամեցնելու և երջանիկ ապրելու համար:
Երջանկութիւն, ոսկի, ոսկի...

Միտքը կը պղտորէր, կը շփոթէր:

Կարծես այն ոսկիները զոր կը կշռէր, աւելի իրեն համար
ստեղծուած ըլլալու էին, իրեն, որ այնքան պէտք ունէր անոնց:

Ոսկիի սահանքը իր անողոք ձայնին մէջ կը խղդէր Գէորգ-
եանի զաղափարային վսեմ սկզբունքները. կամաց, կամաց կը
փոխուէր, կը չարանար, ոսկիին անձրևը կը խանդարէր, կը
մոլորեցնէր իր հոգիին հանդարտ սաւառնումները:

— Ի՞նչ աղէկ բան հարուստ ըլլալ: Պարտք չունենալ, աղ-
քատներու, անտէր և անձնողք պղտիկներու օգնել, դրամին
ուժովը քարերը իսկ խօսեցնել տալ. ան, հարուստ ըլլալ:

Հազար ոսկիի պանքտոմս... չէ՛... քիչ մը աւելի... բայց...

Իր մտածումները կանգ կ'առնէին յանկարծ հոս, որովհե-
տև յանախորդ մը դրամ կը ձգէր, երկրորդ մը Ֆրանքին օրու-
ան cours-ը կը հարցնէր, երրորդ մը ուրիշ հարցում...

Իր սովորական խորհրդածութիւններուն մէջ մխրճուած,
անգամ մը անձանօթ մարդուն մէկուն հարիւր ոսկի աւելի
տուած էր:

Պատահեցաւ որ այդ անձանօթ յանախորդը իր ձեռքովը
բերէ caisse-ին յանձնէ հարիւր ոսկին, անհաւատալի առաքի-
նութիւնով մը:

Միտքը տարտղնուած էր, չէր կրնար գործին վրայ խոր-
հիլ, գործ մը որ շատ հսկողութիւն, ուշադրութիւն և փոր-
ձառութիւն կը պահանջէր:

Հաշուական սխալներ սկսած էր ստէպ ընել, յանախորդ-

ներու խենթ պատասխաններ կուտար. տնօրէնին հարցումներուն կարևորութիւն չէր տար և բարկութիւնով կը խօսէր մեզի հետ:

Վայրկեան մը պարապ չէր մնար, երբ առանձին զգար ինքզինքը, դարակը կը բանար, ոսկիին պարկերը կը պարպէր, թիով կը հոսեցնէր, դիւային խնդուք մը՝ չորցած, գունատ շրթունքներուն ծայրը: Եթէ հեղուկ ըլլար այդ ոսկին, թիին եզերքը բերանին պիտի մօտեցնէր ու պիտի խմէր, պիտի խմէր, յագեցնելու համար իր ոսկիի պապակը, իր ոսկիի մուկին ծարաւը:

Աշխարհի ամենէն զմայելի երգերը կ'եղանակէին իրեն համար այդ դրամները, իր միտքը կը վերանար անոնցմով. իրականութեան հետ ունեցած բոլոր յարաբերութիւնները կը խզէր, ոսկիէ երազին մէջ ամփոփուելու համար:

Ու մէկ քանի անգամ փորձեր էր զեղծումներ ընել՝ յանախորդէ մը մոռացուած դրամ մը չվերադարձնելով կամ սխալ հաշիւ մը չճշտելով, իր կեանքին ցաւալի ընթացքը այդպէսով քիչ մը բարեփոխելու համար. բայց զիշերը, խեղճին հետ զլուխ զլուխ տեսակցութիւն մը՝ հեռացուցած էր զինքը անիրաւ միտումներէն, անբարոյական նպատակներէն:

— Ի՞նչ պիտի ըլլայ աս վիճակնիս, կ'ըսէր կնոջը ամեն իրիկուն, իր աղուոր աղջկանը խոպուպիկներուն հետ խաղալով ջղածգօրէն:

— Ի՞նչ ընեմ, չես ձգերօր կարի երթամ, աշխատիմ: Երէկ եկաւ նորէն տանտէրը, անպատեառ այս ամսու զլուխ դրամ կ'ուզէ. հացագործին չորս ամիսէ ի վեր դրամ չէ տրուած. Սիմոնեանէն առնուած փոխառութեան պայմանաժամն ալ կը լրանայ, չեմ գիտեր ի՞նչ ընեմ... պիտի խենթենամ:

Սաթենիկ կնոջական սուաւելութիւններուն կը միացնէր տկարութիւններ, թերութիւններ: Տառապանքին դիմագրաւելու համբերութիւնը սպառիլ սկսած էր իր մէջ:

Երկարօրէն խորհած էր իրենց վիճակին վրայ և սա եզրակացութեան յանգած որ՝ եթէ այս կեանքը շարունակուի իր փափուկ առողջութեան հետ պիտի կորսնցնէր նաև ինչ բան գեղեցիկ որ ունէր իր վրայ:

Ու օրին մէկը ցաւալի բժաշակութեամբ, հիւանդ հետաքրքրութիւնը ունեցեր էր իր ամուսինը խաբելու, դրամ շահելու համար:

Եթէ դրամ ունենար Գէորգեան, իր կինը աշխարհիս ամենէն պարկեշտ, ամենէն օրինակելի կինը պիտի մնար, և ամբողջ կեանքի ընթացքին անբարոյութեան սև ամպ մը երբէք չպիտի մթազնէր ընտանեկան մաքուր հորիզոնին: Սաթենիկ թէև ահամայ, կամաց կամաց վարժուեր էր այդ կեղծիքի կեանքին. դրամ կը շահէր, անսլաակաբարէն լալիր չկաւատուհի մը վաւերական միջնորդութիւնովը. ալ չպիտի տառապէր շատ, գէթ թիչ մը լայն պիտի ապրէին:

Գէորգեան կինը ուրախ և զոհ կը գտնէր իրիկունները. միտքին սահմանափակ և անձուկ կացութիւնը ու կնոջը պարկեշտութեանը մասին ունեցած անսահման վստահութիւնը, թոյլ չէին տուած իրեն որ կասկածի անոր հաւատարմութեանը վրայ, մինչև այն օրը՝ երբ en flagrant délit բռնեց զայն վաւառու ծերունիի մը հետ:

Ինք որ չէր ուզած կնոջը աշխատելու երթալը, որպէսզի չելլէ փորձութիւններու հանդիպի...

Գործի չեկաւ այն օրը:

Անկից ետքը աւելի յուսահատած, աւելի փոխուած գտանք զինքը: Ապրելու անկանոն եղանակ մը ստեղծեց իրեն համար: Ո՛չ ուտել, ոչ խմել, միտքի անհաւասարակչիւ վիճակ մը՝ տխուր ու եղերական:

Պաշտօնեաներէն մէկ քանին կը ծաղրէին զինքը, անոր ներքին փոթորիկներուն անդիտակ:

— Հայտէ՛, օւր է նայինք, կ'ըսէին անոր, կշռելի՞ մոռ-
ցեր ես:

Ու ան հեզնախառն, մեյամաղձոտ ժպիտով մը, որուն մէջ
անթեղուած կար աշխարհիս անհաւասարու թիւններէն, անիրա-
ւու թիւններէն, կեղծիքէն, անբարոյու թիւններէն զգացած ամ-
բողջ դառնութիւնը և նողկանքը, թիակը ձեռքը կ'առնէր նո-
րէն, կը խառնէր շարունակ, ոսկիէ բուրգեր կը կանգնեցնէր
և յանկարծ, կը փլցնէր զանոնք, ջղածգօրէն, անխորհուրդ հա-
րուածով մը, իբր թէ անոնք իր իսկ երազներուն բուրգերը եղած
ըլլային, յետոյ մանկական միամիտ տխրութեան մը մէջ կը
խորասուզուէր:

Շուրջինները ալ ծանծրանալ սկսած էին:

Իր ընթացքին մէջ զարտուղութիւն մը կը շեշտուէր հետ-
զհետէ. Ոսկիէ—Կուռքին առջև ողջակիզուած իր հպարտ, վէս
անհատականութիւնը, կը կորսնցնէր իր սկզբնական կորովը,
եռանդը:

Միւս կողմէ ընդվզումները վայրկենաբար կ'անհետանային
մտածողութեան հորիզոններուն վրայ, շրջմովիկ հիւրերու պէս:

Ձէր կրնար գէշ բան մը ընել, ատիկա իր ուժերէն շատ
վեր էր, ու իր հոգին այդ պայքարին մէջ օրերով մաքառեցաւ:

Իր բացակայութիւնները աւելի ստէպ դարձան:

Ոսկիին ծարաւը Գէորգեանը չիմարացուցած էր:

... Երէկ չիմարանոց տարին զայն:

ՄԵՐՈՒԺԱՆ ՊԱՐՍԱՄԵԱՆ.

* * *

Նորից մի կարօտ, սիրոյ մի թախիժ՝
Ծանօթ մեղեդին երազ-անցեալի
Պարուրեց հոգիս.

Նորից մի համբոյր վաղանցուկ գարնան
Վարդի բուրմունքով
Օրօրեց հոգիս...

ԱՐՄԵՆՈՒՀԻ ՏԻԳՐԱՆԵԱՆ.

* * *

Հողիս վայելեց
Մի գողտրիկ համբոյր՝
Հովերից անուշ,
Զովերից անուշ.—
Այն քո հայեացքն էր—
Կենսատու մի բոյր
Նւիրեց սրտիս,
Գարունից անուշ:

Սիրտս տրորեց
Մի թախիծ ծանօթ,
Մի երազ—կարօտ,
Մի յուշիկ աղօտ. —
Այն քո հողին էր
Թւերը փռած՝
Փարեց, գուրգուրեց
Հողիս ախրամած:

ԱՐՄԵՆՈՒՀԻ ՏԻԳՐԱՆԵԱՆ.

ՏՐՏՄՈՒԹԵԱՆ ԽՈՋԵՐԻՑ

Երբ տխուր երգով մրրիկը աշնան
Կբաղխի փեղկը փակ լուսամուտիդ,
Ու կհեկեկայ անարցունք սրտիդ
Ցաւոտ դաշնակներ մի պահ տխրութեան,
Իմացիր, նրանք ծայներն են սրտիս...

Այդ տխուր պահին դալուկը ճակտիս,
Նստած միայնակ մռայլ սենեակում,
Տարագիր սիրուս կսկիծն եմ սգում.
Եւ հեկեկանքս թւերովն հողմի
Թռչում է Գեղ մօտ, սոււերովդ այրւում,
Կարօտով արբած՝ պատերիդ փարւում,
Տրտունջն է լալիս սև անշատումի.
Խենթ բարկութիւնով դռնակդ ծեծում,
Ու գիշերն անվերջ ոռնում ու հեծում...

Հ. ՄԱԶՄԱՆԵԱՆ.

ԱԾՆԱՆ ԾԱՂԻԿԸ

I.

Նա գիտէր, որ ինքը այլևս երիտասարդ չէր, որ կորցրել էր թարմութիւնը: Նա արդէն դադարել էր երազել և հաշտուել էր այն մտքի հետ, որ մի կերպ քարշ կտայ այս մնացած կեանքն էլ:

Նա չիշուժ էր, որ երբ դեռ 16 տարեկան էր, աշխոյժ, ուրախ, լի յոյսերով: Նա ինքն էլ չնկատեց, թէ ինչպէս անցան տարիները, բայց մի օր սոսկաց՝ նկատելով գլխին երկու ճերմակած մազ, որ արծաթի թելերի նման փայլում էին սև սաթի պէս սև մազերի մէջ: Նա պոկեց այդ յանդուզն մազերը, որ ժամանակից առաջ էին ճերմկել, և մի խոր հառաչանք դուրս թռաւ նրա կրծքից:

Երբ դեռ նոր էին սկսել հատ-հատ ճերմկել, նա պոկում էր, բայց յետոյ նա սկսեց ներկել, երբ արդէն անհնար էր դուրս տալ...

Ինքն էլ չնկատեց ինչպէս անցան տարիները և մի օր աչքերը բացեց և տեսաւ, որ տանը մնացած պառաւած աղջիկ էր, և սիրտը հմլւեց կրծքի տակ:

40 տարի նա շարունակ սպասել էր, որ ահա կգայ նա, կսիրէ, կփայփայէ. նա կդառնայ տանտիկին, սիրող, շատ սիրող կին: Նրա երևակայութեան մէջ վառ պատկերանում էր

նա: Բայց տարիները գլորւել էին միմեանց չետեից, և նա չէր եկել:

Այժմ նա բնակւում է իր մի յարկանի տան մէջ. նա դադարել է երազել. բայց էլի սրտի խորքում նա դեռ հաւատում էր նրա գալուն: Նրա սիրտը մանկան պէս վախկոտ էր. նա դեռ կարծրում էր տղամարդու ամեն մի հայեացքից, թեթև շփումից:

Նա կարծես չէր ուզում հաւատալ, որ կեանքը անցնում է, և արհեստական միջոցներով կամենում էր պահպանել իր թարմութիւնը: Նա խնամքով ներկում էր մազերը, գնում էր այն բոլորը՝ ինչ գտնում էր լրագրական յայտարարութիւնների մէջ, ինչ լսում էր իր ծանօթներից, որոնցով նա ուզում էր դադարեցնել բնական թառամելը:

Բայց ոչինչ չէր օգնում և պարզ տեսնում էր ինչպէս օր օրի վրայ դէմքի կաշին կնճռոտում է, կորցնում թարմութիւնը: Եւ նա յուսահատւած դէն ծգեց բոլոր միջոցները և թողեց որ կեանքը գործը կատարէ. նա փակեց իր մի յարկանի տանը իր պառաւ աղախնու և ծերացած մոխրագոյն կատուի հետ:

II.

Նա վերջնականապէս դադարել էր հաւատալ, որ կղայ նա՝ երբ եկաւ. բաղդը կարծես մի վերջին անգամ ուղեց ժպտալ նրան: Նա նորից սկսեց ուշք դարձնել իր արտաքինի վրայ, հազնւում էր վերջին տարազով, խնամքով ներկում էր մազերը, շպարում դէմքը:

Այդ փոփոխութիւնը կատարւեց այն օրից, երբ նա ծանօթացաւ մի երիտասարդ սպայի հետ, որին նրա մօտ բերել էր իր մօրաբրոջ որդին. նա հէնց առաջին անգամից սիրահարւեց

մինչև ականջները. նա պատրաստ էր ամեն ինչ զոհել. մեծ զգուշութեամբ նա աշխատում էր ծածկել իր այդ զգացմունքը կողմնակի աչքերից. նա կորցրեց իր անդորրութիւնը, գիշերները աչքերը բաց էր լուսացնում, յաճախ ինքն էլ չգիտէր ինչու լալիս էր դեռատի աղջկայ նման: Նրա սիրտը զարթնել էր քնից և արագ բաբախում էր. նա ոչ մի տեղ հանգիստ չունէր, ուրիշ ոչնչի մասին չէր մտածում, շարունակ նա էր նրա աչքերի առաջ՝ վայելչակազմ, դեղեցիկ, քաղաքավարի:

Շաբաթը մի քանի անգամ այդ երիտասարդները այցելում էին նրան և հիւրասիրւում: Մենակ մնացած ժամանակ նրանք ծիծաղում էին այդ ծերացած օրիորդի վրայ, որը աշխատում էր 16 տարեկան աղջկայ նմանւել, իսկ նրա հետ շատ սիրալիր էին:

Նա մի րոպէ կանգ չէր առնում, չէր տատանւում, երբ նրան դիմում էին փողի համար. նրա քսակը բաց էր նրանց համար. նա չէր թողնում, որ երկրորդ անգամ կրկնեն: Երբեմն ինքն էր հարցնում՝ արդեօք փողի կարիք չունի՞ն: Նա սիրում էր և պատրաստ էր ամեն ինչ զոհել նրա համար:

Նա աշխատում էր գրաւել նրանց իր ճոխ հիւրասիրութեամբ, աղաչում էր, որ աւելի յաճախ այցելեն, գանգատւում էր իր մենակութիւնից...

Նրանք գնում էին, և անհամբեր սպասում էր հետևեալ այցիին:

III.

Դա նրա երկրորդ սէրն էր:

Առաջին անգամ պատահեց՝ երբ նա դեռ 24 տարեկան էր, այն ժամանակ նա դեռ մենակ չէր, ծնողները կենդանի էին:

Նա նրան սիրեց հէնց առաջին անգամ, երբ նրան տեսաւ

իրանց տանը, երբ նա եկել էր խնդրելու նրա ծեռքը: Նա սիրեց նրան: Սիրեց առանց իրեն հաշիւ տալու:

Նա սիրեց նրան, որովհետեւ նա եկել էր առաջարկելու նրան իր կինը լինել... Ամբողջ գիշերը նա անքուն անցկացրեց, երազեց իր ապագայ կեանքը, երբ արդէն ամուսնացած կլինի...

Բայց միւս օրը փեսացուն փոխանակ ինքը գալու տեսնելու իր նշանածին, մի մարդու հետ ուղարկեց իր հրաժարականը, պատճառաբանելով աղջկայ տղեղութիւնը, և պահանջում էր 10,000 ռուբլի. պակաս չի համաձայնել:

Նրա օժիտը միմիայն 5,000 էր, և գործը գլուխ չեկաւ:

Շատ վշտեր կրեց նա, թաղեց ծնողներին, և ինքը մնաց մեն-մենակ:

IV.

Մի ամբողջ ամիս էր անցել նրանց ծանօթանալու օրից. նրա սէրը օր-օրի վրայ ուժեղացել էր և այժմ նա անկարող է առանց նրան ապրել: Նրա ուրախութիւնը փոխւել էր տանջանքների: Երրորդ օրն էր նա նրան չէր տեսել. արդէն երեկոյեան ժամի 9-ն էր, բայց նրանք չկային. եթէ այսօր էլ չգան, նա ուղղակի կխելագարւի:

Նա շքեղ հագնւած, մազերը գեղեցիկ սանրած նստած էր հիւրասենեակում՝ ընկղմւած դաժան մտքերի մէջ... Գուցէ նա այլևս չգայ. գուցէ նա էլ չի տեսնելու նրան: Արցունքները խեղդում էին նրան:

Յանկարծ նա ամբողջ մարմնով ցնցւեց և գունատւած ոտի կանգնեց. նրա ականջին հասաւ դանդի ձայնը, բայց նա կարծես չէր հաւատում իր լսողութեան... մի ընդհանուր քարացած էր տեղումը, սիրտը ամուր բաբախում էր. նա երկրորդ անգամ լսեց դանդի ձայնը, այլևս անկասկած էր. նա

արագ դիմեց դէպի դուռը... Նա գիտէր, որ նրանք են. ուրիշ
ո՛վ կարող է լինել... Եթէ չլինէր այն միւսը՝ եթէ նա մենակ
լինի, նա պատրաստ էր ընկնել նրա վզովը, սեղմել իր կրծքին,
համբուրել, համբուրել անվերջ...

Մի քանի վայրկեան նա կանգնած էր դռան մօտ մի տե-
սակ ինքնամոռացութեան մէջ. ոտի ծայն լսելով նա ուշքի եկաւ,
արագ վազեց դէպի հայելին, ուղղեց մազերը, հագուստը և
զնաց դիմաւորելու նրանց:

Դուռը բացւեց, նա էր մենակ, միւսը չկար...

— Օր. Կատերինէ, բարև ձեզ, երևի չէի՞ք սպասում:

— Ո՛չ, ո՛չ... Ընդհակառակը... Ես... Նա չկարողացաւ շա-
րունակել և շփոթւած հրաւիրեց նստել...

Մի ընկալ էր կուսն էլ լուռ էին:

— Ո՛ւր է Վասօն, նա ինչո՞ւ չեկաւ:

— Ամբողջ օրը չեմ տեսել, չգիտեմ ուր է կորել... Ինձ
շատ հարկաւոր էր նրան տեսնել, շատ... Ինձ հարկաւոր էր...

— Ի՞նչ է պատահել ձեզ, դուք այնպէս լուղւած էք ե-
րևում...

— Ախ, ոչինչ... ոչինչ: Ուղղակի անիծեալ կեանք է. մի
ինչ որ 200 ընկալի, ո՛չ մի տեղից չկարողացայ գտնել, որ շարը-
տեմ այդ անպիտանի երեսին. այժմ ուղում է մուրհակը դա-
տարան տանել:

— Ինչո՞ւ ինձ չէք ասել... էլ ո՞ր օրուայ համար է բարե-
կամութիւնը... ամօթ ձեզ...

— Ախ, ի՞նչ էք ասում, դուք առանց այն էլ շատ էք
օգնել ձեզ:

— Դատարկ բան է... Ես իսկոյն...

Նա արագ անցաւ միւս սենեակը և երկու ընկալ չանցած
երկու թղթադրամ ձեռքին ներս մտաւ:

Երիտասարդ պարոնը արագ մօտեցաւ նրան, բռնեց նրա ձեռքը և սկսեց համբուրել:

— Դուք փրկեցիք իմ պատիւը:

Թղթադրամները ընկան աղջկայ ձեռքից. նա դողում էր ամբողջ մարմնով:

— Ձեզ ի՞նչ պատահեց:

— Ոչինչ, ոչինչ, կանցնի... ուշքի գալով շշնջաց նա ընկնելով բազկաթուռի մէջ: Նրա կուրծքը արագ բարձր ու ցածր էր անում... Նա բացեց աչքերը, նայեց նրան և յանկարծ բոլորովին անսպասելի կերպով նա ծունկ չոզեց, բռնեց նրա ձեռները և կրքոտ սկսեց համբուրել:

— Ի՞նչ էք անում... ի՞նչ էք անում:

Նա լուռ, գունատ ոտի կանգնեց և լայն բացած աչքերով նայեց նրան, կարծես չհասկանալով իր արածը. յանկարծ նա երկու ձեռներով ծածկեց դէմքը, կարծես ամաչելով իր սիրուց:

— Ներեցէ՛ք... Ներեցէ՛ք... Հազիւ լսելի շշնջաց նա մեռելի նման գունատ:

Մի րոպէ տիրեց լուռթիւն:

Երիտասարդի աչքերը փայլեցին, նա հասկացաւ, ուզեց զրկել նրան, միանգամից համբուրել նոյն իսկ շրթունքները, բայց նայեց նրա թառամած դէմքին և յետ քաշւեց:

Մի վայրկեան երկուսն էլ լուռ էին, տղան վերցրեց նրա ոչ այնքան թարմ, բայց դեռ գեղեցիկ ձեռքը և համբուրեց: Օրիորդը դողաց, այդ դողը կարծես էլեքտրական թելով անցաւ տղայի ամբողջ մարմնով, աչքերը փայլեցին, ամբողջ մարմնում զգաց մի տեսակ ջերմութիւն. նա այլևս չէր կարողանում իրեն հաշիւ տալ. նա նայեց նրան, այս անգամ նա նրան աւելի գեղեցիկ թւաց: Մի քանի րոպէ առաջ նա զզւեց՝ տեսնելով այդ պառաւած աղջկայ կիրքը, բայց այժմ ինքը զգում է մի անդիմադրելի կիրք, որ մղում էր դէպի նոյն այդ պա-

աւաւած աղջիկը, որը գուցէ առաջին անգամն է, որ այդպէս
այրուում, դուրում է սիրոյ կրակից, որ գուցէ երբէք չի զգացել
սիրոյ քաղցրութիւնը... Գուցէ հէնց այդ հետաքրքրութիւնն
էր, որ այդպէս մի անգամից վառեց նրա ցանկութիւնը, և մի
տեսակ ինքնամոռացութեան մէջ ընկաւ նրա գիրկը:

V.

Այն երեք օրը, որ նա ապրեց նրա հետ, նրան մոռացնել
տւին իր կեանքի բոլոր դառնութիւնները:

Վերջապէս նա տեսաւ իր երազը իրականացած:

Նա սիրում էր և սիրւած էր՝ և այն էլ մի գեղեցիկ երի-
տասարդ տղայ, որին երբէք չէր երազել:

Նա անհամբեր սպասում էր նրան, նա նստած էր պատու-
հանի առաջ: Ինքնաեռը վաղուց պատրաստ էր: Սեղանի վրա
դրւած էին ամեն տեսակի քաղցրեղէններ:

Նա լուռ նստած էր. ամեն մի կառքի ծայն լսելուց նա
ցնցւում էր, անհամբեր սպասում էր կանգ կառնի՞ թէ ոչ:

Նշանակւած ժամից վաղուց անցել էր, բայց նա չկար. ան-
համբերութիւնից նա ոտի ելաւ ու նեարդային սկսեց պտտել
սենեակի մի անկիւնից միւսը: Նա պատրաստ էր երեխայի նման
լալու:

Նա կանչեց աղախնուն, պատւիրեց նորոգել հանգած ինք-
նաեռը, ինքը ընկաւ գահաւորակի վրայ և երկու ձեռքով ծած-
կեց դէմքը:

Աղախինը զարմացած նայեց իր տիրուհուն, ուզեց բան
ասել, բայց չասաց. լուռ՝ — վերցրեց ինքնաեռը և դուրս
դնաց:

Այդ օրը նա իզուր սպասեց, իզուր սպասեց երկրորդ, եր-
րորդ օրը. նա չկար:

Յուսահատութիւնից նա պատրաստ էր գլխի մազերը փետ-
տել, չանգուտել դէմքը, մատերը կրծոտել:

Ո՞ւր գնար, ումնի՞ց հարցնէր, ո՞րտեղ տեսնէր նրան:

Նա անկարող է ապրել առանց նրան:

Նա ոտի կանգնեց, վազեց իր սենեակը, սկսեց արագ հագ-
նւել. նա կզտնի նրան, որտեղ որ լինի. գուցէ հիւանդ է. գու-
ցէ նա էլ տանջւում է իրեն տեսնելու տենչով:

Արդէն պատրաստ էր դուրս գալու՝ երբ լսեց զանգի ու-
ժեղ ցնցում ու կանգ առաւ, նա մի վայրկեան քարացած մնաց
հայելու առաջ գլխարկը ձեռքին, ապա նետեց գլխարկը մի
կողմ և արագ դիմեց դէպի դուռը, որ սղմի նրան իր կարօ-
տած կրծքին, էլ երբէք, երբէք բաց չի թողնիլ... Նա թող
սպանի նրան, միայն չթողնի նրան մենակ՝ որ առանց նրան
ապրել չէր կարող:

Նա չսպասեց աղախնուն, ինքը վազեց բանալու դուռը և
չէմքի վրայ հանդիպեց նրա ընկերոջը. նա վախեցած մի քալ
յետ-յետ զնաց:

— Որտե՞ղ է նա:

Տղան ոչինչ չպատասխանեց, անցաւ սենեակ, մի կողմ նե-
տեց ձեռքին բռնած գլխարկը, վերարկուն ու նստեց բազկա-
թոռի վրայ:

— Մհ, ի՞նչ յոգնել եմ:

— Ի՞նչ է պատահել նրան... ո՞ւր է նա:

— Ո՞վ, կարծես չհասկանալով՝ անտարբեր հարցրեց նա:

— Նա, Սերգէյը:

— Նա զնաց... տարան:

— Գնաց... տարան...

— Տարան պատերազմ:

Նա մի քանի վայրկեան լուռ նայեց սղային, որ այդպէս

անտարբեր կերպով ասում էր այդ մի քանի քայլ յետ-յետ
գնաց և ուշաթափ ընկաւ գետին:

VI.

Մի շաբաթ էր անցել, նա հիւանդ պառկած էր անկող-
նում. ոտների մօտ նստած էր նրա պառաւ աղախինը:

Անկարելի էր նրան անաչել, գունատ, նիհարած աչքերը
խորն ընկած, այդ մի շաբաթում նա 10 տարով աւելի ծերա-
ցած էր երևում:

Երկուսն էլ լուռ էին: Պառաւ աղախինը շատ էր աշխա-
տել մխիթարել, բայց յուսահատուել էր ու լռել:

Ոչ մի շշուկ, չորս կողմը լուռ էր, լսւում էր օրիորդի
թոյլ շնչառութիւնը այնպէս, որ զանգի ծայնը այդ լուռութեան
մէջ թնդանօթի հարւածի չափ ուժեղ թնդաց:

Աղախինը դանդաղ բարձրացաւ և գնաց դուռը բանալու:

Հիւանդն էլ լսեց այդ ծայնը, նա բարձրացրեց գլուխը և
սպասում էր թէ ո՞վ է յիշել իրեն, նրա դէմքի վրայ խաղաց
մի թեթև յոյս և էլ մարեց:

Մտաւ աղախինը մի նամակ ձեռքին, աղջկայ սիրտը սկսեց
ամուր բաբախել՝ այնքան արագ, որ նա ոչ մի խօսք չկարողա-
ցաւ արտասանել... Նա համարեա խլեց աղախնու ձեռքից նա-
մակը, նայեց ծրարին, աչքերը սևացան, նա էլի ընկաւ բար-
ձերի վրայ:

Մի քանի վայրկեան նա մնաց այդ դրութեան մէջ:

— Զո՛ւր, շշնջաց նա:

Աղախինը մի ձեռքով բաժակը մօտեցրեց նրա շրթունք-
ներին, միւսով պահեց գլուխը, նա մի քանի ուժայ խմեց, Եր-
բեց շրթունքները, մի խոր շունչ քաշեց ու պառկեց տեղը:

Նեարդային կերպով պատուեց ծրարը: Նամակը նրանից

էր: Նա ներում էր խնդրում, որ այնքան անսպասելի էր եղել զնալը, որ չէր կարողացել զալ («մնաք բարով») ասելու և խրնդրում էր, որ 300 ըուբլի տար ընկերոջը՝ որ ուղարկի իրեն. վերջում խնդրում էր աղօթել, որ Աստուածը պահպանէ իրան պատերազմի դաշտում:

Նա վերջացրեց նամակը. արցունքները խեղդում էին նրան. իսթերիք կերպով սկսեց լալ. նա լալիս էր, համբուրում նամակը, սեղմում կրծքին:

— Նա դեռ սիրում է ինձ... սիրում է:

Շփոթւած աղախինը չգիտէր ի՞նչ անել, ինչպէս հանգստացնէր...

— Օրիորդ... օրիորդ...

— Մաշա՛, Մաշա՛, ճչաց նա, ընկաւ աղախնու գիրկը և արցունքների միջից սկսեց ջերմ-ջերմ համբուրել նրան:

Մի քիչ հանգստացած նա ծունկ չողեց և ջերմեռանդութեամբ սկսեց աղօթել:

VII.

Նա ամենայն ուշադրութեամբ հետևում էր լրագիրներին. դրանով էր ապրում. յաճախ նա գնում էր նրա ընկերոջ մօտ՝ նրանից տեղեկութիւններ իմանալու:

Բայց մի օր նա երբ ծանօրացել էր այդ անհատելի այցելութիւններից, ուղղակի յայտնեց՝ որ նա սպանւել է պատերազմում:

Այդ լուրը նա լսեց շատ սառը, լաց չեղաւ, գունատ, լուռ օտի կանգնեց, առանց ոչինչ ասելու դուրս եկաւ սենեակից:

Ամեն ինչ շարդուփշուր եղաւ. երազները թառամեցին. այժմ նա նման էր ծովափում ընկած կտորած նաւի:

Նա խորը կերպով զգում էր, որ իր կեանքը վերջացաւ.

բաղդը մի անգամ էլ ուղեց ծաղրել նրան, մի անգամ էլ նրան
ապրելու յոյս տուեց, բայց շուտով էլ խլեց, կարծես աւելի խո-
րը զգացնել տալու խոր վիշտը, իր մենակութիւնը:

Բայց նա օրհնում է նրա պատահելու ժամը. նա երջանիկ
եղել է, ի՞նչ անենք, որ դա միայն մի քանի օր էր. այդ էլ բա-
ւական է. նա տեսել է երջանկութիւն:

Նրա աչքում այնպէս ողորմելի թւաց իր կեանքը. էլ ին-
չի՞ն է պէտք նրան կեանքը:

Երբ նա դուրս եկաւ նրա մօտից, ճանապարհին երբ դեռ
վերքը թարմ էր, նա ոչինչ չէր զգում. երբ տուն հասաւ, նրա
ականջին պարզ հնչեցին նրա խօսքերը. «Նա սպանւել է պա-
րազմում»... Նա ընկաւ մահճակալի վրայ երեսի վրայ. երկար
նա տանջւեց, մինչև արցունքները եկան մխիթարելու նրան, և
նա դառը լաց եղաւ:

Այդ օրը նա կանչել տուեց քահանային, գրել տուեց կտա-
կը, նւիրեց բոլորը պատերազմում ընկած զինուորների որբ մնա-
ցած ընտանիքներին, իսկ տունը իր պառաւ աղախնուն:

Միւս օրը նրան գտան կախւած իր սենեակում:

Թաղումը շատ անշուք էր:

Աղախինն էր, որ աղեկտուր լալիս էր. և այն երկու երի-
տասարդները, նրանք էլ եկել էին հրաժեշտ տալու նրա դիա-
կին:

ՄԻՔ. ՄԱՆՈՒԷԼԵԱՆ.

ԳԵՂԵՑԿՈՒԹԵԱՆ ԵՐԳԵՐԻՑ

1.

Իմ դէմն՝ անհուն ծով ծաւալուն,
Ափին նստել, միտք եմ անում.
Նայում լրուին՝ լազուր ջրրին
Ու թախծում եմ, ու հիանում...

Գրլխիս վերև—ոսկի՛ արև,
Ճերմակ ամպեր երկնի մովում,
Մով-կապուտակ վրրանի տակ
Մեղմ ճեմում են լոյսի ծովում...

Աչքիս դիմաց, շեշտասրլաց՝
Ծովն է նետում ճայր ճախրուն.
Մեղմ ծրփանքում որս է ճանկում
Ու սրլանում, ծածկւում հեռուն...

Եւ բրնութեան գեղեցկութեան
Փայլով տարւած՝ իմ հէզ սրրտում
Ինչ կայ մրուայլ, անյոյս, անփայլ—
Գեղեցկութեան ծոցն եմ նետում...

Արտերը՝ ոսկի՛, դաշտերը՝ զըմրճւխտ,
 Երկնի կապուտը՝ անծի՛ր հովանի.
 Լողում են վարդշող ամպերը պանդուխտ
 Հուր-վերջալուսի ծովում ծիրանի...

Եւ փրուած վարսեր, սեւաթույր դէմքով,
 Վէս բարձունքներից ոգին գիշերի
 Իջնում է երկիր լրուիկ հրմայքով,
 Որպէս ուրւական աղօտ յուշերի...

Եւ գալկանում է հեռում ոսկեհուր
 Շողերի հիւսկէն՝ լեռները շողած.
 Սեխն է տալիս անտառը գանգուր,
 Ու մայր է մըտնում արփին նւաղած...

Զովիկ մի սիւգ է չորս դին երերում—
 Այն գիշեր-ոգու վարսերն են ծրփում...
 Ոսկի՛ արտերում, զըմրճւխտ դաշտերում
 Կեանքն էլ խոնջացած՝ աչերն է խրփում...

Ա. ԾԱՏՈՒՐԵԱՆ.

Ս Ի Ր Ա Վ Է Պ

(Շ ու շ ա ն ի ն և Վ ա հ ա ն ի ն)

Լեռան լանջ ելած, թաւիշ-դալարում
Մենք նստել էինք ու չէինք խօսում...
Լեռան ետեին արփին էր մարում,
Երեկոն իր նուրբ շրդարշն էր հիւսում:

Եւ մըթընշաղի շունչը հովաբոյր
Մեղմ օրօրելով սաղարթը չորս դին,
Գալիս, տալիս էր մեզ թեթեւ համբոյր
Ու անցնում, մտնում ձորերը մըթին...

Լեռան լանջ ելած, թաւիշ-դալարում
Մենք նստել էինք ու չէինք խօսում...
Եւ սէրը գաղտուկ մեր վառ սրբտերում
Իր յաւէրժական պօէմն էր հիւսում...

Ա. ԾԱՏՈՒՐԵԱՆ.

ԱՆՑԻՐ, ԱՅ ԱՂՋԻԿ...

Անցի՛ր, այ աղջիկ, հէգ սրբախ մօտից,
Անցի՛ր դու անփոյթ, հէքիաթի նրման.
Սրբախ օրոցքն է—մենութեան թախիծ.
Նիրհում է նա խո՛ր... Մի՛ յուզիր նրբան...

Սէր չունի՛մ... Սրբախ վաղճը է օտար
Կանանց աչերի ժրպիտն հրմայուն.
Որպէս տարաժամ ծաղիկ ցրտահար,
Զի՛ գրգռում էլ նա սիրայոյզ գարուն...

Եւ նրման աշնան տրխուր դալուկին,
Լուռ օրօրում է նա անդարձ յուշեր,
Օրօրում հրրնւանք և յոյզեր նախկին,
Ու թախծով երգում մերձեցող գիշեր...

Անցի՛ր, այ աղջիկ, երազի նրման,
Որպէս գիշերին՝ ցերեկն անհաղորդ.
Դու—չրքնա՛ղ փերի լուսաշող գարնան.
Ես—մըթընշաղի մենաւո՛ր ճամբորդ...

Ա. ԾԱՏՈՒՐԵԱՆ.

ԵՐԱԶՆ Է ԿԱՆՉՈՒՄ...

Յարաղմուկ կեանքի նանիր մանրուքին
Օտա՛ր է, ընկե՛ր, օտա՛ր իմ հոգին.
Յարաղմուկ կրուի ժրխորում եռուն
Ինձ շող-երազն է միշտ կանչում հեռուն...

Կանչում է, որպէս լուսածին փերի,
Դէպի խաղացկուն սրլացքն ամպերի.
Դէպի ծաղկավա՛ռ, յարախի՛նդ, անմա՛ր
Արե՛նտ վայրեր, կապուտա՛կ կամար...

Կանչում է այնտեղ, ուր գունեղ, անձիր
Չորե՛ր, հովիտնե՛ր, պուրակնե՛ր ցան-ցիր
Լեռնալանջերից փարթա՛մ, ծաւալո՛ւն
Նազով նայում են ծովի հայելուն...

Կանչում է այնտեղ, ուր թաւ կանաչում
Արծաթ-չրրերն են անլուռ կարկաչում.
Ուր նոճիների բընքոյշ հովանում
Գեղեցկի երզն է սրբտում ծովանում...

Ականջ եմ դրնում հրմայիչ կոչին,
Եւ, որպէս աշնան մըշուշում նոճին՝
Յաւերժ վերամբարձ, յաւերժ դալարճուն—
Հողիս տենչում է արեւն ու հեռճուն...

ԱԼ. ԾԱՏՈՒՐԵԱՆ.

ՎԱՐԴԱՆԱՆՑ ՊԱՏԵՐԱԶՄԸ

(Հոգեբանական էտիլո)

Վաղն արդէն հինգշաբթի է:

Իսկ ես դեռ ոչինչ չեմ արել:

Ահա երեք շաբաթ է, ինչ ամեն օր, հէնց որ մթնում է, փակում եմ սենեակումս, ձեռքս առնում թուղթն ու մատիտը՝ մի փոքրիկ ծրագիր կազմելու:

Սակայն բաւական է մի բոլոր, որ ինձ պատկերացնեմ ուսումնարանի ընդարձակ դահլիճը և փոքրիկ ամբիոնը, որի վրայից ճառ եմ արտասանում. բաւական է, որ ես զգամ հասարակութեան զսպառ շնչառութիւնը և այն անհամար հայեացքները, որոնք դէպ ինձ են մեխւած, բաւական է, որ աչքիս ընկնեն առաջին կարգում բազմած հոգաբարձուների լայն ու բուլթ դէմքերը. բաւական է այդ փոքրիկ մտապատկերը, որ իմ մտքերն իսկոյն ցրւեն, և ես չիշեմ որևէ դէպք իմ անցեալից—յաճախ չնչին և աննշան,—ու տարւած այդ յուշով կորցնեմ ողջ գիշերը:

Այս երեկոյ ինձ հանգիստ չի տալիս, ինձ հալածում է... նրա հարսանիքը...

... Ես ուշ գնացի: Ես նոյն իսկ չէի ուզում գնալ ու

պատրտեցի «Նարսանեաց Նրաւէրը»... «Բայց ոչ, ասացի, թող տեսնեմ իմ ներկայութեամբ ինչպէ՞ս ես դու ուրախանում»...

Եւ երբ մտախոհ ու սխուր պարտիզի ներսն անցայ, ուր հարսանիքն էր կատարւում, մի ըռպէ մտքովս անցաւ թագնւել թփի յետեն ու հեռւից դիտել նրան՝ իր փեսացւի հետ:

Յանկարծ կանացի մի ձայն ցնցեց ինձ. յետ նայեցի ու ճանաչեցի նրան՝ նորահարսի սպիտակ զգեստով:

— Ինչո՞ւ այսպէս ուշ, պարոն Արամ, ասաց նա յուզւող ձայնով.—մի ժամանակ ինձ թւաց, որ այլևս չէք գայ. ինչո՞ւ չէք մօտենում հանդիսականներին: Գնանք, ի միջի այլոց կժանօթացնեմ և իմ փեսայի հետ: Գիտեմ, դուք նրան չէք հաւանիլ. ձեր և նրա հայեացքների մէջ տարբերութիւն շատ կայ... բայց, դիտէ՞ք ինչ. միայն այս երկու օրս նրան մօտիկուց ճանաչեցի. չպէ՛տք է այնքան էլ խստապահանջ լինել. նա լաւ մարդ է, բարի, բնաւորութիւնը մեղմ. յամենայն դէպս նրա... նա լաւ ընկեր կարող է լինել...

— Գնանք, ծանօթացրէ՛ք, վրայ բերի ես վճռականօրէն:

Այդ նրան տարօրինակ թւաց. մի ըռպէ լռեց, քարացաւ ու տագնապով լի նայեց աչքերիս:

«Ն՞րմ... զարմանում ես... չէի՞ր սպասում. դու կարծում էիր ես կհրաժարւե՞մ, ես կսկսեմ հայհոյել նրան իբրև իմ բաղդը յափշտակողի՞»...

— Ինչո՞ւ չէք շարժւում. զնանք, ծանօթացրէք ինձ ձեր փեսայի հետ, կրկնեցի ես սառն ու շինծու անտարբերութեամբ:

Նա հպատակւեց ինձ:

Մենք մօտեցանք փեսային:

Իսկոյն մեզ վրայ կենտրոնացան հիւրերի հետաքրքիր ու հարցական հայեացքները: Ոմանք երկիմաստ ժպտացին, ոմանք փսփսացին իրար ականջի, ոմանք ցինիկօրէն բլբլացին...

Ատելութեամբ ու զգլանքով լիբը ես խոյս տւի այդ հասարակութիւնից, բարձրացայ պատշգամբը ու առանձնացայ այն փոքրիկ սենեակում, ուր յանախ, ձմեռուայ երեկոներին, մենք այնքան մտերիմ ժամեր ենք անցկացրել, խօսել, կարդացել, ոգևորւել...

Գաւառական փոստը նոր էր եկել. ես սկսեցի թերթել ստացւած լրագրները՝ առանց, սակայն, կարդացածս հասկանալու:

Հսեցի, թէ ինչպէս դուրսը լռեց լարաւոր երաժշտութիւնը, և ասիական բռի փողահարները զլեցին իրենց ծայնառատ նւագր:

Հարեան սենեակներում ու նախասենեակում հնչեցին շտապ ոտածայներ, աղմուկը խտացաւ, մարդիկ իրար անցան:

— Դէ՛հ, շո՛ւտ արէք, հարսին պսակելու են տանում, ով եկեղեցի է գնալու, թող պատրաստւի. լսւում էին այս ու այն կողմից կարգադրող ծայներ:

«Պսակելու են տանում... թող, թող տանեն... ես հօ ոչինչ... ես նոյն իսկ լրագիր եմ կարդում, թէ ինչպէս Կողբ գիւղում գողերը ուղեցել են մի կով փախցնել և դարբասի մօտ... դարբասի մօտ... հա՛, փողահարներն երթի եղանակն արդէն դարբասի մօտ են փչում)»...

Լրագիրը ձեռքիցս սալթաքեց. սիրտս սկսեց արագ-արագ բարախել. գլուխս առայ ափերիս մէջ:

Յանկարծ լսում եմ կանացի թաւշեայ շրջազգեստի խրչխրչոց. բարձրացնում եմ գլուխս ու տեսնում նրան՝ ոտքից մինչև գլուխ սպիտակ հագնւած, պսակի ոսկեցող քօղը երեսին:

— Մնա՛ք բարե... Արան, մնաս բարե... շշնջաց նա կրցկտուր, — վաղը, վաղը մենք ճանապարհւում ենք: Գուցէ վերջին անգամն է... ների՛ր... Ես էլ շատերից մէկը... հայ կինը... չկարողացայ, ուրիշների կամքը կատարեցի... և ուզում էի ասել,

որ դու... որ ես քեզ յաւիտեան չպիտի մոռանամ... մնաս բարե... ների՛ր...

Ես վեր կացայ տեղիցս, լուելեայն ու կոպիտ երեսս շուռ տւի:

Զգացի, թէ ինչպէս նա որսաց իմ ձեռքն ու սեղմեց իր տաք շրթուներէն: Ես խլեցի ձեռքս ու մնացի նոյն դրութեան մէջ: Եւ երբ երեսս դարձրի՝ նա այլևս չկար:

Այն ժամանակ ձեռքս մօտեցրի իմ շրթուներին ու սկսեցի, խելազարի պէս, համբոյրներ դրոշմել այնտեղ, ուր նրա դառն ու աղի արցունքներն էին կաթել...

— Նորահարսն ու փեսան ապրած կենան, ուրա՛... որոտաց մէկը պատշգամբից:

— Ուրա՛... ա՛... արձագանք տւին հարիւրաւոր ծայներ ներքեւից:

Փողահարները նւագում էին, այս անգամ դարբասից դուրս, փողոցում, ճիշտ այն սենեակի տակը, ուր ես էի գտնւում:

Ես վազեցի, հանգցրի ճրագը ու կանգնելով պատուհանի առաջ, ճանապարհ դրի պսակելի զոյգին... Նա չիմացաւ, որ ես մութ սենեակից դիտում եմ նրան... Զոյզը անցաւ, ես ընկայ աթոռի վրայ: Դրսից հարսանիքաւորներին պլպլացող մոմերի աղօտ շողերը երերացին սենեակի մութ առաստաղին ու չքացան. հարսանիքը գնաց, անցաւ...

Եւ այս բոպէիս էլ, այս ուշ գիշերին, երբ փետրւարի ցուրտ քամին ոռնում է պատուհանիս ճեղքերի մէջ, չիշեցնում է ինձ փողահարների այն զիլ ու միալար նւագը, որ հետզհետէ հեռացաւ ու նւաղեց...

Շնորհակալութիւն քեզ, քամի՛, հազար շնորհակալութիւն, որ խզեցիր իմ յուշերի շարանը: Զէ՛ որ այսօր վերջին գիշերն է, և ես վաղը հանդիսին ճառ պիտի արտասանեմ:

Բայց, սպասի՛ր, նոր թուղթ հանեմ, մաքուր և անբիծ

կանց, մատիտս սրեմ. այ, այսպէս: Այժմ թող թղթի ճակատին
ճառիս վերնագիրը գրեմ.

Վարդանանց պատերազմը.

Ու տակը հաստ գիծ քաշեմ: Ահա՛, այսպէս: Այժմ մի
փոքրիկ կոնսպէկտ. մի թեթեւ ծրագիր: Բայց նախ և առաջ
կենտրոնացնեմ իմ մտքերը: Ի՞նչ խօսեմ առհասարակ, ինչպէ՞ս
տանեմ իմ ճառը... ինչպէ՞ս սկսեմ... Մի փոքրիկ համբերու-
թի՛ւն. սպասի՛ր... վաղը կամ, աւելի ճիշտն ասած, այսօր (չէ՞
որ կէս-գիշերից անց է), ժամը 12-ին, երբ կվերջանայ պատա-
րագը, խուռը բազմութիւնը կլցնի ուսումնարանի դահլիճը:
12-ից քսան ըոպէ անց (անպատճառ քսան ըոպէ անց) կբար-
ձրանայ վարագոյրը, և բեմի վրայ դասաւորւած երգեցիկ խում-
բը ճեղքելով՝ ամբիոն կելնեմ:

— Դպրոցի տեսուչը... Արամ Վհատեանը, կշշնջան դահ-
լիճում:

Եւ ես կսկսեմ ճառս:

Ես այս քաղաքում անյայտ մարդ չեմ: Արամ Վհատեանին
ամեն ոք գիտէ: Փոքրիկ կարծիքի չեմ և իմ հռետորական ծիր-
քի մասին:

Այո՛, ես գիտեմ լարել ունկնդիրների ուշադրութիւնը. ես
կարող եմ ազդել նրանց մտքի ու զգացմունքի վրայ: Այդ է
պատճառը, որ նրանք ամեն տարի Վարդանանց տօնին գալիս և
լցնում են դահլիճը:

Իսկ Վարդանանց պատերազմը ինձ համար եղել է այն
սքանչելի կանւան, որի վրայ ես հիւսել եմ իմ գաղափարները,
իմ տենչերը, իմ ձգտումները...

Վարդանանց պատերազմը... Դա եղել է ոգևորութեան
այն երանելի առւակը, որով ուռզել եմ իմ հոգեկան անդաս-
տանը, միւսնոյն է ինչ ցանքսով էլ ցանւած լինի:

Մերթ ազգային և կուլտուրական վերածնութիւն, մերթ Տանկահայաստանի ազատագրութիւն, մերթ սօցիալական կռիւ և ճնշւածների ու հալածւածների դատ...

Իսկ այս տարի՞:

Բայց, կաց, ես արդէն սկսել եմ ճառս... չրմ... ճնշւածների և հալածւածների դատ... սօցիալական կռիւ... Մի՞թէ այս խօսքերը երբ և իցէ արտասանել եմ... Ազատագրական շարժման այն լայնածաւալ փոթորիկը, որ... Չէ՛, ես չեմ կարող շարունակել: Այդ ամենը կեղծ է, շինծու և զզւելի. այո՛, զրզւելի:

Ես արդէն սկսում եմ կմկմալ:

Ախ, ինչո՞ւ ցամաքեց իմ ոգևորութեան աղբիւրը. ո՞ւր կորաւ իմ հաւատը: Կեանքիս կէսը կտայի...

Յանկարծ նկատում եմ (մի բան, որ ուրիշ տարիներ երբէ՛ք տեղի չի ունեցել), թէ ինչպէս երրորդ պատրաստականցի Տիգրանեանը զրչածայրով իր ընկերների կռներն է ծակծկում. իսկ Գէորգեանն անվերջ կերպով ծիծաղում է: Դաստիարակ Որոտեանը փոխանակ կարդապահութեան վրայ հսկելու կռացած անընդհատ փսփսում է օրիորդ Նազիկեանի ականջին... Ախ, ատելով ատում եմ այդ ծծկերներին, որոնք աշակերտական սեղանը դեռ չթողած ուսուցչական ամբիոնն են բարձրանում... Ի՞նչ ուսուցիչներ կարող են լինել դրանք, ասացէ՛ք խնդրեմ...

Վրդովւած, հայեացքս նրանցից դարձնում էի դէպի դահլիճը... Եւ ի՞նչ եմ տեսնում... Առաջին կարգում սրբազանը ննջում է, իսկ հոգաբարձուները ծոյլ յօրանջում են: Ինձ լսում են մի բանի ծանձրացած դէմքեր, թոյլ քմծիծաղները բերանների: Տէ՛ր Աստուած, ինչքան քիչ հասարակութիւն է հաւաքւել այս տարի... Ա, ես դիտեմ պատճառը: Նրանք զգացել են իմ մէջ կատարւած փոփոխում... Ո՛չ, դուք սխալւում էք,

Ես դեռ ճառել զիտեմ... Ես դեռ տեղի չե՛մ տւել... Դուք հաս-
կան՞ում էք...

Աչքս մի դէմքից միւսն եմ դարձնում և ես դահլիճի մէջ
սկսում եմ որոնել մէկին, որի ներկայութիւնը, թւում է, ինձ
նոր թափ, նոր եռանդ կտայ... Ահա՛, ահա նրա սովորական
տեղը. չորրորդ կարգի առաջին աթոռը... Դատարկ է... Նա
դահլիճումը չէ...

Մի անսպառ կարօտ, մի անտակ ամսոսանք պատում է
իմ սիրտը, և արտասուքի կաթիլները խեղդում են բուկս...

Ես այլևս անկարող եմ շարունակել:

Յանկարծ դահլիճում լսում են սուլոցներ...

Ուսուցիչներն ու աշակերտները խառնւում են միմեանց.
սրբազանը քնից արթնացած ոտքի է կանգնում, ոմանք աթոռ-
ների վրայ են բարձրանում:

Տիրում է աղմուկ, իրարանցում:

Ես ամօթահար իջնում եմ ամբիոնից:

Իմ ճառը կիսատ է մնում...

Մէկը դեռ շարունակում է անընդհատ սուլել...

Բայց դա կրկին քամին է, որ բաղխում է դրսից պատու-
հանիս փեղկերն ու վայում նրա ճեղքերի մէջ: Ուրեմն այս ամ-
ենը երևակայութիւն էր և ես զառանցում էի: Որքան ուրախ
եմ... Կնշանակի դեռ ևս մի ողջ գիշեր կայ առաջիս, և ես դեռ
հնարաւորութիւն ունիմ վաղւայ ճառիս համար նախապատ-
րաստւելու: Ես իսկոյն, իսկոյն, ես շատ շուտ կկազմեմ ծրագի-
րը... ան, եթէ կրկին այդ հարսանիքը չկաշկանդի իմ մտքերը:

Տարօրինակ է, եօթ ամիս է անցել այդ օրից, և ոչ մի
անգամ նա այսքան պարզ և այսքան կենդանի չի պատկերա-
ցել ուղեղիս մէջ՝ ինչպէս այսօր:

Կարծես երէկ էր:

Երանի թէ գնացած չլինէի: Եւ ես միշտ տատանւում էի՝

զնամ թէ չզնամ: Իսկ երբ մօտեցայ նրանց տանը, հրավառւած դարբասի մօտ ինձ ընդունեց նրա հայրը, մեր դպրոցի հոգաբարձուն: Մեր քաղաքում նա անւանի մարդ է: Նա ինձ ներս հրաւիրեց, սեղմեց իմ ձեռքն ու առաջնորդեց դէպի պարտէզը, ուր տեղի ունէր հարսանիքը: Ապա նա մի զննող հայեացք ձգեց վրաս ու մեղմ ժպտաց, ներողամիտ, բայց յաղթական ժպտով:

Ես հասկացայ այդ ժպտի իմաստը: Նա գիտէր ամեն ինչ և գոհ էր, որ ելքը յաջող էր...

Ես անցայ պարտէզ:

Անհամար գոյնզգոյն լապտերները, ինչպէս պսպղուն ժանեակներ, մի ծառից միւսն էին ձգւում: Նրանց դողդոջուն լոյսի վրայ կամար էր տւել կէս-գիշերւայ խաւարն, իր կապոյտ թւերի տակ ծածկելով բարձր ծառերի մեղմօրօր կատարները:

Հնչում էր լարաւոր երաժշտութիւնը:

Եւ մեղմախօս թառի թրթիռներն ու նրան ծայնակցող ջութակի վշտոտ հեծկլտանքները ծնւում էին այդ լուսեղէն կամարի տակ, ծուլւում ու դափի թոյլ հարւածների հետ դէպի վեր սլանում և մեռնում այնտեղ սաղարթների մթին ծալքերի մէջ:

Հանդիսաւոր ու հիասքանչ դէմքերից մի օղակ կազմած մի չքնաղ կին, թեթև ու ճկուն, սահում էր կանաչ խոտի վրայ և պարում հեշտանքով ու նազանքով լիքը «ուզունդարան»...

Հնչում է ծափը, թնդում են մարդկանց խինդ աղաղակները:

Ինձ թւում է, որ ես տեսնում եմ մի կախարդիչ հէքիաթ, որ ես լսել եմ մանկութիւնից, չգիտեմ որտեղ և ումնից:

Ինձ թւում է, որ ես տեսնում եմ մի ոսկեհիւս երազ, երբ ես դեռ փոքր էի ու քնում էի մօրս գրկին փարած:

Հէքիաթ էր, երազ էր այդ:

Ախ, հէքիաթ էր և իմ ողջ անցեալը, երազ է և իմ

կեանքը:

Անցաւ, գնաց ամեն ինչ...

— Իսկ դուք, յարգելի հանդիսականներ, սպասեցէ՛ք որ-
քան ուզում էք:

Ես ձեզ ասելու այլևս ոչի՛նչ չունիմ...

ԿԱՐԷՆ ՄԻՔԱՅԷԼԵԱՆ.

Հ Ա Տ Ի Ա Ծ

Յողնատանջ սրտով նատեցի մենակ
Աշխարհում, աղօտ
Անյայտ կողմերի մութ ճանապարհին,
Աւեր շէնքերի մոխիրների մօտ,
Աշնան օրերի գունատ մահացող
Ծաղիկների մէջ, ցուրտ հողի վրայ,
Ծանր երկնքի տաղտկօրէն լացող
Անծրեւների տակ.—

Մոռացայ բոլոր հոգսերն առօրեայ.
Ցանկութիւններըս ապարդիւն ու սին
Անմիտ և ունայն տենչերիս ուղին,
Սուտ վարդերն ու սուր փշերը նրա
Մերժեցի ընդմիշտ, մատնեցի մահին,
Անդարձ մոռացայ...
Եւ խաւարն անհուն, գիշերն անթափանց
Իր լայն թւերը փռեց իմ վրայ...

Լուսեղէն ու սուրբ սիրոյ երազը
Խաւարչտին կեանքում,
Եւ երջանկութեան ցնորքներըս հին,
Եւ տառապանքի գիշերներն անքուն
Իմ սրտին ընդմիշտ օտար թւացին,
Օտար թւացին...

Եւ չըկար ոչինչ, որ սիրտս դիւթէր.
 Ոչ սիրոյ կարօտ, ոչ բախտի ծարաւ,
 Ոչ հարստութեան ու մեծութեան բեռ,
 Ոչ ապարդիւն փառք և ոչ փայփայող
 Ու սրբազան ցաւ
 Զարչարանքի և ինքնազոհութեան:
 Եւ այնպէս անզոյն, անմիտ, ապարդիւն,
 Տաղտկալի և սին
 Թւաց ամեն ինչ աշխարհում անհուն...
 Եւ ամենքն ընդմիշտ օտար թւացին
 Եւ անդարձ հեռու...
 Քար էր իմ սրտում և ծանր, և ցուրտ
 Եւ աշխարհն էր քար՝ սառն ու անխորհուրդ...
 Երկինքն էր լալիս պաղ արցունքներով,
 Լալիս էի ես մերժւած ու խռով,
 Եւ ցուրտ աշխարհում
 Ինքս իմ սրտին հարսպատ չէի—
 Ու ծաղր էր թւում հեկեկանքս չոր...
 Ես լալիս էի,
 Բայց օտարի պէս էի ունկնդրում
 Ինքս իմ հողուն, ինքս իմ լացին...
 Ու մութ էր շուրջրս և խաւար անհուն
 Իմ խաբւած սրտում՝ մթնամած գիշեր
 Եւ պաղ, և ծանր, ծանր, որպէս քար
 Եւ տաղտկութեամբ լի և անվերջ երկար
 Անծիր ու անհուն—
 Եւ ոչ մի հեռւում լոյս չէի փնտրում...
 Եւ համր էր ընդմիշտ աշխարհն ինձ համար—
 Եւ օտար և մութ.
 Ես ընկած էի անզօր ու մոլար

Ու յաւէտ մենակ, և անդարձ մենակ
Անանուն, անյայտ անժանօթ հեռուն...
Ո՛վ ազատութիւն յաւիտենական,
Մահ, շշնջացին շուրթերըս տկար
Եւ այդ շշուկը դառը չըթւաց.
Գրկեցի հողը մի ցուրտ ցանկութեամբ,
Եւ նա իմ առաջ բացեց իր գիրկը
Անսուտ գգւանքով.
Եւ գերեզմանի խորշը ցրտաշունչ
Անուշ թւաց ինձ,
Որպէս մայրական գիրկը սրտամոք
Պայծառ օրերում,
Որպէս հեռաւոր երկրում մոռացած
Մայրական երգի սիրով օրօրւող
Թովիչ օրօրան...
Մահ, շշնջացի, և սիրտս նրան
Ընդունեց սիրով, որպէս զթառատ
Հեկեկանքը մօր նուրբ կարեկցութեան.
Եւ հեռացայ ես ու հեռացայ ես
Մի անյայտ կամքի զօրութեամբ անուշ
Հեռուն ու հեռուն,
Ողջը մոռացայ օտար աշխարհում,
Անդարձ աշխարհում...
Եւ խաւարն անհուն գգւանքով թեթեւ
Ծաւալեց շուրջըս և փուլեց վրաս.
Ու կեանքըս բոլոր մի երկարատեւ
Նինչ թւաց հոգուս, մի տխուր երազ,—
Մանկական մի երգ հեռու օրերում,
Նրբին մի համբոյր, որ չունի անուն,
Որ չունի անուն...

Ինձ ահեղ թւաց խնդութիւնս նոր,
 Կարծես մի վերին ու նուրբ հրաշքով
 Լուսացաւ իմ մէջ առաւօտն անհուն
 Եւ թեթեւ թւաց կեանքս երկրային,
 Որպէս առակը սարերից իջնող,
 Որպէս ամպերի շարքը ոսկեղէն
 Գարնան արևող երկնքում չւող...
 Ու թւաց յանկարծ, որ չրկան, չրկան
 Անցեալն, ապագան...
 Թւաց, որ մի սիրտ իմ վիշտն է գգւում
 Հանգիստ է ասում բոլոր յոյզերին.
 Բոլոր յոյսերին օրօր է ասում,
 Օրօր է ասում...
 Բաբախուն սիրտըս գրկել է ուզում
 Գգւել է ուզում
 Անսուտ խնդութեան ոսկէ երազում...
 Թւաց, որ մէկը իմ ցաւն է երզում,
 Իմ լացն է լսում,
 Իմ լռութիւնն է գգւում իր գրկում.—
 Եւ իր մեծ հոգում,
 Իր անհուն հոգում՝
 Իմ սրտից խորն է թախիժս գգում...
 Ճիչ հանեցի ես սիրով խնդագին,
 Աղաղակեցի օրհներգու ձայնով,
 Սիրտըս նետեցի քարին ու ջրին,
 Խառնեցի հոգիս աստղերի երգին,
 Պարզեցի կեանքս՝ պարզ ու խնդագին՝
 Յաւիտենութեան, յաւիտենութեան...

ՎԱՀԱՆ ՏԵՐԵԱՆ.

„ՈՍԿԷ ՀԷՔԻԱԹ“ ԳՐՔԻՑ

I.

Արժաթաշող առուն առւին
Զայն է տալիս ու երգում.
Չի տրտնջում լալկան ուռին,
Ուռին առւի եզերքում...

Շուրջրդ ահա գիշեր ու երգ՝
Հանգիստ, հէքիաթ ու երազ.
Կոյս ամպերը ճերմակ ու մերկ,
Աստղերն անուշ—հեղ ու նա՛ղ...

Սիրտ իմ յողնած, մեղմ օրհներգեր՝
Հնազանդ ու ցնորուն՝
Երկինք ու ծով, ամպ ու երկիր,
Այս մարդերն ու այս առուն...

Եղիր դու էլ պայծառ ու հեղ,
Հէքիաթ եղիր ու երազ.
Ծաղկանց ու կոյս ամպերի պէս
Աստղերի պէս հեղանազ...

Արժաթաշող առուն առին
Ձայն է տալիս ու երգում.
Չի տրտնջում լալկան ուռին,
Ուռին առի եղերքում...

II.

Դու խօսում ես, բայց կարծես,
Դու չես՝ գիշերն է երգում.—
Այնպես նուրբ ես, այնպես հեզ,
Այնպես մեղմ ես ինձ գրկում.—

Լուսեղէն է խօսքերիդ
Իմաստը պարզ ու խորունկ.
Որպես մեղմ ու անառիթ
Գարնան, գարնան մտորմունք:

Եւ անդորր է ծայրը քո
Հաշտ է թախծոտ իր շեշտով
Որպես անուշ երեկոյ
Լիքը սիրով ու վշտով:

Դու չես, դու չես, հեռաւոր
Վարդենիներն են շրշում,
Ծովն է երգում լայն ու խոր
Յաւերժական մշուշում:

Իմաստուն է և արդար
Օրերի երգն անընդհատ,
Դառը տանջանք ու դադար,
Եւ վիշտ, և սէր, և հէքիաթ...

Գիշեր... լուսնեանկ... լուռթիւն...
Անուշ թախծի լուսէ երգ...
Փուխիւր, փուխիւր իմ հողում
Խաղաղութիւն անեզերք...

ՎԱՀԱՆ ՏԵՐԵԱՆ.

ԱՌԱՋԻՆ ՎԻՇՏ

Փոքրիկ Սուրէնը վաղ առաւօտեանից մեծ բան ու գործի էր:

Նրա համար զնել էին նոր մահճակալ:

Եւ նա, որ մինչև այժմ քնում էր հայրիկի և մայրիկի ննջարանում, այսուհետ պիտի քնէր տատիկի սենեակում, տատիկի հետ:

Հէնց որ նոր մահճակալը սարքեցին՝ Սուրէնը սկսեց իր գաղթը: Ինչէր ասես՝ նա չհանեց իր հին մահճակալի տակից: Կոտրած սալակը, անդսպան շոգեկառքը, անպոչ ծին, այն արկղը որ ծիու համար ախոռի տեղ է ծառայում, հոյն ու պտուտակը և այլն, և այլն: Այդ ամենը նա, մէկ-մէկ, տեղափոխեց իր նոր օթեանն ու սարքեց նոր մահճակալի տակ: Այնուհետև տարաւ հայրիկի նւիրած թուրն ու հրացանն ու կախեց ուղիղ գլխավերևը, որ, եթէ բան է, գիշերը գողերը մտնելու լինեն մահճակալի տակից ծին գողանալու՝ իսկոյն վերցնի, խփի նրանց և սպանի:

Սուրէնը անչափ գոհ էր իր նոր սեփականութիւնից:

Նախ, որ նոր մահճակալն առանց ցանկապատի էր և իր քէֆն ուղած ժամանակ կարող էր ելնել ու իջնել, ինչպէս իրենից մեծերը. երկրորդ, որ ամենագլխաւորն էր, նա, տատիկի ենեակում, քնելիս, կարող էր իր ծոցը զնել փոքրիկ, չալիկ

Փիսօյին: Տատիկը պառաւ է՝ չի նկատի, տատիկը բարի է ու
ներողամիտ՝ նա մայրիկի պէս չի վերցնի ու կատուին պատըշ-
գամբից ցած չի ծգի:

Եւ այսօր, էգուց, միւս էգուց, յետոյ էլի միւս էգուց և
ուրիշ շատ էգուցներ Սուրէնը պիտի քնէր տատիկի հետ միա-
սին, միւսնոյն ննջարանում, նոր մահճակալի վրայ:

Այդ օրը Սուրէնն անհամբեր մթնելուն էր սպասում:
Նրան շատ էր հետաքրքրում, թէ նոր մահճակալի վրայ ինչ-
պէս պիտի պառկի, շորերը ուր պիտի դնի և ինչպէս պիտի քնի:

Վերջապէս հասաւ երեկոյեան ժամը ու թր: Մայրիկը նրան
կերակրեց ու ձեռքից բռնելով առաջնորդեց դէպի նոր օթեա-
նը: Շորերը հանելով նա նրան պառկեցրեց անկողնում, երեսիցը
համբուրեց և բարի գիշեր մաղթելով հեռացաւ:

Սակայն մի փոքր անց կրկին ներս մտաւ, տնտղեց սեն-
եակն ու սպառնալով Սուրէնին ասաց.

— Տէ՛ս, Սուրիկ, եթէ կատուին դրել ես անկողինդ՝ էլ
ես քո մայրը չեմ, և հայրիկին էլ կասեմ, որ դու շատ և շատ
վատ տղայ ես:

Բայց Սուրէնն այդ օրն ամենից քիչ կատուի մասին էր մտա-
ծում: Աւելի շուտ հետաքրքրել էր նրան ու զրգուել նրա երե-
ակայութիւնը նոր շրջապատը:

Նա փոքրիկ, սևահեր գլուխը սպիտակ բարձի վրայ մերթ-
աջ, մերթ ծախ դարձնելով, աչքերը պլզած, դիտում էր սեն-
եակի բոլոր իրերը և այն մեծ ու փոքր սոււերները, որոնց,
սեղանի վրայ դրած փոքրիկ ճրագը, ծգում էր ամեն մի առար-
կայի կողքին: Եւ լուռ իրերի ու մութ սոււերների մէջ մենակ
մնացած Սուրէնին թւում էր, թէ այս գիշեր իր աչքերին
քուն չէր գալու:

Մի ժամ անց, զգոյշ ու մեղմ, բացւեց դուռը, և տնքա-
լով ու ճռռալով ներս մտաւ պառաւ տատը:

Սուրէնը խորամանկութեամբ փակեց աչքերը:

Տատիկն ոտների ծայրով, համրաքայլ, մօտեցաւ նրան, իր ցուրտ և բարակ շրթունքները հպեց նրա այտերին ու հեռացաւ դէպ իր մահճակալը:

Սուրէնը վերմակը գլուխը քաշեց և տակից մի անցք բանալով հետաքրքիր ու կայտառ աչքերը տատիկին յառեց:

Այդ տեղից նա պարզ տեսնում էր, թէ ինչպէս տատիկը մէջքը նրան դարձրած պատրաստում էր հանւելու: Ահա նա ուղում է շրջագոգեստի չափրաստները բաց անել, սակայն նրա դողդողուն և կնճռոտ մատները միանգամայն այլ տեղ են որոնում նրանց, ու երկար ժամանակ չափրաստները չեն բացւում:

Սուրէնը յիշեց մայրիկի դիւրաշարժութիւնն ու մտքումը հեզնեց պառաւ, անշնորհք տատին:

Վերջապէս նրան յաջողւեց շորերը յետ կոճկել ու կամացկամաց հանւել: Եւ ամեն մի շարժում անելիս նա, անվերջ կերպով, տնքում ու ճռռում էր:

Երբ նա իր շապիկն էր փոխում, Սուրէնի աչքովն ընկաւ նրա զոյգ թառամած ու գորշ ստինքները, որոնք կախւած էին նրա չոր կրծքից, ինչպէս երկու, դատարկ տոպրակներ: Տարօրինակ և տգեղ թւացին Սուրէնին տատիկի ստինքները...

— Եթէ թուճիկը, — մտածեց Սուրէնը, — որ այժմ օրօրոցումն է, ծծելու լինի տատիկի ծիծը, կաթ կգանջ թէ ոչ:

— Չէ՛, չի գայ, պատասխանեց ինքն իրեն Սուրէնը. կաթ չի գայ, որովհետեւ թուճիկը տատիկի երեխան չէ: Այո՛, հայրիկն ասում է, որ նա էլ թուճիկի պէս տատիկի կաթն է ծծել: Իսկ եթէ հայրիկը հիմա ծծի տատիկի ծիծը...

Մի բոպէ Սուրէնը պատկերացրեց հայրիկին, այն մեծ, միրուքաւոր հայրիկին, թուճիկի պէս օրօրոցում կապկպած, թուճիկի պէս լալկան՝ տատիկի կաթը ծծելիս: Այդ մտապատկերը

նրան շատ զւարճալի թւաց, և նա բարձր-բարձր ծիծաղեց վերմակի տակ:

Բայց իսկոյն ուշքը վրան հաւաքեց ու, բերանը բռնած, լռեց, որ տատիկը նրան չլսի:

Տատիկը նրան լսել չէր կարող, որովհետև ամբողջովին թաղւել էր վերմակի տակ: Նա ողջ մարմնով դողդողում էր, անընդհատ տեղը յարմարեցնում և աւելի ու աւելի կծկւում հաստ ծածկոցի տակ:

Սենեակը ցուրտ էր:

— Այո, մրսում է, մտքումը վեռեց Սուրէնը. մայրիկն էլ է չաճախ մրսում: Բայց հէնց որ մայրիկը մրսում է, հայրիկը նրան տաքացնում է: Իսկ տատիկը: Ինչո՞ւ հայրիկը մի-մի անգամ էլ տատիկի մօտ չի դալիս տաքացնելու:

Մի փոքր անց տատիկը գլուխը հանեց վերմակի տակից ու հանգցրեց ճրագը: Մի ականթարթում բոլոր սոււերները դուրս ցատկեցին իրենց դարաններից ու կլանեցին սենեակը: Մութ խաւարի մէջ Սուրէնը ահ դգաց, փակեց աչքերն ու, մի քանի րոպէ անց, անուշ քնեց...

Անցաւ մի ամիս, և Սուրէնը միանգամայն ընտելացաւ իր նոր օթեանին:

Մի գիշեր նա վատ երազներ տեսաւ: Նրա ականջին դիպան ինչ որ հնչիւններ, շշուկներ: Նա վախեցած աչքերը բաց արեց և, որպէս շարունակութիւն իր երազի, տեսաւ հայրիկին և մայրիկին, շրջապատած տատիկին:

— Ի՞նչ է պատահել, մայրի՛կ, հարցրեց տազնապով Սուրէնը:

— Ոչի՛նչ, բալի՛կս, ոչի՛նչ. դու քնի՛ր, աշխատեց նրան հանգստացնել մայրը:

Բայց Սուրէնի քունն այլևս չտարաւ, և մայրը նրան տեղափոխեց իր սենեակը: Հետեւեալ օրը տեղափոխեց և նրա մահ-

ճակար: Այնուհետև Սուրէնը քնեց կրկին հայրիկի և մայրիկի ննջարանում:

Առաւօտը տատիկը սենեակից դուրս չեկաւ. իսկ Սուրէնին արգելեցին այլևս նրա մօտ մտնել:

Այդ օրը մի անժանօթ քեռի, որի ըթին ակնոց կար և ձեռափայտի վրայ ոսկրից շինած նապաստակի գլուխ, եկաւ տատիկի մօտ, փակեց նրա սենեակում ու նորից գնաց:

Այնուհետև ամեն օր այդ քեռին գալիս էր տատիկի մօտ: Հայրիկն ու մայրիկը մտադրադ, բայց սիրալիր, ընդունում էին նրան: Ամեն անգամ մայրիկը նրան հրաւիրում էր սուրճ խմելու, և նա միշտ հրաժարւում էր. իսկ հայրիկը փորձում էր պահել նրա վերարկուն, ու նա չէր համաձայնում: Մի օր էլ հայրիկն ու մայրիկը երկար փակեցին տատիկի սենեակում ու յետոյ դուրս եկան արտասուքներն աչքերին:

Նրանք լաց էին լինում:

Հայրիկն էլ էր լաց լինում:

Սուրէնը ինչ որ վատ բան նախազգալով թագնւել էր մայրիկի պահարանի յետև ու լռել:

Այդ օրն ակնոցաւոր քեռին չեկաւ: Նրա տեղ եկան ուրիշ քեռիներ ու պապիներ: Յետոյ եկան հօրաքոյրը և ուրիշ շատ հօրաքոյրեր ու մօրաքոյրեր:

Բոլորն էլ մտնում էին տատիկի սենեակը, մի առ ժամանակ մնում այնտեղ ու նորից դուրս գալիս խոնաւ աչքերով:

Նրանք քայլում էին համր ու հանդարտ ու խօսում հազիւ լսելի, ցածր ձայնով: Ողջ տունը կարծես հառաչում ու փսփսում էր:

Համարեա ամբողջ օրը Սուրէնը մնաց մայրիկի պահարանի յետևին, և ոչ ոք նրանով չհետաքրքրւեց:

Հետևեալ առաւօտ Սուրէնին մաքուր հագցրին ու տարան տատիկի սենեակը, որ ձեռքը համբուրի:

Տատիկին նոր շորեր հագցրած պառկեցրել էին սեղանի վրայ, մի երկայն ու նեղ սնդուկի մէջ:

Երբ Սուրէնը նրա ձեռքը համբուրեց, նա չիմացաւ: Նրա աչքերը փակ էին:

Սուրէնն այժմ միայն հասկացաւ, թէ ինչու բոլորն էլ հանդարտ էին քայլում ու շշուկով խօսում:

Որովհետեւ տատիկը քնած էր:

Բայց նա սաստիկ ուզեց մի կերպ իմաց տալ տատիկին իր ներկայութիւնը: Դրա համար նա բռնեց տատիկի ձեռքը, որ թափահարի, բայց նրան արգելեցին և անմիջապէս սենեակից հեռացրին:

Ինչո՞ւ տատիկի ձեռքն այնքան ցուրտ էր...

Շուտով կրկին հաւաքւեցին երէկւայ պապիներն ու քեռիները, տատիներն ու հօրաքոյրերը:

Եկաւ և ժամի պապին, որ երկար միրուք ունէր և միրուքիցն էլ երկար մի («տէր-ողորմեա»), եկաւ և ժամի քեռին, քթախոտի տուփը մի ձեռին:

Նրանք ժամի շորեր հագան ու սկսեցին ժամ անել, ինչպէս եկեղեցում, խնկի կապոյտ ծուխով լցրին ու մթնացրին փոքրիկ սենեակը:

Բոլորը տխուր և լուրջ դէմքերով, գլխակոր շրջապատել էին այն սեղանը, որի վրայ տատիկն էր պառկած. իսկ սեղանի երկու ծայրերին, տատիկի գլխավերևն ու ոտի տակը, բարձր մոմկալների մէջ դէպի վեր էին լողում երկու հաստլիկ կերոնների սուր լեզւակները:

Մի փոքր լետոյ տատիկին վերցրին, դրին ուսերի վրայ ու տարան:

Տատիկը իմացաւ, թէ ինչպէս իրեն բարձրացրին ու տարան:

Նրա աչքերը էլի փակ էին...

Մի քանի ժամից յետոյ նրանք վերադարձան տուն հաց
ուտելու, բայց այս անգամ առանց տատիկի:

Նրան չէին բերել...

Դուրսը ցուրտ էր և սաստիկ ծիւն էր գալիս:

Երեկոյեան, երբ բոլորը ցրւեցին, տունը խաղաղւեց:

Սուրէնին, իր նոր մահճակալի հետ, տեղափոխեցին կրկին
տատիկի սենեակը: Միայն այս անգամ տատիկի փոխարէն նրա
հետ գիշերեց մեծ մօրաքոյրը:

Սուրէնը մտաբերեց իր առաջին տեղափոխութիւնը և չի-
շեց տատիկին: Յիշեց տատիկին, երբ վերմակի տակ կուչ եկած
մըսում ու դողդողում էր:

— Մարիամն ասաց, որ տատիկին տարան և դրին հողի
տակ, մտածեց Սուրիկը. — իսկ այս բուք-բորանին տատիկը այն-
տեղ արդեօք չի՞ մըսում... Խեղճ տատիկ, մըսում ես, հա՛, դու
դողդողում ես, հա՛...

Սուրէնը խղճահարւեց ու մղկտալով հեկեկաց...

ԿԱՐԷՆ ՄԻՔԱՅԷԼԵԱՆ.

Յ Ա Յ Տ Ա Ր Ա Ր Ո Ւ Թ Ի Ի Ն Ն Ե Ր .

Գ Ա Ր Ո Ւ Ն

Գ Ր Ա Վ Ա Ն - Գ Ե Ղ Ա Ր Ի Ե Ս Տ Ա Վ Ա Ն Ա Լ Մ Ա Ն Ա Խ

Գ Ի Ր Ք Ա .

ԲՈՎԱՆԴԱԿՈՒԹԻՒՆ.— Ա. Ահարոնեան—Հայրը, Սիրունի—Որդին, Յ. Քիֆեձեան—Աղւրճակ քարը, Ա. Իսահակեան—Երազիս տեսայ, Ա. Իսահակեան—Օմար Խայամի վէժը Աստծոյ հետ, Ս. Բազէն—Արևելքի մրմունջներ, Սուրէն—Արիւնոտ հովիտը, Յ. Յակոբեան—Ես այն եմ սիրում, Մ. Պետրոսեան—Կամուրջ, Շ. Կուրդինեան—Բանւորուհին, Ա. Տիգրանեան—Յիշողութիւն, Լ. Շանթ—Ճամբուն վրայ, Մ. Պարսամեան—Մարդկային, Հ. Նազարեան—Սև երգեր, Դ. Դեմիրձեան—Զուժակ և սրինգ, Վ. Փափազեան—Ծովափին, Ալ. Ծատուրեան—Ալիք, Ալ. Ծատուրեան—Երազներ էին, Ալ. Ծատուրեան—Քրքիջ, Ալ. Ծատուրեան—«Կարմիր օրեր»-ից—Բանւորուհու ճր-ճրը, Կ. Միքայէլեան—«Էրֆուրտի ծրագիրը», Վահան Տէրեան—«Ոսկէ հէքիաթ» գրքից, Վահան Տէրեան—Մոռացւած ուղի, Վահան Տէրեան—Վերադարձ, Կ. Միքայէլեան—Նահանջ, Յայտարարութիւններ:

Գինն է 1 Ր., ՎԵՐԱԴԻՐ ՎՃԱՐՈՎ 1 Ր. 25 Կ., ԻՍԿ Ա. ԵՒ Բ. ԳՐՔԵՐԸ ՄԻԱՍԻՆ 2 ՐՈՒԲԼԻ 25 ԿՈՊ.

Հասցէ՝ նիւթերի, նամակագրութեան ու պատւէրների համար.—

МОСКВА, Большая Дмитровка, д. № 9, кв. 50.
Г. Микаэлян.

ԱԶԱՏԱՄԱՐՏ Օրաթերթ՝ քաղաքական, զրական
և հասարակական բաժիններով:

Բաժնեգին տարեկան. — Կ. Պոլիս՝ 75 դրշ.: Գաւառները՝
100 դրշ.: Արտասահման 25 Ֆ.:

Հասցէ՝ Rédaction „Azatamart“, Péra, Ieni Tchiarchi N. 32. Con-
stantinople.

ԲԻԻԶԱՆԴԻՈՆ Ազատ հայաթերթ ամենօրեայ
(Խմբ. Բ. Քէչեան)

Տարեկան՝ Տաճկաստան 120 դրշ. — Արտասահման 40 Ֆր.

Հասցէ՝ Rédaction du journal „Puzantion“. Constantinople.

ՄՇԱԿ Քաղաքական և զրական լրագիր: ԲԱԺԱՆՈՐ-
ԴԱԳԻՆԸ. — տարեկան 10 ռուբ. է, տասն և
մէկ ամսւանը նոյնպէս 10 ռուբ., տասն ամսւանը 9 ռուբ., ինն
ամսւանը 8 ռուբ., 8 ամսւանը 7 ռ., 7 և 6 ամսւանը 6 ռ.,
հինգ ամսւանը 5 ռ., չորս ամսւանը 4 ռ., երեք ամսւանը
3 ռ., մէկ ամսւանը 1 ռուբլի:

Ամերիկայի բաժանորդները պէտք է վճարեն տարեկան
6 դոլլար, Եւրոպայի բաժանորդները՝ 30 Ֆր., Պարսկաստանի
բաժանորդները՝ 10 ռուբլի:

Հասցէն՝ Тифлисъ, Редакція „МШАКЪ“. Արտասահմանից Tiflis,
Rédaction „Mschak“.

Ժ Ա Յ Ռ Գրական, հասարակական և քաղաքական թերթի
բաժանորդագիր—

Ռուսաստանում՝ տարեկան 3 ռ., կէս տարւան 2 ռ.

Արտասահմանում՝ „ 5 ռ., „ „ 2 ռ. 50 կ.

Հասցէն՝ Александрополь, Редакція „Жайръ“.

ՀՈՐԻԶՈՆ

Գրական, քաղաքական և հասարակական լրագիր:

Տարեկան Ռուսաստանի համար 8 ռ., Պարսկաստանի՝ 9 ռ., Թիւրքիայի՝ 20 ղրշ., Ամերիկայի՝ 6 դոլլար., Եւրոպայի՝ 30 ֆր.:

6 ամսւանը՝ Ռուսաստանի համար 4 ռ. 50 կ., Պարսկաստանի՝ 5 ռուբլի, Թիւրքիայի՝ 70 ղրշ., Ամերիկայի՝ 3¹/₂ դոլլար, Եւրոպայի՝ 18 ֆրանկ:

3 ամսւանը՝ Ռուսաստանի համար 2 ռ. 30 կ., Պարսկաստանի՝ 2 ռ. 70 կոպ., Թիւրքիայի՝ 35 ղրշ.:

1 ամսւանը Ռուսաստանի համար 80 կ., Պարսկաստանի՝ 1 ռուբլի, Թիւրքիայի՝ 14 ղրշ.:

Բաժանորդագրութիւնը ընդունուած է միայն իւրաքանչիւր ամսի 1-ից: Ապագուիկ ոչ ոքի թերթ չի ուղարկուած:

Հասցէն՝ Тифлисъ, редакция „ОРИЗОНЪ“, Вельяминовская, №16. արտասահմանից՝ Rédaction „HORISON“, Tiflis (Russie-Caucase).

ԼՈՅՍ

Գրական-հասարակական շաբաթաթերթ.

«ԼՈՅՍ»-ի նպատակն է կապ հաստատել Ղրիմի, Հիւսիսային Կովկասի, Նոր-Նախիջևանի և Ռուսաստանի ցրւած հայ գաղութների միջև և մասնակից անել նրանց ընդհանուր հայկական կեանքին:

ԲԱԺԱՆՈՐԴ. — Ն. — Նախիջ., Ռոստովի ու շրջակայ հայ գիւղերի համար տ. 3 ռ., կէս տ. 3 ռ., 3 ամիսը 1 ռ.: Ռուսաստանի այլ տեղերի համար տ. 4 ռ., կէս տ. 1 ռ. 50 կոպ. և 3 ամիսը 1 ռ. 50 կ., հատուկ ամեն տեղ արժէ 10 կոպ.:

Դիմել՝ Нахичевань-на Дону, въ редакцію армянскаго еженедѣльнаго журнала „ЛУЙСЪ“.

ՀԱՍԿԵՐ ՄԱՆԿԱԿԱՆ ՊԱՏԿԵՐԱԶԱՐԴ ԱՄՍԱԳԻՐ.
Ամսագիրը լոյս է տեսնում Թիֆլիսում 32—
48 երեսանոց մեծագիր գրքոյկներով, նախկին ընդարձակ ծրագրով:

Խմբագրութեան հասցէն — Թիֆլիս, Բէհրուժեան փողոց. (Тифлисъ, Редакция журнала „Аскеръ“. Tiflis (Caucase), Rédaction „Hasker“).

ԽԱԹԱԲԱԼԱ Երգիծաբանական-սատիրական պատկ. շաբաթաթերթ:

ՄԵՐ ՄՇՏԱԿԱՆ ԱՇԽԱՏԱԿԻՑՆԵՐՆ ԵՆ

Գրիչն ու Թանաքը, Ներկն ու Հանաքը.

«ԽԱԹԱԲԱԼԱՅԻ» ԲԱԺԱՆՈՐԴՆԵՐԸ ԿԱՐՈՂ ԵՆ ՍՏԱՆԱԼ

ՍՈՒՐՀԱՆԴԱԿ ՊԱԿԱՍ ՎՃԱՐՈՎ
Գրական, քաղաքական, հասարակական և առևտրա-արդիւնաբերական լրագիրը:

«ԽԱԹԱԲԱԼԱՅԻ» ԲԱԺՆԵԳԻՆՆ Է ԱՌԱՆՁԻՆ

Տարեկան 5 ռուբլի, կէս տարին 3 ռ., երեք ամիսը 1 ռ. 50 կ.
Թիֆլիսում տարեկան 4 ռուբլի:

«ՍՈՒՐՀԱՆԴԱԿԻ» ԲԱԺՆԵԳԻՆՆ Է ԱՌԱՆՁԻՆ

Տարեկան 7 ռուբլի, կէս տարին 4 ռ., երեք ամիսը 2 ռ. 25 կ.,
ամիսը 75 կ.

ԵՐԿՈՒՍԸ ՄԻԱՍԻՆ ԱՐԺԵՆ

Տարեկան 10 ռուբլի, կէս տարին 6 ռ., երեք ամիսը 3 ռ. 50 կ.,
մէկ ամիսը 1 ռ. 20 կ.:

Դիմել — Тифлисъ, редакция „Хатабала“. Հեռագրով — Тифлисъ, „Хатабала“. Արտասահմանից — Tiflis (Caucase), Rédaction „Khatabala“.







